

МЕНГЗИЁ САФАРОВ

А Й Р И Ш О Х

(Киссалар, ҳикоялар, эссе)

„О'QITUVCHI“ НАШРИЁТ-МАТБАА ИЖОДИЙ УЙИ
ТОШКЕНТ — 2008

Ўзбек прозасини ўзига хос янги оханглар билан бойитиб, адабиётимизда ёрқин из қолдирган сурхондарёлик истеъододли ёзувчи Менгзиё Сафаровнинг бу китобидаги асарлар орқали сиз кўхна ва навқирон воҳанинг гўзал табиати, соддадил ва олижаноб одамлари, уларнинг қувонч ва ташвишлари билан ошно бўласиз. Китобдаги асарларнинг бирортаси ҳам сизни бефарқ қолдирмайди.

*Масъул муҳаррир: **Х. МАҚСАДҚУЛОВ***

С 4702620100 — 125 Қатъий буюртма — 2008
353(04) — 2008

ISBN 978-9943-02-214-0

© „O'qituvchi“ НМИУ, 2008

Тоғдек баланд, чўлдай кенг

Ўтган асрнинг етмишинчи йиллари ўрталарида адабиёти-мизга ўз услуби, фақат ўзигагина хос овози билан шундай бир ижодкор кириб келдики, у дастлабки асарлариданоқ ўқувчилар қалбидан жой ола бошлади. „Шарқ юлдузи“ журналининг 1965 йил май сонида босилган „Турналар учади“ киссаси ўзбек адабиётига ҳассос бир ижодкор кириб келганлигини намойиш қилди.

Бу ижодкор Менгзиё Сафаров эди. Журналнинг ўша кисса босилган сони бирданига қўлма-қўл бўлиб кетди. У адабиёт-шунослар, адабиёт ихлосмандлари сұхбатларининг бош мавзуга айланди. Ўқувчилар унинг бошқа асарларини ҳам интизор бўлиб кута бошлашди. „Олис қирлар ортида“, „Пайғамбар ороли“, „Айришоҳ“ қиссалари, „Она тупроқ қўшиғи“, „Боботоғ“ эсселари, „Кийикларнинг қайтиши“, „Долғали дарё“, „Кум қўргонлар“, „Ота ҳузурида“ каби бир қанча ҳикоялари унинг муҳлислари томонидан ҳамон севиб ўқилиб келинмоқда.

Агар адаб ҳаёт бўлганида бу йил ропа-роса 70 ёшга тўлган бўларди. Қўлингизда турган китобга унинг ўзи тартиб бериб, ҳатто мундарижасини ҳам тузиб чиқсан экан. Китобдаги „Олис қирлар ортида“ киссасидан ташқари барча асарлар ҳали ўқувчиларга таниш бўлмаган янги асарлардир.

Менгзиё Сафаров ўз умрининг саккиз йилини Амударёдаги „Пайғамбар ороли“ кўриҳонасида директор ўринbosари вазифасида ишлаб ўtkazdi. Шу даврлар мобайнида у қадим Жайхунни обдон ўрганди, у ҳақда бой материал тўплади. Кунлардан бир куни у „Катта дарёдаги кичик ороллар“ туркумida бешта кисса ёзмоқчиман, деганини эслайман. 1989 йилнинг кузида у „Айришоҳ“ қиссаси қўлёзмасини қўлимга тутқаза туриб, „Хуррам, шу нарсани бир ўқиб чиқсангиз“ деди. Мен ўшанда ичимда „камтарлик ҳам эви билан-да“ деб қўйганимни ҳамон эслаб юраман. Энди ўйлаб қарасам, ўша „нарса“ Менгзиё Сафаровнинг шоҳ асари бўлиб, „Катта дарёдаги кичик ороллар“ туркумининг биринчи қиссаси экан.

Бундан бор-йўғи эллик, юз йил бурун Марказий Осиё тимсоли, фахри, мўъжизаси бўлмиш улуғ дарёлар — Аму ва Сир бўйлари юриб бўлмас тўқайзор, ўрмонзорлар улкан нахрлар

соҳилларига хос табиат маскани эди. Улар қучоғи Турон йўлбарси, Бухоро буғуси — хонгуллар сингари ноёб хайвонларга бошпана, мингларча тур қушларга қўналға эди. Ватан деган муқаддас туйғуга событилик, қанот ва парвоз ато этиб турарди.

Яқин ўтмиш авлодларининг баднафслиги, калтабинлиги туфайли нодир табиат горат бўлди. Дарёларнинг белоён сарҳадларидағи тўқай ва ўрмонзорлар ёндирилди, шафқатсизларча ўзлаштирилди. Одамлар хуркиш билмас ёввойи ҳайвонлар, қушларга қирон келтиришди. Насиба ва макондан жудо бўлган жониворлар эса азалий юртларини янгидан бунёд этилган пахтакор ва шоликор хўжаликлари измига колдиришиб, бу ерларни тарқ этишди.

Бироқ жамиятда шундай тоифа одамлар — маслак сохиблари ҳам борки, улар умрларини табиат муҳофазасидек олижаноб ишга бағишлишган. Кўрикхонларда жон сақлаётган ҳайвон, қушлар, гўзал ўсимликлар оламига улар жонкуяр, посбон.

Асар қаҳрамони — „Айришоҳ“ ана шундай бокий кадриятларга умр баҳшида этган меҳри дарё одамлар тарбиясида ўсади, вояга етди. Шоҳдор буғу камолга етгач, одамлар уни ўз тўдасига қайтаришди. Айришоҳ табиатнинг буюк қонунлари меваларидан баҳраманд бўлади: эрк, мағрурлик, олижаноблик саодатини ҳис этади. Инсон қавмига хос буюк меҳр ва разил макни кўради.

Инсон ва хонгул. Инсон ва табиат. Тақдирлар чатишган. Кисматлар бир олам мавҳумот. Адидни ташвиш ва саросимага солган ечимсиз муаммо — инсоннинг табиатга муносабати, маънавий қадриятларга оташин куюнчаклик. Зотан, инсон табиат маҳсули, фарзанди, ҳаёт унинг измида. Табиатга дардкашлик, иноят чинакам фарзандларга хос олий хислат.

Хуллас, „Айришоҳ“ киссасининг асосий foяси мана шулардир. Асар ҳакида кўп гапириш мумкин. У ўз таҳлилчиларини кутиб ётибди. Вакти келиб, адабиётшуносларимиз унга ўз баҳоларини беришларига ишончимиз комил.

Китобдаги юки оғир асарлардан яна бири — бу „Сарбаста Сурхон“ эссесидир. Дарвое, уни эссе деб бўлармикан? Гап шу ҳақда. 1991 йилнинг илк баҳор кунлари эди. Адид асар кўлёзмасини ўқиб чиққани берди.

Кўлёзмани олиб салмоқлаб кўрар эканман, кўнгилга кўлдан бери тугиб юрган бир саволни бердим:

— Менгзиё, нега ҳамиша янги асарингизни ўқигани биринчи бўлиб менга берасиз?

— Чунки сиз ҳамиша жон жойимдан ушлайсиз. Момолар чанчувли жойни осонгина топганларидек, сиз ҳам асарнинг

оғриқ жойларини аниқ айтиб берасиз. Тан олмасдан бошқа иложим қолмайди. Бошқаларга ҳам ўқиб чиққани берган пайтларим бўлган. Ким билади, бир гап айтишдан истиҳола қиласдиларми ё бўлмаса аядиларми, хуллас, тайинли бир фикр ололмайман, — деди.

Адиб ўзи туғилиб ўсган Сурхон воҳасини бутун вужуди билан севар эди. Нафакат Сурхондарёни, гўзл ва серкүёш Ўзбекистонини ҳам, борингки, бутун еру заминни севар эди. У ҳаётни, яшашни, тирикликни севар эди. Ана шу севги туфайли у юртнинг равнақи билан ҳам, унинг қувончи-ю дарду хасратлари билан ҳам ҳамиша чамбарчас боғлиқ эди. У бирон-бир нарсага бефарқ қарамасди. Бирон-бир кўнгилсиз воқеаҳодисага дуч келгудай бўлса, кўзларидан тиркираб ёш чиқиб кетарди. „Сарбаста Сурхон“ унинг узок йиллик кузатишлари, ўзи гувоҳ бўлган нарсаларнинг таҳлилидан иборат бўлиб, ўқиган кишини асло бефарқ қолдирмайди. Кишини ларзага солувчи сатрларда ёзувчининг ўзи ҳам яшайди ва бор бўйи билан куюнчак ижодкор Менгзиё Сафаров бўлиб гавдаланади.

Қўлёzmани ўқиб чиққач, билдирган биргина эътиrozим жанри кўрсатилмаганини айтишим бўлди.

— Гапингиз тўғри, жанрини нима деб аташга ўзим ҳам қийналиб ўтирибман, — деди у.

— Эссе деб кўйса бўлар?

— Эссе — бу хаёлга келган фикрни пешма-пеш қоғозга тушириб боришидир. Назаримда, асарнинг кўлами бу байнамилал сўзга мос бўлиб тушмайди. Адиб ва ҳаёт, ён дафтардаги мавзулар, деган фикрга ҳам бордим. Бу ҳам қониқтиrmади мени. Охири дардлар, деб атасам қандай бўлар экан, деган хаёлга ҳам бордим.

— Бирон-бир мунаққид, ажабо, адабиётда бундай атамали жанр йўқ-ку, хеч бўлмаса, ўйлар деб кўйса бўларди, дейиши мумкин.

— Менимча, дард деб кўйишга асосим бор. Башарти, ўйлар атамаси эътироф этиларкан, дард ҳам тан олиниши керак. Чунки дардсиз ўй бўлмайди. Дарвоқе, жаҳон адабиётида ҳеч бир жанри кўрсатилмай ёзилган китоблар ҳам бор. Шу хаёлларга бориб, бу масалани очик қолдиргим келяпти, — деди у.

Дарҳакиқат, Менгзиё Сафаров ҳамиша ҳақиқатни очик айтишга одатланган ёзувчи эди. Айниқса, собиқ СССР президенти Михаил Горбачев қайта қуришни бошлаганидан кейин, адиб: „Шўролик тузумининг 70 йиллик ҳаёти давомида бунақа ислоҳотлар кўплаб ўтказилган. Бироқ уларнинг барчасида коммунизм қуриш ғояси қуруқ гап бўлиб

қолаверди. Умуман, коммунизм ғоясининг ўзи беъмани гап. Коммунизмда ҳар кимнинг қобилиятига яраша ва ҳар кимнинг эҳтиёжига яраша, деган ғоя эса ундан ҳам беъманироқ. Қайси тўрданам чиқсан Володка ҳамманинг бошини қаердаги пуч гаплар билан ғовлатиб юборди. Якка партия ҳукм сурган жамиятда ҳеч қачон демократияни карор топтириб бўлмайди. Хуллас, „бу партияга ишонч йўқ“ деган сўзларни биз даврадошлари орасида биринчи бўлиб шу инсон айтган эди.

Ҳар бир одам замонаси, даврига муносабатини билдиришга ҳаклидир. Зиёли учун эса бу ҳам қарз, ҳам фарз. „Сарбаста Сурхон“ юкорида айтиб ўтганимдек, 1991 йилнинг баҳорида ёзилди. Ўша йилнинг 1 сентябрида, гарчи Ўзбекистон мустақил деб эълон қилинган бўлса-да, хокимликлар бошида ҳамон со-биқ коммунистлар турарди. Бундай шароитда бирон-бир журнал асарни босиб чиқаришга журъат этолмасди. Асар ёзилганидан кейин ҳам ёзувчи тўрт йилга яқин умр кўрди. Ёзувчи хаётининг охирги иилида янги китобига тартиб бера туриб, уни тўпламга киритди. Аммо нашр қилдиришга улгуролмади...

Рост, ҳозир тегирмонимиз новидан сув шарқираб оқиб турибди. Эркин фикрлаш саодати! Қанчалар улуғ саодат! Бундай саодатга бир неча авлодлар, юз минглаб аччиқ қисматли тақдирлар, жудолик ва оғир машақкатлар, ағдар-тўнтарлар эвазига эришдик.

„Сарбаста“ сўзи аслида форсча сўз бўлиб, „боши боғлиқ, ёпиқ, яширин, маҳфий“ деган маънони билдиради.

Ёзувчи бу сўзга „Қўл-оёғи боғлиқ Сурхон“ маъносини юклаган. Адиб ўзининг бу асари орқали нафақат ўз дардини (отаси мулла Раҳмонкул қатағон даврининг курбонига айланган), балки бутун Сурхон воҳаси ҳалқининг оғир қисматини ўз елкасига олган ижодкор бўлиб колди. Асар жанрини фақат шартли равишдагина эссе деб атадик. Аслида эса бу вилоят экологиясида юз берган фожиаларни, бунинг гувоҳи бўлган катта бир ҳалқнинг ўқинчини, шўролар даврида тўраларча ҳукм юритган раҳбарларнинг кўр-кўrona сиёsatини кўриб юраги вайрон бўлиб кетган истеъоддли ёзувчининг ўқириғи, ҳайқириғи, қалб туғёнлари, дарду ҳасратларидир.

Бу тўпламда ёзувчининг илгариғи китбларидан „Олис қирлар ортида“ қиссаси ўрин олганлигини айтмасак, қолганлари китобхонлар билан биринчи марта юз кўришмоқда.

Ёзувчининг бадиий мушоҳадаси сарҳад билмайди. Бир қарашда унинг прозаси бир оз дағалроқдек туюлади. Бунинг сабаби, уларнинг ҳар қандай жимжимадорликдан йироклиги-

дир. Ёзувчи салмоқли фикрлайди ва шиддат билан баён қила-ди. Ҳар қадамда шоирона тимсоллар, фалсафий хуносаларга дуч келамиз, воқеа ва ҳодисалар, ҳолат ва ҳарактерлар тав-сифи шу қадар жонли ва жозибадорки, гўё қўл билан тутиб олса бўладигандек.

Муҳтарам китобхон, ишончимиз комилки, сиз мазкур тўпламга киритилган асарлар орқали севимли ёзувчимиз Менгзиё Сафаров билан Сурхон воҳасининг дашту чўлларида, дарё ва кўлларида, сервикор тоғларида биргаликда сафар қилгандек бўласиз. Адибнинг асарларида салбий образлар йўқ. Сиз бу асарлар орқали фақат яхши кишилар билан учрашасиз, уларнинг яхши фазилатларини ўзингизга юқтириб олиб, қалбин-гиз баҳра олади.

Хуррам МАҚСАДКУЛОВ

ҚИССАЛАР

Айришоҳ

Тўйинтоғнинг овлоқ этакларида жамики жониворлар четлаб ўтадиган қадимий Битик-чашма манзилгоҳи бор. Булоқ атрофида аралаш-қуралаш сүяклар хирмон бўлиб ётади: одамникими, қушникими, ҳайвонникими – билб бўлмайди.

Кўплаб уюмлардаги сүяклар аллақачон чириб, кўкиш-кулранг тупроққа айланган. Бироқ шундай туйғун ва собит сүяклар ҳам борки, тош-метин тоғ жинсларини тилка-пора қилиб ёриб чиқсан найза тигларини кўкка беаёв саншиб туради.

Бу сүякларни ким, қачон ва нима мақсадда тўплаганини ҳеч ким билмайди.

Олатасир асрларнинг силсили портлашлари, жоҳил ва баднафс аждодларнинг ашаддий шафқатсизликларидан омон қолган, аммо аянчли қисмат кутаётган гўзал ва асов, мағрур ва нотавон, олижаноб ва афсонавий мард хонгулларнинг сўнгти тўдаларига багишлайман.

Муаллиф.

БИРИНЧИ БОБ

Жанубда Аму соҳиллари ва шимолда Тўйин, Кайки, Боботоғ этакларига тулашиб кетган Қобадиён ва Хонтоғай даштлари қалин қор билан қопланган кўйи ястаниб ётибди. Тирик мавжудтосиз ҳувуллаган дашту биёбоннинг ўнларча чақириимида на бирон тепалик, на кўзга илинж берувчи бирон-бир манзил кўринади.

Бу йилгидек қирчиллама қиши камдан-кам содир бўладиган ходиса эди. Қарийб бир ойдан бўён давом этаётган қора совук изғиринларига, ҳатто суви асло музламайдиган Амудек улкан дарё ҳам бардош беролмади. Соҳилларни, ёйилма кўлчаларни қалин муз қоплади. Устма-уст ёғаётган қурук қор хас-хашак, тўқай, сийрак ўрмон, бутазорларни кўмиб ташлади. Тунлари

кора совуқ забтидан дарё музи қарсиллаб ёрила бошлади. Даётва соҳиллар киёфаси баттар ёввойилашиб, тунд бўлиб олди. Аму ортидаги афғон даштлари — Даشت Сиёҳгирдан эсган шиддатли довул ўз йўлида дарёнинг совуқ эпкини опичлаб олиб, қор уюмлари ўркачларини ундеқ совуриб, шимолга учирмокда эди.

Корбўрон буғулар галасини дарёнинг шамолга пана тик соҳилларидан қўзғатмай, михлаб ташлади. Чор-ночор қамалиб қолган буғулар жон сақлаш учун ўпирма қирғоқнинг музлаб, тарашадек қотган тупроғини хидлашар, кавакларда осилиб турган ғадир-будур, эгри-бугри узун жинжак ва янтоқ илдизларининг совуқ урган қорамтири-қизғиши пўстлоғини чайнашар, нам бурун катакларидан буғ таратиб, тинмай кавшанишарди.

Дарёдаги муз қатламлари қарсиллаб ёрила бошлагач, жонсарак буғуларнинг ороми батамом бузилди.

Сурув серкаси нар-буғу тўдадан сал қуида туриб, дарё ўзанида чайқалаётган қамишзорнинг шовуллашида, муз қатламларининг йироқларда гурсиллаб синишида бирон-бир йиртқич найранги йўқмикан, деган ҳадик билан атрофга сергак қулоқ соларди. У анчагина сергак тортгач, хавф-хатарнинг йўқлигига ишонч ҳосил қилди ва улкан чамбарак шоҳларини чиройли силкитиб, қирғоқнинг нишаб жойидан юқорига кўтарилиди.

Тик жар деворига елка тираб турган урғочи буғулар бўйинларини чўзишиб, нажот кутишгандек, шоҳлари тўмтоқ, очликдан мадорсиз она буғу пинжиги тиқилишди.

Худудсиз уфқнинг ғарбида оқиш-сарғиши шафақ кўринди. Даشتнинг кўз илғамас кенгликлари, қалин ва бадқовоқ булатлар ортида қўёш ботиб бормоқда эди. Оламни қаҳрли зимиштон чулғаётганиданми ёки яна увлай бошлаган аччиқ шамолнинг шом аёзини бошлаб келиши муқаррарлигини сезганиданми, она буғу қалт-қалт титради. У тўдадан ажралиб, оҳиста юриб нар-буғуга яқйнлашди.

— Айришоҳ нимани ўйлаяпти?”

Нар-наваз унга ўғирилиб ҳам қарамади. Унинг нигоҳи олисларда, элас-элас қорайиб кўринаётган тог этакларида эди.

— Сафар пайти етди. Отланмоқ керак”.

Мода буғу нар-навазнинг қатъиятли ва ўқтам кўзларига бокди. Кўзларда қандайдир таҳлика ҳам бор эди.

— Бу ерда кўп турсак, кўк ёллилар хид олишади. Тунда дарё этагидан кўк ёл увлашини эшитдим. Шерикларини чорлади”.

Мода буғунинг аъзойи бадани қақшаб кетди:

— Катта сурувни кутамизми?”

У катта сурув етиб келса мушкули осон бўлишига умид боғларди. Катта сурувда катта кулфатлар кичик кўринади.

„— Катта сурув Оқ қоялар воҳасига боролмайди. Колиб кетди. Келмайди. Кутсак, фурсатни бой берамиз. Халокатга учраймиз“.

„— Айришоҳ билади. У тоғлар унинг юрти. Унга ишониб бораяпмиз“.

Қош қорайди. Олислардаги тоғ этаклари ҳам кўздан ғойиб бўлди. Сур-қизғиши туклари совуқдан хурпайган Айришоҳ қорон-филик чўккач, жойида тик турганича қор тепиниб пишқирди. Жар тагида унинг амрини кутиб ётган сурув нишабликдан дупур-дупур чопиб чиқиб, уни бир эумда ўраб олди.

„— Оқ қоялар воҳасига кетамиз. У ер тинч. Емиш кўп. Ёшлар сурувнинг охирида юрсин“.

Сурув йўлга тушди. Аёзли довул уларни гоҳ қувиб етар, гоҳ ўзиб ўтиб кетарди.

*

* *

Айришоҳ шапалоқдек қулоқларини динг қилиб ҳар товуш, шарпани дарҳол илғаб олиш учун сурувдан анча олдинда борарди. У шу даражада ҳушёр эдики, ҳатто ортда сафдан чекинган ҳар бир буғунинг қадам олишини пайқар, баъзи бесабр, бетоқат ёшларнинг ножӯя ҳаракатидан дарғазаб бўлиб пишқирар, қаҳрли зулмини ўтказиб борарди. Тун ярмидан окқач, паст-баланд тепаликлар бошланди. Шамолга беткай ерларда қор тагидан куриган шувоқ, читир пояларидан тараалаётган ёқимли ҳид буғлар димогини қитиқлай кетди. Бир нечаси шувоққа интилди. Айришоҳ ер тепинди.

Гала тобора юқорига ўрлаб борарди. Буни ҳаммадан бурун она буғу сезди. Унинг кекса юраги гупуллаб ура бошлади. Айришоҳ қарияга бир зум дам бериш ва шу баҳона ёшлардан инсоғ талаб қилиш пайида сурувни тўхтатди.

„— Фафлат — ғаним. Ҳавф-хатар йўқ, деб қувонманг. У оёқ остида. Сал фурсат сабр. Оқ қоялар воҳаси яқин қолди“.

Қулоқлар тагида ҳамон изгирин чийиллайди. Узун киприклиарга қор учқунлаб урилади. Буғулар қадимий уруғ-аждодлари түёқларининг тафти қолган сўқмоқлардан юриб боришарди. Улар бу сўқмоқларни биринчи бор каşф этганлари йўқ. Сўқмоқлар улар қонидаги из, вужудидаги армон йўллари. Насллардан мерос. Осмонда турналар йўли бўлгани сингари, еру заминда азалдан буғу сўқмоқлари бўлган. Қадимда улар жуда кўп сертармоқ эди. Нажотбарор халоскорона орзуларга элтгувчи йўл эди. Тирик сафлар занжири йиллар ўтиб қисқарди ва охир-оқибат

узилди. Буғу туёқларига зор-интизор дашт сўқмоқларини ёввойи ўтлар босиб кетди. Унут бўлди. Хонгуллар ота юртларига қадам босмай қўйишди. Улар ҳакида узук-юлуқ афсоналаргина қолди, холос.

Айришоҳ бошини кўтариб чалғисимон тифдор шохларини бақувват елкасига қўиди ва бурун катакларини кенг кериб ҳавони хидлади. Олислардан келаётган ҳид кадрдон туюлди. Бу ҳид тоғдан келдими ёки самодан? Наҳотки, аждодлар ҳиди ҳамон борликда адашиб, дайдиб макон излаб юрган бўлса? Ёки бу мутлақ мангулик деб атальмиш вақтнинг тухфасими? Азалдан улар бор эди, бугун йўқ. Наҳотки, буларни ҳам шундай машъум қисмат кутмоқда?

Сурув сойга баҳордагина тошқин сувлар пишқирадиган Ётим-сойнинг ўзанига эниб, яккам-дуккам юлгунлар оралаб кетаётганида қандайдир ҳайвоннинг мунгли увлаши эшитилгандек бўлди. Айришоҳ сергак тортиб, қадамини тезлатди. Таҳлика-нинг бутун сурувга ёйилганини кўриб, у чопиб кетди. Бир неча чақирим шу йўсинда босиб ўтилди. Айришоҳ пастак тепалик устида нафас ўнглаб олиш учун оёқ илди. Ниҳоят, улар бехудага ҳовлиқишганини ва ортда ҳеч қандай шубҳали жондор таъкиб этмаётганини пайқашди. Ҳамон беаёв изғирин увллаётган бўлса-да, чопиб қизишган буғуларга энди кор қилмасди.

Айришоҳни бир оғир гумон қийновга соларди. Оқ қоялар воҳасига сурувни бошлаб бориш бехуда оворагарчилик бўлиб чиқсанчи? Қанча йиллар ўтиб кетди: тоғлар нурагандир, жилғалар куригандир.

Ортдан эса ҳамон кучли шамол эсар, рўпарада нима бўлаётганини: на бирон ҳид, на бир зот шарпасини сездирарди. Нар буғу таваккалига, фақат кўзга зўр бериб сурувни олға бошлади. Шубҳали мавҳумлик сергак бўлишга, мадорсизлик, чарчоқни енгишга, унутишга мажбур қилди.

Тоғ ёнбағри адирликлари бошланди. Бир неча сой ва жилғадан сўнг Оқ қоялар воҳаси келади. Катта сой ўркачидан ошиб ўтиб, воҳага тушишгач, буғулар ўзларини ажиб ва сирли сукунат оғушида ҳис этишди. Атроф жимжит. Шамолнинг кучи ҳам сусайган. Яйдоқ даштда тўсикқа учрамасдан елиб-юргурган довлни тоғ ўнгирлари худди аждаҳодек ютмоқда эди. Бирок бу алдамчи кайфиятга узоқ берилиб бўлмасди. Шамол тоғ этакларининг даштга қараган пастқам сойликларидан шиддат билан ёпирилиб кириб, сўнгра адашиб-дайдиб юриб, яна аллақайси бир сойда сурувнинг рўпарасидан туйқусдан лоп этиб чиқиб қолар ва васвасага солиб кетарди.

Буғулар тоғ ўнгирларига яқин боргандари сари, сойлардаги осойишталик барқарорлигига ишонч кучаярди. Бу ҳол улар-

ни дадилроқ юришга ундали. Нар-наваз сўнгги адирлик ўркачига кўтарилигандан, тонг ёришишига сал фурсат қолган эди. Пастда истинод, мудроқ Оқ қоялар воҳаси ястаниб ётарди. Воҳанинг кунчиқар томонида чағир тошли тоғларнинг баҳайбат ўмровлари қоронғилик қаъридан юксалиб турарди.

Оқ қоялар адирлик билан тоғ оралиғидаги кенггина — шимолдан жанубга ўнлаб чакиримга чўзилиб кетган воҳача эди. Баҳорда адирликлардан оккан ёмғир ва тоғда эриган қорларнинг суви шу воҳадан оқиб ўтиб, этакдаги ўпирма жарликларда ерга сингиб кетарди. Сой жияклари, ўзанлари ҳамиша ўтга, хас-хашакка сероб бўларди. Бунинг устига, воҳа катта яйловлардан ғоят узок бўлгани ва майдони кичиклиги туфайли ҳам чорвадорлар назарида беписанд эди. Чўпонлар бу ерларга мол ҳайдаб келишни ортиқча ташвиш, деб билишар, шу сабабларга кўра, Оқ қоялар воҳаси бокира ва хилватлигича сақланиб қолган эди. Қиши оғир келадиган йилларда тоғлардан кийиклар, даштлардан жайронлар ва онда-сонда дарё соҳилларидан хонгуллар бу ерларга насиба излаб келишар, токи бўрилар ёки бетайин мерғанлар хабар топиб, безовта қилишмагунча, эмин-эркин кун кечириб юришарди. Бу жойнинг табиий кулайликлари бир дунё. Теварак-атроф — адир ўркачлари, тоғнинг беткай яланғоч қиялик ва ўнгирлари худди кафтдагидек кўриниб турарди. Туёкли жониворлар ризқ-рўз териб еб бўлишгач, харсанглар тагидаги камарлар ва шамолпанда жарларда оёқ узатиб, дам олишарди.

*
* *

Айришоҳ адир тепалигига оёкларини керганича воҳани кузатиб турарди. Бирон-бир шубҳали шарпа, ҳаракат ва овоз илғамаган бўлса-да, тонг ёришгунча сурувни шу ерда тутиб туришга қарор қилди.

Даштдагига нисбатан бу ерда қор қалин эди. Тонгнинг илк нишонасиданоқ воҳа, чор-атроф сутдек ёришиб кетди. Буғулар олдинма-кетин бир-бир қадам ташлашиб, сафга тизилишганичка қиялиқдан воҳага тушиб боришиди. Бир неча дақиқа Оқ қоялар воҳасининг ўлик сукунати буғуларни саросимада тутди. Жимликни факат сой тубида қор уюмлари тагидан жилдирраб оқиб чиқаётган ирмоқчанинг нозик овозигигина бузиб турарди. Ҳар қандай очиқкан маҳлуққа, жонзотга хос бўлган табиий тийиксиз эҳтиёж устун кела бошлади. Жон ҳовучлаб тургандан кўра, юмшоқ корни ўткир туёклар билан ковлаб-таталаб нам ва хушбўй чўп хасни ковлаш буғуларнинг ягона истаги эди. Ёш буғуларнинг ўпирма сой, қия жиякларда осилиб турган шувоқ, ёвшон, қизил-

бурган пояларига ташланганини кўрган Айришоҳ ўзини сурувдан четга олди ва биронта гумондор товуш ёки ҳайвон ҳаракатини илғаб оларман, деб эҳтиёт важдидан теваракка разм солиб юрди. Бирок у ўзини қанчалик дадил, бепарво ва хушёр тутишга уринмасин, шерикларининг очофатлик билан ҳашак ямлаб ютишига қараб сўлаги бетўхтов куйилиб келаётганини, сергакликдан кўра, тоқатсиз иштаҳа кўпроқ голиб чиқаётганини пайқади. Шунча кунлар давом этган оч-наҳорлик, таҳлика силласини қуриптганини ва оғирлиги зил-залварли чамбарак шоҳли боши ўз-ўзидан қуий эгилаётганини сезди. Кор тагидан димогига гуп этиб урилган қора шувоқ ҳиди унинг кўнглини оздириб юборди.

Тушга бориб буғулар хилват тоғ шароитига шунчалар мослашди-ки, гўё улар ўзларини бу воҳада азалдан хур-хуррам яшаётгандек, илк бор она елинига тумшуқ тираб эмчак эмиб дуркун ўслан, улғайган асл юртда юришгандек чоғлашар, қорни тўйиб бир-бирига шўхлик қилишарди. Тўшини қорга бериб ётган кекса она буғу уларга меҳри ийиб қарап, хира кўзлари билан суряр, хотиржам ҳаловатдан қоқшол вужуди илиб бораради. Қани эди, ҳамиша шундай бўлса. Сурувимиз ўз насибасини шу хил хотиржамлик, шоду шодон, кўнгилхушлик билан териб еб юрса. Улушимиизга табиатдан ёзмиш ҳозиргидек ҳазиллар, ёшлардаги ўйинқароқ шўхлик ва дуркунлик ҳеч қачон канда бўлмаса.

Пешинга бориб, дарғазаб булатлар анча юмшади. Улар увалаланиб, парча-парча бўлакларга бўлиниб, тоғ тўшигига чодир тикиб туришарди. Шамол ҳам тинди. Шундай оромбахш сукунат чўқдикни, унинг илиқ ва мулоим нафасини бутун сурев ҳис этди. Қорни тўйиган буғулар ҳоргин эснаб, кавш қайтариб, ҳомуза торта бошлишди.

Кекса она буғу аллақачон сийрак киприкларини юмган эди. Унинг тагидаги қор танаси тафтидан эриб борар, у эса гавдасини кўтариб, бошқа жойга ўтишга эринарди. Нихоят, у биқинида турган қаттиқ оғриқдан кўзларини очди. Воҳа этагида қип-қизил қуёш порлаб турар, гоҳо унинг юзини увада булат тирнаб ўтганида хиралашиб, яна яраклаб кетарди. Харсанг тош ёнида Айришоҳ қоматини ғоз тутганича, кавшанар, ахён-ахёнда ялтироқ ҳўл тумшуғини эгиб, қуриган шувоқ бандини лаби билан қимтиб узиб олар ва яна бошини кўтариб, ором билан курт-курт чайнарди.

Она буғу ўрнидан зўр-базўр туриб, ётган жойига қаради. Унинг бўртиб чиққан қовурғаларига озор берган нарса кирра тош эди.

— Мизгибман. Баданим жунжикаяпти".

Кекса буғу гавараси „дурр“ силкинди, пахмоқ жунлари хурпайди.

— Сен кекса. Уйқу ҳам сени биринчи олди“.

— Энди сен ухла. Менинг кўзларим ҳозир кўриб турибди. Тунда кўрмайди. Яна ҳамма ташвиш ўзингга тушади“.

— Безовта бўлма, бу жойлар тинч. Йиртқич қадами тегмаган“.

— Ишондим. Гапинг рост. Зап юрт экан. Оқ қоялар юртим, дегандинг“.

— Ёшлигим кечган бу ерда. Унда мен илк дафъя эркинлик ва ёлғизлик сездим. Унгача одамлар қўлига қарам эдим“.

Она буғу дафъатан ўзини четга олди, оёқлари музга тойиб, қўймучи билан қор уюмига ўтириб қолди.

— Кўрқма. Улар мени бокди. Кейин шу юртга келтиришди ва тўдангни топиб ол, дейишди. Қулоғимдан чўзишиб олов тамға босишиди. Қулоғимдаги тамға улардан улгу“.

Айришоҳ улкан бошини силкитди. Қулоғидаги тамға чамбарак бигиз шоҳларга тегиб қарсиллади.

— Одамлар минг яхши бўлгани билан, улардан олисрек юрган афзал“.

— Нега? Ёвуми улар?“

— Ҳайвонларнинг феъли-хўйи қисматига ёзилган. Адашмайсан. Одамларники эса ҳар хил. Феъл қурбони ҳар нарсага қодир.“

ИККИНЧИ БОБ

— Ҳал қилинмаган бир масала қолди, холос, — деди яқиндагина гриппдан турган қўриқхона директори Раҳмат Аҳадов ҳафтабоши йигилишни якунларкан. У оғзини ўнг қўли билан тўсиб йўталди ва рўзнома қатидан қофоз олиб ўрнидан турди: — Мана бу сарғайган, ҳарфлари ўчиб кетган газетада битилган бир хабарга эътибор беринглар. Кўпларингиз янгидан ишга келгансиз, табиий, бехабарсиз. Шунинг учун ўқиб берганим маъқул. — Директор томогини кирди, қофозни деразадан тушаётган ёругликка тутиб ўқий бошлади: — Кейинги пайтларда қўриқхона ходимлари томонидан амалга оширилган ибратли ишлар туфайли, она табиатнинг антиқа жониворлари — Бухоро буғуси — хонгуллар сонининг кўпайганлиги ҳеч кимга сир эмас. Эндиликда бу афсонавий ҳайвонлар юзлаб чақиримли жануб тўқайзор-ўрмон ва дарё соҳилларида тез-тез учраб турибди. Куни кеча қўриқхона жамоаси ҳаётида ҳаяжонли воқеа юз берди. Кўлда бокилиб, вояга етказилган навқирон нар-наваз-эркак буғу ўзининг қадрдан тўдасига қайтарилди. Маросим охирида ўрмончи

Суяр Суюнов буғу тарбиячиси — Сулув Суюнова ёрдамида бу нодир ҳайвон қулогига белгили тамға босди. Олимларнинг фикрича, ҳалқаро ҳалқалаш бюроси тасарруфидаги бу тадбир қатор муммолярни ҳал этиш имконини беради“...

Директор курсига ўтираркан, ходимларга маъноли ва синчков назар ташлади-да, қўшиб қўйди:

— Қани, Суяр ака, эсланг-чи, неча йил бўлди, хабарни эълон қилганингизга?

Пойгақда курсида ўтирган ўрта яшар ўрмончи ийманибгина ўрнидан турди. Унинг ҳаяжонлананаётгани пирпираётган кўзларидан сезилиб турарди:

— Ўн йил... Агар янглишмасам.

— Хотирангизга қойилман. Дарвоқе, бундай воқеаларни унуби ҳам бўлмайди. Мана, аниқ йили ва ҳаттоқи ойини ҳам айтишим мумкин. — Директор қофоз четига сиёҳ билан битилган ёзувни ўқиди: — Бир минг тўққиз юзу етмиш... февраль... Ўшандан буён уни қайтиб кўрдикми?

— Ўша йилнинг қишида кўриқхонага келиб-кетиб юрди. Икки марта ўз кўзим билан кўрдим.

— Кейин дом-дараксиз кетди.

— Ҳа, қайтмади. Қайтса кўрардик, — деди Суяр Суюнов ҳамон тик турганича.

— Энди янгиликни эшитинг. Кеча чегарачилар ғалати ҳабар етказишди: афғон тарафдан бир гала буғу дарё кечиб ўтибди. Улар соҳилда, тўқайзор ўрмонда қолиши керак эди. Илгари ҳам бундай ҳодисалар кўп бўлган. Лекин тўда бу билан кифояланмаган. Чегара тўсинларидан ҳатлаб ўтиб, баъзи жойларга шикаст етказиб, биз томонга ўтган. Застава бошлигининг гапига қараганда, сурувни йирик шоҳдор нар-наваз бошлаб юрипти. Қулоғида ғалати, тамғага ўхшаш нарсани дурбинда кўришипти.

— Балки!.. — Суяр Суюнов беихтиёр бир қадам олға талпинди.

— Бу — тахмин. Аму бўйларида тамғали буғу пайдо бўлибди, деган овоза кўп йилдан бери бор. Аммо бу хабарга бепарво қарай олмаймиз. Ёлғонми ёки чин — иложи борича аниқлашга уринишимиз лозим. Ўн йил чакана давр эмас... Ким билади, балки ўша Айришдир.

— Қаерда кўришипти? — ёш ходимлардан бири тоқатсизланиб сўради.

— Юқорида, оролдан олтмиш-етмиш чақирим шимолишарқда.

— Агар Айришох бўлса оролга келарди. Ҳарқалай, ўрганган ери, юрти, — деди Суръ Суюн беҳафсала оҳангда.

— Эҳтимол, келгандир. Фақат биз уларни илғамай қолган бўлишимиз мумкин. Бундан қатъи назар, буғулар тўдасининг тасарруфимиздаги ерларда пайдо бўлиши ва айниқса дарё соҳилларидан чиқиб, тоғ ёнбағирликларига йўл олиши жуда сирли ва муҳим гап. Бирон-бир сабаби борки, тагига етмасдан илож йўқ... Мен илмий ходимлар фикрини билмокчи эдим. Балки, — директор газета бўлагини тахлаб, рўзнома қатига тиқди, кейин ўтирганларга разм соларкан, кўшиб кўйди: — Эрталабгача ўйлашайлик. Маслаҳатлашиб бирон қарорга келармиз.

— Ўйчининг ўйи битгунча таваккалчининг иши битибди. Вақт — ғанимат, — ҳалигача тик турган Суръ Суюн шошиб гап ташлади.

— Йўқ, — деди унинг гапини чўрт кесиб Аҳадов, — етти ўлчаб бир кес, деган гап ҳам бор.

— Тўғри-ку-я, лекин мендан бўлак...

— Суръ ака, одам деган имкониятларини ҳисобга олиши керак.

— Нима қипти менга? Ҳаромдан бир итим ва бир мушугим бор.

Ҳалолдан ҳеч вақо. Бу ерда ўтиридим нима-ю, у ерда бўлдим нима. Бола-чақам йиглайдими ёки хотиним борки, зерикиб қоладими?

— Оёқ тираб туриб олганингизни биламан, бойиси бор...

— Балли, Айришни кўргим келяпти, — Суръ Суюнов курсига ўтириди ва бошини эгди, бошқа лом-лим демади.

— Ҳмм-да, — директор лабларини қимтиб, ўйланиб қолди. — Ҳамроҳликка кимни оласиз? Танланг.

— Ҳамроҳларим етарли. Бу ерда эса ҳар қўл ҳисобда. Уйдагиларни эса ўз ҳолича ташлаб кетолмайман. Биласиз, куним ҳам ўтмайди уларсиз.

— Ҳа, майли. Бўлмаса, тайёргарлигингизни кўринг. Кайки билан Тўйиннинг шароити сизга таниш. Ҳафтада бир хабар олиб турамиз. Фақат эҳтиёт бўлинг. Сурувни ҳуркитиб юбориш ҳеч гап эмас. Тоғ воҳасига эски изларни қўмсаб келишипди-я!.. Ҳойнаҳой, бу Айришнинг иши. Мабода, бу биз тахмин қилганчалик рост бўлиб чиқса, унда хизматларимиз зое кетмаган бўлади. Занжир уланади... Сулувойнинг хизматларига сийлов. Инсон мурувватининг ёввойи ҳайвон табиатига таъсири. Бу хайрли асорат қай бир қирраси билан намоён бўлади — бу ёғи сизга боғлик.

— Хотиржам бўлинг.

Суяр Суюн одатига кўра, барвакт уйғонди. Бироқ иссиқ ўрнидан туришга шошилмади. Бошини кўргадан чиқариб хона ичини кўздан кечирган бўлиб, лоҳас хаёллар калаваси учини топишга уринди.

Ойпарча дераза токчасига чиқиб олиб юзини ювар, мўйловини тили билан тарап, бути орасидан бошини чиқариб, думини яларди. Сезгир эса пастда эчки пўстак устида кулча бўлиб ётарди. Ойпарча ўқтин-ўқтин деразадан ташқарига боқар, ниманидир сезгандек тош қотар, сўнг яна жунларини тараш билан банд бўлиб кетарди.

Суяр Суюн ўрнидан турди-да, оёқ учida юриб, даҳлизга чиқди. Пахталик шими чўнтағидан гугурт олиб лампа чирокни ёқди ва қўл соатини хира шуълага тутиб кўрди. Соат олтига яқинлашиб қолган эди. Уйқуни роса урибмиз-ку, деб хаёлидан ўтказди. Сал хаёлсираб турди-да, илгақдан пўстинини олиб елкасига ташлади. Ташқарига чиқмоқчи бўлиб эшикни итарди, очилмади.

— Нима бало, бирор михлаб кетганми? — у эшикка тизза уриб кўрди, сўнгра тисарилиб бор кучи билан елка ташлади. Кундузги ёмғирдан нам тортган зшик тунги аёзда чиппа музлаб, ромга ёпишиб қолган эди. Эшик бор бўйи қарсиллаб очилиб кетди. — Ол-а, айтдим-ов, роҳатижон уйқу қаердан келди, деб. Кор босиб қопти-ку. Икки кун ўқирган довул охири ишини тиндириб кетибди-да... Ха, майли, давринг кепти, ёғавер.

Суяр Суюн эшикни тортиб ёпди. Ишни нимадан бошламоқ керак, дегандек, анчагача бирон қарорга келолмасдан, совукқа қота бошлаган қўлларини бир-бирига ишқаб, ўйланиб қолди. Уй совиб кетган. Бурчакдаги чўян печкани ушлаб кўрган эди, қўли чиппа ёпишди. Печка дарчасини очиб, ичкарига қўлини суқиб, кулини туширди. Қофоз ғижимлаб, устига пайраха қалаб, олов ёқиб юборди. Кундузи узок сафар қилишни мўлжаллади. Шунга яраша тўйимли овқат тайёрлашга уннаб юборди. Хушбўй картошка ва қоврилган консерва гўшт ҳиди хонага ёйилгач, ит билан мушук ҳам керишишиб, жағларини катта-катта очиб, эснашиб, ғимирлаб қолишли.

Оиланинг одатдаги, аммо янги шароитдаги ҳаёти бошланди.

Вагончани судраб келиб ташлаб кетган тракторнинг изларини аллақачон қор кўмган эди. Суяр Суюн Сезгирни эргаштириб, вагончани жануб шамолларидан тўсигб турган баъзанд

тепалик ўркачига кўтарили. Сойнинг шамолга тескари бетига кор қалин тушган. Тиззагача корга чўкаётган оёқларини аранг судраб, тепаликка кўтарилигунча терлаб-пишиб кетди.

Тўйинтоғ устидан кўтарилиган куёш нур пуркар, нигоҳ етгунча уфқлар жимирилаб, кўзга нинадек санчилар, кўз очирмасди. Суяр Суюн оппок олам жимирига кўзлари мослашишини кутиб турмади. Оёқлари тагида, атрофида гир айланиб, чопиб юрган итга завки келиб қарап, унга ўчакишиб ёшовланган кўзларини дастрўмоли билан артганча юқорига ўрлаб бораради. Унинг мўлжалида хуш кўрган бир жой бор эди. У шунга ошикарди. Жуда кўп йиллар бурун у Оқ қоялар воҳасидан кучоққа сифадиган оҳактош келтириб, ўша жойга ўрнатган эди. Ўшандан буён балки бу ерларга ҳеч ким келмагандир. У ҳолда яна ҳам яхши. Ўйинқароқ саёҳлардан омон қолган тош устида кўпчиган хамирдек бир кучоқ қор уюлиб туради.

— Ҳамон турибсанми, тошим. Қани, бир кучоқлашайлик... Ўхӯ, бунча оғирлашиб кетибсан. Елкангдан қор босаяптими? Мана, силлиқ елканг бос-бояги топ-тоза... Гуноҳкорман олдингда, биламан. Сен айбни менга ағдаряпсан. Балки, тўғридир таънанг. Начора, давр дегани эгов бўларкан. Неки кучинг, неки чиройинг, неки орзу-ниятинг бор — ҳаммасини эговлаб-эговлаб охира қилтириқ қилиб қўяркан... Мени кечир, жинсдошларинг орасидан ажратиб олиб, ёлғиз ўзингни бу ерга келтирганим учун. Ҳа-я, у пайтларда ёш эдим, кўзга ҳеч нарса кўринмасди. Ёнимда Сулувим бор эди... Мана, яна қўмсаб келдим. Энди ёлғизмасссан.

Суяр Суюн ўзи билан ўзи овоз чиқариб гапиришни одат килганидан, ҳатто ити ва мушуги ҳам таажжубланишмас эди. Бунга кўнишиб кетишган. У тош ёнига чўккалади, сўнгра оёқларини узатиб, ёнига ўтириб олди ва яна бир бор пўстини енги билан қор зарраларини сидириб ташлади.

— Йўқ, барибир, сен ўсибсан. Кара, кучогимга сифмаяпсан. Бардошингга балли-е, бир жойда туриб ҳам улғайиш мумкин эканда. — Суяр Суюн иссиқ қўл кафти билан тошни силади. — Мен эса нималарнидир изладим, елдим-югурдим, адашдим, топдим, йўқотдим. Ўзим қолдим... Инсон умрини сенларнига менгзатиб бўлмас-ов. Қани эди, ўша йўқолган нарсаларни мана, ҳозир сени топганимдек адашмай топа олсан. Нима, олам остин-устун бўлиб кетармиди? Шундай бўлса керак. Сабаби — инсонни табиат ўзи шундай яратган. Унинг қайта такрор топганида севинишини ва яна бос-бояги кўнишишини билгани ҳолда, атайлаб лойини шундай мўрт қилиб қорган. У фақат сўнгиз армон ҳис этгандагина қуилиб, инсофга келади... Майли, буларни кўйиб турайлик. Ўксик

ўйлар ўрни эмас ҳозир. Навбат сенга, гапир, эшитай. Неча замон йигитлигим кўзлари билан бу воҳага тикилиб ётибсан. Нималар кечди, айт?.. Майли, сен эслаб тур, мен воҳага кўз ташлаб олай. Ахир, уни ҳам роса соғинганман.

Бу орада Суяр Суюннинг жимир-жимир қордан хира тортган кўзларига нур иниб, оппоқ оламга мослашган эди. Бу нур мудрок вужудининг чуқур қатламларидан йўл топиб, борлигини ёришириб келарди. Болалик, ўсмирлик, йигитлик чоғларигагина хос мунаввар равшанлик, оройиш ҳорғин қалбига шуур бағишила-мокда эди.

Рўпарада бир-бирини давом эттирган, бир-бирига абадул-абад маташган кўйи тош қотган тоғлар силсиласи. Олис ўпирма даралар, қора камар тубсиз ёриқлари қаъридан совуқ зулмат кўз қирини ташлаб туради. Бўктарув қор уюмлари тагида тоғларнинг кат-кат дўнглешона ажинлари. Воҳа эса кафтдаги-дек, олам оқлигидан унинг пасту баландликлари ҳам кўринмайди. Тоғнинг тарам-тарам кесик пойида сочилган қумалоқ-дек оқ-чипор доғлар кўринади. Бир замонлар ер қаъридан вулкон отган оппоқ сокқалар. Оқ қоялар сайҳонлиги, деб ном олган мудрок дашт шу эди.

Оlam жимжит. Қимирлаган жонзот кўринмайди. Фақат қулоқлар тагида чингиллаган нозик чинни жаранг.

*
* *

Суяр Суюн кўзларини юмди, сўнг очди. Йироқларда икки қора кўзга ташланди: гоҳ бирлашади, гоҳ ажралишади. Бир-бирини қувлашади. Фойибдан пайдо бўлганларнинг бири ҳарир алвон кўйлак кийган жувон, бири паҳтаси қавилмаган кўк як-такни тўрва килиб, ниманидир орқалаб олган йигит. Уларнинг хатти-ҳаракати, елиб-югуришлари бунчалик таниш ва қадрдон? Ким бўлди булар?..

— Эҳ-эҳ, ўзимиз-ку, — энтиқди Суяр Суюн беихтиёр.

— Кўйиб юбор, бўлмаса тош оёғингга тушиб кетади”, — дейди йигит.

— Кўнгилчан одамсиз, ташлаб юборолмайсиз”, — тегажаклик қиласи жувон.

— Хали шундайми? Мана, бўлмаса!” — Йигит гавдасини четга шаҳд билан ўгириб, тошни елкасидан итқитади ва жувонни қувлаб кетади. Жувон қийиб-қийиб қочиб бораяпти, йигит ҳансираф-ҳаллослаб унинг изидан қуваяпти. Ана етди. Иккаласи сабза кўкатлар устига думалаб, ағнашди.

— Сени қанча огохлантирдим-а. Тишимни тишимга қўйиб келаётган эдим”.

— Ёлгон. Оғир харсангни бунча йўлга кўтариш осон иш эмас. Бошида мардлик қилиб... — Йигит жувоннинг тоф шамоли ёрган пўрсилдоқ лабларини қўл кафти билан тўсди.

— Керак бўлса, сени ҳам тошга кўшиб кўтараман. Шартимга рози бўлсанг, бас”...

— Хай-хай, ҳаддингиздан ошманг... И-йе... Уялмайсизми...“

— Кимдан? Бу оламда ёлғиз иккимиз”...

Суяр Суюн кўзларини юмди. Вужудига унут бўлган лаззатли, қиздирувчи, лоҳасловчи қалтироқ тўлқин хуруж қилди ва бутун танасига симобдек ёйилди.

Жувон билан йигит ўринларидан туришди.

— Нафсингиз кондими? Жуда бетоқатсиз-а”.

— Дунё тургунча турсак ҳам нафсим қонмайди” — деди йигит қўй кўзлари билан мулойим боқиб.

— Бориб тошингизни теринг, йўқ, йўқ, кўтаринг”...

Иккаласи хандон отиб кулишди.

Ҳа-я, шундай шоду шодмон, қувноқ кунлар ҳам бўлган эди.

Суяр Суюн бир нарсага ҳайрон қола бошлади: нега у куни бўйи у ҳақда ўйлаяпти. Хотиралар шунчалар тиник, равшан ва ушлаб-тутар даражада зохир эдики, ажабланмай иложсиз эди.

— Оқ тошим, эсладингми? Ҳа, сен уни кўрган эдинг. Энди у йўқ. Сен ва мен қолдик. Ўшанда чиндан ҳам оёғига тушиб кетиб, лат етказган эдинг. Кейин жажжи оёқларини кўлларимга олиб қанчалар силадим. У сенинг силлиқ елкангда ўтирап, куйиб-пишаётганимдан завқи келиб куларди. Энди эса бу кўллар совқоттан елкангни силаяпти. Чорасиз дунёда ҳаммаси ўткинчи экан.

Сезир эгасининг сонига сўйканди. Сал узоқлашиб, қуймучини ерга берди.

— Ҳой, нима қиляпсан? Ҳа, ҳайвон! Тур кет, нарига!.. Жой қуриб кетдими? Чоп паствга... Қўрқма, ўзим бор, қараб тураман. Бу ерни ифлос қилма, Сезир. Бу ер муқаддас.

УЧИНЧИ БОБ

Суяр Суюн шахсий ҳаётдан ёлчимади. Суйиб олган хотини хиёнат қилди. Ўшанда мактабда ўқитувчиликни ташлаб, газетага ишга ўтган эди. Хотини тақинчоқларга ўч эди. Бир пулдор дўкондор билан дон олишиб қолди. Эр айб устида ҳар иккаласини тутди-ю, урмади, сўқмади, қўни-қўшнини гувоҳликка чақириб, талогини берди. Хотин икки қизни олиб кетди-қолди. Қўз очиб кўргани хотинини жуда севарди. Куйигига чидай олмади. Обрў топтириб, эл орасига танитган редакцияда ҳам қололмади. Ўша пайтларда қурила бошлаган Термиз-Хатлон темир йўлига ишга ўтди. Ҳаёти хизмат сафарларида ўтадиган

оддий одамларга тез орада кўшилишиб кетди, ғам-ҳасратини унуган бўлди. Темир йўлчилар қайноқ ҳаётдан кўпинча йироқ бўлганлари учун, талай икир-чикирларга шунчаки, ўткинчи, табиий ҳодиса, деб қарашар, хис-асабларга зўр бермасдан, усиз ҳам мураккаб бўлган турмушни мушкуллаштиришмас эди. Бу ҳол Суяр Суюнга ёқди. Умр қарийб даштда ўтар, ўтган кунларни, фарзандларини эсга соладиган хаёлларга кам ўрин қолдира-ди.

Бир куни кўриқхона директори уни вокзалда кўриб қолди. Редакцияда ишлаган кезлари кўриқхона фаолиятидан мақолалар ёзиб юриб, биродарлашиб кетган эди. Директор эса ўша пайтлари оддийгина илмий ходим эди. У яқиндагина директорликка тайинланиб, ўзига майлдор одамларни ишга таклиф этиб юрган экан. Икки оёғини бир этикка тиқиб, ҳашша кўриқхонага ишга ўтасиз, дипломни овора қилманг, деб туриб олди. Зиёлилиги ғулгула қилиб, боз устига, табиатга рўшнолиги голиб чиқиб, рози бўлди. Илмий ходим бўлиб ишлай бошлади. Орадан беш йил ўтгач, кўриқхона ходимаси есир Сулувга уйланди. Эри туғмайсан, деб ташлаб кетган экан. Чиндан ҳам у туғмади. Аммо табиат унга меҳрдан берган эди. Меҳр-шарофати бир дунё бу аёл Суяр Суюнни бошига кўтарди. Туғмас аёлларга хос гуноҳкорона назокат ва мунис нафосат фарзандлар ўрнини босиб кетди. Суяр Суюннинг қалби нурга тўлди.

Ўша нурли кунлар эсига тушиб кетди.

— Ойпарча, кел ёнимга, — у дераза токкасида чўнқайиб ўтириб, ташқаридаги сирли сукунатга қулоқ тутиб турган мушукка юзланди. Мушук полга тушди ва сўнгра Суяр Суюн кўкрагига сакраб чиқди. — Кир қучогимга... Ха, қурғур, ўлари мағурсанда. Майли, бор, оёғим учида ёт... Эгачинг сенга зап исм қўйганда — Ойпарча. Ниманг ой парчасига ўхшайди? — Суяр Суюн бошини ёстиқдан кўтариб, мушукка қаради. Ойпарча бошини кўтариб, хуриллаб юборди. Унинг ўsic жунлари қора-қўнғир, тўши оппок, думлари ола-була эди. Коронги хонада ҳам бу ранглар кўзга ташланиб турарди. — Нима ҳам дейсан, эгачинг чиндан ҳам ақлли, фаросатли аёл эди. Мен сенга унча-мунча яшаб, яхши-ёмонни кўп кўрган бир одам сифатида шуни айтмокчиман: ҳаётнинг кўп ишларига қойил эмасман. Биринчисини яхши кўрдим-у хиёнат килди. Иккинчисини яхши кўрдим — шум тақдир уни қучогимдан юлиб олди. Шуям иш бўлди-ю. Наҳотки, севгининг сийлови ҳамиша хиёнат, разолат, жудолик бўлса...

Суяр Суюн толикди, кўзларини юмди...

Сулувой унинг ёнида. Ёстиқдошлар кўзига ҳа деганда уйку келавермайди.

— Унда сен оролда яшардинг. Бахор эди. Биз директор билан „Оқ тонг“ совхозидан бир буғу боласини келтирдик. Бирам чи-ройли, шундай ҳам гўзал мўъжиза жонивор эдики, караб тўймас-динг”.

— Таърифига тил ожиз. Бир корейс йигит шолипояни шуд-гор қилиб юрганда топиб олган ва директорига совға қилган эди”.

— Ўшанда қиёмат-қойим бўлган. Сен асл воқеалардан бе-хабарсан. Можаро каттариб кетди, иш судгача борди... Уни сут билан боқиб ўстирган қизалоқ ҳам ҳеч кўз ўнгимдан кетмайди”.

— Вой, шўринг қургур, қизалоқ! Сизларни бағритош, бе-раҳм, деб роса койигандим: ёш гўдак меҳри жуда қаттиқ бўла-ди, қайтариб беринглар, йўқса қизалоққа бирон кори ҳол бўли-ши ҳеч гапмас, деб ялиниб-ёлворгандим”.

— Ха, гапларинг рост чиқди. Қизалоқ бир ҳафта оғзига туз олмапти. Ҳар эрта соҳилда қизчанинг фарёдини эшитганимда, юрак-бағрим эзиларди... Эшит, бур куни отаси машинада қиз-часини олиб келди. Агар унинг ҳолини кўрганингдами, юра-гинг орқага тортиб кетарди. Юздан юз, кўздан кўз қолмаган. Озиб-тўзиб, чўп бўлиб кетипти. Азза-базза одамнинг ялиниб-ёлвориши ўсал бўларкан. Қизимга ўша буғучани бир кўрса-ting, ақалли бир марта. Унинг тириклигига ҳеч ишонмаяпти, ўрмончилар уни сўйиб еган, деб ўзини ургани-урган.”

— Шўрлик қиз, ёшгина жонингга бунча ҳам қасд қилма-санг”.

— Кўнгил-да, онаси, унга буюриб бўлмаса”.

— Сизники-чи? Сизларники тош-метинми? Ёки сизларда-ги кўнгил одамники эмасми?”

— Шошма, бир бошидан айтяпман-ку. Ўша куни оролда ёл-ғиз ўзим эдим. Қизалоқни қайиққа миндириб, дарёдан олиб ўтдик. Буғучани симтўр қўрада саклардик. Етаклаб олиб чиқ-дик. Қизалоқ унинг бўйнига осилди-ю, шалвираб ўзидан кетиб ийқилди. Буғуча эса унинг озғин қоқсувак юзини ялади... Мен бир четда, ота бир четда — бу холдан лол. Қизчани бир амал-лаб ҳушига келтириш ҳам минг азоб бўлди. Отаси яна ялиниш-га тушди: қизимнинг кўнгли қотгунча, кўникунча гоҳ ўзим, гоҳ онаси бирга келиб буғучани кўрсатиб турайлик, бўлмаса, уни бой бериб қўямиз, деб туриб, чўнтағидан бир даста пул олиб, қўлимга тутқазди. Азбаройи қўрқанимдан сесканиб кетдим”.

— Пулни олдингизми?“.

— Ўлибманми”.

— Нега ўшанда қизалоқни қон қақшатиб, буғучани тортиб олдинглар?”

— Давлат муҳофазасидаги нодир ҳайвонлар, модомики, улар табиат қучогидан топилган бўлса, шахслар қўлида сақланмайди. Тақиқланган. Олтиндай гап-да: ер устидаги, тагидаги, кўринган-кўринмас олтин давлатники-ку. Булар ҳам буғучани кўриқхона назоратидаги ердан топишган”.

— Топа солиб ими-жимида сўйиб еб юборганда нима бўларди?”

— Испотланса, қонун олдида жавоб берарди... Мен-ку директорга айтдим, бир карра кечинг, бола бечора сут бериб катта қилиб олипти, меҳр қўйиб қопти; одамнинг раҳми келади, мурғак қалб бу зарбага бардош беролмай, пора-пора бўлар, дедим. Биласан-ку, унинг одатини, феъли-хўйини, йўқ дедими, тамом. Муроса, раҳимдиллик унинг кўчасида кун кўрмайди. Жуда ҳам золим экан, дема, қачонки табиатга хусумат бўлса, у қуюшқондан чиқиб кетади. Қисқаси, охиригача қатиккўллик билан оёқтираб олди: буғучани берасан, вассалом! Қизчанинг отаси ҳам катта одам, дами қайтмаган: бор, қўлингдан келганини қил, деб тўнини тескари кийиб олди. Раҳмат Аҳадовнинг авжини ўшанда кўрмадинг-да. Эртасига участка милиционери билан суд ижро-чисини бошқариб борди. Қонун олдида ҳамма бир хил. Буғучани бермай қаёққа ҳам боради... Ҳалиям директоримиз одамгарчилик қилди, буғуни қонунсиз тутиб, ҳовлисида сақлагани учун жарима белгилашни талаб қилмади. Қизчанинг ҳурмати, берган сути ҳақи, бу ишдан воз кечди”.

— Бечора-е, ёш буғучани оч-наҳор қолдирмай она ўрнида сут бериб боқса-бовлиса, ҳаётини сақлаб қолса-ю, яна жаримаси нима? Йиртқич ҳайвон ёки ғаламис овчи чангалига тушганида ном-нишонсиз йўқолиб кетарди-ку. Унда кимни тутардинглар?”

— Бунинг қизиги йўқ. Энг муҳими — воқеа содир бўлган. Уни яшириш қийин, ҳамма билади. Бу ёғини кўй, эшиит. Буғучани ҳовлидан олиб чиқиб, машинага босдик”...

— Қизалоқ анграйиб қараб қолавердими?”

— У ердаги тўполонни кўрганингда, ақлинг шошарди. Қизча уйда йўқ экан, мактабда бўлган. Қизини-ку кўй, онасининг ўкириб-бўзлаганини айтмайсанми. Бошини урмаган девор қолмади. Эри бунчалик бўлишини кутмаган экан, довдираф қолди, уйдан қочиб чиқиб кетди. Онаси, буғчага қўшиб ўлигимни олиб кетинглар, қизалогим — ёлғиз фарзандимнинг фарёдига тоқат қилолмайман, деб ер муштлайди”.

— Бир ёввойи ҳайвон деб, бечора онани шунча хўрладингларми?”

— Ҳамма гап шунда-да. Улар ер юзида жуда оз қолган: юз, юз элликта. Бор-йўғи. Одамлар уларни тутиб олишиб, ўз бил-

ғанларича бокишиша, ҳаю-ҳавас ҳовли безаги қилишса, овчи эса кўрган ерида отса, бу антиқа ҳайвонлар қирилиб битади".

— Кейин директор уни менга топширди. Сулувой, жуда қимматга тушган асл зот, деди. Қизалоқ гоҳ отаси, гоҳ онаси билан тез-тез келиб туришарди. Отаси „Бир кун келиб, сенинг буғучанг улкан, шоҳдор, чиройли буғу бўлади. Айри бутоқ шохлари кучоғингга сигмай кетади, унга Айришоҳ, деб от қўямиз", деган эди. Шу от қолди. Қизалоқнинг тасаввурига отаси каромат килган улкан буғу ҳеч сигмасди. У уни Айриш, дерди."

— Кейин Айришни ҳам, у туфайли қизалоқни ҳам яхши кўриб қолдинг".

— Бу ҳам рост. Опа-сингил тутиндик. Ёввойи ҳайвон аёл зотига жуда пайванд келаркан. Эркакка нисбатан аёлга тез ўрганади".

— Аёллар — олам. Уларда илоҳий куч бор."

— Айриш бизнинг биринчи фарзандимиз эди".

— Ошириб юбормадингми?"

„Нега энди? Кўп сут ичган мечкай боламиз ўша бўлди-ку.

— Биз ҳалак, бир фляга сут, қоп-қоп оқ жўхори кўтарган совхоз директорининг шофёри ҳалак..."

— Ҳа-я, ҳаш-паш дегунча уч йил ўтди-кетди".

*
* *

Директор Суяр Суюнни кабинетга чорлаган бўлса-да, негадир гап очмас, брелок қаламтароши учи билан тирноклари орасини тозалар, кимсасиз ҳовлига кўз қирини ташлар, орачорада дераза ёнидан бир-бирини қувлашиб, дупур-дупур чопиб ўтаётган ит ва буғу шовқинини эшитганда, кулимсираб қўярди. Суяр Суюн дераза ёнидаги курсида ўтирад, директорнинг оқ оралай бошлаган қалин тўлқинли сочларига тикилар, соқолини ҳар эрта қиртишлаб оладиган чиройли юзидан бирон-бир фикр уқиб олишга уринар, неки топшириқ, иш бўлса йўл-йўлакай, оёқ устида айтишга одатланган Аҳадовнинг шу топдаги ўйчан ҳолатидан ажабланар ва мавҳум даргумонликдан сикиларди.

— Баҳор келди, Суяр ака, — деди директор брелок қаламтарошни буқлаб чўнтағига соларкан, тирсакларини столга тираб ўрмончига тик бокди: — Эшитяпсизми, Сезгир вовулляяпти?

— Айриш кўп тегажаклик қилаяпти унга.

— Демак, ўз тўдасини қўмсаяпти.

— Ишқилиб, қилиқ чиқариб қолди: гоҳ шоҳ ташлаб дарахт сузади, гоҳ туёқ уриб, ер тепинади.

— Ҳайвон ҳам улғайиб вояга етса, инсон сингари қавмига талпинади. Камолга етгани шу. Бир фарқи бор — ҳайвоннинг умри қисқа бўлганлиги учун, қавм қадрига барвақтроқ етади. Инсон сингари бепарво бўлса, улгира олмайди. Табиат бунинг ҳисоб-китобини азалдан бичиб қўйган.

— Шўхликлари бирам ёқимли...

— Биламан, фарзанддек бўлиб қолган. Фарзанд — пайванд. Айриш сабаб Сулувой билан апоқ-чапоқ турмуш куриб кетдингиз. Ҳамма ҳавас қиласди.

— Бир-бирига жудаям ўрганиб қолишган. Қайси куни сузиб охурни бузиб ташлабди. Қарасам, лой қориб охурни суваялти. Чидаганга чикарган, дедим. Фарзанд кўрслик қиласди, шўхлик қиласди. Фарзанд бўлсанг шўх бўл, шўх бўлмасанг йўқ бўл, деган нақл ҳам бор, дедим. Қайси куни Ойноввот келган экан. Хотин-да, киздан уялмай-нетмай ҳасрат қилаяпти... Мен, хой хотин, кўп ҳам куйинаверма, бола туғмадим, деб. Сенинг йўриғинг бошқа, каминг йўқ... Сўнгра гапингизни эслатдим.

— Қайси гапни? — директор хушёр тортди.

— Афсонавий ўғил вояга етказяпсизлар, деганингизни.

— Ҳа. Афсона чакалакзорида яшаш — бу аввал ибтидо. Ойноввотга бир қаранг, нима етмайди унга? Гўзал, хулқ-атвори аъло, билими пухта, келажаги равон. Ҳаёти бекаму кўст. Барабири, Айриш деса жонини беради.

— Ойноввот бошқача қиз. Айриш у ёқда турсин, Сулувни ҳам бошига кўтаради.

— Бунинг ҳаммаси меҳр-муҳаббат оқибати. Орамизда меҳроқибат уйғотишга неки қодир бўлса, қадрлашга лойик... Бир куни Айришни эркалаб турсам, ёнимда Ойноввот. Каердан пайдо бўлди, билмайман. Ўзиям қизмисан қиз бўпти-да. Унга соҳиб чиққан йигитнинг ошиги олчи. Ўқтамлигини айтмайсиз: тагин ўйламанг, Айриш учун кўнглида гина сақлаб юргандир, деб, мутлақо, деса бўладими. Мактабни бу йил тугатаркан. Ветеринар бўламан, рози бўлсангиз, кўриқхонада ишлайман, дейди кулиб.

— Кўз тегмасин-да. Ақлли қиз.

— Суяр ака, маслаҳат бор эди. Чакиртирганимнинг бойиси шу. — Директор ўрнидан туриб, дераза ёнига борди, ўгирилиб белини токчага тиради-да, давом этди. — Билмадим, қандай қабул қиласиз буни. Тилим ожизлик қилаётган бўлса-да, айтмасдан иложим йўқ. Сизни мулоҳазали, ўйловли одамлигинингизни биламан ва мени тўғри тушунасиз, деб ишонаман... Оғир, жуда оғир. Баъзида ўзимиз истамаган ҳолда принциплар курбони бўлиб қоламиз. Бир муаммо мени қийнайди. — Раҳмат Аҳадов столга тақаб қўйилган суюнчиқли стуллардан бирини

судраб чикарди ва Суяр Суюн рўпарасига тўқиллатиб қўяркан, унга ўтириб олди. — Мана, ҳозир Айриш уч ёшга кирди. Борингки, бешга, ўнга, йигирмага киради, дейлик. Ҳаммамизни кувонтириб, севинтириб эркатойлигича қолади. Келиб-кетадиган меҳмонларга кўз-кўз қилиб мақтанайлик ҳам, ўз ишимизга сидқидилдан жон куйдиришимизни амалда исбот ҳам қилдик, дейлик. Аммо бундан Айришга нима фойда? Уни шу ерда тутиб туришимиз табиатнинг буюк қонунларига зид эмасми? Инсонгарликка хилоф эмасми? Башарти иш сиз билангина битганида-ку, бунчалик ташвиш чекмасдим. Лекин орада Сулув бор... Шошманг, охиригача тингланг. Ўлайвериб, бошим қотиб кетди. Биласизми, нимани эсладим. Эскидан қолган бир ақида бор: рўзгор қурмаган эркак ёки аёл табиатнинг наъшу намосидан бебахра қолса, гуноҳи азимга ботган бўлади. Ҳатто тул колган онага турмуш қуриш маслаҳатини бериш асл фарзанд учун ҳам қарз, ҳам фарз ҳисобланган. Пушти камар — ҳаётнинг узилмас риштаси.

— Ҳайвонот боғига...

— Асло! У ҳолда бунча ташвиқот, тутокишига зарурат бўлмасди. Бошқача йўл тутамиз: Айришни ўз тўдасига қайтарамиз. Ҳа, ўз қавмига, тўдасига.

— Нобуд бўлмасмикан, ҳойнаҳой, у инсон тарбиясини кўрган, тайёрига ўрганган. Табиат эса мурувват, раҳм-шафқатни тан олмайди, ялтоқликни хуш кўрмайди. Буғуда она сути, кундалик табиий турмуш тарзи билан вужудга сингадиган хислатлар йўқ. Мослашомласов.

— Назаримда, фурсатни унчалик бой берганимизча йўқ. Айриш ёшидаги ҳайвонлар ёввойиликка тез киришиб кетади. Қўмаклашамиз. Фақат буни Сулувга, қолаверса, Ойноввотга ҳам ётиғи билан тушунтиринг. Бу ҳам осонликча кўчадиган иш эмас. Бир гўдак фарёди бизга сабок.

*
* *

Беозорликда хокисор буғу ва Сулув бир-бирига ўхшар, бир-бирини тўлатиб туришарди. Ўйғун муносабат, илиқ меҳр ва илҳақлик нури билан йўғрилган турмуш тожи узра қора булат кўланкаси айланаётганини ҳар иккала зот ҳам билмасди. Вақт ўтгани сайин кўланка қуюқлашар, Суяр Суюннинг усиз ҳам хира кўнгли баттар хуфтон бўларди. Айришнинг бир умр уларга боғланиб қолмаслиги, қандайдир ё хуш, ёки нохуш қисмат кутаётгани аён бўлса-да, бефарзанд аёл меҳр дийдасига тўсатдан бериладиган зарба уни чўчитарди.

— Ётмайсизми, вақт ҳам алламаҳал бўлди, — деди Сулув ой нури тушиб турган столга тирсакларини тираб, чап қўли билан бўйнини қашиётган эрига.

— Негадир, Айриш безовта. Охурига беда ташлаб келдим. Оқ жўхорига ҳам тегманти.

— Иштаҳаси илгаригидек эмас.

— Зерикаяпти. Ҳайвон-да, ҳайвонни қанчалик парваришила-ма, тўдасига талпинади.

— Ундей деманг. Нега энди Айриш ҳайвон бўларкан. Уни афсонавий хилқат, деб эркалайдиган ким? Ҳайвон деганингиз нимаси?

— Ҳар нарсанинг ибтидоси ва ниҳояси бўлади, — деди оғир хўрсиниб Суяр Суюн.

— Кўп ҳам унга айб тақайверманг. Ўтган йили баҳорда қўйиб юбордиларинг. Тўдасига кўшилди. Елди-югурди, ҳовуридан тушди ва ҳаммани ҳайратга солиб туз еган хонадонига қайтиб келди. Ўшанда мазах қилувдиларинг, нотавон, тўдасидан туртки еган шўрлик, деб.

— Унда ёш эди. Сен берган сут таъми оғзидан кетмаганди. Энди эса ўз кунини кўришга қодир. У иликларидағи кучни, томирларида оқаётган қонни ҳали туйганича йўқ. Томошани кеинин кўрасан.

— Кўйинг ваҳимангизни. Ундан кўра, ётиб дамингизни олинг. Суяр Суюн ечиниб, ўрнига, хотини ёнига кирди. Бошини Суловнинг юмшоқ билагига қўйди.

— Айришнинг зерикаётганини директор ҳам сезипти.

— Ер остида илон кимиirlаса билади у. Кеча симтўрни чертиб туриб, сизнинг юмушингиз космосга одам учираш билан teng, деди. Фақат тескари томонга, ортга униши керак эмиш. Нима бало, Айришни ҳам учирмоқчимисиз, дедим. Сезиб турибман, ораларингда қандайдир сир бор. Яширяпсиз.

— Сулув, сендан бекитадиган қандай сир бўлиши мумкин. У раҳбар одам, узоқни кўриб иш қилмаса бўлмайди.

*

* *

Суяр Суюн Суловнинг хўрсинишидан ва ҳаш-паш дегунча учийил ўтди-кетди, деб ўксинишидан умр, у билан боғлиқ энг кутлув кунлар ўтиб кетганлигига иқор бўлди-ю, юраги ачишиб, зирқираб кетди.

— Аёл қалби эркакникига нисбатан юмшоқ, шафқатли бўлишини яна бир оғир кунда ҳис этдим. Ўшанда авжи баҳор эди. Айришни Тўйинтоққа олиб чиқдик. У билан хайр-хўшлашгани Ойноввот, унинг ота-онаси ҳам келишиди...

„— Айришнинг қулоғига қиздирилган чўғдек тамға босгандарингда аъзойи баданим қақшаб кетди. Инсон ҳам шунчалар бешафқат бўладими?.. Ўшанда билиб-бilmай бир ишни тўғри қилдиларинг: тамғани босган заҳоти Айришни қўйиб юбордиларинг. Акс ҳолда, у оғриқ унитилгач, яна одамларга ўрганиб қоларди. Изидан неча сой, жилға ошиб чопган энг азиз халоскори Ойноввотга ҳам қайрилиб қарамади. Орияту мағурурликда ягона зот“.

„— Сен ўшанда яна бир нарсани билмадинг. Бу директорнинг ўйлаб топган режаси эди. Эшит. Бу тоғлар азалдан хонгулларнинг ўтлоқ жойлари. Сўнгги асрда кўп қирилди. Эски тоғ сўқмоқлари оша сурувларни бошлаб борадиган нар-навазлар биринчи бўлиб ёвузлик қурбони бўлишди. Сўқмоқлар унтилди. Ришта узилди. Айришни ўша ерга обориб, ўз эркига қўйиб юборишдан мақсад ҳам битта эди: тоғ сўқмоқларини кўрсинг, қўшилаҗак тўдасини зарурат туғилгандага ёки бирон фалокат юз берганида шу ерларга бошлаб келиши кўзда тутилган эди. Бу таваккалчиликдан ҳаёт занжири — қадимий сўқмоқларни ёдга тушириш эди“.

„— Айриш кейин бетламай кетди. Одамлар қўлига тушишдан кўркди. Шунча кўз ёшлар, қилинган меҳнат сувга оқди-кетди“.

„— Йўқ, Ундей дема. Орадан уч йил ўтгач, уни икки марта кўрдик. Катта сурув орасида юрарди. Ўз тўдаси, қавми...“

„— Барibir, изсиз йўқолди“.

ТЎРТИНЧИ БОБ

Тўйинтоғ билан адирликлар жанубга — Аму сари чўэилган сайин пасая боради. Тоғ ўркачи ёхуд бирон баландроқ адирлик устидан атрофга назар солған киши пастда қўёшнинг олмос нурларига чўмилиб, оппоқ тасма бўлиб ётган улкан дарёни кўради. Ҳаво сал исиди дегунча, дарё соҳилларидан кўтарилиган совуқ эпкин тоғ ва адирликлар оралиғидан эслан илиқ шабада билан кураш тушади-да, ортга — илиқ шамол маскани Тўйиннинг овлоқ сайхонликларига бир-бирини кувлашиб кетади. Дастваб сезилмай ҳаракатга келган бу шамол тоғ тўшларига етгач, тобора шиддатли куч касб этади. Шу тоққа хос бу шамолни „Тўйиннинг чаппаси“, дейишади. Бу шамол эсмаган кун камдан-кам бўлади. Йилнинг барча фасллари унинг учун барibir. Оралиқка тушиб олган бебош шамол то Боботоғнинг қўйпешона ўмровларига шаҳд билан урилмагунча шиддат билан эсади, сўнгра эса кекса тоққа зарб билан ташланиб, қаттиқ панд егач, адирлик томонга бутун захрини сочади. Айниқса, баҳор кезлари ер селгиб, қизиган чоғлар унинг хуружи

аёвсиз бўлади. Кўз очиб-юмгунча катта-катта майдон яйловларни бўз қумга кўмиб ташлайди, йўлида дуч келган дўнгликларни ялаб-ямлаб ютади, пастқам сойларда чанг-тўзон кўтариб ўкиради. Ер ялаб увларкан, ясси тепаликлар тупроғини совуради. Шамол тингач, тупроқ орасида омон қолган қаттиқроқ жинслар ҳар ер-ҳар ерда дўппайиб, афтода қабристон манзарасини касб этади.

Кичик чилланинг бошида кунлар бирмунча юмшади. Тўйиннинг чаппаси кун оша эсар, қордан халос бўлган яланғоч намадирлар сиртларидан кўтарилаётган ҳовурни тўзғитарди. Дастлабки кунлари қуриган сассиқ коврак бошларининг қор устида чирпирак учиши, ўсимлик пояларининг сивизиқ чалишидан ҳадиксираган сурув қарийб ҳар куни, айни бир пайтда — пешинда эсадиган бу шамолга тобора кўнишиб борди ва охири парво қилмай қўйди.

Бугун эса шамол воҳа тарафдан эсди. Осмоннинг қути бузилди. Оқ-қорамтири булутлар карвони тоғ сари тўш ялаб, ўрмалаб келарди.

Айришоҳ қатъий қарорга келгунга қадар атрофга, йирокларга обдан сер солиб кўрди. Ҳаводаги кескин ўзгариш уни қаттиқ ташвишга солмоқда эди. Мабодо, сурункали қор бўронлари бошланса, эриган қор усти муз қатламига айланиб, юришни қийинлаштиради. Бундан ҳам баттари хас-хашак қор тагида қолиш хавфи юз берса, тирикчилик ҳам фавқулодда оғирлашарди.

У сурувдан четда қичишган елинини ялаётган она буғу ёнига борди:

“— Бўрон бошланади. Пана жой керак. Битикчашмага кетамиз”.

“— Мен ҳам шу ташвишдаман. Битикчашма узоқми?”

“— Тоғ кўлтиғида. У ер тинч. Бир замон жон сақлаганман”.

“— Қадим аждодлар ривояти у. Кўп афсона эшитганман.”

Сурув турнақатор бўлиб икки адирлик орасидаги сайхонликдан йўлга тушди. Тоққа яқинлашган сари йирик-йирик оқ-қора харсанг тошлар ўрнига майда шағал, кул тупроқ, сопол синифи каби палаҳса-палаҳса силлиқ, ялтироқ тошли торгина, тарам-тарам тароқ ўркачлар бошланди. Буғу туёқлари теккан тош-шағал дарада шилдир-шилдир акс садо берди. Шу алпозда бир чақиримча юрган буғулар дара тубида жилдираб оқаётган сувни кўришгач, тақа-тақ тўхташди. Жилғанинг ётиқ соҳиларида қадимий қўтонлар ўрни, кат-кат ясси тошлардан қаланган чалдиворлар кўзга ташланди. Кўнга замонлардан қолган бу инсон манзиллари буғуларни ғарифона сукут билан кузатмоқда. Қор кам тушган тошлоқ қияликларда момақаймок, қизилқиёқ, туюн

товорнларнинг тиззага урадиган хазонлари сарғайиб ётиди. Салюқорилаб борилгач, дара иккига бўлинди: бири қаттиқ жинслардан ўтмас бурчак ясаб тоғ томон бурилди. Жилғани коплаб олган шувокзор орасидан чашма оқмоқда. Булок эса тик баланд қат тагидаги камардан сизиб чиқмоқда. Қаҳратон қиш бўлишига қарамасдан, унинг халқоб кўлчаси атрофида ҳамон пажмурда кўкат — себарга ўсиб ётиди. Булоқнинг кунботиш тарафи тик зов бўлиб, турган-битган қат-қат кулранг, яшимтирижинслар. Устма-уст қалангандек сип-силлиқ бу ойнасифат палахса тошлар сой оқимиға қараб қия тушган. Қат ва тошларнинг емирилиб нурашидан тепада гумбаз пайдо бўлган.

Она буғу гумбаз тагини танлади. У ялтироқ, оқиш-кўкимтири тошларни туз хаёл килиб, қуруқшоқ ғадир-будур тили билан ялай кетди. Туз! Бугу учун бундан ҳам лаззатлироқ неъмат бўлармикан? Унинг сўлаклари бир зумда халта бўлиб осилиб турган лунжларини тўлдириб юборди. Буғулар сўнгги марта кузда Оролда қизғиш калла туз ялашган эди. Она буғу алданди. Бу тузмас, ялаганда ушалиб, кемтик тишлар орасига кириб қоладиган мўрт, биллурдек тош эди. Она буғу чучук-тахир таъмдан кўнгил айниб, мулзам бўлиб турганида тошдаги ғалати суратларга кўзи тушиб қолди. У хира, бодроқ кўзларига зўр бераркан, қизғиш, оч-қизил, пушти, сарғиш, жигарранг бўёқлар билан чизилган хилма-хил суратларни кўрди. Булар ўzlари сингари шоҳдор буғу галалири, бурама шоҳ кийиклар, отлар, морхўрлар тасвири эди.

— Айришоҳ, қаердасан?.Бери кел. Бу не мўъжиза?

Уч тарафи тоғ билан ўралган дара. Зов тепасидаги одамлар бир гала буғулар устига тош думалатишмоқда. Кимдир камон ўки ёғдирмоқда, найза иргитмоқда. Дара адоги бек, одамлар тўсишган. Ҳалок бўлган жониворларнинг кўл-оёқларини кулликлаб, ходадан ўтказишиб, елкаларида кўтариб кетишяпти. Ярим яланғоч чувринди одамлар гулхан ёқиб, буғуларни тириклай кабоб қилишмоқда...

— Буларни одамлар чизишган”.

— Бўёқлари ярқираб турибди. Кечагина чизишгандек. Улар шу ерда. Мени яна ваҳима босяпти”.

„Кўрқма. Бу ривоят. Айтдинг-ку ўзинг. Фақат тошга битилган ривоят”.

— Бунда одам бўлган. Яна келади”.

— Гумондорлик — кексалик аломати. Ривоятдан чўчима. Буни чизганлар тошда, тупроқда”.

— Рухим хавотирда”.

— Ваҳима қилма. Олам тинч. Бу тоғларда ёлғиз ўзимиз”.

Тун ярмида шамол тинди. Осмон чарақлаб, бодроқ-бодроқ юлдузлар кўринди. Дара салобати сукунат кучогида янада маҳоватлироқ кўринди.

Дара этагидан элас-элас эшитилаётган овозларни дастлаб Айришоҳ илгади. У чашма ирмоғи жиякларидағи алафлар устидан охиста юриб, овозларни тиникроқ эшитиш ниятида холироқ жойга чиқди. Тоғ дараларида салгина бегона товуш ва ҳаракат дарҳол сезилади, дара деворларига урилиб, акс садо бериб, тез ёйилади. Бўрилар хуружини тусмоллаб, қаттиқ хавотирланган Айришоҳ, мабодо, сурув хуркиб, пастига ташланса, тиғдор шоҳлари билан йиртқичлар сафини ёриб ўтиб, буғуларга йўл очиши чўтлаб турди.

Шағал тош шилдиради, бир оздан сўнг булоқ томонга ўрлаб келаётган нотаниш ҳайвоннинг оғир ҳансираши эшитилди. Хид олган айёр бўри. Нар-наваз бироз тинчланди-ю, бироқ синчковлиги ошиб кетди. Бемаҳалда йўлга чиққан бу тўда қандай ҳайвон экан? Сув ҳидини сезган баҳайбат қобон пишқириб олга интилди. У ирмоқка бел турган нар-навазнинг ер тепинишидан ўзига келди-ю, саросималаниб тақа-тақ тўхтади. Айришоҳ ўз сурувини иссик жойидан қўзғатган бу саёқ қобонга, унинг изидан келаётган ҳолсиз галани кузатиб турди-да, викор билан юриб, уларга йўл берди.

Тўнғизлар апил-тапил сув ичиб, кўк себаргаларга тумшук урган заҳоти қобон хириллаб, қисқа-қисқа ҳўрк-ҳўрклав галисини айланди-ю, дара бўйлаб шерикларини бошлаб кетди. Демак, чор атрофи битик, дейилган боши берк канорада тўнғизларгагина таниш сўқмоқ бор. Тўнғизлар шовқинига изма-из эргашиб борган Айришоҳ тоққа кўтарилиган тик ковак сўқмоқни кўрди. Бу, афтидан, ўркачлардан оқадиган сув йўли бўлиб, айни пайтда ёввойи ҳайвонлар сўқмоғи хизматини ҳам ўтарди. Зарурат туғилганда иш берадиган сўқмоқни топганидан севинган Айришоҳ она буғуга рўпара келиб, суйканди.

- “— Кўрдим. Тўнғизлар ўтди.”
- “— Юқорида сўқмоқ бор.”
- “— Нега чашма атрофида қолишмади?”
- “— Бизни авайлашди.”
- “— Йўқ. Бемаҳалда қарсилаган совуқда йўлга чорлаган нарса қўрқув, катта ҳадик”.
- “— Сезмадим”.
- “— Фаними изидан қувиб келаяпти. Узоқ йўл босиб адаштирган. Олислаб кетишди”.
- “— Тонгда қайтишади”.

- Йўқ. Битикчашма — қолқон. Қобон буни билади. Оёқ ил-
май тез кетди. Улкан тоғларга кетди".
- Кексалигинг тутди яна".
- Бу ер менга ёқмади. Кўнглим ҳамон безовта".
- Майли, тонгда манзилимизга қайтамиз".

*
* *

Сурув Оқ коялар воҳасига чошгоҳда етиб келди. Тўйин орти-
дан кўтарилган қуёш мусаффо осмон узра сузаркан, сийрак тоғ
ҳавоси бўшлиқларига нур сочар, эгри-бугри жилғани тунги
аёзда қоплаган қиласмиқ музни эритар, унинг соҳилларида бу-
гулар кенг ёйилиб, нам қора шувоқ, қизилқиёқ ва бурган банд-
ларини чилпид еб юришарди.

Одам билан ит баланд тепалик устида ўтиришарди. Бу ҳол буғу-
лар учун шунчалик кутилмаган тарзда юз бердики, улар тумта-
рақай қочишни ҳам, ўзларидек анграйиб, бақрайиб қараб тур-
ган одам ва итни томоша қилишни ҳам билмай қолишиди.

Сурув ҳам, тепадагилар ҳам тек туришар, улар орасидаги
нигоҳ ўйинида ғайритабиий, мўъжизакор кўз кўрмас сехрли
нур бир лаҳза иккала тарафни ҳам ром этган эди. Одамлар
дунёсидан хабардор Айришоҳ тиззаларини букиб, қорга яrim
белигача чўккалаган кимса юзига олмос назар ташлади ва шу
онда у одам кўзларида ҳайрат, шодлик, илоҳий қувонч кўрди. У
зўр-базўр юлқинаётган итнинг бўйинбогидан маҳкам тутиб ту-
ради.

— Айриш! — шабада сехри сингари тепалиқдан эшилган
бу садо жилға бўйларида нозик акс садо берди. Она буғу ўзи-
ни четга отди. Сурувда тўс-тўполон бошланди. Ит фингшиб, бор
кучи билан олға ташланди, ўз эгасини қор устида баҳузур суд-
раб, пастга чопди. У жилға жияигига етганда сакрамоқчи бўлди.
Одам итни тўхтатишга ҳарчанд уринмасин, эпини қилолмади.
Кайиш бўйинбогни қўйиб юборди.

— Айриш, қўрқма. Бу — Сезгир...Айриш!..

Одам қор капалаб, қор муштлаб қолиб кетди. Ит сойма-сой
осиби буғуларни қувиб кетди. Сўнг атроф тинчигач, жилғанинг
хилват соҳилларидан акс садо қайтди: Айриш...риш...иш...

*
* *

Узоқ югурушга ўрганмаган ит уч сой ошгач, тили кўкрагига
осилиб, қолиб кетди.

Буғулар тог ўрлаб илдам юриб боришар, онда-сонда анча
ортда қолиб кетган Айришоҳни бетоқат маҳтал бўлиб кутишар,
типирчилашиб, бир жойда туришолмасди.

Она буғу ётиб келгандың Айришохнинг қаншарини ялаб, юзига боқди, күзларига кўзи тушди-ю, хайратдан тисарилиб кетди.

- Нима бўлди? Кўзларинг бесаранжом, дардли?“
- Бола кўзларини кўрдим“.
- Қандай бола?“
- Инсон боласи. Сен у кўзларни кўрмагансан. Бола кўзи ҳам ана у одамники сингари ўткир, даҳшатли сехр“.
- Неки мавжудот бор — боласи беозор. Бола бўлгани учун ҳам шундай. Улғайгач, жонимизга қасд қилишади“.

Айришох пастга, қорайиб кўринган иланг биланг жилғага тикилди. У ҳаллослаб чопиб келганд сўқмоқ осмонида ўша садо ҳамон таъқиб этар, қадрдон ва олис, мушфик ва мунис товуш қулоклари тагида шамол алласидек тўлқинланарди: „Айриш!.. риш...иш“. Бу овоз бўшлиқдан келиб, унга етганида шиша зирапчалардек чил-чил синиб, бутун вужудига чўкар ва онги-ю қалбининг чуқур қатламларида жонўртар оғриқ кўзғарди.

— Одам ишончдан холи. Ёвуз дегансан. Тириклик қавмида уларчалик нокас зот йўқ. Ҳатто қондошига хусумат иллати факат шу қавмга хос. Қилмиши қалтис, мунофиқлик“.

— Йўқ. Аждодлар ўғити бу. Кўп таъна қилма. Инсон — буюк зот. Унга тиз чўккан ҳаёт“.

БЕШИНЧИ БОБ

— Бадбахт, ҳуркитиб юбординг-ку уларни! Сени ҳамроҳ қилган мен аҳмок.

Бир неча қадам ортда эгасининг дарғазаб кўзларига қарашга ботинолмай кетаётган Сеэгир жундор думини гажак қилиб вовуллаб юборди ва жонсарак ҳолатда ҳали бир замон ўтиришган тепаликдан ошиб ўтиб, кўздан ғойиб бўлди. Буғуларга ташланган пайтда ити уни бир зумда жилға ёқасига судраб борганида, қанчалар куч сарфлаганини ҳис этгач, Сеэгирга нисбатан қархи бирмунча босилди.

Итдан дарак йўқ эди. У тепалик пойидан бошланган кенг сайхонлика қанча тикилмасин, ит қорасини кўрмади. Ҳанузгача даштдаги оплок қорга кўникмаган, сал зўр бериб тикилса ёшовланиб қоладиган кўзларидан хавфсинди. У қор устига ўтириди-да, чўнтағидан дастрўмол олиб кўзларига босди. Сеэгир ҳеч ерда кўринмасди. Сайхонлик уфқида Октояга тулаш бетда қандайдир қора нуктанинг шитоб билан узоклашиб кетаётганини илғаб олди. Адашган лочин ёки олабош кузғун учиб юргандир, деб ҳаёлидан ўтказди. Орадан ярим соат ўтгач, ўша томондан акиллаб Сеэгир алпанг-талпанг қайтиб келди. У андишани аллақачон унугланган, ялтоқланиб Суяр Суюн ёнига келиб ўтириб олди.

— Нимани кўрдинг, бунча ҳаялладинг?

Ит ҳансираганича ҳамон Оқтов тарафга қаарди.

— Гапдан қолдинг-а, ярамас... Ол-а, яна бир марта буғулар ортидан ҳалигидек чопсанг бас: ё юрагини ёриб қўлига берасан ёки бу ерлардан түёғини шиқиллатишга мажбур этасан. — Суръ Суюн итининг пешонасини силади. Ит оғзидан буғ пуркаб, қипқизил тили билан унинг қўлини ялади. — Ҳа, майли, бу гал ке-чирдим...

— Чарчадингми? Ўзингдан кўрким сенга чоп, деди. Қани, кетдик. Бугунга етар. Ойпарчанинг кўзлари тўрт бўлиб кутиб ўтиргандир... Энди келишиб олсак. Ўйлаб туриб шу хulosага келдим. У кулоғинг билан ҳам, буниси билан ҳам яхшилаб тинглаб ол: сен билан Айриш орасидаги фарқ ер билан осмонча. Сенинг ношуд қавминг одамзодга мутъе бўлганига неча минг йил бўлди? Хонгуллар эса ўз эркини муқаддас билган танти ҳайвон. Сен ўзлигиндан йироқлашиб кетгансан. Ҳайт деса, думингни кисасан, у эса ойга сапчиди. Начора, қисмат. Ўз эркингни курбон қилиб, инсонга мутъеликни раво кўрган сенсан, у эрк ва озодлик деб ўқтам ва гўзал, ҳуркак ва мағрур бўлмасин, барибир таъқибда, мудом ҳадикда... Билсанг, бир пайтлар Айришга қайишиб гап қотганимда, Раҳмат Аҳадов роса маломат қилганди. Айтганим шу бўлдики, қўлга ўрганган ҳайвонга озодлик берманг, бошини тиқадиган жой тополмай қолади, чеккан азоб, қилинган меҳнат бир пул бўлгани гўрга-я, пировард нобуд бўлади, дедим. Директор эса менга бакрайиб қараб туриби-ю, ҳаёли бошқа ерда. Мен сичқонни мисол келтирдим. Ландовур, бошқа ҳайвон куриб кетганиди... Тўғри-да, у коронги ва зах инига мослашган, Қани, бор, ўйна, ёп-ёруғ, иссиқ хонада насибангни териб е, эркинг ўзинг билан, деб ўз ҳолига очиқликка кўйиб юбор-чи. Энг аввало, у ёруғликдан ўтакаси ёрилиб, ин излаб югурди. Қайга тумшуғини тиқмасин — ҳаммаси нотаниш. Ана шунда ўзи яшаган ним коронги ин ва кечалари қайдандир топган ташландиқ нон ушоғи унга жаннат инъоми бўлиб туюлади. Инчунун, ҳайвон-ку ўз йўлига, инсон ҳам шу куйга тушади... Директор ўзига келиб, демак, инсонга эрк берса, бошини йўқотиб қўяркан-да? Унга ҳамиша васий, ҳомий керак, демокчиз. Ўзига кўйиб берсангиз иш пачава. Мустақиллик берма, бадном бўлади. Уни ҳамиша йўлга солиб, бошқариб тур. Шундайми?.. Бўлмасам-чи! Рости ҳам шу-да. У ўсмокчилайди: хўш, бу ҳол бир йил, ўн йил давом этсин, борингки, авлоддан-авлодга ўтсин. Кейин-чи?.. Унда одамлар эмас, ҳалқ шунга мослашади. Максад ҳам шу-да, ўзи... Директор пешонасини чанглаллаганича, ҳай, шўрим курсин, деб юборди. Бир гапни айтди ҳали-ҳали тагига етолмайман: ҳомийликдан манфаатдор одам ишёқмас,

дангаса, текинтамоқ келади, борига барака деб қуллук қилишга ўрганиб қолади. Сиз ўзингиз ва атрофингиздагилар ҳаёт тарзи-дан келиб чиқиб фикр билдиридингиз. Ўз фикрингизда қолаве-ринг, аммо Айришга эрк берамиз. Мунозарамиз очиқ қолади. Башарти, эрк ва озодликка чиқкан Айриш ҳалок бўлса — мен ютқазаман; у ризқ-рўзи, табиий шамоили ва қонуниятлари асо-сида кун кўриб кетсасиз ютқазасиз... Мана, энди ўйлаб кўрсам, директорнинг гаплари жўяли. Ана, Айриш соғ-саломат, дуркун яшаб юрипти-ку. Кўзим кўрмаганида ишонмасдим. Яна қандай кун кўраяпти, дегин. Илгари кўпроқ емиш еб кўйса ҳазм қилол-май ҳақиллаб, ётоғон бўлиб қоларди. Энди коматига қара. Бай-бай-бай. Шоҳларини айтмайсанми, чамбарак, оламга кучоқ очиб турибди. Ёқут кўзларидан чакнаган ўт-олов-чи? Бунга маҳлиё бўлмаган инсон бу оламда топилмаса керак. Бўйнидан қучоклаб ўпсанг, кўкларга кўттарсанг. Шунда ёнимизда Сулув билан Ойнов-вот туришса... Қисқаси, эрк деган ақидани тушунмас эканман. Кўзим очилди.

*
* *

Сой ўркачига кўтарилишгач, олисда — Оқтөв этагида вагонча кулба кўринди. Сезгир бир дақиқа қадалиб тикилди-да, чопа кетди.

— Ҳа, тиниб-тинчимас-е, соғининб қолдингми Ойпарчани. Чоп, суюнчи ол. Айришни кўрдик, де.

Суяр Суюн қалин қор ўюмларига кўкрагигача ботиб, сакраб-сакраб бораётган Сезгирга завқ билан қаради. Манзилга ярим чақиримча қолганида, вагонча ёнида яна бир қора бино бўлганини ва итнинг қор сачратиб қайтиб келаётганини кўрган Суяр Суюн қадамини тезлатди.

— Ҳа, нима бўлди сенга? Думинг ер хидламай қолди... А-а, катта кептими? Яхши.

Газик машинаси ойнасига сачраган лойни қуруқ иркит дока билан артаётган шоффёр йигитга қўл бериб саломлашгач, этиги учлари билан вагонча ғилдиракларига тепиб корини қоқди-да, эшикни очиб ичкарига кирди. Қоврилган пиёз гуп этиб димоққа урилди.

— Келсак, сиз йўқ, ўзимиз кайвонилик қилиб ётибмиз, -- деди директор кул юқкан қўлинин узатаркан.

— Келишингизни кўнглим сезиб эди-я. Айтдим, Сезгир тушмагур нега мунча ховлиқади, десам, гап бу ёқда экан.

— Қўйинг ўша алвасти бўрибосарингизни. Бир қўкрак килди — ағдарилиб тушдим. Шоффёрнинг олдида уялтириб қўйди.

- Кечиринг, бу ҳайвонни. Соғинган-да. Мен бўлса, эзмалик қилавериб жонига тегиб кетганман. Олишмасам, эркалатмасам. Ётибди-да бўрдоқига боқилган сўқимдай семириб.
- Қалай, қийналмаяпизми? Афт-ангордингиздан кайфиятин-гиз ёмонга ўхшайди.
- Янглишмадингиз.
- Бугун шанба куни экан, бир сизни кўриб, ҳам дашт ҳавосидан нафас олиб яйраймиз, деб келавердик-да.
- Яхши қипсиз-да. Бизда эса катта янгилик. Бугун Айришни кўрдик.
- Наҳотки? Йўғ-э...
- Орамиз ҳам унча узок эмас — юз эллик метр бор эди. Тўйин жуда ёкиб қопти шекилли, эҳтиёткорликни ҳам бир четга йигиштирган. Атрофида бир гала урғочи буғу.
- Ҳарам денг. Қандай танидингиз?
- Қулоғидаги тамға нордай бўлиб қорайиб турибди. Ҳа, ни масини айтасиз, жонивор роса етилибди. Хонгулмисан — хонгул. Шоҳ ҳам болалаб кетган.
- Аттанг, эртароқ келганимда кўрарканман-а.
- Сезгир ахмоқлик қилмаганида, балки қочмасди. Бу ярамас мени улоқ қилиб судраб кетса бўладими. Менимча, у таниди, аксинча, „вав-вав“лаб ҳуради.
- Рахмат Аҳадов челяқдаги қўмир устида қўл чаяркан, ҳаяжонини яширишга уринмасди:
- Ҳаммаси айтганимиздек ўша йўрик бўйича бораяпти. Энди гал қилсак арзиди, асос бор. Буни амалий иш дейдилар... Эҳ, қани эди, узокдан бўлса ҳам бир кўрсам, армоним қолмасди.
- Ҳали кўп кўрасиз.
- Айтганингиз келсин. Туф денг, кўзингиз тегмасин, — директор ўрмончининг елкасига қўлини қўйиб кулди. — Жондор-пондор, овчи-повчига йўлиқмаса бўлгани. Акс ҳолда, ҳаммаси чиппакка чиқади... Ҳа, айтмоқчи, нега карабинни олиб юрмайсиз? Қарасам, бурчакда турибди. Эшик очиқ. Ўзингиз бир кунлик йўлга чиққансиз.
- Рахматжон, бу даштда ким ҳам бор. Келибманки, одам, бўри у ёқда турсин, ҳатто қуш учганини кўрмадим.
- Барибир, Суяр ака, карабин ов милтиқ эмас. Худо кўрсатмасин..
- Ҳақсиз, хаёлдан кўтарилиб кетипти.
- Мен эса сизга икки кути ўқ, дурбин келтирдим. Шошганда лаббай топилмайди, деганларидек, кўч-кўчда ёддан чикиб қопти.
- Дурбинни келтириб боплапсиз, — Суяр Суюн дурбинни филофдан олиб, ойналарига пуллади, енги учи билан артиб, қайтиб жойига солди-да, бурчакдаги илгакка осди.

- Яна бир гап: йўлда кажавали мотоциклъ изини кўрдик. Битикчашмадан чиқсан шекилли.
- Йўғ-э! — Суръ Суюн дарҳол ҳушёр тортди.
- Адоқдан Оқтов ошиб, катта йўлга чиқсан. Вагончани кўрган-да, атайлаб узоқдан четлаб ўтган. Лекин Битикчашмага қаердан ошиб ўтганлиги номаълум.
- Ий-е, буни бугуноқ аниқлаймиз.
- Бугун кўйинг энди, вақт пешиндан оғди. Кор ҳали-вери эримайди, излар туради. Биз ҳам кеч тушмай қайтмоқчимиз.
- Ким бўлди экан? — лабларини чимириб, ялаётган Суръ Суюн ҳа деб елкасини учирарди. — Ақлим бовар қилмайди. Бирон-бир шарпани сезганим йўқ.
- Пихини ёрган шундай браконьерлар борки, гала бўрининг кўлига сув қуяди. Уч кунлик масофадан ҳид олишади.
- Шошманг, шошманг, изни Оқтов тарафда кўрдим, дедингизми?.. Ҳа, бўлди, тушундим. Ҳали Сезгир бир қорани кўриб чопган эди, ўша экан. Мен лочинми, қузғунми, деб гумон қилгандим.
- Баракалла, ўзингиздан қолар гап йўқ. Эҳтиётлик чорасини кўринг. Ёки бирон шерик қўшайми? Ёлғизлиқдан кўра...
- Нима, гўдакманми?
- Ким билади, дейсиз.

* * *

Уйқуда ҳаловат бўлмади. Айқаш-уйқаш тушлардан босинқираб уйғониб кетди. Дераза томонга айланиб ўтган ой нури столга тушиб турарди. Оғзи қақраб, қуруқшиб турган бўлса-да, столдаги чойнакни узалиб олишга эринди. У ўзини руҳсиз, толик-қан ва ланж хис этди.

Суръ Суюн одатига кўра, кайфиятида содир бўлган ўзгаришларни мулоҳаза қилишга ўтди. Ахир тескариси бўлиши керак эди: шунча йил дийдорига интизор Айришни кўрган бўлса, бу воқеа устига директор келган бўлса, дилхасталикка бало борми? Кулба бирров гавжум бўлиб, яна ҳувиллаб қолганиданми? Йўқ. Ёлғизлиқка ўрганиб кетган. Бундай эмас. Кимдир уни ҳўрланган, у эса бўзрайган куйи бошини ҳам қилиб, тахкирга тоқат қилганидан нафратланаётган сезарди ўзини. Мустар хаёлларга қанчалик берилмасин, мушкули баттар оғирлашар, азият чекарди. Бу биринчи марта эмас: қасдма-қасдига ҳамиша унинг бирон-бир қувончига албатта кутилмаган кўнгилсизлик ҳам соядек эргашиб келарди. Бундан у ҳатто ирим қиласиган, хавфси-райдиган бўлиб қолган.

У ҳаммасига ўзим сабабчи, деган хулосага келди. Гап миликда эмас, бунга директор алоҳида шайма қилган бўлса-да, маъно бошқа ерда. Ўзи иллат деб тан олган ношудлигида. Ҳой, сен бу ерга нима мақсадда келгансан? Наҳотки, юмушинг бехуда хаёл суриш-у, табиатга маҳлиё боқиш бўлса?.. Шу тарэда ўзини тергаб турганида эди, бурни тагидан ўтган мотоциклчиларни кўрган бўларди. Келиб-келиб кимдан, директордан бу хакда эшитса-ю, алам қилмайдими. Суяр Суюннинг жиғибийрони чиқиб, ожизлик ва журъатсизлик алами ўтида қоврила бошлади.

Токчадан устига сакраб тушган Ойпарча унинг хаёлларини тумтарақай бузиб юборди. Бошқа одам бўлганида, жаҳл билан мушукни улоқтирган бўларди. У эса юмшоқ жунларини силай кетди. Хўрсинди. Эчки пўстак устида ғужанак бўлиб ётган Сезгирга бўқди. Сичқондан фил ясама, деб ўзини тинчитган бўлди.

— Ойпарча, нима десанг дегин, лекин директор барибир ҳак, —деди у хулосасида қониқмай. — Лапашангликка нукта кўйиш керак. Мустақил бўлиш пайти келди. Акс ҳолда, бесамар хаёллар, умидсизлик қули бўлиб қоламиз. Эгачинг Сулов нима дерди, ёдингдами? „Сиздан ўрмончи чиқмайди, кўнгилчан, шафқатлисиз, директордан ўрнак олинг.“ Оролда бир бўғоз буғуни бўрилар тилка-пора қилиб кетгани устидан чиқиб, роса ғам чекканимда шу сўзларни яна тақрорлади. Аёл киши эркакка нисбатан юмшоқкўнгил деб юрсам, у менга дакки бераялти. Кўнгилга буориб бўладими. У ахир шиша идишга ўҳшайди: минг авайлаганинг билан бир бор синса бас, вайрон бўлади-кўяди. Сулуви тушмагур, одамнинг қалбига кириб кетарди-я. Ҳалок бўлса бўлти-да, табиат қонуни бу, деб юпатмоқчи бўларди. Мен, забонсиз ҳайвон ҳалок бўлаётгандага фигон чекмайди, қавмлари уввос кўтариб дод-фарёд қилмайди, сассиз бўлгани учун ҳам бу фожиага бардош беролмайман, дедим. Инсон ғам-ҳасратини дод-фарёд билан чиқаради. Ҳайвон-чи? Нидосиз ҳалокат — ҳайвон зоти учун ялпи қисмат. Буни оддий ҳақиқат, деб виждан оғриғимизни босишга тушамиз. Оддий ва беписанд ҳақиқатлар ҳамиша хор: оёғинг тагида-ю, аммо кўз илғамайди. Ҳаётда ҳақиқат бўлмаса, яшашнинг нима қизиги бор?

ОЛТИНЧИ БОБ

Орадан ҳафта ўтди. Табиатда тўлғоқ бошланган эди. Буни тиззага урадиган қор таги эриб, пастга чўкканидан, ҳаво босими тез-тез ўзгариб турганидан, илиқ мўътадил оқимларнинг тақрорланишидан сезса бўларди. Лекин табиатнинг бу бекарор ўзгаришлари кўпни кўрган Суяр Суюн назаридан четда, зохирда

содир бўларди. У эса кўрган ҳодисаларинигина таҳдил қилишга одатланган эди.

Пешиндан оққач, изғирин шамол тўхтаб, сийрак лайлак қор ёға бошлади. Суяр Суюн осмон раъйига қараб, қорнинг узоқ ёғмаслигини, ҳавонинг юксак қатламларидағи шамол пора-кандада қилган булулларни Боботоғ сари жадал суринб кетаётганини кўрди. У гир айланиб, капалак каби ерга оҳиста қўнаётган енгил қорга қараб турди ва манзарани очиқ жойда кузатишни мўлжал қилиб, вагондан чиқди. Унинг ортидан Сезгир сакради.

— Мен билан киндинг бир-да, а? — деди у ичи жун пўстини енгларига қўл суқаркан. — Тўғри қиласан, Сезгир, кўриб қолиш керак. Балки бу сўнгги қордир. Ўзи-ку, қишига ишониб бўлмайди. Унинг бир куни ҳам қиши... Юр, кадрдан тошимиз устида ўтириб, маза қилиб томоша қиласиз.

Сой бетига ўрлаган ҳам эди, Сезгир тўхтаб, ортга қаради.

— Нима бўлди сенга? — Суяр Суюн киприкларига қўнаётган қордан кўзлари пирпираётган итнинг жундор бўйнидан тортиб, тақимига босди. — Пайқабсан-да, дарров.

Ойпарча улар изини хидлаб алпанг-талпанг келар, совқотган панжасини кўтарганда, мувозанатини йўқотар ва қорга бикинлаб қоларди.

— Бизга-ку зарур, сенга ким қўйипти, — Суяр Суюн қордан фарқ қилмас оппоқ бўйнини кўтариб ҳаво ҳидлаётган Ойпарчанинг белидан ушлаб қўлтиғига соларкан, пўстини билан бекитди. — Биламан, сен бизни яхши кўрасан. Хонада уззуқун қолиб зерикишинг ҳам сир эмас. Бизга қўшилиб юргинг кела-ди. Начора. Кимдир уйда бўлиши шарт. Бўлмаса, у ҳувиллаб қолади. Бир оз сабр қил, баҳор келсин, сени ҳам ҳамроҳлик-ка оламиз, — у вагонча эшигини очиб, қўйнидан мушукни олдида, думига бир уриб, ичкарига киритиб юборди ва эшикни зичлиб ёпди.

У тошга ўтираркан, ёнгинасига чўнқайган Сезгирнинг хўл бўйнига пўстин этагини ташлаб, қучоқлаб олди.

Атроф жимжит. Сийрак қор ҳам унсиз, сукунат салобатини оширади. Қорнинг ёғиши ёқимли. Шу онда у шовқин-суронли шаҳарни, ишдан қайтаётган шошқалоқ одамларга гавжум кўчалар ва озиқ-овқат магазинларидағи хос ҳидларни қўмсади.

Термизда қор камдан-кам ёғади. Сулув қор ёққан маҳаллар шаҳар кўчаларида яёв кезишини яхши кўради. Шундай кезларда Сулувнинг ички ҳаяжон нуридан ёлқинланган чехрасига боқаркан, андиша туфайли бикиқ ва факир вужудида бир умр саклаб юрган хуфёна фазилатларни кашф этар, ҳар бир аёл ўз чиройини билмоги учун қор ёққан онлари кўчаларда

юрмоги ва ўткинчи йўловчиларнинг ўз юзига қай сук билан назар ташлашидан хуоса чиқарса бўларкан, деган мuloҳазага бораради.

— Мана, ҳозир ҳам ёнимдасан, йўқ, ҳам борсан, ҳам йўқсан. Одам бўшликини тўлғазиб турган тирик жон. Мен айни пайтда маконда мужассам. Сен кетдинг — бўшлиқ эса ўша-ўша ҳоли-ча, пинагини бузгани йўқ. Ҳатто шу тошчалик ҳам эмасмиз. Тирик жон бунчалар мўрт, сўнувчан бўлмаса! Кўзларимни юмсам, армонли хаёллар чангальзорини кўраман. Унда адашиб қолиб, бу афтода хаёллар хабарларида нима излаб юрибсан, деб ўзимни сўроққа тутаман... Атроф шовуллаб қолди: Айришинг чамбарак шохлари хаёлот чангальзори узра ўқтам сузиб бормоқда. Айтмоқчи, Айришинг шу ерда, лекин кўз ўнгимда йўқ. Тўйиннинг қайси бир ўнгирида ҳарам қўриқлаб юрибди. Бир-бирларингдан нима фарқларинг бор? Ёнимда бўлмасаларинг. Фақат алам қиласидигани шуки, сен борган манзил аниқ, Айришники эса номаълум. Мавхумият баъзида умид уругининг униб чиқишига замин бўлади. Ҳамон умид изидан қувиб юрибман. Балки бу шунчалик баҳона, никобдир, аслида ниятим сен билан висол учрашмок. Айриш қисмати сеники, меники бўлиб қолди. Арзанданг осмон қулаб тушса ўзимнигина эмас, сурувимни ҳам сербутоқ шохларим билан тўсиб қоламан, деб керилиб юрибди. У ҳали ҳам кеккайган, ёш. Шунинг учун ҳам мардона яшаш оғир қисмат эканлигини тан олгиси келмайди. Эҳ-ҳе, унинг йўлларида канчадан-канча хавф-хатар, пистирма, тўсик. Шунча йиллар ҳаммасига чап бериб, бенаво, кутсиз тўқайларга безак бўлиб, омон юрибди. Бугун эса у Тўйинда. Балки у ҳам кўп жаҳонгашталиқдан сўнг ҳақиқатга бош эгандир. Фақат емиш-қумортқи эмас, сенинг меҳринг, кароматингни қўмсаб келгандир. У туфайли мен ҳам келдим. Интизор қўмсашлар масофа, макон билмас.

*
* *

Саҳарга яқин ит фингшиб, эшик тирнади. Уйғоқ ётган Суяр Суюн:

— Эшикни кўп тирнама, бўёғини кўчириб юборасан. Сабр қил, ҳозир очаман, — деди.

Вагонча эшигидан сакраб тушган ит зим-зиё қоронгиликка ўзини урди. У ҳа деганда қайтавермади. Кул ранг узун пўстини елкасига ташлаб, эшикни очган Суяр Суюн ҳанг-манг бўлиб қолди: Тўйиннинг сип-силлиқ қорли ўркачлари устидан сутдек оқ тонг ёришиб келарди. У атрофга анча қулоқ солиб турди ва қорни ғарч-ғурч босиб тепаликка кўтарилди.

— Маҳ-маҳ, Сезгир! — овоз берди у. — Нима бало бўлди экан?

— Итдан садо чиқавермагач, дикқати оша борди. — Қизиқ. Айриш шарпасини сездимикан? Ҳайвон зоти бир-бирини тез танийди. Апок-чапоқ бўлиб қувлашиб юрган бўлса-я.

Битикчашма тарафдан келаётган Сезгирнинг қораси кўринганда, воҳа тонг шафағидан уйғонган эди. Ит унга бир неча қадам етмай тўхтади, келган йўлидан кўз олмай гоҳ чўнқаяр, гоҳ думи билан қор супиради.

— Пишириб қўйғанмикан, еб келдингми? Қилиқларинг менга ёқмаяпти. Ўзбошимча бўлиб кетаяпсан. Қани, уйга кирайлик-чи.

Тумшуғини эшик тирқишидан олмай, думини ликиллататётган Сезгир киройи овқат ҳам емади. У нимадандир бесаранжом эди. Суяр Суюн нари-бери нонушта қилган бўлдида, карабинни елкасига ташлаб, дурбинни пўстин тагидан бўйнига осиб олди.

Тоғ устидан кўтарилиб, қуёшни тўсган бир тўп булутни хисобга олмаганда осмон тиник эди. Икки чақиримча юришгач, ўзлари солган қорли сўқмоқ қолиб кетиб, Етимтепага йўл олган ит изидан илдам кетди. Сезгир ортга қарамай қор хидлаганича узоклашиб борарди. У тепалик ошса, кўздан йўқотишини фахмлаган Суяр Суюн бақира кетди: ниҳоят, думини гуноҳкорона қисганича қайтиб келган ит бўйинбогидан ушлаб олди-да, кўнгли тинчиди: — Нима бўлди сенга, босар-тусарингни билмай қолдинг. Ҳовлиқиб қош қўяман, деб кўз чиқариб қўйма, тағин. Бефаросат қилиқларингдан оғзим куйган. Бўлди, бир қадам ҳам жилмайсан ёнимдан. Ўзимга қўйиб берди, билганимча қиламан, деб ўйлаяпсанми, чучварани хом санабсан.

Воҳа ўртасидаги Етимтепа устидан теварак-атроф кафтада гидек кўринади. Башарти, Оқ қояларда буғулар юрган бўлса, қорамизни кўрсатиб, хуркитиб юбормайлик, деган хаёл билан вазиятни аниқлагунча тепалик устида ўтиришга жазм қилган Суяр Суюн елкасидан карабинни олиб қорга қўиди. Бўшалган ит шитоб билан тепалиқдан пастга чопиб кетди.

— Қайт, Сезгир, қайт дедим сенга! — зуғум қилиб қичкирди Суяр Суюн. — Тез кел ёнимга!.. Баччағар, ҳалитдан бўйсунмай қўйдингми? Ҳазиллашма, бола. Авзойингдан кўряпман, ниманидир сезяпсан. Тилинг бўлса экан — гапирсанг. Бўзраясан, думингни ликиллатасан... Боғламасам бўлмайди. — У ит бўйинбогига қўшиб боғланган чилвир учини ечиб, кирза этиги почасига кийгизди. — Худбин бўлмаслик керак. Юрсак бирга юрайлик, кўрсак бирга кўрайлик-да. Шерик ҳам шундай бўладими?

Суяр Суюн тиззаларини пўстин этаклари билан ўраб олдида, корга ўрнашиб ўтириди. Пешонасига тушган телпагини юкори кўтараркан, кўзларига дурбинни тутди. Оқ қоялар билан Етимтепа оралиғидаги масофа бир чақиримча. Тоғ ошиб ўтган күёшнинг қия нурлари харсанглардаги қор уюмларини ялтиратар, қимирилаган жонзот кўринмасди. Ётиқ сой ўнгиirlари, харсанглардан тушган кул ранг соялар оқ сукунат оламида сирли кўланка бўлиб туоларди.

Оқ қоялар воҳасининг тоққа туташ белида ғалати олмос ёғду чарақлаб кетди. Суяр Суюн дурбин кўзларини турли мағомда бураб қанча тикилмасин, бу нурнинг фарқига боролмади: нотаниш сайёхлардан қолган консерва қутиси ёки дераза парчаси узоқдан бундай кўринмайди, ерда бўлса қор тагида қоларди. Қизиқ, нима бўлди экан?

— Акиллашингдан бир гап борга ўхшайди. Энди сени бўшатаман. Факат узоқлашма, — деди у ўрнидан туриб, итига эргашаркан.

Йўл-йўлакай қор устидаги изларини кузатиб борди. Куриган сасиқ коврак танасини кемириб, дарча очган кўрсичконлар нозик панжалари билан қорда кашта тиккан. Қандайдир қуш ризқ-рўз излаб чиқсан митти жониворларга чанг солган. Қуш кўтарилиганида қанотлари қорда кесик елпифичдек тароқ чизган. Тоғ чумчук шувоққа чирмасиб ўсган нўхатак донини чўқиб титкилаган. Калтакесак харсанг тагидан чиқиб, кумоқ тупроқда ағнаган. Бироқ буғулар изи ҳеч ерда кўринмасди.

— Чарақлаган нур нима бўлди экан?.. Ий-е, мотоциклми!? Ана холос... Аҳ-ҳа,вой фирибгарлар-ей, Оқтовни айланиб ўтишибди. Излар ўша ёқдан келаяпти. Сезмай қолишимиз сабаби ҳам шу.

Ит эгасининг ҳай-ҳайлаганига қарамасдан олға ташланди.

Кажавали тўқ яшил яп-янги „Урал“ устига эски шолча ёпилган. Атайлаб катта харсанг панасиға қўйишган. Одам излари Битикчашмага қор кечиб кетган. Бир неча дақиқа ўйланиб қолган Суяр Суюн шолчани кўтаради-да, шамчақмоқни сими билан бураб чиқариб олди ва чўнтағига солди.

— Қани, Сезгир, қайтамиз. Булар ипсиз боғланди. Мехмонларни ўйда кутамиз, — деди у итнинг елкасини силаб. — Сенга қойилман. Саҳардан бери акиллашингнинг сабаби бор экан.

*

* *

Сезгир эшик тавақасига бор бўйича сакраб, ташқарига талпинди. Суяр Суюн дераза пардасини кўтариб салт икки кишининг олдинма-кетин келаётганини кўрди. Улар вагончадан анча нарида тўхтаб:

— Ҳой, ким бор, — деб овоз беришди ва чопиб келаётган итни кўришиб, иккаласи ҳам таппа қорга энгашиб, тимирслиланиб қолишиди. — Итни олинг-е! Ҳой, биродар, тезроқ чиқинг.

Қор сочаётган йигитларни гир айланиб хуриб чопаётган итни бир амаллаб ушлаган Суръ Суюн, вагончага кираверинглар, деб ишора қилди. Ўзи эса ит бўйнидан чилвирни бўшатиб, вагонча фидирагига боғлади-да, кулбага кирди. Йигитлар ечин-масдан совқотган кўлларини ишқаб, ух-ухлаб дахлизда туришарди.

— Сал қолди-я еп ташлашига, худо кўрсатмасин, ит ҳам шундай бўладими? — деди қалт-қалт титраётган йигитлардан бири.

— Ичкарига марҳамат, — мезбон чўян печка ҳалқаларини ко-сов билан кўтариб, хокандозда кўмир ташларкан, ўзини астойдил меҳмондўст кўрсатишга уринарди. — Келинглар-е, қандай шамол учирди?

— Сўраманг, айтсак ишонмайсиз, — деди ботик кўз, дўнг пешона, қораҷадан келган барзанги йигит шолғомдек қизарган қулоғини панжалари билан силаб, хона ичига кўз югурти-раркан, шеригини туртиб. — Яйлов излаб юрибмиз.

— Яйлов! Қандай яйлов? — Ҳанг-манг бўлиб сўради мезбон.

— Мол ҳайдайдиган яйлов-да. Кишни қаранг, чорвани тутдай тўқди-ку. Жанубнинг ҳар йилгидек енгил-елпи ўтар-кетар қишига ўрганган раҳбарлар пайтавасига қурт тушди. Таёқнинг бир уни бизнинг бошимизда синаман, деб турибди. Ўласанми, тириласанми — чорвани кутқазиш чорасини кўр, деб туришилти. Бу киши "Оқ тонг" совхозининг зоотехники...

— Ий-е, шошманг, — деди Суръ Суюн хокандозни чеълакка ташлаб, — Янглишмасам, у ерда Ойноввот зоотехник эди-ку. Нима, ишдан кетдими?

Йигитлар бир-бирига бақрайиб қараганларича лол қолишиди. Барзанги йигит ҳолсизланиб, курсининг четига омонат чўқди-да, бошидан сур телпагини олиб, барра жунларининг гажагини ёзиб ўтириди.

— Кечирасиз, сал англашилмовчилик бўлди. Ойноввот зоотехник бўлиб ишляяпти. Бу киши Ойноввотнинг ўртоғи...

— Э, шундай демайсизми! — Суръ Суюн елкасини орқага ташлаб қуличини очди. — Ўзимиздан экансиз-ку. Тўйларингда бўлғанмиз биз ҳам. Ундей тўйни бир кўрдим... Қаранг-а, тўлишиб, ўзгариб кетибсиз. Исмингиз?..

— Баҳодир.

— Ха-ха, Баҳодиржон... Рахи пушти барқут гиламда зар пур-калган момик пахта билан исмларинг ёзилган эди. Тонггача давом этганди тўй... Сулув қўярда-қўймай раксга туширганди мени ҳам. Умримда ўйнамаган одам эдим.

— Ака, кечирасиз, бу кишини зоотехник деб... — курсида телпак силаб ўтирган йигит гапини тугатолмади.

— Кўйсангиз-чи, — деди ҳамон довдираганча мезбон. — Эру хотин қўш хўкиз, дейишади. Бир-бирининг оғирини, ташвишини кўтармаса бўладими. Ҳеч ажабланадиган жойи йўқ. Бай-бай-бай, қаранг-а, тоғ тоғ билан учрашмайди, одам одам билан учрашади, деганлари шу-да.

— Ойноввотни қандай танийсиз? — сўради ўзини босиб олган йигит, сур телпагини дераза токчасига қўяркан, тарам-тарам қалин соchlарини панжалари билан тараб.

— Ойноввот синглим-ку... Айтаверсам, тарихи узоқ... Аввал таом, кейин калом, дейишган кексалар. Энди борини кўп кўриб, тортиномай бафуржа ўтиргинглар. Мен „жир-пир“ қиласай. Дашибники шу-да... Кутимаган қувончни қаранг. Фарид кулбамни тўлғазиб юбордиларинг. Бунинг устига, Ойноввотнинг куёви кепти. Бирорвга айтсанг ишонмайди... Мен бўлса не хаёлларга бориб, сизлардан гумонсираб юрибман.

*
* *

— Яна бир маломат воқеа юз берди, Сулув. Ойноввотнинг йигити ўз оёғи билан кулбамга кириб келди. Учрашган жойимизни кўр. Нималар бўлаяпти — ўзим ҳам ҳайрон. Тақдир бир маҳаллар нукта кўйиб, узиб кетган ҳаёт ришталарим қайта ула-наяпти. Мен ва Айриш қаерда-ю, Ойноввот билан унинг қайлиғи қаерда. Бугун яна ўша доира атрофида тақдир ўйини... Ойноввот ҳалигача фарзанд кўрмапти. Турмуш қурганларига олти йил бўпти. Шундай зарба бўлдики, ўзимни бу шум қисматда гуноҳкордек сездим. Баҳодирнинг кўзларига карай олмадим. Кўзларида жаҳаннам уфқи: йироқ ва рўёбга чикмас армонлар уммони. Унга ғарқ бўлишдан кўрқаман. Шунда сенинг бефарзандлик туфайли кечирган изтиробларингни юракдан ҳис этдим. Оғир, ғоят оғир бўларкан. Энди ўйласам, сени барвақт ҳазон қилган bemурувват қисматнинг ана шу қалтис, ўнглаб бўлмас зарбаси сабабчи бўлган экан. Сен билан менини қўша армон эди — сабаби, шифо излаб чопмадик, чунки чополмасдик ҳам. Имконият, шароит кўтармади. Булар эса дунё кезиб юришилти. Ҳаммаси беҳуда. Бу хулоса қатъийлашгани сайин, улар билан ҳаёт орасидаги чоҳ шу қадар тубсиз маъно касб этиб чуқурлашмоқдаки... Шўрлик Ойноввотга қийин бўпти. Сенинг билмаганинг ҳам бир ҳисобдан яхши. Унинг ҳам ғами-ю, ҳасратини чекиб, куйиб кул бўлардинг. Йигитларни кузатдим-у, улар қолдириб кетган бир олам азоблар гирдобида қолдим. Қаердан ҳам келди улар... Пешинда Тўйиннинг чаппа шамоли

турди. Бир ҳафтадан буён эсмаган эди. Даشتга чиқиб кўкрагимни шамолга тутдим. У қорни чирпирак қилиб учирди-ю, аммо кўнглимдаги ғурбатни совура олмади.“

ЕТТИНЧИ БОБ

Бир учи Аму соҳилларига тақалган Кайки тоғи Тўйиннинг давоми бўлса-да, ўзгача викор билан керилиб туради. Афғон даشتлари ва турангазор ўрмон, тўқайзор соҳилларидан эсадиган шамоллар дастлаб унинг яланғоч ўмровига урилади, дакки егач, шаштидан қайтади. Унда на чукур сой ва жилга, на шамолпана даралар бор. Икки кундан буён бетиним увлаётган изгирин буғуларни сүяк-сүяигигача қақшатиб юборди.

Совуқдан, очликдан мадорсизланган гала баланд тепалик пойида панада тупроқ ҳидлаб қур ташлаб ётарди. Учқунлаб ёғаётган сийрак қор буғулар жунига қўнар ва шу ондаёқ эриб кетарди.

Сахар чоги Айришохнинг кўзи илингган экан, бехосдан сескашиб уйғониб кетди. Буни сезган мода буғу аввал орқа оёқларига турди, сўнгра кучаниб олдинги оёқларини ростлаб, гавдасини кўтарди.

“— Чўчидинг. Нега?”

“— Ёмон туш кўрдим. Жуда ёш эмишман. Кўк ёл қуваяпти. Мен қочаяпман. Соҳилдаги бўтқа ботқоққа сакрадим. У мени тортиб кетаяпти. Оёқларимни қимиirlата олмайман. Йирткич эса ўзини гоҳ у ёққа, гоҳ бу ёққа уриб, тиш қайраяпти... Кейин қиз пайдо бўлди. Ботқодан судраб чикарди. Опичлади. Оёқларим мадорсиз, осилиб ётибди. Қизнинг жуссаси меникидай кичик, лекин мени кўтарди. Қочдик. Кўк ёл қувиб келаяпти... Хаммамиз қочдик. Халигача ўзимни босолмайман”.

“— Бухудага ваҳима қилма. Ёвуз нияти кўк ёл бўлганида изимииздан қолмасди.”

“— Ҳадиксираш — сут билан кирган одат”.

“— Мен ичган сутда — ишонч”.

“— Айришох нима килмоқчи?”

“— Оқ қоялар воҳасига қайтамиз”.

Харамдаги ёш мода буғулар апил-тапил ўринларидан туришиб, ҳаво ҳидлай бошлишди. Сурув йўлга тушди. Буғулар бир оз юришгач, увишган томирлардаги кон қизишиди. Ҳас-ҳашакка се-роб Оқ қоялар манзилгоҳи паноҳига етиш иштиёқи сурувга далда ва қувват берди.

Ит қувлаган кундан буён анча вақт ўтган бўлса-да, Айришох паришонҳол бўлиб юрарди. Ўзини ҳамиша тўдадан четроқда ту-

тар, ҳатто бетоқат ёшларга зүғум ҳам қиласди. Унинг хаёлла-ри гира-шира хотиралар билан банд. Олис ва таниш товуш, чопа-чопа ҳолдан тойиб қолиб кетган итнинг ночор ғингшиб, акил-лашлари ахён-ахёнда қулоқлари тагида тақрорий садо бериб туради.

— Бизни қувлаган кўк ёл пойлаб турган бўлса-чи?"

Она буғу унга яқин борди.

— У кўк ёл эмас — ит. Мен сингари одамларга топинган зот. Бир замонлар қавми кўк ёл бўлган. Энди эса факат сумбати қолган".

— Уни танидингми?"

„Ха. У ёқимтой, шўх ит".

Айришоҳ она буғудан илдамлаб кетиб, бир тепалик устида тўхтади. Атрофга сер солди. Кулоқларини динг қилиб, ҳарчанд уринмасин, биронтағайи товуш эшитмади.

*
* *

— Наҳотки, уларнинг мақсади яйлов бўлса? Ишонмайман! — деди Раҳмат Аҳадов жун пайпогини ечиб, кирза этигининг кўнжига соларкан. — Бирон ғайирлик сезмаяпсизми, Суяр ака?

— Ким билади дейсиз, мол оласи ташида, одам оласи ичидা.

— Мотоциклдан чақмоқтошни нега олдингиз, деб сўрашмадими?

— Куёв кўнгли очиқ йигитга ўхшайди. Шериги анча қув кўринди. Калондимоғ, ўзига бино кўйган.

— Нима, пўписа қилдими?

— Гапининг зайдидан шундай холосага келдим. Хужжат кўрсатинг, деди.

— Хўш?

— Кўрсатдим. Бошқа нима ҳам қилардим.

— Сиз ҳам талаб қилдингизми?

— Ҳей, Раҳматжон, биласиз-ку мени, бирорни тергашга тобим йўқ.

— Бундай пайтда хушёрлик зиён қилмайди. Хизмат мавқеингиз ҳам шуни тақозо этади... Ҳаммага ҳам ишонаверманг. Бир балоси бўлмаса, шудгорда қўйруқ на қилур. Узок даштда ёлғиз ўзингиз. — Директор чўнтағидан ён дафтар олиб нималарнидир ёзди, пиёладаги или-милиқ чойни ҳўплади. — Ҳа, айтмоқчи, ваъдаси қачон?

— Якшанба куни дейишган.

— Демак, эртага... Яхши. Бирга кутиб оламиз. Фақат бир илтимос, мени зинҳор директор, деб танитманг. Кариндошингизман. Кўргани, ҳол сўрагани келганман... Борингки, шогирдингизман. Суяр Суюн астойдил кулди: директорнинг тадбиркорлигидан эмас-у, бунга ҳеч ажабланмас эди, биргина тун ҳамхона бўлишидан қувонди. Сезгир керишиб ўрнидан турди ва узун тумшугини эшик тирқишига тиқди.

— Ха, қистаб қолдими? — директор эшикни очди. — Дайдиб юрма, сени коронгида излайдиган бекорчи йўқ... Суяр ака, машинанинг багажнигига йиғма каравот билан уйку қоп бор, шуларни киритинг.

— Нима қилардингиз, мен полда ҳам ётавераман.

— Шу пайтгача бирорвга оғирлигим тушмаган. Хали ҳам раҳмат денг, шоффёрни қолдириб келганимга. Тўйи бор экан. Ростор жойда томоша бўларди-да.

— Кўнгил кенг бўлса, жой топилади. Бундан ҳам мушкул шароитларни кечирганимиз.

— Туш токчадан, — деди Ойпарчага Суяр Суюн йиғма каравотни дераза рахига тақаб, уйку қопни ёзаркан. — Тағин адашиб, эгамники деб, уйку қопга кирма, чиқарга йўл тополмай димиқиб ўласан.

— Гапга тушунади-я бунингиз? — хаёлсираб сўради директор ён дафтардан бошини кўтармай. — Менга қаранг, Сезгирингиз узок кетди. Хабар олмайсизми?

— Чилвир тушираётгандир-да. Келади, келмай қаерга ҳам борарди.

— Зап итингиз бор-да. Иккаласининг орасида ҳеч низо чиқадими?

— Мол эгасига ўхшамаса, ҳаром ўлади.

Директор ён дафтарни четта суриб қўйиб, совиган чой хўплади:

— Энди, Суяр ака, бир иш қилсангиз. Кундалик тутинг-да, буғулар галасига тааллуқли бўлган неки ҳодисани кузатсангиз, ёзиб боринг. Бу аввало, ҳисобот учун керак, кейин энг муҳими, бу — тарих. Ёзувчилик қобилиятингизга ҳеч ким шубҳа қилмайди.

— Қўлимга қалам олмаганимга ҳам неча йиллар бўлиб кетди. Бир замонлар газетада ишлаганим туш бўлиб туюлади. Машқ йўқ, ҳафсала йўқ...

— Надоматга эш берманг. Турк шоири Шайх ўғли Сотунинг ибораси эсингиздами: етук аллома бўлиш учун ўттиз йил ўки, ўттиз йил сайру саёҳат қил, сўнгра ўттиз йил қўним билан ўтириб, одамларга кўрган-билганингни нақл қил. Сиз ҳозир иккинчи босқичда — сайру саёҳатда юрибсиз.

— Илмийлик-чи... Бу ёғи нима бўлади?

— Буни қўйинг, — директор унинг сўзини бўлди. — Ҳар қандай илмийликнинг пировард мақсади инсон ақл-заковати, руҳиятига таъсир этиш, пешлаш.

— Одамлар, ношуд, омадсиз шўрлик ўзига таскин берипти, деб ўйлашмайдими?

— Асло. Майли, туйгулар бўлсин, чекинишлар, эркин мулоҳазалар бўлсин. Биз табиатни ҳимоя қиласиз, деб оғиз кўпиртирамиз-у, аммо аслида қурук сафсатадан нарига ўтмаймиз. Минг хил муаммо, хаётдаги хос ҳодисалар орасидаги чоҳ пайдо бўлиш сабаби ана шу бокий түғённи пинҳона саклашда. Илмийлик билан руҳият орасида боғлиқлик бўлмаса, ўрнида зўрма-зўракилик, узилиш юз беради... Ҳей, Суръ ака, ўзингиздан қолар гап йўқ, ҳаммаси рисоладагидек кетганда эди, олам гулистон бўларди. Табиатга ҳамдардлик уйғотамиш, деб кўпчилкни томошабинга айлантириб қўйдик. Томошабин одамнинг тақрор-тақрор мудроқ босишига ким кафил бўла олади? Башарти, ҳис-туйгуларни, дахлдорликни барқарор қилмас эканмиз, сўнгги илинжларни ҳам бой бериб қўйиш ҳеч гапмас. Сиз билан бизнинг сарсон-саргардонлигимиз ҳам чақага арзимай қолади. Сувга оқиб кетади... Шунинг учун ёзинг, тап тортмай ёзинг. Ҳозир мисқолча ҳақиқат ҳам қадрли. Айришга келсак, у бу ақидаларсиз ҳам сиз учун бир дунё.

Тўйин ортидан кўтарилиган тўлин ой ҳонани ёритгач, Суръ Суюн чинакамига ховотирга тушди:

— Бундай одати йўқ эди, хайронман, — деди у этигини кийиб, пўстинни елкасига ташларкан. — Хабарлашай.

— Шошманг, мен ҳам бораман.

Директор апил-тапил кийинди. Улар аёздан тарашадек қотган қорни қатир-қутирип босишиб, сал юришгач, тепалик ортидан чопиб чиқсан итнинг қорасини кўришди. У ҳансира бекланича, думини ликиллатиб, Суръ Суюнни бир айланди-ю, директорнинг тиззасига сакради.

— Тур-е, килғиликни сен қил-у, узрни мен сўрайми? Бор, эгангга ёпиш!

— Бери кел-чи. Қани, гапир, нимани кўрдинг? — Ит ялтоқланиб Суръ Суюннинг пахталик шимига тумшуғини ишқади, тилини осилтириб, акиллади, -Наҳотки, Айришни кўрган бўлсанг?

— Сезгир унинг елкасига сакради, юзини яламоқ бўлиб, тилини чиқарди. -Ол-а, торт тумшуғингни, уятсиз!

— Бир гапи бор бунинг...

Намозшом шамоли сутда димланган оқ жўхори ва ёрма арпа ҳидини адир ошириб келтирди. Бундан эсанкираб қолган Айришохнинг динг қулоқлари ғалати чийилдок товушга тоб беролмади. У бошини орқага ташлаб, ҳавони зўр бериб ҳидлай кетди. Чамбарак шоҳлари елкасига қадалиб оғритгач, ўзига келди. Бу кўнгил оздирувчи ҳидни факат угина пайқагани, тўданинг эса порвойи палаклиги уни ҳайратга солди.

— Ҳид сезмаяпсанми?"

Она буғу ҳўл тумшуғини шовдираган қуп-куруқ бурган поясидан кўтариб, ҳаво ҳидлади.

— Йўқ".

— Ёқимли ҳид, жуда таниш".

— Яна туш кўрдинг".

Адирликлар оша елган шамол тинди. Ҳид ғойиб бўлди.

Орадан уч кун ўтгач, бу хуморли ҳидни пешинда, кун қизиб сал эрувгарчилик бошлангандан яна сезиб қолди. Камардан чиқиб, тепаликка кўтарилиб, шу ҳид келган томонга бош олиб кетгиси келди. Аммо куппа-кундузи очиқлиқда юриш кутилмаган ҳавф-хатарлар келтиради. Дамини ичига ютди. Айришох иштаҳадан қолди. Яна шамол эсиб, оқшом маҳали ҳид таратишни кутди.

Ой қизарип тоғ ўркачи оша чўтири юзини кўрсатган пайтда нар-наваз ўзи ёлғиз тепалик устида турарди. Ёнига имиллаб келаётган она буғу яқинлашгач, ер тепинди.

— Яна ўша ҳид!"

— Айришох ақлдан озди".

— Сурувга қара, тарқалиб кетмасин".

— Каерга?"

— Оқ қоялар воҳаси менга тор..."

Айришох кенг сой ўртасида чўпкари беда ғарамини кўриб ҳанг-манг бўлиб тақа-так тўхтаб қолди. Шу алпозда у чорак соат тош ҳайкалдек қотиб турди. Унинг бутун вужуди кўз-кулоқча айланди. Ҳадик асорати кўтарилган сайин сут димлама оқ жўхори ва арпа ёрма ҳиди тобора бурқсиб, кўнглини оздирив, кўзларини тиндиради. Беда ғарами ва унинг ёнига узунасига қўйилган ёғоч охур буғунинг кўзларига чўғдек кўринди. Айришохни талвасага солган ҳид охурдан тараларди. У ўзини тийишга уриниб кўрди, лекин ёввойи, тўпори бир куч сеҳрига бардош беролмади. Нар-наваз бир-бир қадам ташлаб, ғарамга яқинлашиб борарди. Шу онда оппоқ тепалик устида ит кўринди. У хурмади, бошини олдинги оёқларига қўйиб, қор устида бироз

судралди, бугунинг тек турганини кўргач, бош-оёқ тепалик устидаги чопа кетди. Нихоят, у фарам рўпарасида чўнқайиб ўтирида, мунгли фингшиди, корга ётиб, турди, яна чопди. Думларини қисиб олиб, қулоқларини чимириб, чопди...

Айришоҳ янгишмади, уни таниди. Неча кунлар ҳаловатини ўғирлаган бу ҳайвон унутилган ўшлигининг шериги Сезир эди. Шутопда у беда фарамини ҳам, димлама оқ жўхори ва арпа ёрмани ҳам унуди: гувлаётган бошини аранг кўтариб, ҳолсизликдан кулашини ҳам, кўркувдан тумтарақай қочишини ҳам билмай сеҳрланиб туради.

САККИЗИНЧИ БОБ

— Тасодифан учрашиб қолганимизни уйдагиларга айтсан, ишонишмади. Ойноввот эса бирга бораман, деб туриб олди. Тоғда қор кўп, шамоллаб қоласан, деб бир амаллаб тинчитдик, — деди Баҳодир вагонча эшигини очаркан, Темир зинага оёқ кўйиб. — Ҳаммаси салом айтишиди.

— Кайнотангиз бардамми ҳали? — сўради Суяр Суюн юлқинаётган итнинг бўйинбоғидан маҳкам ушлаб.

— Отдай.
— У одамлар ҳали-бери қарийдиганлардан эмас.
— Эҳ-хе, биздан бошка ҳам меҳмон бор-ку, — Баҳодир хонага киргач, Раҳмат Аҳадовни кўриб таажжубланди.
— Эски қадрдоним, йўқлаб келиптилар.
— Одам одамга ғанимат. Даشتда эса бу мақолнинг қадр-қиммати юз карра ошади. Биз ҳам отамлашайлик, ёлғизлигингизга шерик бўлайлик, деб келдик.
— Бир кўрган таниш, икки кўрган — билиш, учинчисида эса дўйсту биродар, оғайни.

— Бу гапингиз тўғри, меҳмон, — деди Раҳмат Баҳодирнинг кўлидан оғир сумкани оларкан. — Даشتда таниш ортиридим, эски қадрдонлар экан, бугун келишмоқчи, деб кетгизгани қўймади бу киши.

— Яхши бўпти-да. Сиз билан ҳам танишамиз. Мен — Баҳодир. Суяр ака тортинчоқ одам чоги, ўтган гал сўраб-суриштириб ҳам турмади. Касб-коримиз домлалик...

— Мактаб директори денг, — лукма ташлади шериги.
— Барибир, домла-да... Шеригим, исмлари Ботир, райподада затторг. Болалиқдан бирга ўсганмиз. Ҳали ҳам бир майиз топсак, бўлиб еймиз.
— Суяр ака билан ҳамкасб экансиз, — деди Аҳадов деразага тақалган каравотни йиғаркан.
— Ойноввот туфайли эса тутинган ака.

— Хизр ҳам бундай одамни орзу қилолмайди.

— Кечирасиз, ўзлари-чи? — барзанги Ботирнинг туйқусдан берган саволи директорни гангитиб қўйди, чунки бирданига самимий ва қизғин тус олган ўзаро мулокот уни ҳам тамомила ром этган эди.

— Менми?.. Суяр аканинг шогирдиман. Домламиз бўлган бир пайтлар.

— Яхшининг сабогини олиш ҳам туман бойлик... Суяр ака, бафуржা ўрнашиб ўтирайлик. Бугун дам олиш куни. Тенг ҳуқуқли фуқаролармиз. Қани, Баҳодир, топган-тутганингизни столга қўйинг. Кўнгил чигилини ёзмасак бўлмайди.

Тандиркабоб ҳидини олган Сеэзир очиқ эшикдан мўралади. Ботир лаҳмлари сидириб олинган қўй курагини итга улоқтириди.

*
* *

— Хонгулнинг одамга эл бўлиши мумкиндир, лекин бир бор ўз тўдасига қўшилган ҳайвоннинг яна одамзод ҳузурига қайтишига ишонмайман, — деди Ботир тивит астарли нимчасини ечиб, илгакка иларкан.

— Тўгри, бу қийин жумбоқ, аммо тарбияга ҳам кўп нарса боғлиқ, — Суяр Суюн пиёлага чой сузиб Ботирга узатди. — Бир ҳафта бўлди охурга емиш соганимга. Кеча жонивор ҳидни олипти. Айришнинг бир ўзи келибди. Ҳечқиси йўқ, эҳтиёткор бўлгани ҳам яхши. Қарабсизки, эртага сурувни бошлаб келади. Бунга шубҳам йўқ.

— Куш уясида кўрганини қилади, кўмсайди, демоқчисиз, — деди унга ён босиб Баҳодир.

— Аввал-ибтидо меҳр қонга сингади. Ойноввот айтгандир, Сулувнинг Айришни қандай парвариш қилганини... Ҳа, шундай. Уни еру кўкка ишонмасди. Туни билан тиним йўқ. Ошхонада тикир-тикир. Ҳой, хотин, мунчаям жон койитмасанг. Одам ўз боласига бунчалик меҳрибон бўлмас. Унга гапирдинг нима-ю, деворга гапирдинг нима — барибир. Пинагини бузмайди. Билганидан қолмайди. Қарабсизки, бир маҳал ошхонадан сутга димланган оқ жўхори ҳиди анқийди. Бошингиз айланиб кетади... Ҳеч туйганмисиз шу ҳидни?

— Йўқ.

— Гап шунда-да, — дейди Суяр Суюн энтикиб. — Уруш йилларини кўрган одамлар бу ҳид қадрига етишади. Сулув ҳам қаҳатчиликнинг бир четини кўриб қолган... Ҳуллас, ҳид хонага таралади, кейин ховлига тарқалади. Сулув эса биқинимга туртиб, ошхонанинг пардасиз деразасини кўрсатади. Бир жуфт

олмос кўз бакрайиб лўқ бўлиб, тикилиб турибди. Бу — Айриш. Димлама оқ жўхори совигунча даразадан нари кетмайди. Айланиб юргани юрган. Кет десангиз, ер тепинади. Ҳей, укам, нимасини айтасиз, у хотин мён-ку мен, етти ёт ҳайвонни ҳам меҳри билан ром қилиб олганди. Фаришта эди. Ойпарча мушумгимиз ҳам, сизларни қирма-қир Оқтовагача таъқиб қилиб борган Сезгир ҳам унинг тарбиясини кўрган. Мушукни эса пайпоққа солиб дараҳтга осиб, тошбўрон қилмоқчи бўлган кўчабезори болалар қўлидан тортиб олган.

— Ҳа, Ойноввот ҳам кўп таърифлади, Сулув опани.

— Унга ҳам меҳри сингган.

Сухбатга қўшилмай, қовоғини солиб ўтирган Ботир ўрнидан турди. Илгакка осилган пўстини чўнтағидан сигарета олиб, ташқарига чиқмоқчи бўлди, бироқ ит ёдига тушиб, иккиланиб қолди. Раҳмат Аҳмадов унга ҳамроҳ бўлиш ниятида ўрнидан турди.

— Буларнинг гап халтаси очилди, — Ботир лабига сигарета қистирди.

— Мен ҳам ҳайронман, Суяр аканинг бундай гапдон эканлигини энди сезишим, — директор чекиш одати бўлмаса-да, сигарет сўраб қўл узатди.

— Ҳаром-ҳариш ит билан мушук орасида зерикиб ётгач, гўр бўлармиди. Юрагини кимга очсин. Мен бўлсам икки кунда тарс ёрилардим. Шуям хаёт бўлди-ю!

— Ботир, қўйинг, шунга ҳам тажанг бўласизми. Ҳар кимнинг йўриги ўзи билан.

— Ҳалиям... Машина сизданми? — қўққисдан сўраб қолди Ботир. — Таниш кўринади.

— Уни кўрмагансиз. Домланинг юртидан келган.

— Тўғри айтасиз, нима кўп машина кўп, бир-бирига ўхшайдида...

Сизни ҳам ўзимизга қиёс қилаб, овчимикан, деб ўйловдим. Ўтган гал келганимда, шу одамнинг ўзидан гумон қилдим, — Ботир кўз қири билан вагон тарафни кўрсатди. — Хужжатларини кўрсам, ҳаммаси жойида.

— Домла катта топшириқ билан келгандар бу ерга, — Раҳмат Аҳадов маънодор қилиб қош учирди.

— Сал-пал фахмим етиб турибди. Фақат бизга пашша бўлгани ёмон бўлди-да. Айриш-пайриши бошидан қолсин.

— Нима эди? — тусмоллаб сўради директор.

— Бизни ёввойи чўчқа қизиқтиради. Битикчашмада бир галаси юрибди. Ўтган йили шу пайтларда учтасини ағдаррган эдик. Домлангиз эса дард устига чипқон бўлди. Тўнғиз отсак, хонгулларни хуркитиб қўямиз. Бу эса ўлса ўлар, лекин розилик бермайди. Авзойидан сезиб турибман. Отмасак, у ҳам бўлмай-

ди. Овчилик билетимиз бор, рухсатнома бор. Ов муддати ўтиб бораяпти.

— Йўлини қилиб, сўраб кўриш керак, балки келишарсизлар, — директор Ботирнинг кўнглидаги бор гапини билиб олмоқча карор қилди.

— Ўзи-ку, бир хисобдан бу ерларга қўриқхонанинг дахли йўқ. Кўриқхона қаерда-ю, Тўйин қаерда. Орадаги масофа юз чакирим. Кўзни чирт юмиб, таваккал қилиб иш тутсанг, у ҳам бўлмайди. Бу одам изимиизга тушади. Гап кўпайиб кетади.

— Бергандан ҳам бир сўра, бермагандан ҳам, дейишади. Кўнгли иийб розилик берар.

— Кўзим етмайди. Эшитдингиз-ку, ҳайвон тўғрисида эмас, етти пуштининг ривоятини қилиб ўтирибди.

Ичкарида эса сухбат кизғин давом этар, Суяр Суюн ихтиёрни батамом қўлига олган эди.

*
* *

Суяр Суюн йўл-йўлакай ўз-ўзидан тутикаиб, кўпириб борарди:

— Ана у сўхтаси совук, писмиқ Ботирнинг галини эшитдингми? — деди у ўсмоқчилаб ёнида ер хидлаб кетаётган итга. — Битикчашмада тўнгиз отармишлар! Келиб-келиб кимга де, директорга айтадими. Ҳай, безбет! Наҳотки, тақдир гаровга қўйилганлигига фахм-фаросати етмаса. Қандай кўрлик бу. Ўҳ-ҳ, браконъерни кўришга кўзим йўқ. Унинг жирканч иши ўз уйига ўғирликка кирган ғаламис қароқчининг кирдикори билан тенг. Фахм-фаросат-ку гўрга-я, савод ҳам йўқ. Бўлганда эди, „Қизил китоб“га кирган неки жонивор бор, қаерда, қачон юришидан қатъи назар, муҳофазага олинганини биларди. Маърифатсизнинг кўзи кўр, жоҳил... Қорасини яна бир кўрсатсин-чи у муттаҳам, ўзим биламан нима қилишимни. У бугун тўнғизни отади, эртага шаксиз хонгулга чанг солади.

Ит хидини олган буғулар изи тоғ ўркачига бошлаб кетди. Баландликка кўтарилаётган Суяр Суюннинг тажанг асаблари тараанглашди, юзини тер босди.

— Кел, Сезгир, бир оз дам олайлик, — ит унинг ёнига чўнқайиб ўтириб олди. У ҳам ҳансирар, оғир нафас оларди. — Хорижга борипти, дунё кезганмиш. Шу ҳам муаммо бўлтими. Ана, одам ойга ҳам чиқиб келди. Нима, шу билан сен оламни тушундим, англадим, деб ўйляйсанми? Азизим, бу хато. Ўз ибтидонг — аслингни тушунишинг, англашинг бундай сайру саёҳатдан минг карра мураккаб. Оқсоқ ҳаётнинг жулдур чопонига тирикликтининг сўнгги илинжи, деб ёпишган хонгулнинг дуркун сакраши-ю ир-

ғишишлари, ҳүшёрлиги-ю ўқтамлиги, ташвишу таҳликаларини кўз олдингга бир келтири. У сингари изтироб чек, тирик қолиши учун курашиш накадар оғир қисмат эканлигини бир он англа. Ана шунда сен бир кун келиб хонгулга айланниб кетгинг келади. У сингари мағрур, бўйсунмас, танти, тутқич бермас мавжудот киёфасига кирасан. Ташвишланма, энди улар билан бир сафдамиз. Шу алпозда афсонавий диеरаро ғойиб бўламиз. Авлиёлар ғойиб бўлишган-ку, кейин уларга топинишган. Эртаклар тўқишишган... Одамлар эртакларни ўқимай қўйишди, энг доғда қолдирадигани — эртакларга ишонишмагани. Афсус. Вахоланки, одамзод умри мангуборлиқ умри олдида лаҳза, оламаро, — агар сен ўша оламни ўзингда кашф этолган бўлсанг — ялт этган учқун. Ботир бўлса, менга шу учқунни барвақт сўндириши маслаҳат бераяпти. Тўғри, шу орзулар олами, парвози, шарпалари, сирли шивирларига чек қўйиш учун нўхатдек кўроғшин ўқ кифоя... Осмондан тош-шагал ёғилади, илоҳий ҳайкал кулагиди. Унга жон ато қилиб турган ҳаракат тинади. Ҳаракат — қон, тирикликтининг онаси, ибтидоси. У қай шаклда, таҳлитда бўлмасин, кечмасин — туйгудами, хаёлдами, рафтордами — тириклик нишонаси. У сўндими — хаёт тўхтайди. Ҳаракат қанча ранг-баранг, хилма-хил, товланувчан, турланувчан ва кўп бўлса, шунчалик олам гўзал, мафтункор, мунауввар кўринади.

Жазава қўзғатган түғён аста-секин босилгач, Суяр Суюн ўзига келиб, атрофга синчиклаб қарай бошлади. Хонгул излари тўмпайганд ажиб тўнкалар ёнида қорни босқилаб пайхон қилган. У барларига ёпишган қорни қокди-да, ўрнидан туриб, ўша тарафга юрди.

— Бу нима бўлди экан? Кизиқ. — Суяр Суюн тўнкалар устидаги қорни енги билан суриб, обдан кузатди. — Эҳ-хе, булар туғдона-ку. Қара, қанча тўнка тоғ бетини эгаллаб ётибди. Излар эски. Мана бу баланд тўнкага буғу қичиган бикинини қашибган. Бечорага кана ёпишган шекилли. Жунга қара, пайраҳалар орасига кириб қолибди. Айришники эмасми, хидлаб кўр-чи?

Ит ҳўл бурнига ёпишган жундан ижирганиб, корга бурнини тикиб, каттиқ акса урди. Суяр Суюн итни ўз ҳолига қолдириб, тўнкалар оралаб кетди. Бир нечасининг ёнига бориб силаб кўрди. Устидаги қорни сидириб, йил ҳалқаларини ўқимоқчи бўлди. Тўнкалар аллақачон тош-метинга айланган, ёшига оид бирон белгини аниқлашнинг ҳеч бир иложи йўқ эди. Афтидан, туғданалар бир неча аср бурун кесилиб кетганди.

— Одам чатоқ, — деди Суяр Суюн баркашдек япасқи тўнка устига бафуржа ўтиаркан, Сезгирнинг бўйнига кўл ташлаб. — Табиатда неки яҳши, асл нарса бўлса, албатта тагига сув қуяди. Таг-томиригача нест-нобуд қилмай тинчимайди. Кўриб турибсан,

бу ерда қандай ўрмонлар гуркураган. Тўнкасининг йўғонлигини қара. Шунга яраша тана, гавда, комат ҳам бўлган-да. Тўнкалар қулоққа сиғмайди. Тўнкалар фуж, демак, дарахтлар баланд ўсан. Ўрмондан четда ўсан ёлғиз дараҳт бақалоқ бўлади... Момом айтарди: туғдона хосиятли дараҳт, уни кесган одам қатл этилган. Шўрлик момолар шунга ишонган. Одамларни лақиллатиш учун атайлаб шундай овоза тарқатишган. Чунки туғдона кимларгадир зарур бўлган. Туғдоналар учун одамлар жабрланганида эди, ўрмонлар кесилмасди. Йўқ. Бу фирибгарлик. Туғдона чиндан ҳам хосиятли. Умри бокий, қаттиқ. Бошига етган касофат ана шу хислати туфайли. Афғон, Қобадиён, Сурхон ютидаги неча авлод-аждод зоҳидларнинг тасбехлари, чўпон ва бахшилар дўмбирасининг асл зотдори ундан ясалган. Тўйин билан Кайки тоғда туғдонадан нишона ана шу тўнкалар... Айтдим-ку сенга, одам чаток, деб. Энди ишонгандирсан. Табиатни қаритди у. Баднафслик ва калтабинлик дарди ёмон. Шундай ҳайбатли ўрмонлар бўлганида, булоқлари сувга сероб, ўтлоқлари бир жаҳон бўлиб яшнаб турарди. Бу тўнкалар бир замонлар тоғларга безак, довулларга тўсик, шабадага мусиқа бўлган қадим ўрмонлар қабристони. Ўрмонсиз тоғ — ўзга сайёра. Одамзоднинг яна бир қусури бор: неки нарса маън этилса, тақиқланса, шунга хуружни кучайтиради. Кани у тасбехлар — дунё кезиб кетди, қани у дўмбираалар — ўтмишнинг ғуборли, онгқақшар сарҳадларига сингиган ўксик оҳанглар, қани у туғдоназор — мана шу атрофда мозор. Туғдонанинг шоҳлари одамлар қабристонидаги яловли туғлар.. Нима мұқаддас ўзи? Чалкашиб кетган. Ёлғон дунё деймиз-у, унинг яратгувчиси, сабабчиси кимлигини билмаймиз. Уни ёлғон отга чиқарган ким? Ўзимиз, ҳа-ҳа, инсоннинг ўзи... Тоғларни абадий дейсанми? Рўё. Ишонмайман. Бу яланғоч чўнг тепаликлар даврнинг парчаловчи, емирувчи, чанг-тўзон қилиб учиргувчи азалий зарбасига дош беришига кўзим етмайди. Жуда кекса, ҳолсиз, қувватсиз, мададсиз, Аччик кисмат олдида тиз чўккан нотавон кўноқлар.

Олис сойлар тубида буғулар суруви кўринди. Улар туғдоналар мозорини узоқлардан четлаб ўтиб, кенг ялангликдан турнакатор бўлиб туманлаб кетиб боришарди. Суяр Суюн шошапиша кўкрагини пайпаслади. Дурбин кулбада эсдан чиқиб қолиб кетган эди. У тутоқиб ўзини сўқди, ғазабланиб корга тупурди.

Сўққабош турмуш Суяр Суюнни ҳар хил нағмага соларди. Одамови бўлганидан, уйига меҳмон кам келарди. Бирон кимса келган тақдирда ҳам жуда севинарди, аммо меҳмон кетгач, хонада анча вақт турғун қоладиган бегона ҳидга тоқати йўқ эди. Шу боисдан вагонча эшик, даразасини шамоллатиш учун ланг очик қолдирган эди. У Ойпарчани каравоти устида кулча бўлиб

ётганини кўргач, апил-тапил деразани ёпиб, эшикни зичлаб, зулфаклаб олди. Печка чўғини титкилаб, ўтин қалади. Ҳаш-паш дегунча, трубада олов гуруллади, хонага хушбўй саксовул хиди ёйилди.

Кундузи кечирган нохуш хаёллар ва ҳаяжон унга кечаси алламаҳалгача тинчлик бермади. Оёқ учида узала тушиб ётган Ойпарча аллақачон хуриллашдан тўхтаб, чуқур уйқуга кетган, бурчакда эчки пўстак устида ётган итнинг нафаси чиқмасди. У нима биландир шикаста асабларини овутиши керак... Ёлғизликнинг ягона шериги — сукунат. У ташқаридаги олам сукунатига қулок тутди. Ҳатто тиқ этган арзимас товуш, сезилар-сезимас эпкин ҳаракати, ўзгариш таранг тортилган инсон руҳиятида акс садо беради. Башарти, бу ҳодиса юз бермаса, бекарор хаёлот одамнинг ўзига, ички оламига қўним излаб қайтади. Қайсар хаёл бўшлиққа муросасиз, жавоб излайди, жой қидиради.

Суяр Суюн энтикиб нафас олди ва енгил тортиб ўзига ўзи: Яхши-яхши, табиат инсонга хаёл суришдек буюк ғойибий — пинхоний қувват-кудрат ато этган, бўлмаса, шўрлик ўн йилча ҳам умр кўролмасди, — деди...

У туш кўрарди.

Ёмғир савалаб ўтган түғдоназор ўрмон устида оқ-куроқ булутлар оҳиста яйраб бормоқда. Ердан ҳовур кўтариляпти: жилғалар, сойлар ўнгириларига қапишганича тоғ ўркачлари сари ўрлапти. Неки тирик мавжудот бўлса, қуёш нурларини қаршилаб, олқишлияпти. Кушлар сайдайди, чирқиллайди, шоҳдан-шоҳга учеб-қўнади. У эса ўрмон рўпарасида буларни кузатиб ўтирибди. Гавжум, ғала-ғовур, жарангдор бу жаннатмакон гўша ҳаёт оқимиға ҳалақит бергиси келмайди.

Бехосдан ўрмон талвасага тушди: шовуллади, дарахтларнинг шохлари қасир-кусур синди, кушлар ҳуркиб учди. Бир гала буғу ўрмон четига жон ҳолатда чопиб чиқиб, нишаб сойга ташланди. Олдинда она буғу. У чопмасди, сакрамасди — учарди. Тахлиқадан қочаётган хонгул парвозидек гўзал ҳаракат ёруғ оламда бўлмаса керак. Унинг парвозини шу чоқ янграган мудхиш ўқ овози хавога михлаб ташлади. Парвоздаги буғу билан тошлок ер орасидаги масофа бор-йўғи бир неча қулоч. Аммо қудратли куч силтовори синди. Буғу бир нафас тинди-ю, сўнгра олдинги оёқларини кўкрагига йикқанича мункиб кетиб, ўмгани билан ерга қулади. Ҳозиргина чағир-чуғури оламни тутган нурафшон ўрмон жонсиз суратга айланди-колди.

Суяр Суюн шаҳд билан сапчиб ўрнидан турмоқчи ва ҳаёт қотили устига ташланмокчи бўлди... Аммо оёқлари мадорсизз, жонсиз, қимирлата олмайди, ер муштламоқчи бўлди — қўлла-

ри шалвираб, осилиб қолди, бор куч билан ўкирмокчи бўлди — нафаси чиқмади.

— Эй, ноинсоф фалак, шундай ҳам хўрлайсанми мени?!" — у тупроқ капалади.

— Ўрнингиздан туриңг, Суяр ака, арзимайди бу қотил қилмиши". — Юпатмоқчи бўлади Баҳодир.

— Наҳотки! Ёвуз Ботир ғолиб чиқиб кетаверса"... Ночор, заиф, нотавон Суяр Суюн ҳўнграб йиглаб юборди. Сезгир унинг юзини ялади. Эс-хушини йигиб олган Суяр Суюн:

— Бир балодан кутқаздинг, Сезгир, — деди ва итнинг бўйнидан қучиб, юзига юзини босди.

ТЎҚКИЗИНЧИ БОБ

Тун ярмидан оққанда буғулар Битикчашма камарида бирбирининг пинжига тикилиб ётишарди. Бўрон увлар, сой елкаси-даги бўктуарув қорни шопириб, тик зов тепасидан сочарди. Бундай кучли бўронда факат энг ашаддий очиққан йиртқичларгина ўлжа излаб тоғ кезишидан хабардор Айришоҳ хотиржам эди. Бир ой мобайнода у Тўйинда кўк ёлларнинг қораси у ёқда турсин, изини ҳам кўрмади. Уни онда-сонда ташвишлантирадиган ҳодиса тўнғиз галасидаги бесаранжомлик эди. Уларни бор-йўғи уч марта кўрди, лекин ҳар гал таҳлика, қандайдир хавф-хатар таъқиб этаётгандек, бирон жойда кўним топмай, елиб-югуриши саросимага солиб турарди. Ҳозир ҳам у тогдан энадиган торгина тўнғиз сўқмоғидан кўз олмас, шубҳали овозни илғаш мақсадида қулокларини динг қилиб турарди. Айришоҳ охири бу беҳуда уринишдан толиқди ва босиб келаётган мудроққа ўз ихтиёрини берди.

У тўнғизлар галасини эллик қадамча қолганида бехосдан сезди. Елка, биқинлари оппоқ қорга беланган, нинадек дағал ёллари тикрайган қобон юмшоқ сўқмоқдан овоз чиқармай тушиб келарди. У камардаги буғуларга парво ҳам қилмасдан, тўдасини туманга бошлаб кетди.

— Улар оч. Тоғда қаттиқ совук. Ер музлаган. Бўрон борини ҳам кўмди. Тиғли тиш ва чақмоқ туёқ иш бермай қолди. Тўда холдан тойипти. Кўзига ҳеч нарса кўринмайди. Кўр".

— Раҳмим келади. Айришоҳ, сездингми, ҳушёрикни ҳам унтишибди".

— Очлик ёмон",

— Рост. Зора, пичан гарамига етиб боришса. Охурда ҳам унча-мунча емиш қолган эди".

— Очлик мажбур қиласди. Улар ҳам биздек. Топиб боришади. Ит уларни қувладиди. Булар эса кўк ёл ўйлаб қочишади".

— Ит уйида бикиниб ётибди. Озор беролмайди“.

— Айтиб бўлмайди. Ит бизни кўрса, уларга тегмайди“.

Айришоҳ сурувни эргаштириб, илдамлаб кетди ва тўнғизлар тўдасининг олдига ўтиб олди. Галани бошқариб бораётган баҳайбат қобон бир-икки бор ўшқириб, хириллаб пўписа қилди, бирок буғуларнинг беозорлигини, илтифотини пайқаб, дархол тинчиди.

Бўрон чап бикиндан хуруж қиласарди. Изма-из кетаётган буғулар қорбўрон шиддатини улкан гавдаси билан тўсган Айришоҳни пана қилиб боришарди. Битикчашма дарасидан воҳага туташ сойга тушишгач, чўчқалар ҳам буғулар билан аралашиб кетишиди. Бўрон чор атрофи очиқ сайхонликларда даҳшат билан ўкиради.

Пастқам сой ўртасидаги ғарамнинг ярми қор тагида қолган. Ғарам, охур ва беозор итга ўрганганд Айришоҳ тап тортмади. Буғулар ғарамни ўраб олишиб, бедага ёпишганини кўришган тўнғизлар бирваракайига емишга ташланишиди. Аввал қобон ўзини охурга урди. Тўда бир-бирини туртиб, итариб ҳўр-ҳўрлар, пишқирав, буғулар орасига кириб, бикинларига тумшуклари билан туртишар, ғарамни таг-тубигача емиришга чоғланган кўйи хавф-хатарни унутишиди.

Тонг сахарда чегара тарафга учиб ўтган вертолёт ҳайвонларнинг ҳушини жойига келтирди. Қобон пишқириб, шошилинч йўлга тушди, ортидан тўда эргашди. Ҳаш-паш дегунча, чўчқалар тўдаси кўздан ғойиб бўлди. Бу ҳолат буғуларга ҳам кўчди. Айришоҳ титилган, топталган беда ғарами, шамол учириб, қорга сочиб ташлаган хор-хасга қаради ва чамбарак бошини елкасига ташлаб, ҳавони симирди. Ёқимтой ит югуриб чиқадиган тепалик ортидан сутга димланётган оқ жўхори ҳиди келаётганини сезди ва ўша томонга оҳиста юриб кетди.

*

* *

— Вертолётнинг овози бўлса-ку гўрга-я. Мотоцикликими, деб гумонсираяпман. Нима дединг, Сезгир? Қани, олдимга туш. Ховлиқмасдан олдимда юр.

Суяр Суюн тепаликка чиқиб, ғарам тарафдан келган буғуларнинг қорга тиззагача ботган изларини кўриб колди.

— Шошма-чи, бу буғуни. Тайин Айриш... Нега тепаликка чиқди экан? Аҳ-ҳа, у сен билан мени кўрмоқчи, ҳол-аҳвол сўрамоқчи бўлиб келган. Биз бўлса иссиқ хона, пўстак, кўрпа-тўшакка ўраниб, маза қилиб хуррап отяпмиз. У бечора совукқа тўниб, титраб-қақшаб турибди. Ҳалақит бергиси келмапти. Начора, ҳам ташаккур, ҳам узр сўраймиз.

Ит из хидини олгач, ғарамга югуриб кетди.

— Эҳ-хе, ҳамма ёқ дабдала-ку. Бай-бай-бай! — бошини чайқади Суръ Суюн ғарамни айланиб кўздан кечираркан. — Бу, дейман, Айришинг жуда ноинсоф бўлиб кетибди, Сезгир... Кўявер, егани димлама жўхори бўлсин. Сут билан жўхори яна бир мартаға етади. Директор ҳам бўрондан кўрқиб, идорага бекиниб олди чоғи. Ҳечқиси йўқ, келиб қолар... Ий-е, чўчқалар ҳам келганми, дейман. Ол-а! Бир камимиз Тўнғизни боқиш қолувди. Охурдаги емишни очофат чўчқа паккос туширган. Бу факт унинг қўлидан келади. Мен бўлса, Айришни ёмон отга чиқариб ўтирибман. Суръ Суюн сирланган челякдаги димланган оқ жўхорини охурга ағдаргач, ҳайвон изларини кузата бошлиди. Қор қалин бўлганидан қай бири чўчқаники, қайсиси буғуники эканлигини аниқлаш қийин эди. Излардан ҳосил бўлган чукур сўқмоқ Битикчашмага бурилгани аник кўриниб турарди.

Битикчашма дарасида ҳам қор қалин тушган. Ҳайвонлар изидан кетаётган Сезгирнинг қорни сўқмоқ четларига тўрва бўлиб осилиб қолар, оёқлари ерга тегмас, хуноби ошиб типирчилар ва ноиложликдан ғингширди. У бир-икки қадам олдинга дуркун-дуркун сакраб, яна тикилиб қоларди. Суръ Суюн келиб кўймунидан кўтартмагунча, ялпайиб, тумшуғи билан қор сузиб ётарди.

— Олдинга мен ўтай, изимдан сен юр. Бу аҳволда ҳолинг хароб. Мехнат қилмай кўп овқат ейишнинг оқибати шундай бўлади, — деди у ортидан йўғон жундор думини гажак қилиб, алпанг-талланг келаётган итга ўгирилди. — Ҳой, кўп зўриқма, қайтишни ҳам ўила... Чамамда, тоқقا тушган қорни довул шу ерга тўплаб келиб, бас дегунча уюпти-да. Бу ҳам бўлса ернинг, тирик жонзоднинг насибаси.

Даҳанадан анча ичкари кирилгач, сўқмоқ тутиб чиқсан баланд қирра бурунга етган жойда ит эгасини четлаб ўтди-ю, олга ташланди. Суръ Суюн бурунга етгач, тўхтади. Нафасини ростлаб олгач, палаҳса тошни ушлаганча панадан бошини чиқарди. Рўпарада жануб томони зов сайхонлик ястаниб ётар, тепадан шамол учирган қор буралиб-буралиб тўзон бўлиб қуиларди. Ит сўқмоқда эмаклаб борар, ўмгани қорга ботиб, ҳолдан тойганига қарамасдан, олдинга интиларди. Ним коронги камар қаршисида улкан нар-навазнинг шоҳдор боши кўринди. У кўркувдан талвасага тушган сурувнинг йўлини тўсиб чиқди ва ер тепинди. Шағалтош камарда акс садо бериб, бўғик қарсиллади. У олдинга ҳам, ортга ҳам юришни билмай, ора йўлда ҳолсизланиб қолган итга яқинлашди. Сезгир ғингшиди ва унга талпинди. Бироқ буғу кескин тисарилиб, итга тикилиб қолди. Ит яна ғингшиб, оҳиста калта-калта хуриб юборди. Камар харачатга келди. Етти бош буғу камар деворига елка тираб, тарс

туриб кочишга шайланди. Нар буғу сузмокчи бўлгандек бош силкиб, уларни тинчтди ва яна итга яқин борди. Уч қадамча қолгач, бошини қуий эгиб, қоп-қора ялтироқ ҳўл тумшуғини итга чўзиб, хидламоқчи бўлди. Сезгир эпчиллик билан унинг тумшуғидан ялади. Буғу дик этиб орқага ташланди. Ит чалқанча ётиб олиб, оёқларини силкиб ўйнатди. Бир неча қадамдан сўнг бор бўйи билан қор ўюмига шўнғиб кетди. У ўртаниб фингшир, тилини осилтириб акиллар, чопмоқчи бўлар ва чорасизлигини сезиб ингранарди.

Суяр Суюн бошини қирра тош панасидан чиқарган кўйи ҳайкалдек қотиб, томоша қиласарди. Айришни яқиндан кўриш насиб этганидан, эс-хушини йўқотар даражада хаяжонланарди. Унинг кўзлари буғунинг қулоғидаги тамғага тушди: занглаб, қорайиб кетибди. Суловнинг кўллари теккан тамға. Кўйиб берса, югуриб борса-ю, Айришнинг шоҳдор бошини кучоғига олиб, ўша занглаган тамғага лабларини босса, яласа.

Қор учқунлаб киприкларига, кўзларига қўнди. Суяр Суюн чи-даб туролмади. Беихтиёр ёшовланган кўзларини енги билан артди. Яна Айришга тикилди.

Буғу уни илғаган эди. У энди тарҳашовлик килаётган итга қарамас, улкан бошини мағрур кўтариб, бодроқ-бодроқ ёқут кўзларини Суяр Суюнга қадаб турарди. Бекинишнинг, нафас ютиб ўтиришнинг иложи колмади. У оҳистагина эмраниб:

— Айриш... Айришим, — деди қўлини карнай қилиб.

Бу овоз ним ёруғ камарда акс садо бериб қайтганда, Айриш дархол хушёр тортди, аммо жойидан жилмади.

— Айриш, бу менман, Суярман, — у гавдасини тош панасидан олиб, буғуга бўй-бастини кўрсатмоқчи эди. Шу пайт қулокни тешиб юборгудек „вав-вав“ наъраси янгради. Думини қисиб, фингшиётган ит устидан Айриш бир ҳамла билан сакраб ўтди. Камардан салт буғулар ўқдек отилиб чиқиб, қор ўюмларига таппа-таппа тўш ташлаб, иришлай-ирфишлай, тоғ тарафга чопиб кетишиди.

— Ха, аттанг-а! — нола қилди Суяр Суюн.

Бу нидони буғулар эшитмади. Аллақачон узоқлашиб кетишиган эди. Буғулар олдинма-кетин устидан сакраб ўтганда писиб қолган Сезгир атрофга аланг-жаланг қаради, эгасининг қорасини кўргач, изига қайтди.

Тўнғиз сўқмоқда қор кўчди, кўз илғаган қияликларда қор тўзони чангиди. Айришнинг наъраси юксакларда яна янгради, „вав-вав-вав“ товушлар ҳавода тўлқинланиб, таркалиб борарди.

— Хей, Айриш курғур, бу ахир мен эдим — Суяр. Танимадингми? Яна жонингга озор етказдим мен ношуд. Чўчитдим-а... Ишқилиб, бирон жойларинг лат емаса бўлгани. Қайда бўлманглар, омон бўлсаларинг бас.

Сурув төғ ўркачига ўралган сайин довул шиддатли тус олиб, баттар ўкирарди. Айриш таъқибдан ўша заҳотиёқ кутилганини билса-да, сурувни төғ устида узок олиб юриш ҳалокат эканлинини ҳам англарди. У Тўйин ўркачларидан ошиб ўтиб, Ориқтов оралиғидаги сайхонлик воҳага чиқди. Тўйиннинг ўркачлари билан тўсилган воҳада бўрон шашти сезилмасди.

Она буғу чўлоқланиб Айришохнинг ёнига келди.

— Тўлиғим тошга қаттиқ тегди".

— Бекорга ҳовлиқдик. Одам ҳам, ит ҳам бизга зарар бермасди.,

Кўрдинг-ку, ювош, кўзлари жовдираган . "

— Сен бошладинг, кейин биз қочдик".

— У одам кўзимга таниш кўринди. Лекин, барибир, одамлардан кўрқаман".

— Уларни ёлғиз сен биласан... Шу ерда тунасак. Ортиқ юришга мадорим йўқ".

— Бу ерлар нотаниш".

— У ёқда бўрон".

— Илож қанча. Кетамиз".

— Рост. Қара, дарахтлар кесилган. Тўнкалар кўк ёлларга ўхшаб қунишиб, хурпайиб туришипти".

— Одамлар кесишган. Афсус. Ўрмон бизга бошпана. У доувуллардан сакларди. Емиш бўларди".

— Терим қотди. Совук. Бўрон қачон тинади?"

— Билмадим. Нега сўрадинг?"

— Тинса, кичик оролларга кетамиз".

— Кишда кичик оролларда катта фожиалар кутади".

ЎНИНЧИ БОБ

Кичик чилланинг ўрталарида Ойноввот келди. Эридан уялмай-нетмай Суяр Суюннинг бўйнидан қучди-ю, аввал бекиёс шодланди, сўнгра титраб-қақшаб йиғлаб юборди. Хали у келмасдан бурун бу учрашувни ўйлаб юрган Суяр Суюн бошқача бўлишини тасаввур ҳам қиломасди. Қиз қалбидаги бир неча йиллик тош-метин, берч армонлар чок-чокидан тирқираб сўкилди.

— Бўлди қил энди, — деди Баҳодир кўз ёшларини тиёлмаётган Ойноввотга. У тик турганича чой қайтараётган мезбондан уялаётган эди.

— Баҳодир, кўйинг, майли, юрагини бўшатиб олсин, — Суяр Суюн жувонга қаради. Унинг қуюқ, узун киприклари намланиб жуфтлашган, ёш оқиб тиниқлашган гусса тўла кўзлари меҳр билан унга тикилиб турарди. — Нега хафа бўляпсиз?.. Мана, яна жамулжаммиз.

— Кечиринглар мени, — деди Ойноввот ва Суяр Суюннинг каравотига ўтириб, Ойпарчани қўлига олди, опичлади, юзини юзига босди.

— Отам ҳам мушукни жуда яхши кўрардилар. Мош деган мушуклари бўларди, ҳамиша атир сепиб қўярдилар. Менинг эса атирга тоқатим йўқ. Мушукни ҳатто пайғамбар ҳам яхши кўрган, ухлаб ётган жониворга озор бермаслик учун, тўнининг этагини кесиб туриб кетган экан, дердилар. Ойпарча энди қариб қолди. Тишлари заифлашди. Нонни ҳам чайнаб бераман.

— Қачонги Ойпарча, эҳ-ҳей. Сезгир ҳам нақ бўрининг ўзи бўпти-қопти.

— Эсингдами, Сулув мушукка Ойпарча ном қўйгани.

— Менинг исмимга уйқаш...

Суяр Суюннинг назарида, Ойноввот нимаси биландир Сулувга ўхшаб кетди. Хастадиллик. Соҳибжамол жувон юзидағи нур, жозиба ўрнига бемаврид паришонлик, умидсизлик кўлан-касини сочган соя нима? Нега у Сулув хақида хеч гап сўрамаяпти. Балки эски яраларни эсга солиб, унга озор бермаслик учун, атайлаб гап очмаётгандир. Айриш хусусида эса чурк этмади. Суяр Суюннинг юраги увушиб кетди: у калаванинг учини топган эди. Туғмас хотинларга хос заифона хокисорлик Ойноввотни аллақачон ўз тўрига илинтириб, исканжага олган, ундан қутилиб кетиш чорасига бўлган ишонч чил-чил синган эди. Қовоғи солиқ Баҳодирнинг чехрасида ҳам бу мудхиш кўланка кезиб юрарди.

Ойноввот мушукни бағрига босганича, деразадан қорли тоғ ўнгирларига бокар, кўзлари бехосдан Суяр Суюн нигоҳи билан тўқнашиб қолса, маъюс жилмаяр, орага тушган нокулай жимлик унинг бахтсизлиги туфайли содир бўлганини зимдан хис этган сайин ўзини қўярга жой тополмас, бу маломат кулфатдан қутилитириш нажотини илтижо қилаётгандек мўлтиради.

— Баҳодиржон, билишимча, фуржали келгансизлар. Фарид кулбамнинг тўри сизларники.

— Агар малол келмаса... Синглингизнинг одатини биласизку, ҳашша борамиз, деб икки оёқни бир этикка тиқиб туриб олди. Бундай ҳаёт кечиришга ўрганиб кетган. Қирқим маҳалла-ри ҳафталаб тоғу тошда, дала-даштда бўлади.

— Ойноввотни кўриб бошим осмонга етди. Сизлар қадрдонларим. Келдингизлар, уйим тўлди-қолди. Сўққабош одам бундан ортиқ хурсандчиликни орзу қилолмайди. Ойноввот билан кўришмаганимизга неча йил бўлди, ахир... Ҳа, шундай. Бундай бир қарасанг, умр окар даре, ўтиб кетганини, кексайганингни билмайсан. Яна бир қарасанг — умр бир хил, ўзгаришсиз тургандек. Ҳаммаси кайфиятга боғлиқ. Ойноввот билади, менинг умрим тўқайзор ўрмонларда, тоғу тошда ўтъяпти. Улар ўзгармагани сингари, менини ҳам ўзгаришсиздек. Баъзан ўзимни сўроқ қиламан: ҳой, сен неча минг йилдан бўён яшаяпсан? Кайфият сал паришонхол бўлса, аксинча, дилозор таҳлика ўрмалаб киради кўнгилга... Сизларники эса ҳали олдинда, кўриб улгурасиз. Қувонч ҳам бўлади, шодлик ҳам, байрам ҳам бўлади. Факат саломатлик бўлса, бас.

— Сиз билан танишдим-у, астойдил ихлос қўйиб қолдим. Ҳавасим келади. Ёлғиз одамсиз, лекин оламсиз.

— Ёлғиз деманг, шер йигит, биз кўпчилик — Сезгир, Ойпарча. Даشتда эса бир фарзандимиз бор — дайди-дарбадар. Ойноввот Суръ Суюнга ялт этиб қаради. Унинг кўзларида шу чоққача кўргаган ҳайратомуз нур чараклаб кетди.

— Ҳа, ҳа, ишонаверинг. Шуниси ҳам борки, баъзи серташвиш оиласларга хос диққатбозлиқ бизда ҳам содир бўлиб туради. Ота-она мўмин-қобил фарзанддан кўнгли тўқ, лекин дарбадар, ўйинқароқ боласига кўпроқ меҳрибон бўлгани каби, бизнинг асосий ўй-ташвишимиз, ғамимиз — ўша. Нима қилди, нима қўйди, қаерда юрипти — хаёл ўшанда! Униги далада, даشتда. Шундай оворагарчилик. Бу иккаласидан эса кўнглим тўқ. Ёнимда. Итоаткор, гапга юради. Сафарга чиқсан, ҳамиша Сезгир ўнг кўлим. Ойпарча эса уйда кайвони. Итнинг бир буюк хислати — амрни бажо келтириш. Лекин амр эмас, аслида, унинг орзуси. Ўз иродам, эркимни у орқали бажараман. Мўйловлари тикрайиб, қошлари учча бошласа, билингки, ит зериқди. Бу ҳолда у тез синиқади. Шунда узокларга бош олиб чиқиб кетамиз. Үнга далда бераман: биргина хонадонни кўриқлаб ётган итларни кўрсанг, роса раҳминг келар-ов. Бечоралар остона ҳатлаб, кўчага чиқиша олмаса. Дунёга келдинг нима-ю, келмадинг нима.

— Суръ ака, безарар, бегам одамсиз, бир умр сизга ўхшаган одамга шогирд тушсам, дейман.— Баҳодир ҳамсухбатининг қизариб кетганини кўргач, кўшиб қўйди, — Сиз мени тўғри тушунинг.

— Карши эмасман-у, лекин айтиб қўяй — бу турмушнинг ҳам машаққатлари бор.

— Одамлар орасида юргим йўқ. Давраларни кўнглим тусамайди.

— Укам, сизнинг йўриғингиз бошқа.

— Йўриқларнинг қурбони бўлиб қолаяпмиз-да.

— Кон-танимизга чирмашиб олган қолигдан қутулиш осон эмас, — деди Суяр Суюн йиғма алюмин столнинг оёқларини кериб, клеёнка ёзаркан. — Мен буни бошимдан кечирганман. Шу боисдан сизни ҳам тушунаман. Сезигир билан кўп гурунг қиласман. Ҳой, дейман унга, ахир, сен бир замонлар бўри пуштидан тарқалган бўрибосарсан. Бўри бўлса йўқ. Шунча ойдан бери тоғ кезамиз, кани уруғга топилса. Бўрибосармиш. Нимани босасан. Умуман, кўлингдан келармикан... Итоатдан ўзга чора йўқ. Шароитга шунчалик мослашдингки, зотинг қадимда йиртқич бўри бўлганлиги ҳеч кимнинг хаёлига ҳам келмайди. Тақдирнинг чикка-пукка ўйинига тан бер, иложсизсан. Унинг бир фазилати менга ёқади: баъзи итларга ўхшаб бўлар-бўлмасга хуриб, ташланавермайди, мен бўри авлодиданмен, деб бемаҳалда увламайди. Забонсиз махлук-да, дарди ичида.

*

* *

Зов тепасида оппоқ қирордан ҳурпайиб турган хатанак Ойнов-вотнинг завқини келтирди.

— Шу бутани ўтган йили баҳорда ҳам кўрганман. Унда тўқ яшил, жуда чиройли эди. — Жувон кипригига қўнган зирачча корни қўй кафти билан сидирди.

— Ўтган йили? — ҳайрон бўлиб сўради Суяр Суюн.

— Ха. Бу ерга отам бошлаб келдилар. Тўл пайти отарлардан хабар олгани чиқкан эдик. Қизим, сенга шу тарафларни ҳам томоша қилдирай, омадимиз чопса, қўзиқорин ҳам терамиз, дедилар. Ана қўзиқорин, мана қўзиқорин — кўриб ақлингиз шошади. Чинакам баҳорни шу ерда кўрдим. Отам урушдан аввал бу ерларда бўлган эканлар. Тўйинда кийиклар пода бўлиб юрарди, ўз кўзим билан кўрганман, дедилар.

— Ташишманд одамга бу гўзаллик бир пул. Кадрига етиш у ёқда турсин, ҳатто эътибор ҳам бермайди, — Баходир корга кўмилиб ётган тутовоннинг сарик-қизғиши, шапалоқдек нам япрогини қўлида ушлаганча томоша қиларкан, тиззалаб ўтириб олди.

— Кейин, биласизми, нима бўлди?.. Баланд тепаликка чиқиб, нонуштага ўтирган эдик, сой тубидан ғалати маърашни эшитдик. Мен отамга, отам менга қарайди. Улокники ҳам эмас, қўзиники ҳам. Шундай бир ғариф, юракни тилка-пора қиладиган овозки, чидаб туриб бўлмайди. Отам, кийик ёки жайрон боласи адәшиб қолгандир, дедилар. Шофёр, отам, мен излаш-

га тушдик. Сойдаги ўт белга уради. Қани энди топсак. Кун пешиндан оққунча овора бўлдик. Ҳеч ерда йўқ. Осмонга учдими, ерга кириб кетдими, билмаймиз. Ҳориб-чарчаб ёзиғлик дастурхон теварагига ўтиридик. Иштаҳа қайда. Шунда бир сой ошиб бир шамол эсди. Ҳали-ҳали эсласам, хўрлигим келади, энтикаман. Ё тавба, шамол ҳам шундай бўладими.

— Суяр ака сизда ҳам шундай ҳолат бўлганми? Қандай жониворнинг маъраши бўлиши мумкин? — Баҳодир бўйнига осиғлик дурбинини қўлига олди.

— Қизик... Ҳайронман...

— Ана уларга қаранг! — бехосдан ҳовлиқиб хитоб қилди Баҳодир. У дурбин богичини бўйнидан ошириб оламан деб, суртелпагини тушириб юборди.

— Мен ҳам кўрай, нима экан, — деди тоқатсизланиб Ойноввот дурбинга кўл узатаркан.

Кўзи ўткир Суяр Суюн бир қарашдаёқ сурувни кўрган эди:

— Ойноввот, томоша қилинг, ўша сиз кўришга интизор Айришингиз. Ҳарамини сайиллатиб юрибди.

Сурув икки жилғани ажратиб турган торгина ўркачдан қор чангитиб, тўнғиз сўқмоқ тарафга тушиб келарди. Ойноввот ҳаяжонланар, дурбинда кўзларини шошиб юргизар, аммо сурувни кўрмасди. Суяр Суюн ўзини панага олиб, Баҳодирни имлаб чақирди.

— Топдим, топдим! — қичқириб юборди Ойноввот.

— Жим-е, — пиҷирлади эри унга.

Ойноввот мувозанатини йўқотиб, қорга чўккалаб қолди. Шунда ҳам у қўлларидан дурбинни қўймасди. Бу орада Суяр Суюн йигит билан режа тузиб олди.

— Бу ёқса юринг. Бас, кейин кўраверасиз, — деди Баҳодир Ойноввотнинг билагидан ушлаб, панага тортаркан.

— Ойимхолнинг қўнишидан тушиб келишяпти. Кеч бўлдида, кориннинг ташвишини, ғамини ейиши керак.

— Ойимхолингиз ким? — таажжубланиб сўради Ойноввот.

— Ойимхолми? — кулди Суяр Суюн жувоннинг қизарган юзига боқиб. — Бир замонлар ўтган бой, тул хотин. Одамлардан ажралиб ўша текис сайхонда якка мохов бўлиб кун кечирган. Ўтвлари, молу ҳоли кўп бўлган. Ойимхолнинг қўниши, деган ном шундан қолган... Гап бундай, буғулар, барибири, шу ердан ўтади. Бошқа йўл йўқ. Тўнғиз сўқмоқ уларни Битикчашмага олиб чиқади. Биз бу ерда турсак, юрагини ёриб қўлига берамиз. Кейин фарамага йўламай қўшишади. Бу ердан жуфтакни ростламасак бўлмайди. Оқ қоялар воҳасига ўтадиган торгина жилға бор, паналаса бўлади. Ўша ерда кутамиз. Очик жой, истаганча томоша қиласиз... Сезгир, кетдик, олдимга туш.

Ит орқасига қарай-қарай чор-ночор уларга эргашди.

Буғуларнинг яқинлашганини сезган Сезгир безовталана бошлиди. Суяр Суюн ими-жими, пўписадан наф чиқмаслигини билб, итни биқинига босди, бўйнидан кучоклаб ва ғингшимаслиги учун чап қўли билан тумшуғини қисди. Афтидан, буғулар одамлар из қолдириб келган сўқмокни ўзлариники чоғлаб, тўппа-тўғри улар паналаган жар лабига келишарди. Ит ёёкларини типирчилатиб юлқинди. Суяр Суюн уни жон-жаҳди билан қорнидан қисган эди тумшуғи юмуқ бўлса-да, „вак“ этиб шангиллаб юборди. Тепадаги тапир-тупур оёқ овозлари узоклашди. Тахминан эллик қадамча адокда она буғу жилғани шошиб кесиб ўтди. Айни маҳал одамлар бекинган жар лабидан қор кўчиб тушди, ғусур-ғусур туёқ товушлари эшитилди. Суяр Суюн Баходирнинг биқинига туртиб ҳали бир замон она буғу ўтган тарафни кўрсатди. Эни беш куличча ўпирма жардан биринчи бўлиб чамбарак улкан шохини елкасига ташлаган Айриш сакради, кейин ургочи буғуларнинг парвоздаги қоматлари кўринди: олдингилари ерга тушган, кетингилари ҳамон ҳавода учеб боришарди. Бир сония маҳлиёликка берилган Суяр Суюн итни қўлидан чиқариб юборди. Бир зумда у нураган жилға муюлишида қор сачратиб, кўздан фойиб бўлди.

— Бунакасини ҳеч кўрганим йўқ! — деди юзи қизариб қаварган Баҳодир оқ жунли пўстини ёқасини ушлаб бош чайқаркан.

Эркаклар тепаликка кўтарилишиб, кенг сайхонда қор ўюмларига суриниб-тўкиниб чопаётган Ойноввотни кўришди. У „айришлаб“ қичқиради. Сезгир рўпарадаги сойнинг ўнгирига етган, бирок ортдан келаётган фарёдни эшитиб, олға — буғулар ортидан чопишни ҳам, ортга — ҳолсизланган Ойноввотга қайтишини ҳам билмай икки жаҳон овораси бўлиб аросатда қолди.

— Бу азоб-укубатлар кимга керак? — гулдуради Баҳодир.

Шу дамда хотинининг беўхшов харакатларидан нафратланганини ҳам, унга раҳми келиб кетганини ҳам англаб бўлмасди.

— Айришни кўргани яхши бўлди, кўнгли юмшайди, — юпатди уни Суяр Суюн.

*
* *

У -бу юмушларни баҳона қилган Суяр Суюн эр-хотинни вагончада холи қолдирди-да, итини эргаштириб, тоққа чиқиб кетди. У хонгуллар тумшук тиқиб қушуя бўлиб кетган ғарамдан хабар олди. Кор роса топталганини кўриб буғуларнинг эл бўлганидан, шу кунгача кечирган ташвишлари зое кетмаганидан, муроди ҳосил бўлганидан севинди. Аммо қандайдир бетайин туйғулар

юрагини гижимлаётганидан кўнгли хуфтон эди. Фуссамакон төғлар узра имиллаб сузаётган оқиш-кулранг булувлар ҳам, адирлар устида судралаётган соялар ҳам кўнглига сифмасди. Нега унинг рухияти зилдай оғирлашди? Ойноввот келди-ю, фаромуш хотир бўлиб қолди. Баъзида ҳаётда ҳамроҳ бўлиб, кейинчалик йўлдан чегирилган шериклар ҳам ўлган, ҳаётдан кўз юмган одамларга ўхшаб кетади. Илгарилари Ойноввот эгасига тушганида, у билан шу тарзда мулоқот қиласди. У эса ўз оёғи билан юриб келди. Бир ўзи эмас, нозик жуссаси кўтара олмайдиган, қалби эмас, оламга сифмайдиган мудҳиш юқ билан келди. Унга ким ҳамдам, ҳамдард бўла олади? Тоғни талқон қиласидиган, ҳар юмушга қодир Баходирдек алп эр ҳам унинг олдидаги ожиз, лол. Севгининг дарду фифонини кўтариш оғир, зил...

Қоронги қалб тўрида ялт этиб нур порлади. Шу фурсатни атайлаб пойлагандек бехосдан чараклаб кетди. Турмуш икирчикирлари, таниш-нотаниш одамларнинг гавжум давралари туфайли, Сулув қиёфаси олислашиб кетган эди. Кимсасиз яйдок даштда бошига тош теккандек гарангсираб кетаётган Суяр Суюн қаршисида унинг ўқсик рухи — рухсори пайдо бўлди. Самовий авлиёдек пок-покиза, тип-тиник... Оламдан кўз юмган одамлар тириклар учун иккинчи ҳаёт кечира бошлишади. Холис ҳаёл азиз ва табаррук хилқатни хору ҳас, иллату қусурлардан ажратиб олиб ювиб-чаяди-ю, мусаффо этиб намоён қиласди.

— Келдингми, Сулув?.. Орадан қанча фасллар ўтди. Атрофимда ҳамон мангулик ҳукмрон. Инсон ранг-баранг, ҳудудсиз оламга ҳамиша муштоқ: ҳаёт, табиат, борлиқни мудом англашга уринади-ю, ўзи бесамар иштиёқ курбони. Назаримда, бу хил йўл тутган одам ҳар ҳолда тўғри қиласди. Фойиб бўлганида унинг изларини излаб топса бўлади. Ахир, сени мафтун этган, асоратга солган у жумбоклар ҳамиша бор, мухайё. Одамзод бир-бирини такрорлайди, тириклар кетганлар орзу-истакларини елкаларида қутлуг мерос янглиғ слиб юришади... Сулув, мана ҳозиргидек қайсиadir бир фойибона чорраҳада руҳинг билан тўқнаш келиш мен учун олий баҳт. Бундай хуфёна айтолмаган, қиёмига етказиб тушунтиrolмаган қалб розимни баён қиласди. Эшиит. Онда-сонда бир хулоса — акида ёдимга тушади-ю, сескантириб юборади: баъзида ҳатто қирғин уруш, фожиа, мудҳиш жудолик шарпалари ҳам севги соғинчикдек бедаво фусса олдидаги эшолмайди. У барча азоблардан кучлироқ эзади, кемиради... Ҳасрат сизга зиён, дедингми? Қара-я, ҳамон ғамим билан бандсан. Кўлингни бер, Сулувим, дала-даштлар бизни кутмоқда. Яқинда еру замин үйғонади. Сен-ла кечган ўша кўклам фасллар ҳали олдинда. Биз, ахир, ҳамиша биргамиз-ку".

Суяр Суюн вақт пешиндан оққач, тоғдан кайтди. Димоfiga гуп этиб ош хиди урилди-ю, дилхасталик, чарчоқлар бирдан унуптил-

ди. Уни Ойноввот хушчакчак кутиб олди. Баҳодир донг қотиб ухлаб ётарди.

— Декчада ош дамладим, — деди Ойноввот шивирлаб, эри ни үйғотиб юборишдан чўчигандек.

— Ташқаридаёқ сездим. Ошни роса соғинган эдим. Ош лишириш эса қўлимдан келмайди.

— Биламан. Қайғурмәнг, мен бор — ош ҳамиша бўлади, — деди Ойноввот қошлирини қоқиб кўкрагига нуқиркан.

Суяр Суюн жувон узатган иссиқ чойни мирикиб ҳўпларкан, саришта-саранжом кулба кенгайгандек, ёруғроқ бўлиб қолган-дек туюлди. У пиёладан кўтарилаётган буғ орасидан рўпарасида ўтирган Ойноввотнинг юзига диққат билан разм солар, яноқлари қизарганидан, бутун рухсори ички нурдан шафакланиб турганидан, қизариб-қимтиниб қовжираган лабларини ялашдан, юzlари ловуллаб ёнаётганидан ҳайратланиб ўтиради.

— Э-бий, ахир, Сезигрга алоҳида овқат қилгандим, эсим қурсин. У шўрлик ташқарида томоги тушиб ўтирибди, — Ойноввот ўрнидан туриб, печка ёнидаги товоқ қопқоғини очди. — Ҳали иссиқ, оғзини кўйдиради.

— Сийлаб юборибсиз-да уни.

— Арзиди. Сезигрга ҳар қандай сийлов ҳам кам.

— Нимасини айтасиз... Уни азбаройи яхши кўраман. Бир куни меҳрим ийиб унга: ўлсак бирга ўламиз, сен-ла у дунё ҳам кўрқинчли бўлмас, дедим.

— Бундай совуқ гапларни қўйинг, Суяр ака.

— Нега? Ўлим ҳақ. Ёниб турган шамнинг сўнгги ёлқини — лип этади, ўчади-қолади. Уни биз бўрттириб, ваҳима қилиб юрамиз. Биласиз-ку, одамзод ваҳимага уста. Магеллан тумонотидаги бир юлдуз бир юз етмиш минг йил бурун сўнган экан. Унинг портлашидан ҳосил бўлган ёғду шуъласи эндигина ерга етиб келибди. Инсонники нима бўпти? Чакмок. Зулматда бир чақнади: саросимага тушган йўловчига нури тушди ва сўнди. Йўловчи яна зулмат ҳукмида қолди. Аммо муҳими бунда эмас

— гап чақмоқнинг оний ёғдусида. Ўша ёғду сизни нурлантириди. Хосиятли чақинлар зоега кетмайди, кимларгадир кўчади, кимларгадир тутантириқ. Токи тирик экансиз, руҳиятингиз, онгингиз ундан нурланиб туради. Сўнган чақинга сиз соҳиб. Навбати келиб, ўзгаларни сиз нурлантирасиз. Ана шу баҳт... Ҳаёт навоси ғоят мураккаб. Ўлимдан даҳшатлироқ ҳодисалар ҳам юз беради. Шундан сақланиш керак. Ёлғон, сохта яшаш ва оний бир лаҳзада бу қабоҳатни англаб, умрни беҳудага ўтказиб юборганингни ҳис этиш — буниси баҳтсизлик... Сулув опангиз ўшандай чақмоқ бўлди. Ундан менга, сизга зарралар сачради. У шамдан тараған нур ҳали кўп йўл кечади.

— Кўнглимдаги гапларни билгандексиз. Айтаман дердим, тилим бормасди. Ойсулов опамларнинг ўзлари биз билан бирга. Худди шундай, — Ойноввот Суръ Суюнни эркалаб, елкасини силади.

— Шу тарзда давом этаверади. Лекин чақмоқлар ҳам ҳар хил чақнайди. Шундай ҳам бўладики, нурлантириш ўрнига кўидириб-ёндириб юборади.

— Бир коса совуқ сув бер, Ойноввот, роса чанқадим, — деди Баҳодир кўзларини уқалаб ўрнидан туаркан.

— Чой ичинг.

— Фақат сув узат, — Баҳодир сувни сипқориб, чинни косани столга қўяркан, курсига ўтириди. — Сиз йўғингизда синглингиз билан маслаҳат қилдик: бир тележка беда, бир фляга сут ва бир қоп жўхори юборамиз. Баҳорги каникулда ўзимиз билан яна келтирамиз.

— Овора бўлиб нима қиласиз.

— Оворагарчилиги борми? Хўжалик бу билан камбағал бўлиб қолмайди. Хонгуллар ғамини фақат сизларгина эмас, ҳалқ ҳам ейиши керак.

— Бу фикрингиз жуда ўринли. Раҳмат, ука, қани эди, ҳамма сиздек тушунса, қадрласа.

ЎН БИРИНЧИ БОБ

Хут охирлайвериб, кучли бўронлар эсганда, лисиб кетган Тўйиннинг чаппа шамоли яна жонланди. У Оқ коялар воҳасида хуштак чалиб, ўркачлар соябон қор қатламлари захрини сайхонликларга пуркади. Пўстинининг ёқасини кўтариб ўраниб олган Суръ Суюн жанубдаги пастқам адирликлар ортига оққан қирмизи қуёшнинг йироқ дарё сатҳида ёркин из қолдириб ботишини мароқ билан кузатарди. Куёш қип-қизил чўф ўтовдек аста-секин уфқ ортига чўкиб бораради. Изгирин шамол суяк-суягидан ўтиб кетганидан, жунлари ҳурпайган Сезгир керишиди.

— Совқотдингми, жонивор? Бўпти, кетамиз, — деди Суръ Суюн осмондаги лахта-лахта қорамтири берч булутларга қааркан. Осмон ҳам биз сингари караҳт. Қишининг сафари ҳам тугаб қолди. Қиши — меҳмон, минг қовоқ солиб чиранмасин, барibir, кетади. Изидан баҳор келади.

Сўнгги кунларда оромини безовта қилган, мудроқقا мойил руҳиятидаги мавхумот бекарор ғашлиқ қатлари чок-чокидан сўклиб кетди. Вужуди шу дамда илғаган баҳор нафасидан сергак тортди. Вагонга қайтишга юраги бетламади. Баҳор арафасида ёввойи табиат қучогида ёлғиз сайр қилишни ғоят улуғ саодат

деб билган Суяр Суюн ўзини бундай пайтларда борлиқ билан уйғун сезар, бу оламда мангу юргандек, неча бор туғилиб, неча бор ўлиб, яна унинг фусункор оғушига қайтгандек ҳис этарди. Ҳар бир күхлик ва хокисор ўсимлик, олам күз ўнгида кун сайин гўзаллашиб, файз касб этаетганидан севинарди. Шунда фаромуш армонлар ўринида шодмон орзуладар барқ уради, чарчоқ ва ҳафсаласизликлар чекланиб, томирларда соф қон кўпирарди.

— Баҳордагина табиат билан чамбарчас боғлиқлигини равшан англамаган, бундай ҳаяжонни кечирмаган инсон умри занглаган темир. Қалби бўм-бўш, эҳтиорсиз одам танбал, кўрс, жоҳил бўлади.

Суяр Суюн ўз хаёллари билан андармон бўлиб, ёнма-ён кетаётган ити ортда қолганини пайқамади.

— Ҳа, ниманинг хидини олдинг? — Тоғнинг зриган ўркачида элас-элас буғулар суруви кўринди. — Мазахўракларми? Уларни ўз ҳолига тинч кўй. Энди кўнгил тўқ, беда кўп, жўхори қопқоп. Бўканича ейишсин.

Сезгир истар-истамай эгасига эргашди. У танасидан иссиқ ўтиб, бўғиз атрофлари қордан холи бўлган шувокларни хидлар, сорир, ўткир тахир хиддан акса урад, тумшуғини нам тупроққа суйкарди.

— Чўчқамидингки, тупроқни тумшуғинг билан ағдарасан. Қара, бурнингдаги лой бир энлик. — Суяр Суюн енги билан ит бурни учидаги лойни сидирди. — Бурнинг мунча совуқ. Корнинг очдими? Э-эй, шундай демайсанми? Бу изғирин совуқ ичингдаги борини ҳам қатрон қилиб ялаб кетади. Очликка чидаш қийин. Ху, ана, Айриш ҳарамини ипсиз сиртмоққа боғлаб тоғдан эндириб келаётган ҳам очлик. — У мушоҳадага берилиб кетди. — Сени билмадим-у, менга буғуларнинг хос ёввойилиги ёқмаяпти. Нега бунча ўзини биздан олиб қочади. Арпасини хом ўрган бўлсак, айтсин. Нодон, ҳар кеча емиш дардидага ўн-йигирма чақирим йўл босади. Мана, шамолпана сойда беда ғарам, охур тўла емиш. Е, ич, қорнингни қашилаб ёт. Тинчингни қўриклиётган соҳибинг бўлса. Аралашиб кетаверса экан инсонга... Йўқ, уларнинг ҳам биз сингари кўнгли тинч, ором оладиган манзили бор. Бирорларга кулбамиз катак кўринар, лекин бизга маҳбуб макон. Неки тирик мавжудот бор манзил излайди, макон талашади. У ўзинг яратган нурли маскан: ўпирма жарнинг соvuқ камари саргардон буғулар учун қаср, муэзлаган тупроғи парку кўрпа-ёстиқ, изғирин шамол садоқатли жарчи. Шунчалар хуркак, юраксиз. Ҳамиша қувғинда, тиқ этган, шитирлаган овоздан юраги така-пука. Бу азоб ўрнига кел ёнимизга, бош эг... Фурунг йўл бермайди. Биламан. Сен эркни ҳар нарсадан устун қўясан. Эрксеварлигинг бошингга минг хил кулфат,

бало-қазолар ёғдиради. Эрк ҳар қандай қулайлик, фароғатдан юксак. Доно аждодлар мактаган хосиятинг ҳам шу хислатинг бўлса керак. Дарвоқе, мутеликдан узил-кесил воз кечмай туриб, эркинликни туйиш чала зартак. Ҳурриятнинг тимсоли учкур асов зотсизлар, сўнгги истак, хилкат эмас — инсоннинг ҳали очилиб улгурмаган нотинч хаёл, парвозга маҳбуб түйғуларисиз. Шохларинг чамбарак — тунда самодан инжу юлдузлар ёғилса, тутиб қолмоқчимисан. Шундайми? Ёки бошқа сиру синоат борми? Тенгсиз хосиятинг, салт гўзаллигинг қадрига етмаган инсон жаҳолатидан паймонанг тўлиб, кўкка илтижо қиласяпсанми? Одамзод ҳам фам-ҳасрат, кулфат тоги нураб, бошига қулаган кезлар ҳовучини, панжаларини шохларнинг тифи янглиғ қўкка очади. Чексиз самода қандай куч, нажот бор?.. Қайси куни Ойноввот шундай қилди. Унинг фифонини сенлар эшитмадинг. Афсус. Ҳали-ку, тўпори хонгул экансан, тавқилаънат инсу жин ҳам, унга жоннисор ҳамдард бўлардинг. Мағрурда меҳр йўқ, дейишади. Балки, ростдир. Лекин нега мағрут, хур зотга тавозе қиласиз? Жумбоқ... Хой, Сезгир, бас қил, демайсанми. Бoshim foвлаб кетди-ку.

*
* *

Кунлар исиб кетди. Қуёшга бетгай ёнбағирликлар, ўркачлардаги қорлар эриб, жигарранг ер юзи кўринди. Эрувгарчилик авж олди. Орадан икки-уч кун ўтар-ўтмай, қордан бўшаган ерлар чимўтдан чиммат тортиди. Тоғ тўшлари оппоқ қор, пойи эса ҳарир либос юзига тортган баҳор. Чимўт узоқдан латиф манзара касб этиб, кузга ташлангани билан, унинг яшил ранги тепган майдонга яқинлашиб борганингиз сайин таровати йўқолади. Шунчалик нозик, заифки, ҳали тупроқ олови ҳовур чиқариб кўтарилаётгандек. Баҳорнинг илк элчиси — адирдаги нимжон имиллаган қишини ҳуркитмоқчилик унинг қоқшол панжаси — қор қатлами этагидан тутиб олган, устма-уст зуғум қилади: гоҳ чимўтни қорга кўмади, гоҳ саҳарда заҳарли изфирин пуркаб, яхмалакка занжиртоб ўрайди. У эса қасдма-қасдига олиб, тобора ранг очади. Қиши бу хархаша, ёпишмоқ қўшнидан чекинади, оқ кўрпасини шоша-пиша йиға кетади. Чимўт эса уни қаричма-қарич тоб бермай таъқиб этади.

Қор тагида узок вақт димиқиб ётиб бўй, ранг кўрсатмаган замин кўзга қанчалар яқин: кумлок, тошлок, сербута, ажиндор, ёмирилган, ўпирилган, чўккан, юксалган сийнаси намоён бўла боради. Бу ўзгаришларни кузатаркан, дилдан сириқтириб ўтказаркан инсон қаҳратон қиши асоратидан халос бўлганини сезади ва кўкракларини кенг кериб нафас олади. Ўпканинг то-

залигидан, шаффоф ҳавонинг мусаффолигидан ва пировард беихтиёр энтикаётганидан таажжубланади, шу аснода табиатнинг дилгир фарзанди сифатида фафлатларга чап бериб, уйғониш маҳали унинг ёнида турганидан бехад севинади. Ахир, инсон муваққат бўлгани билан, замин мангур, чанқоги ундан қонади.

Шиддат ва кўлам жануб баҳорига хос хислат. Пастқам адирликлар, воҳаларда эрувгарчилик бошланган бўлса-да, Тўйиннинг минг метрдан юқори ўмровлари ҳали булутлардан чодир курган совук шамоллар ҳукмида. Қўёшга бетгай сиртлар эригани билан, тароқ сою жилғаларнинг тубларида қор берч катлам бўлиб, босилиб ётарди.

Вагонча рўпарасидаги тепалик қордан халос бўлиб, силлик тўши чимўт билан яшилланди, қўзигуллар дийдираб, ер ёриб чиқди. Тепалик соясидаги қор ўюми кун сайн пастлади. Баҳор чор атрофдан вагончага ёпирилиб келарди.

Суяр Суюннинг кулбаси бир кунда одамга гавжум бўлди-колди.

— Билардим келишларингни, аммо қайси кунлиги номаълум эди. Қарасам, каникул ҳам бошланди, сизлардан дарак йўқ. Бугун тоғларда байрам. Васли баҳор — диққинафас ним коронги кулбанг бозор. Ҳамма табиат қучогига талпинади. Ичими ит тирнайди: қадрдон бовурларим фурсатни бой бериб қўйишмаса, бугун бор-эрта йўқ манзараларни кўришмас, дода қолишади, деб хавотирланиб турувдим.

— Термизнинг кўчалари чангид ётибди, — деди директор яшиллик, кенглиқдан қамашган қўзларини ишқаб.

— Термизликмисиз? — бир четда сигарета чекиб турган Ботир директорга яқин борди. — Янглишмасам, ўтган гал домланинг қишлоқдош шогирдиман, дегандек бўлувдингиз.

— Ботирбой, таажжубланманг: ҳисоб биру бир, — кулди Суяр Суюн.

— Қандай ҳисоб. Тушунмадим.

— Эсланг, эсланг. Сиз Баҳодирни ким деб танитган эдингиз? Биз ҳам қарэдор бўлишни истамадик.

— Менга қаранг, Ботир ака, — деди Ойноввот бошини эшикдан чиқариб, супургини темир зинага уриб қоқаркан. Бу киши қўриқхонанинг директори Раҳматжон ака-ку!

— Йўғ-е! — Ботирнинг капалаги учди. — Наҳотки?.. Баҳодир бунисига нима дейсан?

— Мана энди чинакамига танишиб олдик. Кўнглингизга олманг, бўлади-да. — Раҳмат Ботирнинг кенг елкасига қўлини қўйиб, сигарета сўради. — Чекайлик.

— Ҳали шундай денг, — Ботир чўнтағидан шошиб сигарета оларкан, директорга бақрайиб қаради. — Мен овсар гапга лақقا учибман. Ўйламайсанми, устоз қаерда-ю, шогирд қаерда? Ҳом калла, — у пешонасиға кўрсаткич бармоғини бигиз қилиб турти. — Айтим-ов, Ойноввот бу одамни қаердан таниркан, апоқ-чапоқ қуюқ сўрашиб қолди, деб ҳатто кўнгилимга ғайирлик ҳам келди. Ҳеч ўйламагандим, кечирасиз.

— Кўйинг, ўтган гапга салавот.

— Қани, хонага кириңгизлар, стол тахт, — Ойноввот ичкаридан товуш қилди.

Эркаклар стол теварагида ўтиришди, Ойноввот хизмат қилиб турди. Суяр Суюн уни зимдан кузатаркан, Сулувга ўхшаб кетишини дили синикиб яна тан олди. Жувон гапга аралашмас, кўли иш билан банд бўлса-да, хаёли узокларда эди. У деразадан тоғ ўрқачларига ўғринча назар ташлар, ҳарчанд уринмасин, бетоқат ҳаяжонини яшиrolмасди. Ниҳоят, у чидолмади:

— Бир нарса кўрсатсан нима дейсизлар? — деди у. — Дера-зага қаранглар.

Ҳамма ўгирилиб деразага боқди.

— Нима бўпти? — талмовсираб сўради Ботир.

— Тоққа қаранглар, йўлбарс... — Ойноввот ютинди хижолатдан.

Анграйиб қолишган эркаклар аввал ҳайрон қолишди, кейин кулиб юборишли.

— Чинакам йўлбарсмикан, деб ҳушим учиб кетибди. — Ботир ўсмокчилади. — Жилға-ю, сой...

— Кимга жилға, кимга сой... Топқирлигингишга қойилман. Йўлбарс терисини ёпинган Тўйин. Яшанг, Ойноввот! Эрта-ю кеч атрофимда шу тоғлар, лекин аслига ўхшатолмапман.

— Бу кўзга, қарашга боғлиқ, — деди директор гавдаси билан деразани тўсиб. — Бирор қорни кўради, бошқаси жигар ранг чўқкини. Бирор эса ҳаммасини яхлит тасаввур қилиб, хаёлида тирик сурат яратади. Рассом бўлиш ҳам қўлингиздан келаркан, Ойноввот.

Бироқ жувоннинг журъати, топқирлиги даврадагиларни фаромуш хаёллар оламига бошлади. Ҳамиша вазмин, синчков Раҳмат Аҳадов Суяр Суюнни ҳайратга солиб, гапга тушиб кетди.

— Мўйқалам асарлари табиатдан олинган оний, лаҳзалик манзара. Уларни томоша қилиш учун музейларга, кўргазмаларга борамиз, пулдорлар миллионлаб маблағ сафлаб, сотиб олишади. Аслида, ўзимиз табиат аталмиш рассом яратган буюк асар аро яшаймиз. Шуниси қизиқки, ўзимизни ана шу мангу такрорланмас асарда танимаймиз.

- Сабаби? — сўради Ойноввот.
- Чунки ўзимизни йўқотганмиз...
- Ботир оғзини катта очиб эснади ва чўнтағига кўл тиқиб сигарета олди-да, ташқарига чиқди.
- Ўзлигини таниган инсонгина табиат, умр, эзгулик қадрига етади.
- Раҳматжон ака, бир нарса сўрамоқчи эдим: Тўйин, Хонтоғай дейишади...
- Тушундим. Тўйинтоғнинг номини ўтмиш аждодлар топиб қўйишган. Илгарилари бу тоғда катта ўрмонлар, серўт, серфайз яйловлар бўлган. Чорвани тўйдирган. Чорва тўйса, одам ҳам тўқ. Тирик жонзотни тўйинтирган Хонтоғай тўғрисида кўп ривоят бор. Тоғай исмли бир бой менг тошни чўқичлатиб, чорва учун қудуқ қаздирган. Ўшанинг номига қўйилган, дейишади. Суяр ака эса хонгуллар макони — Хонгултўқай, дейдилар. Меники эса сал бошқачароқ.
- Шуни ҳам айтиб беринг, Раҳмат ака? — ёлворди Ойноввот.
- Муғулистонда Гоби деган саҳро бор. Баъзи жойларига ҳанузгача инсон қадами етмаган. Шу жойларда ховтағай деган ёввойи туялар яшайди. Уларни камдан-кам одамлар кўрган, жуда ҳуркак, асов ҳайвон. Ким билади, балки бир замонлар Тўйин этакларида ҳам ховтағайлар яшагандир... Одамзод эллиқ-юз минг ёввойи ҳайвонлар билан жой талашиб ёнма-ён яшади. Бор-йўғи юз йилда қатағон қилди. Инсон ўз қилмишига ҳисоб бермайди. У билимдон, оқил, фаросати пешланган саин табиатга хуружи ошиб бораверди. Ҳар бири ўзини бир олам деб чоғлайди. Бу — даҳшат! Эшитинг-да, ўттиз-кирқ йил бурун Амударё бўйларида Турон йўлбарси ўкириб юрарди, десангиз ҳозир-ку, ҳеч ким ишонмайди, биздан кейинги авлод маҳз қилиб кулади, чўпчак айтаяпсиз, дейишади. Невара-чевараларимиз эса нафрatlанишади.
- Хонгуллар-чи? — Суяр Суюн хомуш гап қотди.
- Уларнинг қисмати ҳам бундан пеш эмас. Турон йўлбарси, Бухоро буғуси. Номларини эшитсангиз, кўнглингиз тоғдек ўсади... Бир тасаввур қилинг: Хиндистонда филлар қирилиб битса нима бўлади? Ёки Шимолий кутбда оқ айик изсиз йўқолса-чи? Биз эса қириб битирдик. Табиат Турон йўлбарсини миллиард йил ҳужайра саралаб шу муҳитга мос қилиб яратган эди. Уни бир пуф билан она юрт тупроғидан учириб юбордик. У бирон хилват жойга қочгани ёки адашгани йўқ. Батамом қирилиб битди. Бу йўқотишни ҳеч бир нарса билан қиёслаб бўлмайди. Бунинг ўлчови йўқ!..Ха, айтмоқчи, Бухоро буғуси. Бу, ахир, шу

юртнинг кўркигина эмас, тирик тумори. Тумор бўлганда ҳам қанақаси денг. Унинг мағур қиёфасини бир бор кўрсангиз бас, юрак ҳовучлайсиз. Ўзимиз яшаётган замин шундай афсонавий маҳлукот яратганидан ёқа ушлайсиз... Тумордан одамлар илгари ҳайиқишиган, уни ёмон кўздан асрашган. Биз учун муқаддас тумор ҳам, жонзот ҳам, имон ҳам қолмади. Ҳинднинг гавжум шаҳарларида юрган эринчоқ сигирларни кўриб қолсам, тилимни тишлайман. Ҳиндларга, бошқа халқларга тенглаша оламизми?.. Хонгул. Бухоро буғуси. Тўғри, дунёда буғуларнинг уруғи кўп, тури юз хил. Лекин хонгул ягона, бетакрор. Аму ва Сирнинг бенаво, бефайз тўқайларига беназир бе-зак бўлган бу жонивор ҳам тугаб қолди. Жаҳонгир Чингизни мағрурлиги, гўзаллиги билан лол қолдирган хонгул. Босиб ўтган изида бундай гўзалликни кўрмаган, бу гўзаллик уни талвасага солган. Жангужадал юришларни суреб қўйиб, хонгул ови билан банд бўлган. Ҳа, ҳа, ишонаверинг. Булар Чингиздан омон қолди, аммо ном-нишонсиз чингизлардан тўдасини сақлай олмади... Юртнинг номи берилган антиқа ҳайвонлар қирилиб битса — юрт чўқади, юрт тўзади. Ахир, биз бир замин, бир она фарзандларимиз-ку. Уларни эса кўра-била туриб мангуга йўқотаяпмиз. Бу йўқотишни факат шундай манзара билан тенглаштириш мумкин: айтайлик, Сурхон юртнинг фахри кекса Боботоғ бир тунда ер тарс ёрилиб, қаърига қулагаш тушса, жаҳаннам фалокати бўлгани сингари, хонгулнинг фожиаси ҳам шу таҳлит. Юртга менгзатилган ҳайвонларнинг қирилиб битишига сабр-тоқат қилиб, бетараф томошабин бўлиб кузатиб ва мудхиш ҳодисадан ларзага келмаган одам, жамоа, элзлат, миллат вақти келиб изсиз йўқолиб кетса ажабланмайман, асло таажжубланмайман. Қадриятларни авайламаганларни бекадрлик қисмати кутади...

— Майли, таъқиб қилишсин, қирон келтиришсин! — тутоқиб ўрнидан туриб кетган Ойноввотнинг юзлари олов бўлиб ёнар, кўзлари чақнарди. — Хонгулга айланиб, ана у қорли тоғнинг чўққисидан туриб, одамзоднинг жирканч қилмишидан кулсам бас... Ўлиб кутилмаса, кун йўқ буларга. Наҳотки, бу жоҳиллар, қаҳри қаттоллар гўзалликни ўлдириш мумкин эмаслигини, бу дўзахий гуноҳ эканлигини англашмаса?..

— Раҳматжон, одамни жуда тўлқинлантириб юбордингиз, — деди Суяр Суюн пиёладаги совиган чойни қулт-қулт ичаркан. — Хонгулсиз Тўйин, дашту адирлар, Амунинг тўқайзор ўрмонлари жуда гариф, бехосият. Қирилиб битса — ўнглаб бўлмас даҳшатли кўргилик. Эл-ку фафлатда, наҳотки, рух тирик бўлмаса?

Оқ коялар воҳасидаги оҳактошлар орасида гоҳ ерга энгашиб, гоҳ бошларини кӯтаришиб, лўкиллаб донлаб юрган кул ранг турналарга олазарк қарашаётган ёш мода буғулар тоғ оша учиб келган гала қуш қий-чув қилишиб, қанотларини шопиллашишиб, шериклари тўдаси томон қўйилганидан сўнггина тинчиб қолишиди.

„— Турналар манзилларига йўл олишди“.

Айришоҳ маҳзун, ланж, ҳорғин эди.

„— Бу ерда ўт-ўлан баланд ўсган. Улар ҳали-бери кетишмайди“.

Она буғу Айришоҳга таскин берди.

„— Уларнинг қаноти бор. Бизда йўқ,“

„— Қайғурма, сенинг чаққон оёкларинг ва чиройли шохларинг бор“.

„— Парвознинг йўриғи бўлак. Осмон сеники. Осмонда тўсиқлар йўқ“.

„— Бизнинг манзилимиз орол. У ерда ҳам ёш қамишлар, девпечаклар, қўзигуллар ўсаяпти“.

„— Соғиндингми?“

„— Бу ерларни кўзим қиймаяпти“.

Она буғу Айришоҳнинг ҳолидан хабардор эди. Тўйинда ўша сарви-сўйруқ жувон пайдо бўлди-ю, пурвиқор нар-навазнинг дилхаста кунлари бошланди.

„— У келди, сен ўзгардинг“.

„— Улар икков эди, фақат бири келди...“

„— Одамлар кўпайди Тўйинда. Улар бизга хуруж қилишади“.

„— Йўқ. У келди, кўнглим тинчиди. Энди асло қўрқма. У бизни асрайди“.

„— Бундай ишонч бойиси нима?“

„— Одамлар орасида аёлларга топинмаган, сажда қилмагани камдан-кам учрайди“.

„— Нега?“.

„— Тириклиқ чашмаси улар. Аёллар меҳрибон. Мехр эса ҳамиша кучли, ғолиб“.

„— Мени кечир, лекин ишонмайман“.

„— Уни унугтган эдим, у излаб топиб келди. Битикчашмада кўрдим-у, қотиб қолдим. Үнга қарадим. Титраб-қақшаб кетди. Елкасига бош қўйиб, қўлларини, юзини ялагим келди. Фурурим йўл қўймайди... Оролларга бош олиб кетамиз. У қолади“.

„— Сени яна топади“.

— Турналар учишмоқда. Сафаримиз тугаб қолди. Ёшлар йўл ҳозирлигини кўришсин. Бугун Оқ қоялар воҳаси билан хайрлашмиз. У бизга паноҳ, нажот бўлди“.

— Бу ерларга яна қайтамиз. Бизники бўлиб қолди”.

*
* *

— Ботир, ётаверасанми бижғиб. Осмонда турналар хирмон ясаяпти, — деди Баҳодир „Нива“ машинаси эшигини очаркан.

— Ойноввот кўринмайди, — сўради Ботир салқиб қолган шимининг қайишини тортаркан.

— Чошгоҳда Сезгир билан чиқиб кетганича қайтиб келгани йўқ.

— Юришдан эринмаган хотининг бор-да.

— Тўйинга келишдан ният ҳам шу-да, — вагонча эшигини ёпаётган Суяр Суюн гап отди. — Раҳматжон, тайёрмисиз? Кетдик.

— Ўт анча кўтарилибди, — Раҳмат Аҳадов шудрингдан ҳўл бўлган шимининг почаларини қайтарди. — Буғулар ҳам энди ўз манзилига йўл олишади.

— Оғзи энди кўкатга етгандами?

— Ботирбек, дўстим, ҳозир ороллар ҳам ям-яшил. Камситманг кўп. Қишида буғуларни бу тоғларга муҳтоҷлик етаклаб келган эди. Оролларда ўрмонлар бор, бекинадиган тўқайзорлар бор.

— Айриш ҳарамини бекорга эргаштириб юргани йўқ — Суяр Суюннинг кайфи чоғ эди. — Қорни қаппайган урғояи буғулар қилғиликни қилдинг, энди кўздан панароқ жой топиб бер, бу яйдоқ даштда қачонгача оғироёқ талпанглаб юрамиз, дейишиб талаб кўйишяпти.

— Суяр ака, сурувнинг бошида Айриш эмас, ўзингиз юргандек гапирасиз-а, — киноя қилди Ботир.

— Ботирбой, укам, буларни кузда куйикда кўрганингизда эди, ҳазилдан ўзингизни тиyrдингиз.

— Ўз санами, ҳарами — хоси номуси, нар-наваз учун ҳар нарсадан устун. Қутуради, кўзларига қон қуилади. Бирон жонивор дахл қилса, ёриб ташлашдан ҳам тоймайди...

— Буғулар кўринди! — деди ховлиқиб Баҳодир, Оқ қоялар воҳаси томон бир-бир қадам ташлаб келаётган сурувни кўрсатаркан.

— Панага ўтайлик, — Суяр Суюн биринчи бўлиб кўндаланг турган сой адогига чопди.

— Сойнинг қия бети бир қарич ўт, кўрпадек мулойим, майин. Қаторасига юзтубан ётган йигитлар нам кўкат хидини симира кетишиди. Шаффоф, тиник, нозик ўт-ўлан ҳиди ҳаммани сармасст қилиб қўйди.

— Кўкаlamзор кучоги... Бай-бай-бай! — дерди майсаларни кучоқлаб Ботир.

— Аёл кишининг кўкраги, маммалари нега яратилган? — туй-кусдан савол берди Суяр Суюн кўлидаги нўхатакнинг бинафша ранг гулларига боқиб туриб. — Гўдакларнинг эмиши учун. Биз бурун ишқалаб ётган дўнглик — она табиатнинг сийнаси. Қаранглар-чи, бир қулоч ерда неча хил ўт бор? Мен номини айтаверман, сизлар санангизлар: кийикпанжа, эчкиичак, қўзикулоч, кушкўнмас, сувранг, шайтон-кавуш, чучқаёл... Ўсиб ётган майса-кўкат жамики мавжудот, хонгулдек гўл ва мағрур ҳайвонларнинг насибаси, она сути. Тили билан ямлаб, ўткир тишлари билан узиб, жағларида „курт-курт“ чайнаш учун яратилган. Ана шу саҳоватли онанинг бир иши ишкан. Жаҳолат уругини сепмоқчи бўлган кимсаларни дарҳол қаърига олмайди. Ҳаммасини одамларнинг ўзиға кўйиб беради. Биз эса кўнгилчан, кечиримли, бағри кенг элмиз, деб кўкракка муштлаймиз...

Чорак соат ўтгач, Баходир сой тепасига эмаклаб чиқди-да, хитоб қилди:

— Эҳ-хе, ҳаммаси аралаш-қуралаш бўлиб кетибди-ку. Буғулар билан турналар бир давра эди. Айриш онда-сонда тегажаклик қилаётган Сезирни сузмоқчи бўлар, тепалик устида тиззаларини букиб, оёқларини куймучига қўйган Ойноввотга ўқтинг-ўқтинг назар ташларди.

— Ақл бовар қилмайди, — Раҳмат Аҳадов энтиқди. — Буғулар, турналар ва биз. Афсона...

*
* *

Ойноввот димлаб кетган оқ жўхори бўкиб, қозондан ошиб тушгидек кўпчигач, Суяр Суюн сирланган челякка ағдарди. Қуёш ботмасдан сайрга чиккан эру хотин ҳаяллаб кетишиди. Хуфтон бўлди-ям, қайтишмади. Сезир уларга эргашиб кетганидан хавотир ола бошлади. Ботир „Нива“га кириб олиб орқа ўриндиқда ётар, директор эса вагончада ёзув-чизув билан банд.

Суяр Суюн димлама жўхори солинган челякни кўтариб вагончадан чиқди. Тақир ялангликни кесиб ўтиши билан Сезир ғарам тарафдан ёнига чопиб келди. Демак, эру хотин ўша ерда, деб хаёлидан ўтказди.

Шом еган ой чиққач, унинг қизғиши шуъласи ғарамни ёритди. Атрофида қимирлаган жонзот асари сезилмасди. У тепа-

лик ошиб, ғарамни орқа томондан айланиб ўтди. Гангур-гунгур овозни эшитгач, Сезгир ғарам тарафга чопиб кетди.

— Сен ҳам айтмасан, қанд-панд олиб чиққанимизда Сезгирга берардик. Бизга қўшилиб бечора роса очикиди. — Баҳодирнинг эркаловчи овози эшитилди.

— Итга ширинлик бериб бўлмайди, — деди Ойноввот. — Қани, бизда ҳам шундай эсли ит бўлса. Тили йўқ-да, фақат. Бўлмаса, одам билан гаплашарди. Кўрдингиз-ку.

Афтидан, иккала ёш буғулар камарлаб кетган ғарам ичидаги ёнма-ён ўтиришарди. Ҳайтовур, Суяр Суюн шундай тасавур қилди. Бошқача бўлиши ҳам мумкин эмас. Чунки бундай сирли сухбатларнинг гаштини у ҳам биларди.

— Бугун кўрганларимни эсласам, ишонгим келмайди. Бундай манзарани етти ухлаб тушингда ҳам кўрмайсан, — йигит сўзларди.

— Бизнинг омадимиз бу.

— Булатлар оппоқ сут кўпигига ўхшайди-я. Ер ялаб, ўркачларни кучоғига боса-боса баландга ўрлаяпти.

— Дурбинда Айришнинг улкан шоҳдор боши кўринади. У суврвнинг олдига тушган. Сурувдаги буғуларнинг тана-тўши оппоқ булатлар ичиди. Айриш оёқ остини кўрмаяпти. Булат шунчалик қалин ва қуюқ. Улар булатларга чўмилаяпти. Кўпик тошиб, уларни кўздан яширди.

— Умидни узувлар. Баҳтимиэга, Битикчашма муюлишидаги това бурунда яна юзма-юз дуч келдик уларга.

— Агар Сезгир сездирмаганда эди, Айришни кўролмасдик. Шовуришимизни узокдан эшишиб, қочиб кетарди.

— Афтидан, ҳеч кутмаган бу тасодифий учрашуви. Ҳайратдан тахтадек қотиб қолди. Секингина „Айриш...“ дедим. Шунда бир нигоҳ ташлади. Яна отини айтиб чақирдим. Бошини кўтарди. Яна ўша нигоҳ.. Биласизми, Баҳодир ака, сизнинг кўзларингизда ҳам баъзан шундай ғалати учқун порлайди. Шунда вужудим ларзага келади, бўшашади. Суяр акани кўргани ўтган гал келганимизда буни сездим. Айришдан нимадир юқандек сизга. Ёки илгарилари буни пайқамаганман.

— Эсингдами, нима деганинг?

— Такрорлайми?.. Жоним билан... мен сизни албатта баҳтиёр қиласман.

— Ўшанда менда ҳам нимадир содир бўлди, лекин англомадим.

— Барibir, меникича бўлмаса керак. Илгари ҳеч бундай бўлмаган.

— Нима у?

— Айтолмайман. Кўрқаман...

— Шунчалик сирми?

— Йўқ. Айтолмай ҳам туролмайман. Билмайсизми, туш кўрсам, — Ойноввот қаддини ростлаб, ўнғайроқ ўтириб олди шекилли, курук беда шилдиради. — Яхшиси, бир бошидан айтиб берай...

Суяр Суюн жимликдан фойдаланиб, жуфтакни ростламоқчи эди, ҳамон қўлида тутиб турган чеълак ёдига тушди. Бўлгани бўлди, деди-да, елкасини ғарамга тираб, қулогига тушиб турган телпакни ёнбош қилди.

— Тоғ чўққисига ой миниб турибди. Қизғиш, нурсиз. Бир тарафда эса қуёш ҳам бор. У ҳам нурсиз. Қуёшдан ғалати қанотли одамлар учиб келишиди. Она қуёш сизларга ишонмай қўиди. Ҳаммасини нобуд қилдиларинг, дейишиди. Кейин билагимдан тутиб олишиб осмонга, қуёш ҳузурига олиб боришиди. Унинг овози момақалдироқникидек: „Айриш ҳалок бўлди”, деди. Ўпкамни босмайман. У сенинг фарзандинг эди. Одамлар қадрингизга етишмади. Лекин сен ўқинма. Қалбинг пок. Қалби пок одамлар ўқинса, дунё кемтик бўлади. Сен авлод, орият, эрк учун яралгансан. Синовларда бунга ишондик. Қалбинг, сабр-бардошинг ҳурматига мана бу сийлов... У менга иккита буғучা берди: бири урғочи, бири эркак. Сен буларни эҳтиёт қил. Вақти келиб, улар сени улуғлайди, кўкларга кўтаради. Бой бериб қўйма. Бисотимда энг сўнггиси шулар. Нобуд этсанг, орамиздаги нурли йўллар бекилади. Лъяннатлайман!..

Орага узоқ жимлик чўқди. Ит бесаранжом бўла бошлади.

— Сурув келяяпти, шекилли, — деди Баҳодир. — Турайлик.

— Турамиз. Менга қаранг, ҳалиги гапни Суяр акага айтиман.

— Қандай гапни? Эслолмадим.

— Эшонбобонинг фолини-да.

— Шуни ҳали ҳам кўнглингга туғиб юрибсанми? Чўпчак-ку, — кулди йигит.

— Ботир акадан қўрқаман. Ўтакетган мутаассиб эшонпараст. Ҳеч нарсадан тап тортмайди. Эшонбобонинг тупигини ялашга тайёр.

— Ўзинг биласан. Огоҳлантираман, десанг ихтиёринг, факат кўп бўрттирма.

*

* *

— Ойноввот ажойиб туш кўрибди, — деди Суяр Суюн „Нива“ нинг олдинги ўриндигига чўзиларкан, одатича, ўзи билан ўзи гаплашган кўйи. Бироқ ортда Ботирнинг борлигини кўриб, ўсал бўлиб қолди.

- Орқа ўриндиққа ўтсангиз бўларди, Суяр ака, анча қулай.
- Раҳмат, Ботирбой. Бемаҳалда турадиган одатим бор. Сизни безовта қилмай.
- Туш кўрипти, дедингизми?.. Баъзи тушлар ўнгидан келади. Мен ҳеч туш кўрмайман. Сиз-чи?
- Асти сўраманг. Бўйдокларга теккан касал бўлса керак. Баъзилари узундан-узоқ, кўрқинчли. Чўчиб кетаман. Ўйғонман. Кўзларимни юмаман яна туш. Давом этаверади.
- Текин кино, денг — хиринглади Ботир.
- Рост.
- Бугун роса юриб бокдик. Яёв юришга ўрганмаган одамнинг шўри. Болдиrlарим тош осгандек лўқиллаб оғрияпти.
- Халақит бермайман. Ухланг.
- Озроқ хуррагим бор, тагин кўрқманг.
- Ухланг, ухланг. Раҳматжоннинг ҳам шовури чиқмаяпти. Машинасига кирди-ю, тарракдек қотди, шекилли.

ЎН ИККИНЧИ БОБ

Булутлар тонг шафагида эриб кетди. Гулоби қуёш тоғ ўнгирларига қирмизи ранг пуркади. Совлик чувига ўч калхат ва қузғулар чорва яйловлари тарафига уча бошлади. Бир гала қузғун Битикчашма устида айланавергач, Суяр Суюннинг кўнглига ваҳима тушди.

Икки кун бурун дом-дараксиз кетган итни изламаган жойи қолмади. Юрак ҳовучлаб борса, Сезигир ер бағирлаб ўсган тутавон устида ўлиб ётибди. Биров отганини ҳам, зовдан учганини ҳам билиб бўлмайди. Мурдани қопга солиб, кўтариб келди. Бир замонлар Сулувга тортиқ қилган оҳактош ёнидан қабр казиди.

— Сен ўлдинг, қалбим ҳам мана шу очиқ лаҳат сингари хувуллаб қолди, — деди у. Сўнгра изидан қолмай ўралашиб юрган Ойпарчанинг елкасини силади. — Энди иккимиз қолдик. Сезигир ўлди, унга қўшилиб сезгиларим ҳам гўрга кирди... Сен ўлма, Ойпарча, йўқса, кўздаги нурим ҳам сўнади.

Битикчашма тарафдан кажавали мотоцикл сўқмоқ чангитиб, елиб келарди. Йўловчиларни таниди — Ботир ва Баходир эди.

— Бўри деб, билмасдан, отиб кўйибмиз, — деди гуноҳкорона бош эгиб Баходир.

— Ёмон ҳазил қилаяпсизлар, йигитлар. Мен сизлардан буни кутмаган эдим. Жуда ҳурмат қилардим.

— Ҳурматингизга муҳтоҷ эмасмиз, — кекирдагини чўзди Ботир. — Бадбаҳт одамларнинг ҳурмати хосиятсиз.

- Оғзингта қараб гапир! — ўшқирди Суяр Суюн сенсираб.
- Қўлингдан нима келарди? Бу кимсасиз тоғу тошда додинг-ни ҳеч ким эшитмайди. Тақдирингга тан бер. Акс ҳолда, итинг билан қўшмазор бўласан.
- Айт-чи, яна нима истайсан?
- Бизга Айришни бер.
- Мана буни истамайсанми? — Суяр Суюн Ботирга кўрсат-кич ва ўрта бармоқлари орасидан бошмалдоғини чиқариб кўрсатди.
- Хали шундайми? Яхши гапга кўнмаган бўлсанг, ўзингдан кўр.

*
* *

Кечга яқин Ойимхолнинг кўнишида устма-уст милтиқ овози эшитилди. Суяр Суюн терлаб-пишиб, ҳаллослаб етиб борганида, иш битган эди.

— Нима қилиб қўйдинглар, ифлослар! — дерди гандираклаб ийқилиб-суриниб чопаётган Суяр Суюн жони ҳалқумига келиб.

Нишаб сойдаги пистирмадан чиккан Ботир милтиғининг кўндоғини ерга тираб, тирсаги билан унга суяниб турарди: ғолиб, мағрур, шод. Жон узаётган ўлжасига мамнун боқмоқда. Буғу чағир тошлар устида ётар, оёклари силтаниб титрар, бошини кўтармоқчи бўлар, аммо у оғирлик қилиб тўлғанаётган танага бўйсунмасди.

— Вой, лаънати, шундай ҳайвонни ҳам отадими киши! Қандай кўзинг қийди, қотил! — Фифон қилди Суяр Суюн.

— Вой-бўй, нима бўпти? Бор-йўғи битта буғу ўлипти, шунга шунча вахимами! Осмон ўйилиб ерга қулайдими? Ҳеч гапмас, бунақаларнинг нечасини ер тишлатганман. Ундан кўра, сен бунинг шохларини томоша қилиб, кўриб қол. Кучоққа сигмайди-я, баччағар. Мехмонхонамга кирадиганларнинг кўзини ўйнатадиган бўлдим-да. Бунақа шоҳона безак ҳаммага ҳам насиб этавермайди. Ҳонгул, хонларнинг гули. Нимамиз кам улардан. Ҳоннинг туғи тилло-данми?

Суяр Суюннинг ғазаби қуюшқондан чиқди:

— Вой, абраҳ! Бутун жумла жаҳон безагига аразигулик бу хур жонзот чамбарак шохи келиб-келиб сенинг мурдор, ҳаром хонангни безаса — руҳим минглаб лашкар тортиб, сенга ташлансин, шу жирканч ақидани сингдирган авлод-аждодинг уйига ўт қўйсин, кунпаякун қилсин! Сен, эй муртад — ҳаёт ва баҳт ўғриси, гўзаллик ва рўшнолик қадрининг мисқолини англамаган кўркаладамуш, хозироқ жазонгни оласан. Панжаларим нобуд қилганинг ҳонгулнинг тиғдек учли, найзадек беаёв бигиз

шохларига айланади ва укки кўзларингга, пўстак кўкрагингга санчилади.

— Сенсан баҳт ўғриси, Суяр, кўп ҳам жоврайверма. Эски туллак, хотинингни ҳам бир буғу, деб тузогингга илинтирган эдинг. Уни ҳалок қилдинг. Навбат Ойноввотга келдими? Бу найрангинг ўтмайди.

— Жондормижоз албах, буғу гўштини егандан кўра, ана у кора тошни кемирсанг ўласанми?

— Уни сен кемирасан.

— Сен, бадбаҳт, тирикликтининг энг муқаддас илдизига болта урдинг. Инсон ўлаётганида ўзидан сўнг из қолдиради. Менинг изим — Сезир билан Айриш эди...

— Қайғурма кўп. Валдираиверсанг, улар изидан ўзинг ҳам равона бўласан.

— А-а!.. Ҳали шундайми?! — Суяр Суюн бир ҳамла билан сакраб, Ботирнинг рўпарасида пайдо бўлди. — Бошга бош, жонга жон.

— Тушунмадим... Ҳой, енгилтаклик қилма...Хунини тўлаймиз. Бизни ким, деб ўйлајапсан: мардга мард, номардга номардмиз. Ма, ол, умринг охиригача етади. — Ботир бели синмаган икки даста пул узатди.

Суяр Суюн пул тахламларининг қизил ҳошияли қоғоз белбоғини шаҳт билан юлқиб, даста пулни Ботирнинг юзига соҷди. Шамол қоғоз пулларни сойма-сой, дарама-дара чирпирак қилиб учирив кетди.

— Айриш ва итнинг ёлғиз хуни сенсан! Ўзингсан!

— Отасанми? Ма, от! — Ботир қўлидаги милтиқни Суяр Суюнга узатди.

— Йўқ. Мард бўлсанг, бу ишни ўзинг қил... Қилолмайсан. Йиртқич қотиллар табиатан кўрқоқ бўлишади. Улар нафс гадоси. Сен ҳам гадо! Бир олов ниятим амалга ошди: жамики ҳалок бўлган буғулар учун, ақалли бир нокасдан хумордан чиқиб қасос олишим керак эди. У сенсан. Буғуларнинг барча қотиллари учун сен, ёлғиз сен хун тўлайсан.

Умрида бировнинг ёқасини ушлаб кўрмаган Суяр Суюн рақибиға шердек ташланди. Икки-уч мушт ва беş олти тепкидан сўнг у суляйиб қолди.

— Бас, урма уни, — Баҳодир ғазабдан кўзлари косасидан отилиб чиққудек Ботирни четга торти. — Адои тамом бўлдику. Ўлдириб қўясан!

— Бешбаттар бўлсин!. Менга қара, Суяр, хотининг Сулув, бегуноҳ Ойноввот дийдасини, пуштини қурилган тавқи лаънат маҳлукмиди? Кўриб тур, чамбарак шоҳ бошини танасидан жудо қиласяпман... Мана. Энди фарзанд бўлар. Эркаклик номуси оқланар. Баҳт кулиб боқар.

Суяр Суюн ачишиб, ловуллаб ёнаётган чап биқинини ушлаб, сўнгги кучларини тўплади.

— Конхўр қотил! Илик оналик меҳри илк бор қулф урган жувон бу даҳшатни эшитса, пушти камарига ўзи ўт кўяди. Жоҳиллик уни оналиқдан маҳрум қилди. Ёшлигида норасида гўдаклиги туфайли жаҳолатни тушунмаган эди. Энди камолоти туфайли англаб етади.

— Аҳ-ҳа, ҳали ҳам совуқ нафас қиласяпсанми? Мана сенга, хаққингни ол.

— Ақлдан оздингми, Ботир. — Ҳушиңгни йиғиб ол.

— Нима бўлса бўлади. Бир каллага бир ўлим.

Суяр Суюн ўрнидан турди, гандираклай-гандираклай чағир тош устида қонга беланиб ётган буғу шохидан ушлади. Суяр Суюннинг лаб-лунжидан қон сириқиб оқмоқда эди.

— Садқаи сар шу бош. Кўй. Тезроқ кетайлик бу ердан... Қаёққа қочаяпсан? Қопларни ким кўтаради?..

*
* *

Суяр Суюн кечаси алламаҳалда эти совуқдан жунжикиб, увушиб хушига келди.

— Айриш, сенмисан? — деди буғунинг шохини пайпаслаб ушларкан, аранг шивирлаб. — Келдингми?.. Билардим келишингни. Алданмадим. Одамлар ишонмаган эди... Бизни ажратишмоқчи бўлишид-я, ярамаслар. Сени қанчалар соғинган эдим. Кечир мени, улар ғафлатда қолдиришди. Яхши гапнинг ғариби бўлиш ҳам мутеликнинг белгиси... Вой, азамат-ей, шохларинг бундай улкан, чиройли бўлмаса. Қанча йиллар, шамоллар, довуллар, эл-элатлар, қонхўр йиртқичларни доғда қолдириб, кувгинда яшадинг. Сени эса бир лаҳзада кўз ўнгимда бой бериб қўйдим. Бундан ортиқ мудҳишлиқ бўладими. Менга ишонган эдинг, қадрингга етолмадим... Ёдингдами, Сулув-эгачинг шохларингни айри қилиб турган пешонангни силаб қаширди. Сен мурғак шохларингни эгиб, хузур килардинг. Энди ҳаммамиз биргамиз. Шунчалик гап экан... Нега кўзларингда ой шуъласи? Ўлдиришдими? Иккимизни бирга үлдиришди. Азият чекма. Инсон ёшлигини соғингани сингари, башарият мозийдаги осуда болалигини қўмсайди ва шаксиз сени эслайди. Беозор, тўпори замонларга ҳамроҳ бўлган сендек хурриятпарвар зот бўлмайди. Демак, ҳаётдаги хонгул йўқ... Гўзалликни топтаб, үлдириб бўладими? Гўзаллик ҳазон бўлган жойда разолат ва қабоҳат чечак отади... Кўзларингни юм, озгина дам ол. Мен ҳам нафасимни ростлай. Негадир, ҳаво етишмаяпти... Кейин йўлга тушамиз. Манзилимиз эса олис... Нега сескандинг? Чамбарагинг оғирлик қиласяптими? Менга

бер, бир эум бўлса-да, унга бош суқай, сендеқ гўзал, мағур ҳонгул бўлай. Ўлимни қандай мард кутиб олдинг. Койилман...

Суяр Суюн кўзларини катта-катта очиб, Оқ қоялар воҳасига аввал оҳиста, сўнгра эса шамолдек елиб кетди.

*
* *

Қай бири инсон, қай бири ҳайвон билиб бўлмасди. Иккала хилқатнинг дунё фароғатига, саодатига тўймаган ташна гавҳар кўзлари туғилиб ўсган, умрнинг асл дамлари кечган тоғларга, адирларга тикилиб ётарди.

*
* *

Сезгир ёнида яна бир қабр бино бўлди.

— Суяр Суюн, ўлсанг, киройи шундай ерга дафн этилсанг, деб ният қилувди, — деди Раҳмат Аҳадов.

Тўйиннинг устида эса савр булулари қисмат лаънатлаган шип-шийдам тоғу тош, яп-яланғоч адирларга чақин найзаларни беаёв санчар, момагулдир силсиласи еру заминни ларзага соларди.

Ёмғирдан жикқа ивиган бир иркит мушук икки қабр ўртасида совуқдан қунишиб ўтиради.

ЎН УЧИНЧИ БОБ

— Суяр ака, туринг. Ярим соатдан бери кузатаман — алаҳ-сиганингиз-алаҳсиган.

— Нима бўляяпти ўзи? — Суяр Суюн сесканиб уйғониб кетди. Қўл тормоз ричаги қадалган бикини қаттиқ санчар, машина баранкасига ёпишган панжаларининг қони қочиб, увшган; очилиб қолган оёқлари музлаб ётарди. — Сизмисиз, Ботир? Астагфурулло!

— Ҳа, мен, танимаяпсизми?.. Гулдурмомани эшитаяпсизми? Машинага яшин тушмасмикан, деб кўрқиб ётибман.

Суяр Суюн жавоб бермади. У ҳамон карахт эди.

— Чатоқ одам экансиз. Одам ҳам шундай ухлайдими. Вой-бўй...

Суяр Суюн ўзига келди-ю, чуқур нафас олиб, анча маҳал мийигида кулиб ўтиради.

*
* *

Тоғларда осмон кундузи йироқлашади, тунда яқинлашади.

Дикқинафас хонада ўтириш жонига теккан директор Суяр Суюнга: „Ташқарида гулхан ёқсангиз, атрофида ўтириб, тоза

ҳаводан мириқиб нафас олсак“, деди. Бу таклиф ҳаммага маъкул тушди. Гулхан гуруллаб, аланга олгач, Баходир билан Ойноввот охурга оқ жўхори солишни баҳона қилишиб, ўринларидан туришди.

— Одамзод ҳамиша енгиллик, қулайлик излайди, — деди Раҳмат Аҳадов буруқсиётган саксовул ғўласини олов дамига сураркан. — Иссикқина хонада ўтирасак бўлмайдими? Йўқ. Торлик қилиб қолди. Тоза ҳаво етишмайди.

— Ҳамма нарса инсон учун, — Ботир чўпни оловга тутиб ёндирида, ундан сигарета тутатди.

— Буни қай тарзда англашга ҳам кўп нарса боғлиқ. Худбин одамга барибир. Бироқ у ўзини қанчалик баланд олмасин, табиат яратган қушлар, ҳайвонлар орасида энг пасткаши. Забонсиз мавжудот табиат қонунларини билмай яшайди, инсон эса била туриб, хунук оқибатларини сеза туриб яккаш эмас, кўплшиб, баҳамжихат поймол қилишади. Конунлар эса занжирдек, бир ҳалқаси узилдими, ўнглаб бўлмас путур етади.

— Уларга бўрилар ҳам қирон келтириб ётиби-ку, — Ботир томоғини кирди.

— Бўри қолдими?.. Суяр ака, айтинг-чи, тоғда яшаётганингизга беш ойча бўлди, биронта йиртқичга кўзингиз тушдими?

— Кўрмадим... Лекин одамлар орасидан чиқсан бўрилар бор.

— Менга шаъма қиласяпсизми? — Ботир яна сигаретани лабига қистирди.

— Сиз ўзингизга олманг, Ботир, гап ўроли келди, айтди-кўйида. Ҳали фикрим тугагани йўқ. Борингки, ўзимизни олиб кўрайлиқ. Инсон ўзи яшаётган уйни bemavrid бузмайди, қиммат баҳо гиламига ўт қўймайди, антиқа чинни сервизларини чилчил синдиримайди. Дунё, олам деган катта уйининг ташвишини эса қилмайди. Қайсарона худбинлик ана шу ақидани англашга йўл бермайди сира. Англаган одамлар эса ночор. Касбимиз табиатни қўриқлаш. Мана, ҳозир, шу дамда юз чакирим нарида дарё ўртасидаги оролда нима содир бўлаётганини қаердан биламиш. Оғзимиздагини олдириб қўямиз, кейин фарёд чекамиз. Нихоят, иш битганини кўргач, бўлгани бўлипти, бўёғи синипти, деб ўзимизни овутамиз. Танбалликни қарангки, бу айбимизни ўзгаларга ёпиштиришга уринамиш.

— Одамларнинг бу хил жирканч иллатларига ёдгорлик қўйиш керак. Қачонгача ўтмиш авлод изидан тош отамиш. Ўзимиз нима қилдик? — Суяр Суюн четга ўгирилиб тупуринди.

— Ўзингиз гувоҳ, шу хонгул деб сарсон-саргардонмиз, авлодларга қолсин, улар олдида уялмайлик, деймиз. Эшигинг, Ботир, бир жўяли гап-да. Бир ғаламис хонгулларга қасд қилди, дейлик. Борингки, ўлдириди ҳам. Очликдан бу ишни қилди.

майди у. Ҳайвоний ҳирс, васваса уни бу қотиликка етаклайди. Бир тасаввур килинг, сирим ошкор бўлмасин, деб Суяр акани ҳам нобуд қилди, изим қолмасин, деб мурдани вагонга солиб, ўт қўйиб юборди.

— Мен ўлимдан ташвишланмайман. Агар Айриш ҳалок бўлса, у дунём, бу дунём куйиб кул бўлади. — Суяр Суюн асабийлашиб кетди.

— Айришни ўлдираман деганнинг боши иккитами?..

— Шошманглар, — деди беихтиёр ўрнидан турган Ботир айб устида қўлга тушган боладек қизишиб, ҳаяжонини сездириб қўйди. — Бу, дейман, мени тергашга тушдиларинг чоги... Нима, чўт қоқишу пул ортидан итдай акиллаб қувишдан бўлак нарсаннинг фахмига етмайдиган нодон, деб ўйлаяпсизларми? Кечирасиз, ҳаммасини тушундим. Айтиб қўйяй, бошида шундай карорим бор эди. Буни азбаройи дўстлик, Ойновотга яхшилик қилиш важидан қилмоқчи эдим. Сизлар билан танишдим-у, турмушингизни кўрдим-у, қўлим совиди... Фақат эшонбобонинг олдида ўсал бўлганим қолди.

— Нима деб фол очди у?

— Сиз сўраманг, мен айтмай. Гап кўп.

— Баходирдек, сиздек тушунган, фахм-фаросатли, билимдон йигитларни ишонтирган эшоннинг асосли далиллари бордир. Чунки ашаддий жиноятчилар ҳам бундай ишга қўл урмайди.

— Кўзимиз учиб турувди, — энсаси қотди Ботирнинг.

— Фалокат бир ўзи келмайди, унинг ортидан бошқалари ҳам бош кўтаради, — директорнинг овози қатъийлашди. — Биз ҳозирча тасаввур, тахмин қиласяпмиз. Илтимос, тушунинг.

— Мен энди сизларга бегона эмас, айтсан айтибман-да, — гап бошлади Ботир қасов билан чўф титкилаб. — Иккови бир-бирини жуда яхши кўришади. Орада фарзанд йўқ. Севгини туташтирадиган фарзанд-ку. Ўзбекчиликда бунинг иснодига чидаш юз карра қийин. Топиниб бормаган жойимиз қолмади, кўрсатмаган докторимиз қолмади. Қирғизнинг фолчисига, тоҷик-туркманнинг табибига кўрсатдик. Ҳаммаси бефойда. Кун ўтаяпти, умр кетаяпти. Бир-биридан ажралгиси келмайди. Охирни Қорамиёнхон эшонга бордик. Дангалини айтди: неки қусур дард берган бўлса — даво ҳам ўзи, деди. Биздан бир кун илгари Ойновотнинг онаси бир-икки художўй кампирлар билан бориб келган эди.

— Нима экан у қусур?

— Айришоҳ. Ҳа... Гўдаклик йилларида бир буғучани бокқан, кейин уни қизалоқдан мажбурлаб тортиб олишган, ўшанда ғамаламдан қизчанинг дийдаси кўйган. Давоси ўша буғу. Келтиринглар, гўштига дам солиб бераман. Бошқа чораси йўқ, деди.

— Вой, доно эшонбобо-е, буғу гўшти егилари кеп қопти-да. Койил.

— Халақит берманг, Суръ ака. Кейин-чи, Ботирбой?

— Қалби кемтик, кўнгли қуюкка шифо, малҳам керак. Чўкаёт-ган одам ҳасга ёпишади. Иккала севишган ёш баҳтига зомин бўлган зот бир буғу бўлса, дунё кетса кетсин, айтганингизни мұхайё қиласиз, деб сўз бердик... Суръ акани қора килиб, қўриқ-хонага бордик. Ахир, бу киши ҳам одам-ку, Ойноввот бегона эмас, кулфатига шерик бўлар, деб умид қилувдик. Бу киши эса Тўйинга, буғуларни қўриқлагани чиқиб кетган экан. Айни муд-да... Бу ерга келсак, шароит бошқача. Кейин, ўзимизча, яхши-си ими-жимида қиласиз, тоғ кенг, хилват, ҳеч ким билмайди, деган қарорга келдик.

— Бор гапни айтганингиз учун минг раҳмат, Ботир!

— Мен бўлса ҳали-ҳали юрак ҳовучлаб, гумонсираб юриб-ман. — Суръ Суюн астойдил кулди.

— Сизлар билан танишдик-у, эшонбобога эмас, хонгулга их-лос қўйиб қолдик... Энди бир маслаҳатга муҳтоjmиз. Ўзингиз-дан қолар гап йўқ: эшонбобо ранжиса-ку гўрга-я, лекин авом бор.

— Эшонбобони менга қўйиб беринг. Ўзи авомга тушунтира-ди. Зикриё пайғамбарнинг^{*} мозорини қўриқлаб юрган Айришни қатли ом қилдиришдан ҳайикса керак. Бўйин товласа, ҳалқа ошкора қиласиз. У ҳам инсон-ку. Табиатга кимки қасд қилса — тирикликнинг ашаддий душмани. Эшонми, ҳалқ арзандасими, пурҳикмат амалдорми, барибир — душман.

*
* *

Тоғ осмонини тўлдириб, тўс-тўполон, қий-чув қилиб туни билан турналар учди.

Чошгоҳда шаҳардан чопар келди. Чегарачилар қўнғироқ қилишиб, тонг сахарда тоғдан энган буғулар сурви тугал ҳолда оролга ўтишганини хабар қилишибди. Уларни улкан, тамғадор шоҳдор буғу эргаштириб юрган экан.

— Энди биз ҳам қайтамиз. Вазифани ўтадик ҳисоб, — деди Раҳмат Аҳадов. — Суръ ака, ҳозирлигингизни қўринг, кечгача трактор етиб келади. Бизларни дарёдаги кичик ороллар кут-моқда.

1989 й.

* Пайғамбар ороли қўриқхонасидағи куръоний авлиё Зулл Кифл мақба-раси. Зикриё пайғамбар қадамжойига менгзатилади. X—XI асрларда бино қилинган ёдгорлик.

ОЛИС ҚИРЛАР ОРТИДА

БИРИНЧИ БОБ

Ниҳоят мен орзиқиб кутган куз фасли ҳам бошланди. Ёзниңг жазирамаси, бүг ва дим кунлари ортда қолди. Энди на дикқинафас ҳарорат, на шилким пашшалар кишини безовта қиласди. Рухият ва кайфиятга кузнинг илк ороми кириб келди.

Хар эрта енгил шабададан уйғониб кетаман. Туришга эриниб, иягимга пар ёстикни тирайман-да, қавват-қавват йирик панелли уйлар орасидаги торгина майдонга термулиб ётаман, қуёшнинг чиқишини кутаман. Кунчиқар томонга қараган балконимда тонг еллари ўйнайди.

Дастлаб кул ранг уфқ зархал шафақдан чўғ бўлиб ёнади, сўнgra пирираган қуёш гардиши ер ёриб чиқади. Бинолар ортидан бошланадиган тутзор, йироқ адирликлар, тепаликлар ярим белигача қирмизи ранг қуёш нурига чўмила кетади. Нурли ғубор уларни ўз кучогига олади. Мен ҳар тонгни илҳақлик билан кутарканман, бири иккинчисига ҳеч ўхшамаслигини хәёлимдан ўтказаман ва ажабланаман.

Бугунги тонгнинг файзи бошқача. Осмонда парқу булутлар сузисиб юрибди. Булутлар эса жануб кузининг дарақчиси. Уларни деярли бутун ёз бўйи кўриш насиб қилмайди. Булутлар пайдо бўлганда эса узоқ ва қутсиз осмон бирдан юмшаб қолади. Нигоҳингизни овутадиган турли шаклдаги булутларни аввал онда-сонда, сўнgra тез-тез кўриш, кузатиш имконига эга бўласиз. Осмоннинг тузи ҳам ўзгаради. Катта байрамга ясанадётган, елкасига гулдор либос ташлаган келинчақдек кўзга яқин бўлиб қолади. Гала-гала чумчуклар, чуғурчуклар, майналар тўптўп бўлиб дарахт шохлари, симёғочларга кўниб олиб, йироқ, иссиқ мамлакатларга униш маслаҳатини бошлайдилар.

Ана шундай кунларда тарқоқ ва мукаммал фикр-ўйларим равшанлашади. Ўтган фаслларда бошимдан кечган воқеалар, ўзим гувоҳи бўлган ўзгаришларни бирма-бир эслаб кетаман. Бу чалкаш, серташвиш кечмиш дамларда рухимга яқин, оромбахш, ширин туйғулар уйғотган воқеани танлай бошлайман. Уни топаман. Барча таассурот ва хотираларим орасидан кўзга яққол ташланаётган ва мени йўл-йўлакай ҳаяжонга солаётган воқеа — кузнинг бошланиб кетгани бўлади. Унинг ҳар нарсага қодир, битмас-туганмас кечмишлар уйғотувчи, одам яшаб ўтган ҳар бир кун мазмунини тиниқ кўрсатувчи, дилни қитиқловчи муниис салобати қалбимга йўл олганини пайқайман.

Илк куз тунларининг бирида ногаҳонда уйғониб кетиб, ўзингизни ўраб турган бепоён дунё оромига қулоқ тутганмисиз?

Қуёш нури жилваланган тонг шабнами каби гардишлари мильтираб ётган митти, нуқра юлдузларга тикилғанмисиз? Осуда тун тинчлигини бузиб, ўзлигидан дарак бераётган жониворлар, кекса ер узра сергак одим отиб юрган одамлар товушини эшигандынмисиз? Буларнинг ҳаммасида муқим гўзаллик, мангу үйғунлик бор. Сиз ҳар гал бу овозларни эшитарканси, чексизликка боқарканси, уларни қалбингиздан сиздириб ўтказарканси, дунёга бир бор келиб-кетишингизни, ундаги ҳар бир нарса тақрорланмас гўзаллик эканлигини, инсон ана шулардан баҳраманд бўлгандагина баҳтиёр бўлишини ҳис этасиз.

Куз бўсағада турибди. Менинг сафарим бошланадиган кунлар ҳам келиб қолибди. Демак, шошилиш керак. Кузнинг илк дамларини сершовқин шаҳарлардан йирокларда, хилват ўлкаларда кутиб олиш нақадар хузур.

Мен борадиган манзилимни кўп вақт сарф қилиб, излаб ўтирамайман. Садоқатли туйғуларим бунинг жавобини топиб қўйган.

Чўл!.. Чўлга кетамиз. Бу шивир-шивирлар оҳанги тамоман ром этади. Кузда киши кенг ва бепоён, кўз толгунча тикилиш имкони бўлган зумрад уфқларни қўмсайди. Чўл эса бу орзуға мос келади.

Бўлаҳак сафарга тайёргарлик ташвишлари ҳам тугайди. Поездга билет оласиз. У сизни эрта тонгда кул ранг гумбазли ягона ғиштин иморатдан иборат станцияда қолдиради. Бир лаҳза оёқ илган поезд яна узоқ манзилига равона бўлади. Сиз поезддаги таассуротлардан анчагача қутила олмайсиз. Тахта, бўёқ, папирос ва тер ҳидлари димогингизни ачитиб туради. Тунги чўл сукунатини шовқини билан тўлдириб бораётган катта шаҳарларнинг сўнгги нишонаси бўлмиш поезд ортидан беихтиёр тикилиб қоласиз. Унинг охирги вагонидаги чироқлар узоқлашиб, бора-бора даштнинг кўз илғамас тун мудроғига сингиб кетади... Овозлар тинади. Атроф жим-жит бўлиб қолади.

Тўсатдан темир йўл оша тўлқинланиб келган дашт шабадасини сезиб қоласиз. Сергакланасиз. Бу шабада бир зумда димогингизга ўрнашиб қолган ҳидларни янгилайди. Шунда бу кимсасиз станцияга нима сабабдан келиб қолганингиз лоп этиб эсга тушади. Филофли қўштиғ милтиқ ва ов халтани елкага ташлайсиз. Кимdir ортдан оҳиста йўталади. Симёғочга елкасини тираб, шамолдан ўзини пана қилиб турган наебатчи қизга кўзингиз тушади. Унга гап отгингиз келади. Бирор ўзингизни тиясиз. Шаҳарликларга хос туйғуларингиз билан шу ерда хайрлашасиз-да, гумбазли бинонинг биқинида оқариб кўринаётган йўлга тушасиз. Йўлнинг охири тун пардаси ортида фойиб бўлади. Ана шу йўл сизни манзилга элтади. Сўнгги бор кимсасиз станцияга, наебатчи қизга сер соласиз. Қаршингизда эса туп-

роғи қотган чексиз йўл. Куриган хас-хашак, нам бурган ҳидларини таратиб шамол эсади. Энди ёлғиз ҳамроҳ — тонгни чўлда кутиб олишдек истак қолганини англайсиз.

Одатда киши бирон-бир уловга умид боғламай узоқ сафарга отланадиган бўлса, албатта, узундан-узоқ ҳаёллар йўлдош бўлишини олдиндан билиб, бунга тайёргарлик кўради. Баъзилар бундай фира-ширада йўлга чиқмайди. Йўлда ҳеч нарса бўлмаслигини билса-да, барибир, вужудининг аллақайси жойида сақланиб қолган қадимий кўркув ва ҳадиксираш хиссидан безовталангингиз келмайди. Йўлга чиқдингми — изингга қайтма. Овчиларнинг қадимдан қолган удуми шундай.

Биз чўл кучогига кирдик. У билан йўлма-йўл танишиб бора-верамиз. Ҳали тонг отишига вақт бор, боз устига йўл йироқ. Манзилга етсан армон йўқ. У ерда менинг бир танишим бор. Биз у билан кўп учрашганмиз, лекин ҳар хил вазиятда. Бу галгисининг ҳам кўнгилдагидек бўлишига ишончим комил. Ҳар қалай кўнгилда шундай тилак бор...

Демак, ҳаммаси ҳали олдинда. Кези келганида тонгни ҳам, тонгнинг ҳарир пардасига ўраниб, уйқудан уйғонаётган чўлни ҳам кўрамиз.

Мен сизни ана шу ғалати табиатли, кечмишли чўл одами билан таништирмоқчиман. Чўлда ким биландир, ақалли орқаваротдан танишиш ҳам катта гап. Бу танишув узоқ сафарларингизда кўп аскотади.

ИККИНЧИ БОБ

Бундан беш-олти йилча муқаддам Қизириқ чўлининг жанубидаги Қорақир атрофларида ов қилиб юрардим. Бу жойнинг ёввойи табиатига ўрганиб қолган эдим. Бундай хилват жойни танлаганимнинг боиси бор эди, албатта. Мен бу ерлар табиати ҳақида бир-икки лавҳача ёзиб, газеталарда зълон қилган эдим. Кейинчалик эса Қорақир табиатини ўз ҳолича сақлаб қолиш ва бу ерда чўл паррандалари ва ҳайвонларига мос қўриқхона ёки овчилик хўжалиги ташкил этишнинг иложи йўқмикан, деган фикр туғилиб қолди. Бу хусусда бирон гап айтиш, мулоҳаза юритишдан бурун Қорақирни янада чуқуррок ўрганиш зурур эди. Ҳаркалай ўшанда бу истакни рӯёбга чиқариш йўлида умид қилса арзигулик асослар бор эди.

Қорақирнинг манзараси хийла ёввойи. Паст-баланд тепаликлар орасида тўқайзорлар кўп учрайди. Бу жойлар шунчалик заҳки, осмонга булат чиқса ер терлайди. Пастликдаги Каттакўлни яқин-атрофдаги юксак хисобланган Қорақирнинг яланғоч, гиёҳсиз ўркачлари ўраб туради. Кир ортидан бепоён осмон

қучок очади. Кеч кузда бу хилват гўша чиройи яна ҳам очилиб кетади. Америкалик машҳур рассом Рокузлл Кент чизган худудсиз, салобатли, чўнг Аляска манзараларини эслатади. Пушти ранг гуллари чамандай очилган юлғинзор, поёнсиз кўкдаги кичик-кичик момик булат галалари, баланд ўсган савағич ғишшанинг шамолда эгилаётган попуклари хаёлингиз тинчини ўғирлаб қочади.

Кечқурунлари узок дашт ва чўллардан учиб келган гала-гала қушлар сокин кўл оромини остин-устин қилиб юборади. Турли қушларнинг қанот қоқиши, бир жойдан иккинчи жойга гуруллаб учиб кўниши, қўнгандა қамишларнинг қарсиллаб синиши эшитилиб туради. То коронгилик тушгунча кўлда қушлар чуғур-чуғури тинмайди. Сўнгра кўл жимиб қолади. Назарингизда ҳаммасини шу тубсиз кўл ютиб юборгандек бўлади. Лекин бу ўлик сукунат узокка чўзилмайди: орадан бирон соатлар ўтгач, қуюқ қамишлар ичидан қоп-қора қашқалдоклар — кўл товуғи очиқ жойларга сузиб чиқади. Уларнинг ғамгин ва мунгли овозлари кўл ичкарисидан эшитилаётган ўрдаклар билан қўшилишиб кетади.

Кўлнинг кун ботиш томонида иккита уй кўзга чалинади Бири колхознинг узун бостирмали товуқхонаси, иккинчиси эса Рамазон деган товуқбокар танишимнинг кулбаси. Қорақирда ов овлаб юрган кезларимда уйининг бир ҳужрасини менга бўшатиб беради.

Рамазоннинг ёши қирқларга бориб қолган, озгин, хипча бўй, янок суяклари бўртиб чиқкан. Унинг ҳовлиси кўлдан икки чақиримча шимолда жойлашган қишлоқда. Йўғон гавдаси эриникидан икки ҳисса катта, кенг юзли, лунжи шалвираб тушган хотини кун оша Рамазон ҳолидан хабар олгани келиб туради. Уларнинг тўрт ўғли, икки қизи бор. Ҳаммаси мактабга қатнайди. У оила, рўзгор ишлари ва болалари тарбиясига аралашмайди. Ҳаммасини хотинига топшириб қўйган. Лекин фарзандларининг отасига меҳри анча кучли. Ҳар куни Рамазонга кўмаклашгани келадиган ўғиллари ҳам у каби мўмин, қобил. Рамазон онда-сондагина қишлоқка бориб келади. Унинг бирон марта ҳам на хотинидан, на ҳаётидан зорланганини эшитганим йўқ.

Одатда, у эрта тонгда ҳужрамга киради-да, мени оҳистагина туртиб уйғотади. Апил-тапил кийиниб кўлга тушаман. У эса товуқларга дон бериш билан овора бўлиб қолади. Тонготарда кўл устида ўрдаклар ғужғон ўйнайди. Чошгоҳда қайтиб келиб ҳамхонам билан нонушта қиласиз. Сўнгра иккимиз қайиқقا ўтириб, кўлнинг ичкари томонларига йўл оламиз.

Ўша йили куз чўзилишиб кетди. Шимолдан жанубга учиб ўтаётган қушлар шу атрофдаги илиқ сувли кўлларда қишлишиб қолишиди.

Бирок янги йил арафасида ҳавонинг авзойи бузилди. Жануби-ғарби осмоннинг кути ўчди. Совуқ шамол эсиб, Коракир ўркачларидан ошиб ўтиб, сон-саноқсиз катта-качик кўллардаги қамишларни шовуллата бошлади. Бундай довулли кунларда күшлар пана жой излаб қолади.

Шамол ўшанда туни билан тинмади. Том устидан ға-ғалаб учган ўрдаклар, ғозларнинг овози эшитилиб турди. Рамазон билан иккимиз ухламасдан патронларга ўқ жойлаб чиқдик. Рамазоннинг эртанги овга жуда қизиқаётганилигини кўриб севиниб ўтирадим. Фира-ширада товуқхонадаги очик майдончага дон сепиб чиқдик. Негадир хўроzlар ҳам писиб ётишарди. Кейин кўлга чопдик. Кўлда қамишлар шовуллаб чайқалар, боши сувга тегар, осмонда ўрдакларнинг ҳавони шувуллаб кесиб училари эшитиларди. Одам-одамни танийдиган даражада атроф ёришгач, ўрдаклар парвози ҳам тинди.

Бахтга қарши ўша куни биз кутганчалик ов бўлмади. Ҳал-лослаб, шовуллаб ётган кўлга қайиқ билан кириш ниятидан воз кечиб, отилган ёлгиз ўлжа — қизил бош билан кифояланиб кўя қолдик. Күшлар довулдан шунчалик таҳликага тушишган эдиларки, уларни милтиқ отиб ҳам чўчита олмадик. Онда-сондагина кўлдан кўтарилиб ва яна дархол қамишзорга ўзини урган чурракларни хисобга олмагандা, қүшлар деярли учмади. Улар куни бўйи кўлнинг илиқ ва тинч жойларда жон сақлашди.

Қайтиб келсак Рамазоннинг хотини уйни супуриб-сидириб юрибди.

— Нон-пон олиб келдингми, Қўлдош? — деди Рамазон ҳол-аҳвол сўрашмасданоқ. У хотинини тўнғич ўғлиниг исми билан чақиради.

— Бундай кунда тандир қизитиб бўладими, — жавоб берди хотини гавдасига ярашмаган овоз билан. — Бунинг устига-устак кеча мижжа қоққанимиз йўқ.

— Тинчликми, ўзи? — ўсмоқчилаб сўради Рамазон.

— Кеча анави, Фозил ошнангиз турмадан келди...

— Йўғ-е! — Рамазон анграйганича хотинига тикилиб қолди.

— Эрталабдан бери икки марта одам келди изингиздан.

— Бу довул шунники экан-да. Ўйловдим-ов, бу шамол қаердан келди экан деб... Дарров қайтибди-да. Беш йил эди, шекилли.

— Кейин биласиз.

— Бўпти, ишларни саранжом қилиб, пешинда борамиз...

Пешинда Рамазонларнинг қишлоғига кириб бордик. Фозилнинг ҳовлисида бир тўп одам қозон атрофида уймалашиб юрарди. Бизни бир даҳлиз, икки хонали уйга бошлаб киришди. Ҳамма ўрнидан турди. Фақат бир киши кўлтиғига куроқ болишни

босганича оёкларини узатган кўйи жойида ётаверди. Рамазонга тақлид қилиб бирин-кетин тик турган одамлар билан қўл бериб кўришиб чиқдим. Нихоят Рамазон ёнбошлаб ётган киши ёнига бориб чўккалади. Узун, коқшол қўллари билан унинг елкасидан кучди. Мен қўлимни узатдим. Нимжон, қоқсуяқ, хароратсиз панжаларини секингина қисдим-да, Рамозоннинг ёнига чўқдим.

— Ҳа, омин! Эсонлик-тугалликни берсин, — Рамазон дуо ўқиб бўлгач, барча билан бирма-бир хол-ахвол сўрашиб чиқди. Кейин у хаста кишига ўгирилди. — Зиёратлар кутлуг бўлсин, Фозилбой.

— Раҳмат. Ўзингиз, бола-чақалар омонми? — Фозилнинг ҳаяжонли, заиф овози зўрға чиқди.

— Шукур, ишлаб ётибмиз. Ҳалиям ўша: қичқир хўроҳим, қичқир.

Фозилнинг сарғимтири юзига қон юргургандек бўлди, лабларидаги жилмайиш кўринди.

Биз келишимиз билан сал фурсат бўлингган гурунг яна уланиб кетди. Суҳбат бир мавзудан иккинчисига кўчиб турарди. Кўпинча Фозил қамоқдалик чоғларида содир бўлган ўзгаришлар, воқеалар ҳақида гап кетарди. Фозил эса хандон пистани тирноғи билан чақар, писта мағзини эринмай чайнар, тамшанаради. Унинг чехрасида аллақандай такаббурона қувлик сезилар ва назаримда, у гўё турмадан эмас, балки ҳарбийдан қайтган кишидек ўзини чоғлар, даврада ўзига қилинаётган муомала, иззат-икром, меҳрибонликка лоқайдлик билан қараётгандек эди.

— Ҳм... Ҳалиям қичқир хўроҳим, қичқир денг, — деди у суҳбатни чўрт кесиб, Рамазонга юзланар экан. Фозил қўлтиғига босиб олган болишни айлантириб қўйиб, томогини кирди. Дўхтирлар, товуқ шўрвани кўпроқ ичинг, дейишиди.

— Сиз омон бўлсангиз товуқ топилади, — деди Рамазон енгил тортиб.

— Ҳа, айтмоқчи, мен меҳмонни танимадим, — деб сўраб қолди Фозил.

— Эсим қурсин, — ютиниб жавоб берди Рамазон, — шаҳарлик оғайнимиз. Овчи бу киши.

Фозил бир зум менга синчковлик билан боқиб турди-да, сал гавдасини қимирлатиб:

— Ўзбекдан овчи чиққанини энди кўришим, — деди. Унинг сийрак қошлари орасида айёrona митлираб турган кўзлари, хаста важоҳати совуқ кўриниб кетди. Нафратомуз диккат билан қараганимданми, киприклари, қоши, юзидағи ҳар мўй толаси, бутун аъзолари чалинган касалликнинг заҳридан сарғайиб кетганини шунда сездим.

Кечга яқин тарқалдик. Қалбимга чўккан нохуш кайфият қишлоқдан чиққанимиздан сўнг ҳам тарқалмади. Негадир сўнгги кунларда биринчи бор ўзимни толиқсан ва овчиларга хос саёқ юришдан ҳафсалам пир бўлганини ҳис этиб, барвакт ўринга кириб ётдим. Эрталаб ҳам кайфиятим хиралигича қолаверди. Овга чиқмадик. Рамазон товада тухум қовуриб келтирди. Дастурхон устида гапни у биринчи бўлиб очди:

— Кеча Фозилнинг сўzlари сизга оғир ботди-а?

— Рости, менга ўртоғингиз ёқмади.

— Тўғри айтасиз. Мен ҳам шундай деб ўйловдим. Терслиги бор. Болалигига ҳам шу эди. Шу одатини ҳеч ташлаттира олмадик. Юз-кўзинг демайди, кўнглига келганини аяб ўтирумайди.

— Нега қамалганди у?

— Э, бир фалокат бўлди-да... Фозил аслида ғайратли, зардали йигит. Эл-юрт олдида бир иш кўрсатайин деб юради... У ҳам кўпга кўшилиб, чўлга кетаман деб юрди. Кишлогимизда Олтибой деган бир бетайин одам бор. Ўзи ҳеч қаерда ишламайди. Оғзи бепошна, гапи совуқ одам. Фозил ўша билан жанжаллашиб колди.

— Нега жанжаллашади? — деб сўрадим қизиқиш билан.

— Фозил бир-икки жойда, чўлга чиқиб, янги ер очаман, деган. Дўсту биродарларини ҳам шунга кўндиromoқчи бўлиб юрган. Олтибой эса, гапи совуқ одам эмасми, Фозилнинг фийбатини қилиб; „Нима қиласкан ташвиқот юритиб, ўша тараша хотинини олиб кўчиб кетавермайдими?“ депти. Бундай гап Фозилнинг иззат-нафсига тегади-да. Фозилнинг хотини ростдан ҳам жуда озғин. Лекин чўл хақидаги гапга хотинни қўшиб нима қиласан, ярамас. Фозил бунга чидаб туролмади. Олтибойни уриб бошини ёрди, қўлини синдириди... Ана шу билан қамалди кетди. Мана, икки ярим йил деганда қайтиб келди, ўзи уч йилга кетувди. Ўн икки бармоқ ичакми, дегани бўларкан, шуни операция қилиб олишибди. Ярим жон одамини нима ҳам қилишарди. Бўшатиб юборишган-да... Лекин ўзи кўрс бўлса ҳам, юраги тоза Фозилнинг. Сиз унинг гапларидан хафа бўлманг, ўзи шундай. Мен уни бир қаричлигидан биламан. Сагирликдан кўнгли яримта бўлиб ўсади. Мехнаткаш. Кўнглида қинғирилиги йўқ... Лекин орияти кучли. Кеча сезган бўлсангиз керак — отдан тушган бўлса ҳам, эгардан тушмаяпти. Бунинг бир сабаби бор. Ўша ўтирганлар орасида Олтибойнинг хешлари ҳам бор эди. Шунинг учун ўзини паст олгиси келмади.

— Бу, Олтибой деган киши билан Фозилнинг ўртасида аввалдан хусумат йўқмиди ўзи?

— Олтибойнинг бир синглиси бор эди. Санам деган. Фозил армияга кетмасдан бурун оғайнилари орасига тушиб, шу қизни фо-

тиха қилишди. Кейин қизнинг гапи чикиб қолди. Фозил айниди. Орани очиқ қилди-ю, армияга кетди. Шундан бери Олтибой тишини қайраб юради.

— Ҳа, бундай денг...

*
* *

Яна кунлар исиб кетди. Орадан ҳафта ўтар-ўтмас Фозил Рамазонниги келди. Мен чошгоҳда қайиқни гишшага қантариб қўйиб уйга келсам, Рамазон товуқ патини юлиб ўтирибди. У мени ёнига имлаб чақириб, Фозилнинг уй ортида офтобрўяде исиниб ётганини айтди. Милтикни уйга қўйиб, меҳмоннинг ёнига чиқдим.

Фозил офтобрўяде пўстак устида ёнбошлаб ётар ва ёнидаги девор ковагидан ерга орқаси билан думалаб тушаётган қарахт, ҳолсиз қовоғариларни кузатиб ўтиради. У қўлидаги узун чўп билан йиқилган арини оёққа турғизар, унинг мажолсиз судралишига боқиб туриб:

— Вой, жонивор-ей, совуқ котдингми? Энди ахволинг қалай? Нима қилай, сенга раҳмим келади-ю, лекин заҳарингдан кўрқаман-да, — деди. У бир оздан сўнг ўтириб олди. Қўкрагига ёпишиб турган сурп қўйлагининг тугмаларини еча бошлади. Қорнини очиб, елкаси билан деворга суюнди. Шу пайт мени кўриб қолди.

— Э! Овчи, келинг, келинг, — деди ва чап қўлига таянган ҳолда ўнг қўлини менга узатди. — Қалай, ов бароридан кела-яптими? Қани, ўтиринг-чи... Мана, биз ҳам келиб қолдик... Рамазонбай зап жойни топган-да. Одамлардан, шовқин-сурондан узоқ, овлок.

У инграниб оёқларини узатди. Шунда қорнига кўзим тушди. Сарғайиб кетган, тилим қовундек ҳилвираб турган жароҳатнинг пастки учиди йиринг кўринарди. Фозил кўзларини юмиб олди.

— Бу ҳолда шамоллатиб қўясиз, — дедим. — Тағин газак олиб кетмасин.

— Бўлгани бўлар. Қуёш тегсин, жонга аро кирайти, — деркан, кўзларини бир очди-ю, яна юмиб олди. — Уйда болаларнинг шов-шуви эсхонамни чиқариб юборди. Одамлар кўргани келишади. Бу ахволда кўргандан кейин, худо билади нималарни ўлашади... Уҳ... Бундай нарсалар ёқармиди одамга. Рамазонниги олиб бориб ташланглар, дедим... Зап жойни топганда Рамазон тушмагур.

Рамазоннинг барваста хотини бошига бир дастурхон нон қўйиб келиб қолди. У дарҳол қозон-товоркқа уннаб кетди. Рамазон даврамизга кўшилди.

— Бир нарсадан жаҳлим чиқди, — деди юзини ҳамон қўёшга тутиб, кўзларини юмид ўтирган Фозил. — Аҳмоқлар нима деб гап тарқатишайпти денг? Эмишки, — Фозил қамоқдан ҳийланайранг билан қутилиб кепти. Фаним билан ҳасадгўйнинг кўзи кўр бўлади, деганлари шу-да. Мен қай ахволда ётибману, улар нималар деб вайсаб юришипти.

— Эй, шунга ҳам эътибор бериб юрибсизми, Фозилбой? Ити-мушуклик ота-бобомиздан қолган. Эл оғзига элак тутиб бўлмайди. Тилнинг суюги йўқ. Ҳар ким ҳар нарса деяверсин, сиз эътибор берманг. Ҳалқнинг мақоли бор: Фанимингга гап топилмаса, итингнинг думини қийшиқ, дейди. Қишлоқнинг гапи тугармиди, — деди Рамазон пўрсилдоқ тандир нонни ушатаркан.

— Хаста одамнинг кўнгли нозик бўларкан. Сал нарсани кўнглимга олиб ўтираман... Ҳа, майли, бу кунлар ҳам ўтиб кетар. Бир бало қилиб оёққа туриб олайлик-чи, кейин бир гап бўлар.

— Ҳа, баракалла. Ишқилиб буёги яхши бўлсин, денг. Аҳмок билан кечалиб аҳмок бўлишнинг ҳеч фойдаси йўқ.

— Одам онадан дарров ақли-хуши жойида тушмайди. Мен ҳам ўшалар хилиданман, шекилли. — Фозилнинг овозида ўксиниш, шикасталик бор эди.

— Ғалати одам экансиз. Бирор сизни ўғри, муттаҳам, деб қоралаётгани йўқ-ку. Жаҳл устида бўлган иш-да. Йигит кишининг бошидан нима гаплар ўтмайди, дейсиз. Бу ёғига оёқни борлаб босиш керак...

Жимлик чўқди. Рамазон нон ковшаб ўтиради. Мен эса Фозилга боқардим. Унинг заъфарон чехрасида, кўзларида биринчи дафъа учратганим заҳархандалак, кибр-ҳаво ўрнига кишлоқ ҳаётига тез кўнишиш, қалбида чўкиб ётган изтироб, андиша ва аламлар олдида чорасизлик, ожизлик ва оғир ўй-фикрлардан сўнг кишини толиқтириб қўядиган ҳолсизлик аломатлари кўринарди. Анчадан кейин Фозил дастурхон томон ўғирилиб ўтириб олди.

— Бай-бай, қандай нон-а? Садағаси кетай, — деди у нонни хузур қилиб чайнаркан. — Рамазонбой, келинг, бу гапларни кўяйлик. Овдан гапиринг, сиз, — деб менга ишора қилди.

— Овимиз зўр, — менинг ўрнимга жавоб берди Рамазон ва қўшиб кўйди: — Ҳеч бўлмаганда, ана, ўз оёғи билан келаяпти. Ўзиям ғозга ўхшайди курғур.

— Қичқириб юборса-я хўрози тушмагур, — Фозилнинг бу қочи-римидан иккаласи ҳам қаҳ-қаҳ уриб кулиб юборишиди. Бироқ Фозил дарҳол кулгидан тўхтади-да, қорнини ушлаб қолди. — Ҳа, падарингга лаънат... Ух... Эсдан чиқиб кетипти. — У менга кўзларини маъноли қисгач, сўз қотди: — Мана, сиз ўқимишли одамсиз. Рамазон билан орамизда ечилмай келаётган бир жумбоқ бор. Сиз шунинг орасини очиб берсангиз.

— Хўш, қани эшитайлик-чи? — дедим.

— Эски ашула бор. Биз болалигимиизда ҳам эшитиб юрардик. Шу ашулада бир гап бор: „Қичқир хўрозим, қичқир, тонг ота қолсин, умид билан олган ёrim қиз бўла қолсин...”, дейилади... Бу, энди нима дегани? Менимча шундай: йигит севагнига уйланади. Тўй кечаси. Ери билан бир ёстиққа бош кўяди... Тонг отавермайди. Хаёл ҳали у ёққа, ҳали бу ёққа оғаверади. Кўнглида умид ҳам, ишонч ҳам, шубҳа билан гумон ҳам бор. Бир гап билан айтганда кўнгли безовта. Шунда ҳалиги ашулани тўқийди. Тезроқ хўroz қичқирса-ю, тонг отса, кўнгли жойига тушса. Чунки ҳаммаси: ҳаётি ҳам, ор-номуси ҳам шу тонгга боғлиқ бўлиб қолган... Ўзбегимиизда шундай-ку.

— Бу ашулани Фозилбой тўйлари арафасида кўп айтардилар —деб кулди Рамазон.

— Гапни бўлмай туриңг, энди, — деди Фозил қизишиб. — Бу киши нима дейди денг: эмишки, ўша кеча йигитнинг юраги дов бермаган. Иш қилиб қайлиғига тегина олмаган... Шундай йигитлар ҳам бўлади-да. Ёки бўлмаса кўзи қиймаган, раҳми келган... Йигитнинг ори бўлади, сабр-тоқати етмаган. Шунда: тезроқ тонг отса-ю, бу хижолатликдан кутулсам, деган дейди.

Хар иккаласи ҳам менга жовдираб қааради. Уларнинг биронтасининг фикрини маъқуллаш билан иккинчисини хафа қилиб қўйиш мумкин эди. Тўғрисини айтсам иккала фикр ҳам менга ёқди. Бу ашулани бир умр эшитиб юриб, бирон марта шундай хулосага бормаганимга ҳайрон қолдим...

*
* *

Кунлар илиқ, оромбахш эди. Чошгоҳда Қорақир устидаги булатлар тўзғигач, қуёш ярақлаб кетарди. Бу ерларнинг суқунати, хилватлиги, дастлабки кунданоқ қарор топган дилкаш гурунглар Фозилга хуш ёқди. У тез орада ўзини анча тутиб олди. Қалбдаги ғашликларни унута бошлади. Буни биз ҳам сезар ва севинардик.

Шундай илиқ ва серфайз кунларнинг бирида Фозил мен билан бирга овга чиқиш истаги борлигини айтди. Биз қайикқа ўтиридик. Бу гал кўл ичкарисига эмас, балки унинг чети билан сузиб ўтиб, Қорақирнинг этагида тўхтадик. Қуёш ҳали қирнинг яланғоч ўркачлари ортида эди. Фозил заранг таёкка суяниб аста-секин қирни ёналаб, қир чўйқисига кўтарила бошлади. Мен унга етиб олиб, жароҳат зўриқиши мумкинлигини айтдим. Бироқ у гапимни эшитмади шекилли, жавоб бермади. У билан ёнма-ён борардим. Унинг ранги оқариб кетган, сарғимтири пешанасида кўк томирлар бўртиб чиқсан, йирик-йирик тер томчи-

лари пайдо бўлган эди. Қир устига чиқиб ўтирганимиздан сўнг ҳам у анчагача ҳансираф, юзи, бўйнидаги терларни беқасам тўни барлари билан артиб ўтириди.

— Бунчалик бўлади, деб ўйламагандим, — деди қурқшаб қолган лабларини яларкан уҳ тортиб. — Оёқларим ёмон ўрганиб кетипти. Бу қирларга илгарилари бир дам билан югуриб чиқардим. Қаранг-а...

Фозил бироз совигач, тўнининг барларини букиб, устига ўтириб олди. — Одам тез чўкаркан, — деб давом этди кўзларини яrim қисиб, чор атрофни кузатаркан.

Қир устидан яқин-йироқлар худди кафтдагидек кўринарди. Қуёш терак бўйи кўтарилиган шарқ томонда сув омбори улкан ойнадек кўзни қамаштириб ялтираб ётар, унинг соҳилларига яқин ерларида аллақандай жигар ранг, қизғиш бутазорлар кўзга чалинар ва негадир бу бўз, кимсасиз даштда файритабиийдек тююларди. Шимоли-ғарбдаги қишлоқлар ортидан эса бепоён чўл бошланарди. Унинг худудсиз, тўғри чизиқ уфқлари кўкнинг гул ранг губори билан қўшилишиб кетарди. Қамишзорлар тарафдан худди баҳордагидек илиқ ва майин шабада эсиб, танга ором беради. Фозил ана шу тип-тиниқ кўкка, пастда эринчоқлик билан учиб юрган қарғаларга, онда-сонда сув омбори томондан кўтарилиб Каттакўлга келиб ташлаётган ўрдак галаларига бокиб туради.

— Хадемай баҳор ҳам бошланади. Ху, ана у ёққа қаранг, бедазорга. Кўм-кўк бўлиб қолипти, — деди Фозил кўлларини пахса қилиб, қишлоқ этагидаги пайкалларни кўрсатиб. Сўнгра бармоқларини қарсиллатиб, негадир кўлларига тикилиб қолди. — Бу кўлларнинг катмон дастасини ушламаганига ҳам икки йилдан ошди. Кандай кўлларим бор эди-я. Эх, аттанг...

— Энди оғир меҳнат сизга тўғри келмаса керак, — гап қотдим.

— Тўғри келмайди, деб юраверамизми. Касалликни қанча ўйласанг, шунча исканжага олади. Эскилар, асрраган кўзга чўп қадалади, деб бекорга айтишмаган-да. Балиқ сувсиз яшай олмагани сингари одам ҳам меҳнатсиз яшай олмайди... Қишлоқда бирор-икков, Фозил шу билан тамом бўлиб келди, деб юришилти. Ҳаммасидан хабарим бор. Ҳали мен уларга кўрсатиб кўяман. Кўлимдан иш келмай қолгани йўқ.

*
* *

Биз пешинда қирдан тушдик. Фозилнинг рухи ҳар қачонгидан тетик эди. Хасталигидан асар ҳам қолмагандек тююларди. Йўл-йўлакай ўтмишидан ҳикоя қилди:

— Бу ерлар аслида бизнинг юртимиз эмас. Биз чўлданмиз. Дашибоз, Қизирик, Кушқўнмас чўллари деб эшитганмисиз? Ана ўша ерлар бизнинг юрт. Бу жойларга уруш йилларида кўчиб келиб қолганимиз. Сув сероблигини ҳисобга олмаганда бу ерларнинг ҳам чўлдан фарқи йўқ эди. Энди қарабисизки, ҳаммаёк қишлоқ, боғ, дала. Ўзгариб кетди. Инсоннинг кўлидан келмайдиган иш йўқ... — Бир оздан сўнг у асабий оҳангда қўшиб кўйди: — Чучварани хом санабди улар... — унинг ҳаяжонлангани зийрак кўзларининг чақнашидан сезилиб турарди. Уйга етай деб қолганимизда гапини якунлади: — Насиб қилса, мен соғайиб олай. Иккимиз чўлдаги юртимизни бир томоша қилиб келамиш. Ов ана ўша ерда. Наинки, жонивор истасангиз — ҳаммаси бор.

*
* *

Меҳнат таътилим поёнига етиб борарди. Қорақир тақдири тўғрисида қатъий қарорга келгандим. Эндиши иш баъзи ташкилотлар, овчилар жамияти раҳбарлари, мутахассислар маслаҳатига боғлиқ бўлиб қолганди. Уларнинг розилиги бўлса бас эди. Бунга ишониш им учун етарлича кузатишларга, асосларга эга эдим.

Сербулут кунларнинг бирида уй эгалари билан хўшлашдим. Фозил ҳам шу ерда эди. Мен унга тезроқ соғайишини тилаб, қўлимни узатдим. У анчагача қўлимни кучга кираётган панжалари орасига олиб туриб, юзимга тикилди-да:

— Азбаройи худо, сиз менга ёқиб қолдингиз, — деди қизарид — Биз сиз билан бундан кейин ҳам учрашиб турдик. Ҳашанди қалинроқ танишиб оламиш. Лекин шуни билингки, Рамазонга ўҳшаган яна бир дўст орттирдингиз. Ҳа, ишонаверинг.

— Раҳмат сизга, — дедим ва эндишина яхши кўра бошлаганим Фозил билан яна учрашишга комил ишонч ҳосил қилиб, хайрлашиб жўнаб кетдим.

УЧИНЧИ БОБ

Баҳорнинг ўрталари эди. Шаҳарга товук топширгани келган Рамазон мен учун ғоят кўнгилсиз бўлган воқеани сўзлаб берди. Ўша куниёқ у билан бирга йўлга чиқдим. Бироқ мен Қорақирга кечикиб келган эдим. Ҳали кирга етмасимиданоқ осмонга ўрлаётган сарғиш-қорамтири тутунни кўрдим. Тутун ердан кўтарилигани сайин йўғонлашиб, ёйилиб борарди. Теваракатрофда, ҳавода хас-хуш курумлари пилдираб учуб юради.

Кўп йиллардан бери ўрганиб қолган жуда қадрдон манзил, кўп серзавқ дамларим кечган жойлар ёниб, тутаб ётарди. Уч

кундан буён давом этаётган ёнгин тўқайзорнинг аксарият қисмини шип-шийдон қилиб кетган эди. Бу ёнгин кўлдаги қамишларни эмас, балки қалбимдаги ширин хотираларни шафқатсизлик билан кўйдираётгандек бўлди. Шамол кўлдан учириб келтираётган аччик, ўткир тутун, буғланаётган балчиқ ҳиди димоғимга ўрнашиб қолди. Кирдан ошиб ўтаётганимизда осмонга тикилдим. У ҳам ҳувуллаб қолган эди. Баъзан бир замонлар бу хилват кўлларда жон сақлаган қушлар ҳар йилги одатларига кўра, қир ошиб ўтишар ва нотаниш манзарани кўргач, янада юксакроқ кўтарилар, жанубга сузив кетаётган тутунга чап бериб ё изларига қайтиб, ёки сув омбори томон, ёхуд чўл тарафларга учеб кетишарди. Бир умр бир кўлнигина олам, бошпана, ватан деб билган қашқалдоқлар эса ҳамон кўлнинг очик жойларида тўп-тўп бўлиб туришар ва уларнинг шу туришининг ўзиёқ дилда ғусса уйғотарди. Кўл соҳиллари, Қорақир бағридаги барвақт униб чиқиб, барвақт ҳазон бўлгувчи кўкатлар курумдан қорайиб кетганди.

Кўлнинг кун ботиш томонида, Рамазоннинг уйи ёнида икки кишининг қораси кўринди.

— Ўшалар, — деди ҳамроҳим пешонасига қўлини соя қилиб тураркан.

— Кимлар? — сўрадим.

— Агроном билан Фозил-да.

— Фозил?!

— Бунинг ҳаммаси икковининг иши. Мен сизни ранжитмайин деб бошида Фозилнинг бу ишга қўл урганини айтмагандим.

— Шошманг, шошманг, ахир, бу — Фозил касал эди-ку?

— Касалликни билармиди у.

— Нега тўқайга ўт кўйди?

— Сувини қочириб, янги ер очармиш. Лекин билмадим бундан бир иш чиқишини. Бунинг устига кўлнинг ўртасида булоқ бор, дейишади. Бүёғини кўйинг. Сиз бу ерда биринчи кун, тўқайга ўт кетганида бўлмадингиз. Киёмат-қойим бўлди. Учib келган қушлар оламга сифмай кетди. Буларнинг макони тўқай эканда. Кечанинг алламаҳалигача чуғур-чуғур, чағ-чағ тинмади. Кулокни тешиб юборгидай қичқиришади жониворлар. Кушнинг уяси бузилса ёмон бўларкан.

Биз гап билан бўлиб, уйга етганимизни ҳам билмай қолимиз. Фозил бизга лешвозди чиқди. Негадир худди шу пайтда мен уни ўтган куз қорни ёрилиб, касал бўлиб ётганидамас, балки анча илгаридан, бир неча йиллардан буён таниш киши ҳис этдим. Бўйи пакана, қадди-қомати фўлабирдан келган. Юзида хасталиқдан нишон ҳам қолмаган, қорамагиз, лунжлари таранг тортилиб турибди. Тез фурсатда бунчалик даражада ўзга-

риб кетган Фозилга нисбатан кўнглимда аллақандай ғайрлик сездим. У хаёлимдан ўтган фикрни англагандек, кўзларини маккорона ўйнатиб:

— Милтиқ эсдан чиқибди-да, — деди.

Мен уни бирон-бир аччиқ гап билан узиб олгим келди-ю, лекин ўша заҳоти нима дейишими билмай лол қолдим. Бунинг устига у яна давом этди:

— Сизнинг ахволингиз менга аён, — ўша бепарво оҳангда сўзларди: — Ҳечқиси йўқ. Қанотли жониворлар ризқ-рўзини териб ейди... Биз, дехқонларнинг йўриғимиз бошқа.

Қорақир ва кўл билан қизиқаётганимни пайқаган тўла, кенг юзлари силлиқ, нурсиз кўзлари кулганда кўмилиб кетадиган агроном мухбир кўрган кишилардек сўзамол бўлиб қолди:

— Одамларга ҳайронсиз, ҳа, десанг, чўлга кетамиз, дейди. Ҳа, мана, тумшуғинг тагида ҳам ўзлаштирилмаган ерлар кўп. Аввал шуни эпла, кейин бир ҳисоби бўлар, чўл қочмас, дейдиган киши топилмайди. Мана шу Қорақирни олиб кўринг. Одамнинг куч-кувватига мунтазир бўлиб ётипти. Энди бошланди. Келгуси йили қарийб икки юз гектар ер ўзлаштирилади. Бу чорак колхоз деган гап. Очилган ернинг эллик гектарига шоли, эллигига карам, картошка, қолганига чорва озукаси... Бу кимга фойда — колхозга. Бу — бир. Иккинчидан, колхознинг обрўйи, учинчидан, биродар, ахир бу ботқоқликлар замонамиз учун доғ эмасми? Шунча техникага, кучга зга бўлсак-у ўзлаштирасак. Нима деган гап бўлади. Ҳақиқатан ҳам доғ! Бунинг устига турли касалликлар ташувчи чивин-пашшалар макони... Бу доғни ювиб ташлаш керак... Сиз, ўртоқ, мажлисда қатнашмадингизда, кўрадингиз. Ўзиям, роса шов-шув бўлди. — Агрономнинг овози тобора жўшиб борарди. Фозил афтидан уни бир лахза тинчишини кутиб тургандек безовталана бошлади. Агрономнинг жағи жағига тегмасди. — Мажлис ана шундай тортишув билан ўтди. Оҳ-оҳ... Фозилбойнинг иродасига қойил қолдим. Дехқонда, бу дехқон. Ҳар бир гапи салмоқли, асосли. Қани эди ҳар бир колхозчида шундай ташаббускорлик бўлса...

Фозилнинг тоқати тоқ бўлганлиги унинг асабий ҳаракатларидан сезилиб турарди. Лекин шундай бўлса-да, агрономнинг тилига эрк берди. У, афтидан, менинг кайфиятимни зимдан кузатар, ўз мулоҳазаларини айтишга ҳозирланар эди.

— Сиз анави воқеани сўзлаб берсангиз яхши бўларди, — деди Фозил кўлини орқасига қилиб, кирза этигининг учи билан кесакни эзар экан.

— Қайси?.. Эҳ-ҳа, эсимга тушди. Эшитасизларми? Бу ҳам қизиқ бўлган. — Агроном ҳикоя қилишдек имконият туғилганидан мамнун ҳолда бошлади. — Урушдан кейинги йиллар эди.

Шу ерда кичик жамоа хўжалиги бўларди. Худди шу, Рамазон-бойнинг товуқхонасидан юқорироқда колхознинг томорқаси. Дамин ака деган киши раис. Ўлиб кетди. Рўзиқул деган бир лапашанг киши томорқага қоровул. Раис билан қалин. Ҳар ҳафта бир-икки марта меҳмонларини Рўзиқулнинг чайласига бошлаб келади. Овлок жойда, ҳеч ким кайф-сафо қилишга халақит бермайди. Ҳе, одамлар жуда пухта-да, топган жойини қаранг. Раис билан қоровулнинг қалин бўлиши сабаби маълум. Рўзиқул одамларга қўшилмайди, яккамохов. Бирорнинг сири, иши билан қизиқмайди. Дунёни сув олиб кетса, тўлиғимга чиқмайди, дейдиганлардан эди. Раистга шундай одам керак-да. Бунинг устига Рўзиқул уста балиқчи эди. Балиқчи бўлгандаям зўр эди. Ҳу, кўлнинг этагига қаранглар-а. Кўраяпсизларми? Ана ўша ердан илгарилари бир ариқ сув оқиб чиқарди. Ўша ерда Рўзиқул чийдан дом, яъни тузоқ курган эди. Домнинг ўртасига кунжара, маккажӯхорининг думбулини ташлаб қўярди. Балиқ буларнинг ҳидини олиб келади. Қайтиб чиққани йўл тополмайди. Қачон балиқ керак бўлса, узун дастали тўрни сувга бир-икки марта ботириб олади. Ана шунинг ўзи кифоя. Бир йили кўлнинг суви ўз-ўзидан пасайиб кетди. Рўзиқулнинг доми куруқликда қолди. Меҳмонлар келганда Рўзиқул кўли билан қамишлар орасидан пайпаслаб балиқ тутадиган бўлди. Уста эди-да ўзиям. Ўзи, балиқни сезган заҳоти елкасини сила, дерди. Қаранг-а, балиқ ҳам силашни яхши кўраркан. Шу-шу, бир куни Рўзиқул ғойиб бўлди. Одамлар кўл бўйида ечиб кетган кийим-бошни топишиди. Ўзи эса дом-дараксиз йўқолиб кетди. Шундан бери мана, карийб чорак аср вақт ўтаяпти. Ҳалқ орасида турли-туман миш-мишлар юради. Бирор кўл тортган деса, бирор балиқ ютган, дейди. Бир вақтлар кўлда тунлари қуриллаб, сув тортадиган ўпқон кўрдим, ҳаттоти, кўлни қўриқлаб ётадиган аждаҳо ҳам бор, деган овозалар юрарди... Ишқилиб, ҳеч ким кўлга бетлай олмаган. Бунинг ҳаммаси қуруқ сафсата. Лекин қуруқ сафсата тагида ҳам фалсафа бор. Бу хурофот. Кўлнинг қуритилиши ана шу хурофотга ҳам барҳам беради. Биз бир ўқ билан икки қуён урган бўламиз. — Агроном сўнгги фикридан жуда завқланиб кетди, шекилли, силлиқ юзлари қизарди.

— Лекин сиз хафа бўлманг, деди Фозил менга ўғириларкан маъюс оҳангда. — Ҳалиги гапларим ҳазил. Бу ишни мен қиласам, бошқа бирор қиларди. Сизу бизнинг истагимиз билан ҳаётнинг иши йўқ. Унинг ўз тарозиси бор... Жуда қийин, билиман. Бирорлар ҳозирдан оғзидан гуллаб юрибди. Майли. Мен бу ишни қасдма-қасд қилаётганим йўқ. Ният қилганман... Эл олдида ўзимни бир кўрсатмасам бўлмайди. Бу гапни фақат сизга айтаяпман... Рамазон сизнинг режаларингизни анча ке-

чикиб айтди. Иш битган эди... Хафа бўлманг. Қоракир томон-ларга йўлингиз тушса, ёввойи ўрдак гўшти бўлмаган тақдирда карсиллаган қовун, ширин-шарбат тарвузлар билан меҳмон қила-миз... Овлаш учун эса жой кўп. Мен сизга ёрдамлашаман.

ТЎРТИНЧИ БОБ

Орадан икки йил ўтгач, Фозилнинг касалманд хотини оламдан ўтди. Еттиси ўтадиган куни эрталаб Рамазонниги кириб бордим. У бошимдаги хас шляпага қараб турди-да, уйга кириб кетиб, зум ўтмай чуст дўппи олиб чиқди.

— Шуни кийиб олинг, ҳар ҳолда қишлоқ, — деди у.

Йўлга тушганимизда кўнглим аланечук увушиб кетди. Фашликни, фуссани унутиш учун атрофга қараб кетдим. Кейинги икки йилда Қоракир тўқайзори ўрни батамом ўзгариб кетган эди. Мен унда қирнинг гиёхсиз ўркачларидан бўлак бирон-бир таниш белги тополмадим. Faқат қиргина тошга айланган аллақандай афсонавий ҳайвонга ўхшаб ерга қапишиб ётарди. Шунда бир вақтлар мени мафтун этган ер юзидағи бу хилват ерларнинг нобуд бўлганига ачинганим ёдимга тушди. Бирок энди бу туйғунинг юзаки эканлигини ҳис этдим. Ёлғиз қушларгагина ошён бўлган тўқайзор ўрнида одамларга ризқ-рўз бергувчи, фаровон турмушга монанд тасаввур этолмаган ҳаёт бутун ҳусн-жамолини кўз-кўз қилиб гуркураб яшнарди. Бу изчил ва ҳаётбахш кураш, барқарор бунёдкорлик олдида менинг бир ёқлама ҳис-туйғуларим, ўйларим арзимас бир нарса бўлиб қолганди.

Фозилни кўз олдимга келтирдим. У ўшанда ҳаётдаги бир доғни юваман деб, айни пайтда ўзи билмаган ҳолда тақдирнинг бўлажак зарбасига қарши истеҳком қурган экан. Ҳарқалай бугунги кундаги азобни, кулфатни ўша меҳнат мевалари енгиллаштиради, юпатади, овутади. Ҳали узоқ давом этадиган умр йўлларида кўпгина ишлар қила олишга кодир эканлигини эслатиб туради. Меҳнат ҳалоскор. У бизнинг руҳимизни, вужудимизни емирувчи ғам-андухлардан сақлайди. Кодир инсон кучли, ҳар қандай кулфатдан ҳам қудратлироқ, у худди шу фазилати билан табиатдек, жамики тирик мавжудотдан фарқ қилиб туришини таъкидлаётгандек бўлади.

Кўл ўрнида пайдо бўлган яшил пахтазорнинг узоқ четларидаги ёш тутлар ва терак ниҳоллари кизиб кетган куёш тафтига бардош беролмаётгандек сукут сақлашар, қилт этган шабада эсмас, шифға кўсакка ўтирган ғўзалар устидан жимиirlаб ховур кўтарилади. Пайкал четида универсал трактор қакқайиб турибди. Чор атрофда бирон тирик жон кўрин-

майди. Ёлғиз майна трактор ўриндиғи сұянчиғига сарық панжаларини ботириб, ёлғизоёқ йўлда кетаётган икки йўловчини ҳадиксираб кузатади. Куннинг бундай дамларида жамики жониворлар соя-салқин жойларда жон сақлашади. Бу жазирама ва сукунат тинчини дала йўлида кетаётган биз, йўловчилар гурунги бузиб боради.

— Бу дунё фалати-да, — дерди Рамазон. — Ким йўлабди, дейсиз шундай бўлишини. Мана ўлди-кетди, бечора. Одамнинг қадри ўлгандан кейин билинади. Назокатнинг ўлиши ҳеч кимнинг хаёлида йўқ эди. Шундай-да, одам бир кунмас бир кун ўлади-кетади. Сиз уни танирдингиз-а? Қорақирга чайла куриб, кўчиб чиқишганда уйларига борувдик. Чалоп қилиб берган эди. Бечора қоқсуюқ, кичкинагина аёл эди. Бақувватроқ одам бўлса бир кўлида бемалол кўтариб кетаверса бўларди. Тобутда ҳам бир ҳовуч бўлиб ётди... — Рамазон эринмай ҳикоя қиласарди. — Буларнинг турмуш куриши ҳам қизик бўлган. Хабарингиз бор биз урушгача чўлда яшаганмиз. Такя деган қишлоқда. Фозилнинг отаси темирчи эди. Эс-эс биламан, жуда оғир, чўрткесар киши эди. Фозил ҳам отасига тортган. Уруш бошланганидан сал вақт ўтгандан сўнг қишлоғимиздан беш киши — Фозилнинг отаси, яна бир тоҷик ўртоғи бўларди — у, менинг отам ва яна икки киши фронтга кетиб қолди. Фозил фарзанддан ёлғиз ўзи. Хайрулла акадан бир ўғил, бир қиз — ана шу Назокат қолган эди. Урушга кетишдан олдин аёлларига, бизнинг боримиз бор, йўғимиз бор, лекин болаларни бегона қилмайсизлар, катта бўлишганда қовуштирасизлар, деб насиҳат қилишган. Иккови ҳам урушда йўқолиб кетди. Отам қайтиб келди. Фозилнинг отаси билан хизмат қилишган экан. Отам, биз уни жуда яхши кўрардик, дердилар... Булар ҳаммаси бир жойда ётишган. Фозилнинг отаси ўрнидан туриб сал узокроқ бир околга кирган. Отам, сен ўша ерга ётма, деган. Шунда у, барибир эмасми, ажал ҳамма ерда ҳам изғиб юрибди, ажал етса ҳар жойда ўлиш мумкин, ўлим жой танлаб ўтирумайди, депти. Бир снаряд дараҳт танасига келиб урилган-у, чўрт кесиб кетган. Фозилнинг отасини шу дарҳт танаси босиб қолган. Қаранг, ўқ тегмаган... Жон берадётгандага фақат бир сўзни, Фозилнинг исмини тилга олган. Уни ҳимояларингга олинглар, демоқчи бўлганми, ким билади, дейсиз. Кейин отамлар йиглашиб-сиқташиб, шинелига ўраб эскича расм-русм билан кўмишган. Қабри Украинанинг аллақайси қишлоғида деб юрарди отам раҳматлик... Чўлда яшаш, тирикчилик ўтказиш оғир бўлиб қолди. Шунда ҳукумат бизга серсув жойларга кўчишни маслаҳат берди. Биз ана шу Қорақир томонларга кўчиб келдик. Хайрулла акаларнинг болалари Тоҷикистонга, қариндош-уругларининг ёнига кўчиб кетишлиди. Уруш тугагандан кейин орадан ўн йиллар чама-

си ўтгач, яна қайтиб келишди. Бу орада Фозил билан Санамнинг ораси бузилиб бўлувди. Назокатлар бизга ҳамсоя эди. Фозил армияда уч йил хизмат қилиб, қайтиб келгандан сўнг ҳам бир йилча тракторчиликка ўқиди. Қимлаган иши қолмади-да. Ёш бўлса ўтиб бораяпти. Уйланмайди. Қишлоқни ўзингиз биласиз, бундай пайтда гап-сўз кўпаяди. Шунда отам орага тушдилар. У пайтлари худо раҳматлиқ ҳаёт эдилар. Секингина Фозилнинг кўнглига қўл солиб кўрдилар. Отасининг панд-насиҳатини, васиятини ўртага кўйдилар. Ишқилиб Фозил гапни ерга ташламади. Каранг, насиба экан-да, бўлмаса шу Назокат қаерларда юрмади, дейсиз. Келиб-келиб тақдир қилганига тегди.. Сизга бир қизиқ воқеани айтиб берайин. Қишлоғимизда Олтибой деган киши бор, ёдингиздами, у ҳақди гапиравдим, Санамнинг акаси. Назокат билан Фозилнинг тўйи олдидан бир нарса устида тортишиб қолдик. Кечаси колхоз идорасидан қайтиб келаяпмиз, гурунглашиб. Қаердандир у ҳам кўшилиб қолди даврамизга. Нима дейди денг: шу Фозил билан Назокат устида гап-сўз бўлаяпти-ю, лекин мен ўйланиб қолдим. Хўш дедим. Бир умрнинг заволига қолмасмиканмиз, дейди. Мен тушунмадим. Кейин юрагидагини айтди. Бу Назокат қари қиз, туғмайди. Бор дунёси, хонумони уруш йилларида ичидаги кетган, деди. Мен ҳайрон қолдим, нега туғмас экан? Башарти, туғиб қолса, нима дейсан? Олтибой тап тортмай гапираверди: тушунсанг-чи, биринчидан, унинг гавдасига қара, ундан бола бўлишига кўзим етмайди; иккинчидан, ёши ўтиб кетган, деса бўладими. Мен, агар шу аёл туғса, нима дейсан, дедим. Охирида Олтибой: агар туғса — менинг ҳам тукқаним бўлсин, деб юборди. — Рамазон томогини кириб олди.

— Кейин-чи? Кейин нима бўлди? —тоқатсизланиб сўрадим.

— Кейин тўй бўлди... Тўғри, беш йилча туғмади. Яхши яшаб юришди. Дўхтирларга кўрсатди. Улар ҳам, ёшлигида кўп машак-қат чекканлигини, лекин умид қисса бўлишини айтишди. Худога шукур, насибаси бут экан иккиқат бўлди. Ўғил туғиб берди. Бир куни Олтибойни кўриб, хол-аҳвол сўрадим-да, сўнгра, фалончи, бу Назокат ўғил туғипти, энди навбат сизга, ҳеч бўлмаса қиз бўлсин, деб ҳазиллашдим. Бошини кўтара олмайди. У ярамас оғзидан гуллаб, тилидан топиб юрадиганлар хилидан. Хусумат ёмон нарса-да, у ер, бу ерда, шунча йил белининг қувватини шу кучала еган чандир, қок суюк аёлга сақлаб юрган Фозилга қойилман. Энди шу хотини билан чўл ўзлаштирумокчи, деб лақиллаған. Тешик қулоқ-да, бу гаплар Фозилга ҳам етиб келди. Иккавининг орасида ҳалиги жанжал чиқиб кетди. Фозил роса дўппослади, майиб қилди. Ўзиям қамалиб кетди.. Турмадан келгандан сўнг яна ўғилли бўлди... Лекин Олтибой бир нарсага каромат

қилган экан, ҳа, шумният... Бечора Назокат учинчи фарзандини туғолмай ўлиб кетди. Операция қилишган экан, бардош беролмади. Шўрлик бир хафтача ётди. Муштдеккина, камкуват эдида...

Рамазон пахтазорга ёндашиб келган сердараҳт қишлоқ че-тидаги оқариб кўринаётган жийдазорга тикилди. Қисиқ ва шудамда ғусса тўла кўзларига тер қуилиб ачишириди.

Кишлоқкача жим бордик. Кейин тош йўлнинг ёнидан ўтадиган ариқ бўйидаги тут соясида ўтиридик. Баданимиздаги тер қотгач, ариқ сувида ювиндик. Шу пайт тош йўлнинг қишлоқ ичкарисига кириб кетган муюлишида бир неча нотаниш эркак кўринди. Улар бошларини ҳам қилишиб, паст товушда вазмин гурунглашиб келишарди. Эркаклар саломимизга жимгина бош тебратишиб, охиста ўтиб кетишиди. Улар узоклашган сари гап-сўзлар ҳам эшитилмай қолди.

— Булар ўша ердан келишаяпти, — деди чуқур уҳ тортиб Рамазон ариқ жиягида чўккалаб ўтирганича чаккаларини панжалари орасига олиб қисаркан.

Пастаккина, йўғон танали кекса тут тагидаги шалоғи чиққан, тахталари чириган темир панжарали чорпоя устида уч киши чордона куриб сухбатлашиб ўтиришарди. Улар эшиқдан кириб келаётганимизни кўришиб, қимирлаб қолишиди. Устарада қирилган сочи ўсинқираб қолган, соқол-мўйлови хийла қорайган Фозил биз билан ҳомуш кўришибди. Чорпояга чиқиб ўтирганимиздан сўнг тўрда қўлларини қовуштириб ўтирган, йўл-йўл яктак кийган хушрўй чол — мулла унсизгина овоз билан узундан-узоқ тиловат килиб, қўлини юзига тортиб, „омин“ деди.

— Бандалик экан-да, Фозил ака, янгани ҳам бериб қўйиб-сиз, — дедим мен Фозилга ўгирилиб. У бошини иргаб қўйди.

— Иложи мо чист*, — деди мулланинг ёнида ўтирган жиккак, қотма юзлари қорайиб, чакка суякларига ёпишиб кетган киши.

— Жояш дар жаннат шавад** — бақбакаси осилиб тушган, қизил бўйни йўғон учинчи киши шундай деди-ю, шу билан мархумани кўп эслайвериб, руҳини безовта қилманглар, дегандек томоқ кириб қўйди.

Чорак соатлар ўтгач, сухбат уланиб кетди. Энди кундалик ташвишлар, бу йилги ҳосил, бозорда меванинг нарх-навоси, одамгарчилик ва кексалик, ҳаёт ва ниҳоят ўлим ҳамда у билан боғлиқ ақидалар ҳақида гап кетарди. Ора-чорада марҳуманинг яхши фазилатлари тилга олинар ёки қиёс қилинарди. Мен

* Иложимиз қанча /тожикча/.

** Жойи жаннатда бўлсин /тожикча/.

энди ўзимни енгил ҳис этар, сухбатга қўшилмасам ҳам дикқат билан тинглаб, ҳовли ўртасида буруқсиб тутаб, чўғланиб турган титан ёнида ивиришиб юрган нотаниш икки кишининг ҳаракатларига разм солиб ўтирадим. Аҳён-аҳёнда бирон аёл ҳовлига кириб келганида ичкари уйдаги хотин-халаж уввос кўта-ришар, марҳумани йўқлашар, шундай пайтларда чорпояда ўтирган эркаклар юзида ғам кўланкаси сезилар, яна ҳовли жимжит бўлиб қоларди. Ҳар галги чинқириқда бир аёлнинг: „Ду ҷашми сиёҳро ба ки партофта рафти“*, деган овози ҳовлига оқиб чиқар, қалбимда аллақандай ўксик туйғулар уйғотарди.

Нихоят иш билан банд бўлган кишилар ҳам чорпояга чиқиб ўтиришиди. Дастурхонга ёғи чала доғ қилинган ош тортилди. Ўтирганлар жимгина ош ейишди. Мулла анчагача чиройли, жингалак соколини ёғли панжалари билан силаб ўтиреди. Одамлар ошдан кўл тортишгач, дуо ўқиди. Шундан сўнг бир неча киши ўрнидан туриб, кўлларини кўксига қўйиб, хайрлашишди. Шу чоққача чорпоя четида ғамгин хаёл суриб ўтирган, мусибат ва уйкусизликдан кўзлари киртайган Фозилга ва қотма, жиккак кишига кўнгилни кўтарувчи илик сўзлар айтишиб чиқиб кетишиди.

Ҳовлида одамлар сийраклашиб қолди. Чорпояда ўтирганлар жимгина чой ҳўплашарди. Сукунатни жиккак кишининг хирқи-роқ овози бузди:

— Ёшлигимда бир гап эшитганман: одамни киндик қони тўкилган жой тортармиш,— одамларнинг маъюс бош тебратишларини кўрган ҳикоячи сал далда олгандек бўлди, унинг овози қатъий ва ишончли чиқа бошлади. — Инсон дунёга келганида киндиги кесилади-ку, ана шу одам юрагининг йўлдоши, дейишади. Одам қаерда юрмасин, ҳоҳ узок юртда, ҳоҳ ўзга элда, барибир, ана шу йўлдош тортади.

— Дарҳақиқат, — деди мулла ўсиқ кошларини учирив.

— Киндик қони тортмаганида эди, синглим Назокат шўрлик ўз юртидан узок жойларда ўлиб кетарди. Карангки, нихоят ўз юртидан, киндик қони томган тупрокдан жой олди. Бу дунё шундай. Унинг сиру асрорига ҳеч ким тушунмайди. — Марҳуманинг акаси ўйланиб қолди, кейин ниманидир кийналиб эслади, кўзларини бир зум қисиб турди: — Энди елкасига офтоб текканида оламдан кўз юмди... Ўғиллари боболарининг ҳам, онасининг ҳам ўрнини босади... — У қорайган юзида из қолдириб, сизиб кетган ёш томчиларини сездирмаслик учун ўгирилиб олди.

— Одамнинг насибаси бут бўлганидан қувонмоқ керак. Ҳарқалай, ундан иккита туёқ қолди-ку. Шунга ҳам шукур қилиш керак. Бу дунё кимлардан қолмаган, дейсиз. Хафа бўлманг,

* Бу икки қора кўзларни кимларга ташлаб кетдинг.

Абдулла, —мулла бошини вазминлик билан тебратиб, мархуманинг акасига далда берди.

— Жуда бардошли, мўмин аёл эди-да, раҳматлик. Ўлаётганда ҳам миқ этмалти, — деб гапга аралашиб бақбақаси осилиб тушган семиз киши.

— Дўхтирлар, хотинингизни олиб кетинг, болалари олдида бир-икки кун бўйсин, дейишди, — гап бошлади Фозил. — Мен дарров тушундим: лекин ўзига билдирамадим. Кўпи кетиб, ози қолди, деб кўнглини кўтардим. Келган кунидан бошлаб, ўғилларининг қўлини ҳалоллаб кўяйлик, деб туриб олди. Унинг ахволи менга аён эди-ку. Дархол тўйга тайёргарлик кўра бошладим. Тожикистондаги хеш-таборларнига одам юбордим. Оғаниилари, тоғаси, холаси келиб қолди. Кўнгли чоғ эди. Болаларини эркалатгани эркалатган. Одам ўз ўлимини сезаркан-да. Унинг шўхликларини кўриб, тузалаяпти, деб ўйлабман. Кўкрагида чойнақдай без бор эди. Ўлимидан уч кун аввал юмшаб, ҳеч из қолдирмай йўқолиб кетди.

— Шиши ёрилган экан-да? — деди мархуманинг акаси ютиниб.

— Айтишларича, одамнинг вақт-соати яқинлашса бир-икки кун бурун бутун баданидаги хасталик йўқолармиш, — мулланинг бу гаплари ўтирганларни сескантириб юборди. — Ҳа, кейин нима бўлди?

— Ўлимидан икки кун бурун бир лўли аёл кўчадан кўп ёғоч чўмич-қошиқ олиб ўтди. Шундан сотиб олинг, мен сизларга шу чўмични тўлдириб, қатиқли угра ош сузуб бераман, деди. Эртасига болаларнинг қўлига коса тутқазиб, нозбўй, кашнич, шивит тергани юборди. Болалар териб келтирган кўкатларни қўлига олди-ю, бир бошидан капалаб ея бошлади. Ҳидлаб қувонгани қувонган... Эртасига тўйни бошлаб юбордик. Тўй давом этаяпти. Кечқурун, сиз тўй бошида туринг, эрталаб келарсиз, деди. Лекин кўнглим жуда ғаш бўлгани учун уйда қолдим. Юрагим бир нарсани сезгандай гуп-гуп ураверди. Бир маҳал мени имлаб чақириб, уй ортига олиб ўтди. Уй тўла хотин-халаж эди... Энди гапни эшитинг, бўлар иш бўлди. Умид йўқ. Фақат шу икки боланинг пешанасини силанг, хор қилманг. Менинг ўрнимни ҳам босинг, деди-да, йиғлаб юборди. Яна сағир бўлиб қоласизлар, деди...

Абдулланинг елкалари титраб кетди. У энгашиб, бурнига дастрўмол босди. Фозилнинг томоғига нимадир тиқилиб қолгандек бўлди. Киприклари пирпиради, ютинди, ўзини босиб олди.

— Нима деяпсан, кампир, бўёғи яхши бўлиб кетади, дедим. Ҳеч нарса демасдан изига бурилиб, уйга кирди-да-кетди. Ўғиллари ухлаб ётган хонага кирди. Уларнинг ўртасига ётди-да, ик-

ковини ҳам қучоғига олди. Кейин ухлаб қолди. Кўзим илингандек, бирор оёғимдан тортаяпти. Карасам — холаси. Тез туринг, узилаяпти, ўсал бўлиб қолди, деди. Тура солиб бошига келдим. Кўзини бир очди-ю, юмди. Кўзларининг четидан ёш оқиб кетди. Кейин танглайнини қоқди, жим бўлди-қолди. Хотин-халаж гир айланиб, тўполонни бошлади. Мен бошига ўтсам, улар оёқларига ўтишади. Ўю хаёлим ухлаб ётган болаларда. Ухлаб ётишипти, чўчиб кетишмасин, бирон касофат юз бермасин, дейман... Тўйимиз азага айланиб кетди...

Ҳамма жим қолди. Шундай сукунат чўқдик, у чўзилган саинин барчани ваҳима босарди. Ўлим ҳақиқати олдида ҳар қанақа тилак, илик сўз ҳам ожизлик қилиб қолишини шунда сездим.

Жимликни йирокдан, ҳовли тўридаги жийдазордан чопқиллаб чиқишиган, кўмирдек қорайиб куйган икки боланинг қийқириғи бузди. Жийда новдасини от қилиб миниб олган беш яшар чамасидаги бола терлаб-лишиб чопар, иккинчиси эса уни кувларди. Болалар чопқиллашиб, чорпояни айланиб ўтишди. Жийдазорга етар-етмас қувлаётган кичик бола йиқилди. У йиқилган жойи — нам жўяқдан ўрмалаб чиқишига уринарди. Хивич миниб чопиб юрган бола укаси ёнига келди-да, уни турғазиб қўиди. Болаларнинг пайдо бўлиши ўтирган кишиларни жонлантириб юборди.

— Ҳаёт шунақа-да. Ана энди азаматлар бир-бирининг қўлтиғига кириб, вояга етаверади. Бир қарабсизки, отасига дастёр, қанот. Кейин унинг қўлидан ишини олади. Ҳаёт шунақа, — дерди семиз киши чой ҳўплаб. Анчадан сўнг у тоҷикчалаб оҳиста шивирлаб қўшиб қўиди: — Худо умри барча ҳаётро дихад*

Шу чоқ менинг кўз ўнгимда марҳуманинг сиймоси пайдо бўлди. Кўнглим ўксинди. Жийдазор соясида қий-чув қилишиб, қичқиришаётган болалардан кўз олмасдим. Марҳуманинг бу копқора болалари кўзимга жуда иссиқ кўринар, уларга меҳрим ияр ва жўшқин тўйғулардан хўрлигим келиб ўтирадим. Мен бу оила ташвишларига ўзимни даҳлдор хис этар, бутун воқеалар, ҳаёт икир-чикирларида ўзимга яқинлик сезардим. Марҳума хотираси энди жуда азиз ва қадрдон туюларди, Негадир камтар, камсуқум аёлнинг сермашаққат умри лип-лип этиб кўз ўнгимда намоён бўлар, бир умр оғир ва сермушкул йўлларни босиб ўтган сабр-қаноатли, муштипар, азиз ва мунис марҳума аёлларни эслардим.

Болалар жийдазордан чиқиб келишди. Кўлларидағи жийда шоҳлари силкиниб турарди. Болалар чорпоя ёнидан ўтаётгандаридан кўзларини қисишиб, биз томонга ажабланишиб қараш-

* Оллоҳ болаларига тўзим берсин.

ди. Ҳовлида юрган аёллардан бири уларни хона ичкарисига бошлаб кетди. Улар ортидан ҳавода жийданинг гупуллаган хушбўй ҳиди колди.

Болаларнинг келажак тақдирида кечмиш бир шарпа мени ўйга толдирди. Улар бошларига тушган бу кунги мусибатдан бехабар эдилар. Бироқ кейинчалик, улғайиб, катта бўлганларида гина бу жудолик тагига етадилар. Ўшанда она чўп-устухон, озгин ва кўримсиз аёл бўлиб эмас, балки умр йўлларида армон ва соғинчлар билан парваришланган, ардоқланган, энг теран ҳислар билан йўғрилган, етиб бўлмас сиймо қиёфасида гавдаланади. Ҳаёт уларни бу мудҳиш жудолиқдан қанчалик йироқлаштиурса, бу инсон улар учун шунчалик азиз, муқаддас ва мангу бўлиб, қалбларни ўртайди...

БЕШИНЧИ БОБ

Бир нафас дам ростлаб олайлик.

Биз ахир чўлда кетаяпмиз. Чўлда эса киши секин юришдан роҳат қиласи. Ён-верингиздаги ўзгаришларни сезиш, илғаб олиш учун жуда хушёр бўлишингиз керак. Чунки яйдоқ даштда хўроздар қичқирмайди. Итлар ҳурмайди. Қоронги чўл эса ўз нафосатини, сирларини хуфия айлаб туради. Булутли осмон хўмрайиб турибди. У сабот ва бардошингизни синамоқидек. Узоқ вақт туради. Лекин зулматнинг бу пўписаси жуда заиф. Қалбингиз аллақачон ҳали бир замон шу зулмат қаъридан орзиқиб кутаётганингиз — тонг нишонасини илғаб олганидан дукдук уради, типирчилайди. Сиз энди заррача чўчимайсиз. Чунки енгил қанот қалбингиз самодаги булат қатлари ортида юз бераётган нур ва зулмат жангини ҳис этаяпти. Муқаррар нур тантанасини нотаниш сўқмоқларда юриб кетатуриб кўриш — янги куз тонгига пешвоз чиқиш, уни кутишдек баҳтга мусассар бўлажагингиздан севинасиз. Нихоят осмоннинг қоқ ўртасидан пастроқда, шарқ томонда булат билинар-билинмас оқаради. Жанубликларнинг таъбири билан айтганда: „тонг чиянлади“. Энди нур хуружини даф этиб бўлмайди. Дақиқа сайин булутларнинг оқарган тўшлари кенгайиб боради.

Тонг сахарда чўлнинг ўйғонишини таърифлаш қийин. Туни билан қулокни батанг қилган чигирткалар саси саҳарга келиб тингандек бўлади. Бир неча дақиқалик ҳаяжонли сукунат ҳукм суради. Замин, шамол, жамики тирик жон, осмон туйнугидан мўралаган нур олдида лол қотиб қолади. Кейин қўнғироқдек овоз бутун чўл узра барада янграйди. У шу қадар ёқимлики, дастлаб бу овознинг қушники эканлигини билишни ҳам унугиб қўясиз. Сўнgra бу кувнок, ҳаётбахш овознинг жуда юксаклар-

дан, дарз кетган қорамтири булутлар орасидан келаётганини пайқаб қоласиз. Бу түргай. Тонгда янграган илк тантанавор түргай күшиғидан жозибалироқ, сехрлироқ куйни ким зшитган. Назарингда унинг шодиёна, хушвақт сайраши карвон-карвон бадқовоқ булутларни ҳам чўчитгандек, ҳайратга согландек, енгандек туолади. Улар итоаткорлик билан самонинг чет-четлариға, ҳали тонгнинг олтин найзаси етмаган хилват қоронғиликлари га чекинишади. Шундан сўнг уфқ алвон рўмолчасини силкитади. Чўл ярқираб кетади. Турли-туман овозлар даштни тўлдириб юборади. Эрталабки равшанлик ва осудаликдан дилингиз яйрайди. Йўл жиягидаги кўм-кўк қашқарбеда ва айиқтовон япроқларига кўнган енгил шудринг сал шабададан дув тўкилади. Пойафзалингиз намиқади. Сархуш кайфиятдан ўзингизни текик ва бардам хис этасиз.

Чўл сайрининг ўз гашти бор. Тоғлар билан ўралган воҳа, ранг баранг табиатли ажиб ва жозибали ошён тасвирини келтириш анча мушкул. Лекин назаримда чўлники ундан-да қийинроқ. Биринчисида барча узок-якинни, кумуш қорли чўккилар, бинафша ранг ҳарир пардага бурканган даралар, бўз ёки яшил қияликлар манаман деб кўзга ташланниб туради. Қалбингизга яқин гўзал манзарани сайлаб олиб, майин роҳатбахш ҳаяжондан сармаст бўлиб ўтирасиз. Бироқ чўл нафосатини хис этиш учун анчагина машаққат чекишингиз лозим. Ундаги барча гўзаллик бирданига кўзга ташланавермайди. Буни чўл, дейдилар. Чўл!.. Сиз бу сўзни бир-икки марта ўзингизча чўзиб тақрорлассангиз фоят салобатли ва айни пайтда унда юмшоқ серсадо мусиқа, мусиқийлик борлигини пайқаб қоласиз. Сўз акс садо беради. Гўё улкан болға билан қирқкулоқлик дошқозон четларига оҳистагина урасиз-у, ундан тўлқинланиб таралаётган ва бутун оламни сирли гумбури, худудсиз ва нозик садолари билан тўлдираётган бу овоздан ҳайратга тушасиз.

Чўл таърифи-тавсифи ана шу садодан бошланади. Қолган барча гўзаллик, нафосат ана шу поёнсиз сирли олам қучогида яшириниб ётади.

Биз ҳамон йўлдамиз. Энди йироқдаги тепачалар кўзга яққол ташланади.

Қоракир тўқайлари ёниб битгач, ов қилишдан, умуман, дашту қирларда сайёҳ юришдан ихлосим қайтса керак, деб ўйлагандим. Бироқ бу ҳолат қизиқ устида юз берганини кейинчалик сездим. Ов учун яна уфқлар очилди. Энди чўл мен севган қутлуғ масканлардан бири бўлиб қолди. Баъзан чўлда сайр қилиб юриб шундай ўйга толаман: мен ҳаётга келиб, шу бепоён даштнинг гўзаллиги, хуснини кўрмай, шулар ўйғотадиган туйгуларни хис этмай кетсам, барибир, қалбимда амалга ошмаган армон

қоларди. Мен бу оламни ўзим, ўзим кашф этдим. Илгариги тасаввурим энди чўлдек бағри кенг, вазмин ошён манзарала-ри билан бойиди.

Дам олиш кунларининг бирида Рамазонникига келдим. Фозил шу ерда экан. Орадан олти ой чамаси ўтган бўлса-да, сўнгги жудолик ҳамон унинг чехрасига кўланка солиб турарди. У менинг келганимдан анча хурсанд бўлди ва бир вақтлар айтган ваъдасини эслади.

— Вақтингиз бўлса эртага саҳарда чўлга отланамиз, — деди.

Унинг раъйини қайтара олмадим. Ўғилларини Рамазоннинг ўғлига тайинлаб топширди. Биз эрталаб тонгни ҳам кутмасдан намозшомда мотоцикл билан йўлга тушдик. Ярим соатлар чамаси аллақанча йўл босиб, Қизириқ даштида янгидан ўзлаштирилиб, ажиб чирой касб этган бир совхозга кириб келдик. Тунда Ҳаким Норбоев деган кишиникида меҳмон бўлдик. У Фозилнинг тоғаси экан. Ёши олтмишларга бориб қолган, мошгуруч соқоли кузалган, истараси иссиқ бу киши бир вақтлар комсомол ишининг жонкуяри, урушгача чўлда қилинган кўпгина ишларнинг ташаббускори, уруш йилларида район партия қўмитасининг котиби бўлиб ишлаган экан. Эндиликда у янги жамоа хўжалигида бўлим бошлиғи эди. Эртасига чўл бўйлаб қиладиган сафаримизга у ҳам ҳамроҳ бўлажагини айтди.

Эрталаб ҳаво жуда очиқ келди. Биз шуни орзу қилган эдик. Бизни очиқ чехра билан кутиб олган чўл жозибали эди. Унинг қоқ белидан кесиб ўтган асфальт йўлдан машинада кетиб борарканмиз, йироқдаги тоғлар силсиласидан кўз ололмасдим. Чўл билан қўшилиб кетган бу тоғ этакларини ерлик аҳоли Чифатой ёки Чагир дейишаркан. Эскидан тожиклар билан қалин бўлган ҳамроҳимиз эса буни тожиккасига Калод деб аташади, деди.

Чўл билан учрашув. Чўл гўзалликда шунчалар сахийки, уни кўрганда, хис этганда, унга яқинлик сезганда ўзимда кечган туйгуларни нақадар эзгулигидан, баркамоллигидан гарангсиб қоламан. Унинг кенг бағри кеч кузакда ҳам турфа рангда товланади. Жигарранг, пушти, бўзранг бўёқлар, яшил ва қизғиш ранглар билан алмашиниб туради. Заминдаги бағрикенглик, сербўёқ само чиройи билан қўшилишиб кетади.

Кузнинг шаффоф ҳаволи, тиниқ кунида чўл уфқидаги маржон каби терилган серчўқи тоғларни кўриб турардим. Улар ҳам катта карвондек келиб-келиб, чўл уфқида бепоён текисликни кўриб ҳайратдан лол котиб қолгандек эди. Шунда бу кенглик, бу гўзаллик, бу бўёқлар инсонники эканлигини ва буларнинг барчаси инсон қалбидаги минглаб хил жило, садо билан ғулғула уйғотаётганини, шунда инсон мангу ва табиий гўзаллик билан юзма-юз келганини бахтиёр бўлишини, шундагина ўзлигини танишини юрак-

дан сездим... Ана шундай антиқа, ноёб дамлардагина инсон ўзидаги барқарор, нафосатга ўч, ҳамиша эркка мафтун, илҳақ истак, интилишлари борлигига қатый ишонч ҳосил қиласи. У табиатан гўзалликка интилади. Барча гўзалликлар интихоси эса табиатдир. Сиз ҳамиша табиат билан бўлган учрашувдан қувонасиз, ҳар галги учрашув дилингизда узоқ вақт умидбахш хотиралар уйғотади.

Кечкурун Норбоевниги қайтдик. Куёш жанубдан ярим доира ясаб уфқда милтираб кўринаётган Кўхитанг тоғлари сари имиллаб эниб борарди. Унинг тафтсиз нурлари тоғ этакларини қизғиши алвон нурга чулғаган; қияликлар, ўнгирлар, сойлар кўкиш-кул ранг ғуборга чўмган. Шарқ-жанубдан Каттақум тепаликлари икки воҳа — Сурхон ва Шеробод воҳаларини ажратиб турарди. Кумнинг бир учи афтидан, қадимда Корақир тепаликлари билан туташган кўринади. Иккинчи учи нақ Шўрчидаги Шергози даштларигача етиб боради. Норбоевнинг фикрича, Каттақум тепаликларининг узунлиги қарийб юз йигирма чақирим келаркан. Кум билан Бойсун тоғи этаклари оралиғига бирбирининг давоми ҳисобланган Қизириқ, Истара, Бандиҳон, Дашибоз чўллари суқулиб кириб олган. Куёш қип-қизил баркашдек ботиб борар, чўл осмонининг қарийб ярми ва бепоён дашт уфқи аланга ичиде қолгандек эди. Сўнгра куёш уфқдан сал кўтарилиб турган қорамтири булатлар орасига кирди. У иккига бўлинди. Худди қон тўлғазилган биллур шокоса шаклига кирди. Чўл бағридан ғубор кўтарилиб, шарқ томон кул ранг тусга кириб кела бошлади...

Куюқ меҳмондорчиликдан сўнг кўк чой устида гурунг бошланди. Фозил тўрда диванга орқасини тираб ўтиради. У шу пайтда боши берк кўчага кириб қолган, калавасининг учини йўқотган кишига ўхшаб кетарди. Ночор аҳволда қолганини сезиб турган тоғасининг чурқ этмаётганидан баттар мулзам бўларди. Норбоев каштали болишни буқлаб қўлтиғига оларкан, томогини кириб гап бошлади:

— Ҳа, чўлни ҳам айландик, қалай? — Тоға мошгуруч соқолини тараб муғамбirona жилмайди. У куни бўйи камгап бўлиб юрган жиянини обдан кузатаркан, айни пайтда ўз синчковлигини яшириб ўтиришни эп кўрмаганини ҳам сездирди. — Ўйга толиб қолдингиз?

— Шу баҳорда кўчиб келсамми, деб турибман. Илгариги маслаҳатимиз ҳам шундай эди-ку, — Фозилнинг маъсум юзига қон югурди.

— Маслаҳат эсимда, лекин масаланинг бир томони бор, — Тоға, шундай деди-ю, кўнглига туккан масаланинг ўша томонини айтишдан ўзини тийди.

— Нима экан у тоға?

— Ўзинг биласан дөвдим, ҳа, майли, айтай: аёлингни йилини ўтказ, ҳар қалай, қишлоқчилик. Қишлоқдошларинг билан тузу намак бўлгансан. Болаларинг ўқиш йилини тутатсан. Яна бир муҳим нарса бор. — Тоға бошини ҳам қилиб турган Фозилга қаради. — Лекин бунинг ҳозир мавриди ва вақти бўлмаса ҳам билиб кўйганинг яхши. Ўйланишинг керак. Ўйланганда ҳам ўша юртда ўйланиб келишинг керак. Ёш болали одамга чўлда яшаш қийин. Чўлга кўчиб келиб, икки оёғинг бир этикка тиқилиб қолмасин тағин.

— Бундай гап кўнглимда йўқ, — Фозил қизариб кетди.

— Барибир ўйланишинг, керак-да, жиян. Кирган бўлсанг, энди қирқقا киргандирсан. Йигит қирқда қирчиллади, дейишади. Ҳали белинг бақувват... Бу гаплар ҳазил, сен болаларингни ўйла. Ўгай бўлса ҳам уларга она керак. Рўзгорда аёл кишининг фариштаси бўлади... .

Түннинг алламахалида ташқарига чиқдик. Чўлнинг туни ҳам foят дилбар эди. Гўё чўлга юлдузли осмон ял-ял ёниб меҳмон бўлиб келгандек. Юлдузлар чаманига қараб улар орасидан Тарози ва Хулкарни излаб топдим. Фозил уларга боқаркан, бир замонлар шу юлдузларга боққанини ва тенгқурларининг: „Хулкар билан Тарози, бир-биридан норози“, деган нақлини эслади. Биз кўзларимиз билан серюлдуз осмонда сайр қилиб юрдик. Негадир Етти баҳодирнинг кўринмаётганидан ҳайрон бўлдим. Уфқдан йирокларда қорайиб кўринаётган қирлар ортида Олтин қозиқ ялтиради. Демак Етти баҳодир ҳам ўша томонда. Шунда ҳамиша безовта қиласиган бир туйгуни ҳис этдим: биз бир умр шу серюлдуз оламга боқамиз, унга мафтун ва маҳлиё бўламиз, бироқ унга тўймай, тагига етолмай армон билан ўтиб кетамиз.

Тунда Норбоев билан узоқ сухбат қилдим. Негадир бугун эга бўлган чўл ҳақидаги таассуротларимда кемтик жой бордек ва бу кемтикни факат шу, Норбоевгина тўлдира олади, деб ўйлардим.

ОЛТИНЧИ БОБ

Урушгача Дашибоз чўлларида кўплаб қишлоқларни учратишингиз мумкин эди. Улар табиатнинг бу бепоён сийнасига тўшалган гулдор дастурхонлардек яйраб-яшнаб ётарди. Одамлар хотирасида абадул-абад ўчмайдиган, унинг тафаккури, истак ва интилишига зид содир бўлган сўнгги урушнинг машъум панжалари, қора кўланкаси Дашибоз чўлларига ҳам, унинг мовий осмонига ҳам етиб келди. Саҳрои йигитлар фронтга йўл олишар,

кари-картанглар уларни Дашибоз этагидаги ёвшанлар, саксо-вуллар чайқалган Каттақум тепаликлари гача кузатиб боришар, сўнгра изларига қайтишарди. Қавм-қариндош, ёру биродарлар эса йигитларни водийдаги Навшаҳар станциясида охирги марта қучоклаб, узатиб қолишар, кейин, мунғайиб қолган бўзранг чўлга қайтиб келишарди.

Фозил тоғаси Ҳаким Норбоев билан бу йўллардан неча бор юрган. Улар дастлаб Фозилнинг отасини, сўнгра бирин-кетин уч амакисини кузатиб қолишган.

... Фозил бир зум одамлар шовқинидан, фарёдидан бошига тош теккандек гарангсиб қотиб қолди. Поезд вагонлари унинг ёнидан вазмин гурсуллаб ўтиб борар, кўзларини тикиб турган шпаллар кисирлар, пўлат излар темир карвон садоларини қулоқларига келтиради. У поезд орқасидан югурди. Югурди-ю, бир кучоқ сийрак кўкат аралаш нам кумни қучоклаб йиқилди. У ловуллаб ёнаётган юзини шу қумга босди.

— Йўқ! Шунисини ташлаб кетинглар! — деб телбаларча ба-кирди ва яна ўрнидан сакраб туриб чопмоқчи бўлди. Кимдир унинг белбоғидан ушлаб қолди. Бу — тоғаси Норбоев эди... Фозилнинг ёнидан курум босган қизил вагонлар оҳиста сузуб борарди. Бу состав энди унинг ёлғиз тиргаги, акаси Одилни ҳам олиб кетмоқда эди. Бирок қаерга? Қайси манзилга? Буни акаси Одил ҳам, ўн беш яшар Фозил ҳам билмасди....

Урушгача Каттақум орасидан ёлғиз сўқмоқ ўтарди. Урушнинг ўрталарига келиб эса, бу сўқмоқ арава юрадиган каттаги на йўл бўлиб қолди. Бу йўлдан харбийга чақирилганлар, чопарлар, Навшаҳар станциясига буғдой, арпа, пахта ортган аравалар, туялар қатнаб турарди. Чўл бамисоли булокдек қайнарди. Фозил билан Рамазон станцияга аравада ғалла ташишар, сахрои отларни фронтга жўнатиш учун саралашар эди. Кишлокларда эркаклар, уюрларда отлар камайиб кетди. Тоғ дарала-ридан отилиб чикиб, худди чинор илдизидек чўл сийнасига ёйи-либ кетадиган шарқироқ дарё одамларга куч бермай қўйди. Сув уриб кетадиган ариқларга чим босиб улгуриб бўлмайди. Буғдой-зорлар майдони кисқариб борди. Дашибозни шимолдан гарбга кесиб ўтган ариқлар қаровсизликдан қуриди. Одамларнинг яшаш ва кун кечириш тарзи оғирлашди...

Кирқ тўртинчи йилнинг қиши ўтиб борарди. Йўғон чўзилади-ган, ингичка узиладиган бир пайт эди. Кунларнинг бирида Дашибоз қишлоғига бир неча отлик кириб келди. Зироат экилади-ган майдонларни кўздан кечириб юрган дехқонларни қишлоқ марказига тўплашди. Мажлис ўтказиши. Фронтдан оёғи чўлоч бўлиб қайтган раисом котиби Ҳаким Норбоевга сўз берди.

Ҳамиша гапга чечанлиги, ўткир мулоҳазаси билан чўлликлар орасида машҳур бўлган бу йигит дастлаб оломонга қараб олди-ю, нима дейишини билмай, ўзини йўқотиб кўйди. Ахир у хам мана шу кишилар сингари шу ерда туғилиб ўсган. Бу чўл унинг учун қадрдан ва азиз. Энди эса, у бу кишиларга шу юртни тарқ этишни маслаҳат согани келган.

— Биродарлар, ҳукуматимиз, ҳалқимиз сиз, чўлликлардан беҳад миннатдор, — нотиқнинг ҳаяжонли овози янгради. — Сизлар фронт учун нимаики лозим бўлса, ҳаммасини бердингиз. Фаллангиз, пахтангиз, отларингиз ва булардан ҳам азизрок фарзандларингизни бердингиз. Булар лаънати душман устидан ғалаба қозонишимизга катта ёрдам берди. Урушнинг охири кўриниб қолди. Биз энди, ғолибмиз, деб барада айта оламиз. Эндиғи вазифа — омон қолган кексаларимиз, болаларимизни эҳтиёт қилишдан иборат. Булар келажақдаги порлоқ ҳаётимизни қайта тиклайдилар... Биз сизларнинг ҳузурингизга бир маслаҳатли иш билан келганимиз. Ҳукумат кўп томонларни ўйлаб кўриб, сизларни чўлдан серсув, серунум ерларга кўчиришни лозим топди. Тўғри, биродарлар, она юртни ташлаб кетиш жуда оғир. Шунча йил чидаб бердик. Қолганига ҳам чидаймиз, дейишингиз мумкин. Бироқ ҳукуматимиз сиз чўлликларнинг қийналишларингизни истамайди. Ҳозир вазият чигал. Ишга яроқли одамларнинг ҳар бири ҳисобда. Кўплар жанг қилиб юрибди. Бор куч билан эса чўлда тириклилик қилиш қийин. Ҳозирча ҳукумат томонидан ёрдам кутиш ҳам мушкул масала. Шуни унитмангизки, булар вақтинчалик. Биз бугун чўлдан чекинаётган эканмиз, буни ғолибона чекиниш, деб ҳисоблаймиз. Вақти келиб чўлларимиз яна яшнаб кетади. Биз чўлларимизга яна қайтиб келамиз. Келганда ҳам абадий, ташлаб кетмайдиган бўлиб келамиз. Бу шак-шубҳасиз. Ғалабамиз муқаррар бўлганидек, бу ниятимиз ҳам муқаррардир... Маслаҳатимиз шу эди...

Каттакум орқали ўтган йўл одамлар, кўч-кўрон ортган аравалар билан бир ҳафтача гавжум бўлиб турди. Чўлликлар серсув жойларга кўчиб кетишли. Баҳор ёмғирларидан сўнг Каттакумнинг тупроқли йўлларида тўкилган буғдой ва арпа майсалари униб чиқди. Чўл урушдан кейин бўтадай бўзлаган, сўнгги пушти паноҳидан ажралган, мислсиз жабр-ситам ва ғам-кулфатлардан қадди букилган мингларча оиласаларнинг бири каби мунғайиб қолди...

Уруш тугади. Жароҳатланган ер тин олди. Фозил улғайди. Норбоев кексайди. Фозил ҳарбий хизматга чақирилди. Отаси, амакилар, акаси қон кечиб, жон бериб-жон олиб ўтган муборак йўлларини у ҳам кўриб қайтди. Ватан бепоён ва улуғвор эди.... Фозил армиядан қайтгач, Назокатга уйланди. Болача-

қали бўлди. Умр — оқар дарё. Вақт тез ўтади. Фозил отасига қиёс қилиб мўйлов қўйди. У дастлаб онасини, сўнгра севиб олган Назокатини Такя ота қабристонига қўйди. Энди узок қиш тунларида ўғилларини ёнига олиб, ўтмиш, қалбida ўчмас из қолдирган қадрдан кишилар ҳақида ҳикоя қилиб берар ва улар хотирасини эслаш билан овнарди.

ЕТТИНЧИ БОБ

Чўлда ов қилиб юрадим. Ўшанда куз илиқ келиб, жанубда узок туриб қолди. Кунлар чунонам исиб бердики, ҳатто бепоён чўлнинг тақир юзасида ҳам майсалар, яшил кўкатлар униб чиқди. Эсимда, ўша йили чўлда сарик гул, эгик қирмизи ер чойи, бинафшалар, баҳорда нам ерларда қордек оппоқ намат янглиғ товланувчи оқ ханталлар чунонам гулладики, табиатдаги бу үйғонишни кўриб, куздан сўнг баҳор бошланиб кетди, деб ўйлагингиз келарди. Бир йилда иккинчи бор гуллаган бу нимжон, заиф ўсимлик айниқса кўзга иссиқ кўринарди. Кеч кузда эмас, илк баҳорда фусункор чўл узра кетиб бораётгандек сезарди киши ўзини.

Ўшанда ҳаётнинг ҳам бағри шу чўл каби кенг, чигал ва мураккаб томонлари кўп экан-да, деб ўйладим. Унда ҳам чўлдагидек ҳар хил манзаралар: ғамгинлик ва маъюслик, жилва ва шодлик, тонг ва шом, жудолик ва баҳтиёрлик, ожизлик ва куч-кудратни кўрасиз. Инсонгагина хос бу азалий нарсалар унинг бағрига жо бўлади. Ҳаммаси қоришиб бир-бири билан боғланиб кетаверади. Ҳар биримиз шу қудратли ҳаёт салобатини, ҳар нарсага қодир кудратини, унинг мураккаблигини идрок этган заҳотимизоқ кўпгина ташвишларимизнинг ўткинчи эканлигини, баъзида эса, шу ташвишлар амрига бўйсуниб, ўзимизни беҳудага уринтириб юришимизни тушуниб қоламиз. Ҳаёт — инсон учун улуг кечув. Кечув эса ҳадисираш, кўркув, жонсараклик, зўр бериб қирғоққа интилиш, бу йўлдаги мashaққат, хузур-ҳаловатдан иборат. Ҳаёт дарёсига от солган киши ора йўлда қолмайди. У ўзидан илгариги ўзи қатори ва ўзидан кейин келадиган авлодларга хос оддий ҳаётий зиналарни босиб ўтади. Ўз қурби, имконига яраша ташвиш чекади, жон койитади. Ниҳоят буларнинг ҳаммаси инсон умрининг безаклари бўлмиш — оила, рўзгор, бола-чака, одамгарчилик, яхши турмуш куриб, саодатга эришишга хизмат қиласди.

Фозил ҳам шу азалий зиналарни босиб келарди. Бироқ тақдир унинг елкасига оғирроқ юқ қўйди. Уруш, отасизлик, сағирлик, муҳтоҷлик, туғишганлардан жудо бўлиш, тақдир ато қилган зарбаларга бардошли бўлиш, унга карши заифона исён,

қамоқ, ўз кўли билан қурган ҳаёт меваларини кўргандаги баҳтиёрлик, оила ва фарзанд, яна жудолик, қалбидагитмас-туганмас армонлар. Баъзан шуларни кўз олдимдан ўтказарканман, хаёлга толаман. Бунчалик чўнг юк бир авлодга оғирлик қилмасмикан? Дарҳакиқат, бир қараганда, бу баҳтсизликлар уни тамом қилиши керак эди. Лекин ҳаётнинг яна бир қонуни бор: яшамоқ учун курашмоқ, енгмоқ ва инсоний куч-кудратга ишонмоқ керак. Тарозининг икки палласида турган бу икки ҳакиқат пировардида сўнгисининг зафари билан тугайди. Бардош, сабрканоат ҳаёт тантанасига олиб келади. Бу ҳаётий ҳакиқат бир карра яшаб ўтадиган кишини кулфат ва ғам-андухлар юки билан яшамасликка, қаддини ростлашга ва ғолиб ҳаёт умиди билан яшашга чорлайди.

Фозилни тутиб турадиган илинжлар ҳам ҳали тугаб битмаган. Аксинча энди куртак ота бошлаган. Ана шу куртакларни кечмиш ҳаёт жабрларига қарши қўйиши лозим. У фарзандлари тақдирини ўйлади. Ҳаётдаги шу тиргаклари учун яшайди. Уларнинг баҳтиёр бўлиб вояга етишларида барча армонларининг ювилиб кетажагини бутун вужуди билан ҳис этади.

Орадан яна бир йил ўтди. Фозил вазмин бўлиб қолди. Дастрраб учратган пайтимда сезган қувлик, асабийлик, кек, одамларнинг бўлар-бўлмас гап-сўзларига аралашиб, улардан таъсирланиш аломатларидан асар ҳам қолмади. Катта ўғли Комил (отасининг исмими қўйган эди) учинчи синфда ўқир, кенжаси эса янги ўқув йилида мактабга боришга тайёргарлик кўриб юрарди. Болалар тез улғайиб борарди. Бу ҳол Фозилни ташвишга солмасдан қолмасди. У дастрраб уйланишдан тамоман воз кечган бўлса-да, кейин тоғаси Ҳаким Норбоевнинг маслаҳатларини тез-тез эслайдиган бўлдиб қолди. Бунинг устига қишлоқдаги дўсту биродар, қавм-қариндош уни ўз ҳолига қўймади. Ҳеч бўлмаганда болаларингни ўйлагин, уларнинг кийимбоши, кир-чир, қозон-товок, уй-рўзгор, келим-кетим ишлари хотинсиз бўлмайди, дейишиди. Кейинги пайтларда буни ўзи ҳам сеза бошлади. Фозилга қишлоқдан бир тул аёл топишганда, у бу таклифни рад этди. Негадир таниш аёлларга унинг юраги бетламасди.

Рамазон шаҳарга товук топширгани келганда мени ўз ниятидан хабардор қилди. У шаҳардан бир хотин топган ва шуни Фозилга олиб бермоқчи экан. Сизнинг мавқеингиз бор, деб масалага мени ҳам жалб қилди. Ўша куни чўлдан Ҳаким Норбоев келди. Учаламиз бирга совчиликка бордик. Аёлнинг акалари бу гапдан хабардор эканлар, биз қарши эмасмиз, факат синглимизнинг розилигини олингизлар, дейишиди. Аёл эса, бўлаҗак Эрини кўриш истаги борлигини билдириди.

Келаси дам олиш куни бир ҳовлига кириб бордик. Ёши ўттизлардан ошган, чап кўзи сал қисиқ, юзлари лўппи, қорамагиз, истараси иссиқ, уятчан жувон бизни икки хонали пастак уйга бошлаб кирди. Хона топ-тоза, яраклаб турган деразалардаги тўр пардалар яп-янги. Хонадаги аллақандай таниш ҳид димоқни қитиклайди. Биз хонтахта атрофида аччиқ кўк чой ичиб ўтирадик. Жувон юмуш билан ҳовлига чиқиб кетгач, Рамазон Фозилга қаради-да:

— Бундай чиройингизни очиброк ўтиринг, — деди.

— Биз қаерга келиб қолдик? — сўради хомуш ва айни пайтда ҳайрон бўлиб ўтирган Фозил. Рамазон менга кўз қисди:

— Биз тўйдан бурун ногора қоқмайлик, деб сизга хеч нарсани билдирамовдик. Жувонга яхшилаб қараб олинг. Ана, келаяпти... — Рамазон пиёлани лабига олиб борди.

Жувон товук шўрва келтиргач, ўзи ҳам хонтахтанинг четига чўқди. Косадаги шўрвага ёғоч қошиқ солиб айлантириб ўтириди.

— Шўрвангиз жуда мазали бўпти, — деди Рамазон юпқа нонни гулдор косадаги шўрвага ботиаркан.

— Мастира, қизингиз кўринмайди? — сўради Рамазон

— Муслимами? Боғчада. Бугун душанба, биз дам оламиз. Олиб қолсам бўлар эди-ю, кир-чир ювмоқчи эдим, халақит бермасин, дедим.

Мастира шундай деди-ю, уялиб, бошини эгиб, чакагига тушиб турган қора зулфини қулогининг устига қистириб қўйди.

— Яхши, — деди Рамазон овқат еб бўлиб орқага тисариларкан. — Бу киши, фаҳмлагандирсиз, Фозилбой. Мен сизга айтиб юргандим-ку.

Жувон бошини баттар эгди. Орага жимлик чўқди.

— Бугун шаҳарга олиб чиқсан эдим томоша қилдиргани, — давом этди Рамазон узоқ чўзилган жимликка барҳам бериб. — Йўл-йўлакай ўтаётуб, хабар олайлик, деб кирган эдик. — У чети каштали оппоқ сочиққа қўл артаркан: — Энди малол келмаса, биз турайлик, — деди.

— Қайтасизлар-да, сал ўтирингизлар, — жувон мулойим овоз билан гапирди.

— Фозилбой магазинларга кириб болаларига у-бу нарса олмокчи эди. Ёпилиб қолмай чиқайлик, девдик.

— Ундей бўлса хуш келибсизлар. Шаҳар тушганларингизда келиб-кетиб турингизлар...

— Албатта, бундан кейин келавериб, безор ҳам қилиб юборамиз.

Жувон кулиб ўрнидан турди. Даҳлиздаги офтобани олиб таш-қарига чиқди. Қўлимизни илиқ сувда чайдириб бўлиб, бизни

кўчагача кузатиб қўйди. Рамазон ортда қолиб, жувон билан ни-
маларнидир гаплашди. Биз, Фозил иккимиз уни муюлишда ку-
тиб турдик. Фозил шу дамда тетик ва дилгир эди. Рамазон етиб
келгач, унга сўз қотди:

— Бу аёл ким бўлди?

— Маства... Абдураҳмон деган ошнам бор-ку, ўшанинг синг-
лиси. Акаси билан бир ошхонада ишлайди. Овқатга уста, сипо
аёл. Кўрдингиз-ку.

— Эри йўқми?

— Эрсиз. Бир кизи бор, бир аҳмок шофёр ярим йилча ола-
ман деб юриб, ҳомиладор бўлгандан сўнг ташлаб кетган. Ака-
лари йигитни топишди ҳам. Роса тўполон бўлди. Акалари, йи-
гитни йўқ қиласиз, дейишувди, қочди-кетди... Биз борган ҳовли
биқинидаги ҳовли акасиники... Лекин озода, саришта-саран-
жом хотин. Бир мўлжалим бор эди...

— Тушундим, — деди маъюсланиб Фозил.

— Кўрсам, деганди сизни. Шунинг учун олиб келувдим. Ҳали
орқада қолиб гаплашдик-ку, қалай десам, яна бир ҳафтача ўйлаб
кўрай, деди.

— Акалари нима дейишаркан? — Фозил шундай деди-ю,
мийигида қулиб қўйди.

— Акаларининг кўнглига қўл солиб кўрганмиз. Ихтиёр синг-
лиминг ўзида, дейишди. Шунинг учун ҳам сингиллари ихтиё-
рига ҳавола қилишди... Қалай, қовурғангизга ўтирдими?

Фозил қоши ва елкасини учирди.

САККИЗИНЧИ БОБ

Одмигина тўй бўлиб ўтди. Мен тўйда қатнаша олмадим. Тўйдан
кейин — ёз кунларининг бирида чошгоҳ маҳали Фозилнинг ўйига
кириб бордим. У эски дағал матодан тикилган, ранги ўчиб кетган
шимнинг почаларини тиззасигача қайириб, хандақда майкачан
лой тепарди. Менинг келишимни кутмаган экан, аввал ҳангуманг
бўлиб қолди, кейин чехраси очилиб кетди. Лой, терлаган билаги-
ни узатаркан:

— Кўллар лой эди, кечирасиз-да, — деди иккинчи енги билан
пешанасини артаркан. — Югур, знангга айт, меҳмон келди,
чой дамласин, — Фозил ёнидаги кесилган тимқора соchlари
бўйнига тушиб турган қизчага гапирди. — Қаранг, сизни ҳам
кўрар кун бор экан-а. Эшитдим Рамазондан, Тошкентга кетган
экансиз. Ҳа, борган жойларингиз тинчмикан?.. Баракалла. Шу,
сизга ҳавасим келади, кўп юрасиз. Одам ўзи кўп юриши керак
екан. Ўладиган дунёда кўриб қолганинг маъқул-да. — Бир оздан

сўнг у урилган пахса деворнинг четига бориб қичқирди. — Ко-
мил, ҳой Комил! Югур, Рамазон бобонгни чақириб кел. Мехмон
келди де... Шундай денг. Раҳмат сизга. Эслаб-эслаб турсиз.
Биз энди бир жойда қоккан қозикқа ўхшаб қолдик, шекилли. Ёни-
мизда турган шаҳарга ҳам ойда-йилда бир борамиз.

Фозил ариқ сувига юз-қўлларини ювиб, қизча келтирган ка-
так кўйлакни кийди. Шимиға ёпишиб қолган лойни тирнаб че-
таркан, кулиб гап қотди:

— Шундай қилиб, биз ҳам қариган чоғда яна янги рўзғор қил-
дик.

— Ундей деманг. Уят бўлади. Ҳали сизнинг кучингиз ўнта
йигитга тенг келади, — дедим.

— Кўнглимни кўтарасиз-да. Раҳмат... Мана, ишлаб юриб-
миз. Ўтган йили бошлаган эдим. Баъзилар кўриб, бу, Фозил-
бой, кўлингиз ишга бормай қолди, жуда ҳафсалали одам эдин-
гиз, деб уялтиришди. Ўзим ҳам чўкиб қолганимни сездим. Ба-
ҳорда ёмғир бир пахсасини ювиб кетибди. Бу йил қайтадан
кўтараман. Ўйлаб кўрсам, бўлмайдиганга ўхшайди. Одам бир
кун яшаса ҳам, бир ой яшаса ҳам одамга ўхшаб яшаши керак-
да. Шартта қишлоқдан кўчиб чиқдим. Курилишнинг бошида
бўлмасангиз битмас экан. Оз вакт қолди. Насиб қилса, қишига
қолмай, янги уйга кўчиб кирамиз.

Кейинги тўрт йил ичидагина бўй чўзиб қолган толлар
тагига жой қилишди. Тол тагидан катта ариқ суви жимиб оқиб
ётарди. Ариқ сатҳи, толлар тагидан ғир-ғир шабада эсади.

Томорқанинг этагида Рамазоннинг қораси кўринди. У узоқ-
дан гапириниб келарди:

— Айтмоғдимми, сизга, Тошкентдан қайтишлари билан кела-
дилар, деб. Айтганимдай бўлдими? Валийлик қилсан ҳам бўла-
ди... — Рамазон мен билан кўришиб-сўрашиб бўлгач, кир кўйла-
гининг тумаларини ечди. — Қани, энди бу кишининг улушини
чиқаринг.

— Жоним билан. Ҳозир-да. — Фозил ўрнидан туриб кетди. Ра-
мазон унга эргашди. Улар уй ортига ўтишди. Ўша томондан
тўқлининг маърагани эшитилди. Гулдор сатин кўйлак кийган
аёл юзини гарди рўмолнинг уни билан бекитганича бир челак
сув ва каттакон сирланган товоқ кўтариб, эркаклар томонга
кетди.

Мен ёнимда жимиб, сўнгра эса толлардан сал ўтиб, дам-
бадам шовуллаб пастга кўйилганда мингларча нукра томчилар
сачратиб, кўпирис, яна шитоб билан ўйноқлаб оқаётган ариқ
сувига боқиб ўтирадим.

Рамазон ёғоч товоқда чалоп ва йўл-йўл тик дастурхон кўта-
риб келиб қолди.

— Кўрдингизми, иши юришиб кетди. Уйланганига икки ой бўлаяпти, кўли ишдан бўшамайди. Хайрон қоламан, ўзи кичкина одам-у девдай кучи бор... Чалопдан олинг, иссиқни қайтарида. — У қулайроқ ўрнашиб олиб, оппоқ сўлқилдоқ нонни ушата бошлади. — Ўзиям уйлангунча тўксон тўккиз хаёлга борди. Бошидан ёмон кунни кўп ўтказган одам ҳар нарсадан ҳадиксирайверади. Бирон ишга юраги дов бермайдиган бўлиб қолади... Ўғилларига қаранг. — Рамазон пахса девор ёнида лой эшиб, уйча ясаётган ўғил ва қизчани кўрсатиб давом этди. — Одам сиёғига кириб қолишиди. Уйда хотин бўлмаса эркакнинг шўри қурийди. Хотин бор — эркак тирик. Бизда ҳам бирори бор. Ўша бор экан болаларни, рўзгорни шунча, — у чимчалоғининг учини кўрсатди, — ўйламайман.

— Фозилнинг бу ерда кимлари бор? — сўрадим.

— Иккитами, учтами бўласи бор... Ха, қишлоқда туришади. Тогасини танийсиз — чўлда. Биз дўстмиз. Ёшлигимизда оталимиз тўн ёпишиб дўстлаширишган... Фозил хотини ўлгандан кейин чўлга кетаман, деб туриб олди. Буни-ку, асли чўл енгади. Мен, ҳали болаларинг ёш, сал улғайсин, суяги қотсин, токи тирик жонсан, биронтага уйлангин, дедим. Бундай яхши жойларни ташлаб болаларинг билан хотинсиз чўлда нима иш қилардинг. Ҳам ўзинг сарсон, ҳам болаларинг саргардон. Чўлга бориши қочмайди. Эшитишимча, бизнинг эски юртимиизда ҳам янги совхоз курилармиш. Чўлнинг юкорисидан катта канал ўтаяпти. Ишлар бир ёқлик бўлсин, кейин кўчасан, биз ҳам ота юртга қўчамиз, дедим... Бир бало қилиб кўндиридим. Мана, икковининг бошини биректиридик. Хотини меҳрибон, ўзига ўхшаган мўмин-қобил, меҳнаткаш. Ишқилиб, яхши яшашса, биз ҳам хурсандмиз-да. Колхоз уй курсанг тахта-махта деган материал берамиз, девди, уйни қура бошлади. Кечасиям тинмайди. Ана у полизни кўраялпизми? Ит билан шақалдан қўриклаб чиқади.

Мен бир чети паҳтазорга тулашиб кеттан ковун-тарвуз пушталаriga қарадим. Йироқларда Корақирнинг жазира маҳалла тафтидан жизғанаги чиқиб ётган яланғоч ўркачлари хилват кўлни ёдимга солди.

Ўтган йили райондаги раҳбарлар Фозилга фидиракли мотоцикл мукофотга беришиди. Колхозга хизмати сингган-да, олмайман, керак эмас, одамлар тағин гап қилиб юрмасин, дейди. Ҳукумат бундай нарсаларни ҳаммага ҳам беравермайди. Сенга лозим топибдими — ол. Агар олмасанг, биринчидан, катталарнинг назаридан қоласан, иккинчидан, одамлар кейин гап қилишади, ҳа, фалончи каттароғига, тўрт фидираклигига умид қилган экан-да, ху, баччагар, дейишади, деб роса гап билан олдим. Ахир, мотоцикл — рўзғорга улов. Бир кунмас-бир кун

коримиизга яраб қолади. Қайноғаси — Абдураҳмонникига бориб-келиб турдим. Ҳар минганды, ўшанда түғри айтган экансиз, дейди. — Рамазон дүсти түғрисида завқ-шавқ билан гапиради. Фозилнинг ҳаётидаги бу янгиликлар дүстиники эмас, балки ўзиникидек қувонарди.

Ёшлик йиллари уруш даврларига түғри келган ёшларнинг қобил ва мўминлиги, тенгқурларига оташин меҳри, яхши-ёмон кунларга сабр-тоқат билан қаноат қилиши, ҳаётдан ҳеч қачон зорланмаслик каби хислатлари мени ҳамиши ҳайратга солади. Уларга ихлосим ошиб боради. Назаримда, ёшлигига кечириши лозим бўлган болаликка хос беозор туйғуларини ўша оғир йилларда эҳтиёт-лаб сақлашган-у, эндиликда фурсат келиб, бу хазина эшикларни очишгандек туюлади. Шу галги сұхбатимда ҳам ана шу мулоҳазаларга бордим. Бу авлод билан ҳаётга келиб, кўпгина сабабларга кўра бир умр баҳтсиз бўлиб кетишига ишонмаслик, ҳеч бўлмаганданда бу баҳтнинг бир жилмайиб боқишига умидвор бўлишини кўнглимга соларди. Ҳар қалай, унинг илик табассумидан Фозил ҳам баҳраманд бўла бошлаган эди. Рамазоннинг иши зарур бўлганлиги учун кетиб қолди.

Мени Фозилнинг ўзи Қорақирнинг этагигача кузатиб келди.

— Ҳаммаси ўтар экан-да? — деди у бехосдан, — бугун негадир сизни кўриб кўнглим яйраб кетди. Уйимдан хурсанд бўлиб чиқиб кетаяпсиз... — Фозилнинг овози ҳаяжонли эди, — яхши-ёмон кунлар ҳам ўтар экан. Мен сизга бир нарсани айтайн: биринчи хотинимга жуда меҳр кўйгандим. У ўлиб кетса ҳолим не кечади, деб ўйлардим. Ўзиям кўп қийинчиликлар билан одам бўлган эди. Ҳеч бўлмаса, менинг кўлимдада сал ярасин, дердим. Назокат ўлди-кетди. Мана, мен тирик қолиб яшаб юрибман... Одам ҳаммасига кўнишиб кетаверар экан. Баъзан ўтириб олиб, унинг ўлимини ўзим тезлаштиридимми, деган хаёлларга бораман. Ахир, мен аҳмоқлик қилиб қамалиб кетдим. Бундай бўлади, деб ўйламагандим. Қамоқнинг иснодини эндиGINA тушунаяпман. Бечора номусига чидай олмади-да. Агар шуни ўйласам, юрагимда қолган бир тугун нафасимни бўғаверади. Мен тентак бўлмасам, Олтибойга ўшаган гийбатчиларнинг гапини гап деб юраманим... Ўтган ишга салавот. Қамоқ менинг кўзимни очди. Ҳаётнинг қадрини ўша ерда тушундим. Яна бир томони ёмон бўлдики, чўлда ўсганлигимнинг азобини шунда тортдим. Кўзимни юмсан, чўлни кўраман. Қорнимни ёришгандада умидни уздим ҳам. Кўриш насиб қиласмикан, дейман. Шунча машақкатли кунларни бошимдан кечирганигимни унутиб кўйганим учун ҳам шундай бўлди. Ана шуларни ўйлайман-да: ҳаёт бизнинг эркалигимизни кўтармайди ҳам, кечирмайди ҳам. Биз эркалик қилсак, кўпол ва дағал бўлиб чиқади. Қовушмай-

ди. Назокатнинг ўлимидан сўнг ўзимни ўнглаб ололмасам керак, деб ўйлардим... Ҳозир бирмунча яхши. Шуни тушунаманда, ўзимга ўзим: — ҳаёт бир мартағина сенга кулиб қаради, сен эса дунё теккан тентакдек, босар-тусарингни билмай, талтай-иб кетдинг, дейман. Бунинг ўрнига унинг қадрига етмаганим учун ҳам уни бой бериб кўйдим-да. Энди буёғини эҳтиёт қилиш керак. Борига шукур. Бўлмаса ҳолим хароб бўлади. Рамазоннинг яхши бир гапи бор: бир замонлар Дашибозда ҳовузга ўрнатилган чархпалак бўларди. Рамазон ҳаётни шунга ўҳшатади. Ишқилиб, ҳозирча ғилдирагимиз айланиб турибди. Бир кун келиб, иплари чириган кўзачамиз шалп этиб тушади. Мен ҳаммасига кўнникканим сингари, болаларим ҳам менинг йўқлигимга кўнишишади. Ҳаёт қонунида шундай ёэзилган. Кейин ўзларининг ташвиши билан бўлиб кетишади. Қаноат қилсак, шу кунларга шукур қилсак, болаларимиз баҳтига ҳам шерик бўламиз... Бунга ишонаман. Айтмоқчи бўлган гапим шуки, ҳозир кўзачамиз сувга тўлиқ, зироатимиз кўкариб турибди... Ҳозир ёлғиз бир хаёл билан яшаб юрибман. Чўлга кўчсам. Хотинимнинг фикрини билувдим, у ҳам рози. Кейин ҳаммаси бошқача бўлади.

Фозил Қорақир ўнгирида туриб, ортга қаради. Олис қирлар ортида чўл ястаниб ётар, унинг уфқларини кўз илғай олмасди.

Бу бизнинг Фозил билан Қорақирдаги сўнгги учрашувимиз эди.

ТЎҚКИЗИНЧИ БОБ

Илк баҳорда Қорақир тарафларга йўлим тушиб қолди. Эски танишларимдан хабар олай, деб Рамазонниги бурилдим. У менга Фозилнинг Дашибозга кўчиб кетганлигини ва сув айргичда мироб бўлиб ишлаётганини айтди. Ростини айтсам, бу хабарни эшитиб, аввал дилим синиққанини сездим, Сўнгра эса, негадир хурсанд бўлиб кетдим.

Рамазон билан чўлга отландик. Мен ҳаяжонланар эдим. Сахрои одам бўлмасам ҳам, кейинги йилларда шу танишларим, турли ривоятлар, кечмишлар туфайли чўлни, унинг вазминлигини, салобатини яна ҳам кучлироқ севиб қолган эдим. Жануб чўллари ҳамиша инсон билан ҳамнафас яшаган. Чўл сийнасида кўплаб паст-баланд тепаликларга дуч келасиз. Булар худди баҳорги момақалдироқдан сўнг ер ёриб чиқкан кўзиқоринларга ўҳшаб кетади. Бу обидаларнинг баъзилари, олимларнинг тахминича, Миср эхромлари билан тенгдош. Бир вақтлар Фозилнинг тоғаси Норбоев билан чўлни кезиб юриб, Такя қишлоғи

харобалари устидан чиқиб қолганимизни эслайман. Бу қишлоқ Қизириқ чўлининг кун ботиш томонида. Тифиз гувала уйлар, кўраларнинг ўринларигина қолган. Харобазор ўртасида танаси эгри-буғри, худди чол қаддига ўҳшаб, букик бир жуфт тут қаққайиб туради. Шу каби тут Такя ота қабристонида ҳам бор эди. Эски қабрлар устида мармар тошлар узала ташланган. Уларда арабча ёзувлар. Мен Дашибозда яна бир кўхна харобани ва номи унитилган қабристонни кўрганман. Унинг четида ҳам тут бор эди.

Яна бир воқеа ёдимда. Қизириқ чўли. На дарахт, на бирон иморат кўзга чалинади. Теп-текис бўз дала. Яқиндагина қазилган ва икки четига тупроқлар чош-чош қилиб уюб ташланган зовур. Ёнида ўтов кўринади. Худди осмондан тушгандек етмишларни коралаб қолган бир чол ўтов ёнида кетмон чопади. Чол билан пушта устида ўтириб гурунглашаман. Бир умр чўл муҳаббатини тарк этмапти. У ҳам чекинган. Чўл этагига кетган. Бироқ ҳамиша чўл кўз ўнгидаги бўлган. Унинг юzlари, қадоқ, бўғин-бўғин бўлиб ажралиб кетган панжалари мўмиёнинг рангига ўхшарди. Соқоли ҳам негадир чўлга мослангандек сарғайиб кетган. Унга қараб туриб, бу чолнинг она қорнидан эмас, балки шу бўз чўл қаъридан чиқкан, деб ўйлардим. Бошқа жойларга кўчиб кетмасдан шу ерда қолишингизга нима мажбур қилди, ахир дунё кенг, деганимда чол юзимга боқиб туриб, анча сукутдан сўнг қўлини чўлнинг жануби-гарбига чўзиб:

— Ўша томонда Такя ота деган кўхна қабристон бор, — деди. — Бобокалонимиз Такя деган киши ўлаётib васият қилган эканлар: жасадимни тяга орtingлар, ўлган жисмим билан сўнгги марта шу чўлни томоша қилиб қолай. Ўзларинг тяянинг ортидан бора-веринглар, тя қаерга чўкса, ўша ерга мени кўминглар. Тя ана шу ерга келиб чўккан. Бу ерда бир замонлар катта қишлоқ бўларди. Бу чўлу биёбон эса, ота-боболаримизнинг мулки эди. Улар ҳозир Такя отада. Уруғлари ётган қабристонни, юртни ёлғиз қолдириб бўлмайди. Бу гап эскидан бор. Бўлмаса, уруғдан ҳеч нарса қолмайди, тўзиб кетади. Кимдир буларни асрashi керак-ку...

Тарихда эса, Такяга ўхшаш қишлоқлар кўп бўлган. Тириклар ҳам, ўликлар ҳам шу бўз тупрокни кўзларига суртганлар. Шуларни эсларканман, бу кутлуғ хотиралар, обидалар, манзараларсиз чўлни тасаввур этиш гуноҳ эканлигига тан берганман. Аждодларнинг аслий жароҳатлари, муборак излари, орзулари бепоён чўлларимизда марвариддек тирқираб сочилиб ётган қадимий манзилгоҳларни эслаб-эслаб қўйиш ҳам қарз, ҳам фарз эканлигини, уларнинг армонлари, курашлари замонамиз кишиларига куч ва илҳом бағишлишини хис этганман.

Мотоцикл теп-текис асфальт йўлда қушдай учиб борарди. Қизириқ ва Истара чўллари ари уясидек гувуллар, бир хил тўртбурчак карталарда тракторлар тириллар, янги уйлар ёнида Тожикистондан кўчиб келган талай собиқ истараликлар ғимирлаб юришарди. Бу гапни магазинга совға-салом олгани кирган Рамазон топиб келди. Йўл четида қатор юқ машиналарида кўч-кўронлар. Бироқ чўлнинг ниҳояси кўринмасди. Биз чўлнинг ўзлаштирилган жойларидан анча узоқлашиб, яйдоқ даштга чиқиб олдик. Бу Даشتигознинг бошланиши эди. Уфқда шимолдан ғарбга улкан канал ўзани узала тушиб ётарди. Сув айиргичнинг темирлари, дарвозалари элас-элас кўзга чалинади. Ундан нарида вагон ва кийгиз ёпилган ўтовга кўз тикканимда туйгуларим равшан тортди. Шунда хозир ва илгарилари руҳимни банд этган ҳиссиёт аланга олди. Барча излар, ўйлар, хаёллар заҳматкаш инсон манзилига олиб келарди. Одам ва чўл. Бундан чўлнинг ёввойи ҳусн-чиройига бирданига мазмун кўшиладигандек бўлиб кетди. Шунда бу тарихий обидалар, хотиралар ва табиий нафосатга меҳнат жарангни етишмай турганини, энди эса, бу ҳаётбахш уйғунлик олам-олам шодлик манбаи бўлиб қолажагини юрак-юракдан пайқадим. Ҳаётнинг мангу узилмас ҳалқалари яна бирлашган эди.

Фозил бизнинг келишимиздан ўзида йўқ хурсанд бўлди. Биз борган пайтда Фозилнинг хотини янги тандир кураётган экан. Рамазон унинг кўлидан ишини олди. Ҳаш-паш дегунча тандирни ўрнатишиди, сувашди ва олов қўйиб юборишиди. Тандир оғзидан қора тутун аралаш аланга гувуллаб чиқар, сиртидан эса, оппоқ буф кўтарилаар эди.

— Шунча вақт қандай тириклилик ўтказдиларинг, — деди Рамазон юзини бужмайтириб туриб ўзи касов билан тандирдаги чўгни ағдарар экан.

— Тандир бор эди. Кургур буқача ўтган куни шохлаб, нурагиб ташлапти. Кеча тоғамникидан машинага босиб олиб келдим бунисини, — деди кулиб Фозил.

Ҳазил-хузул билан кеч бўлганини ҳам билмай қолибмиз. Кеч-курун Ҳаким Норбоев келиб қолди. У гурунг орасида бу йил паҳта экаётганини айтди. Суҳбатимиз ярим тунгача давом этди. Бир маҳал қўшни вагончадан чақалоқнинг инга-ингаси эши-тилди. Фозил уялиб бошини эгди. Қиз кўрипти.

Ухлай олмадим. Хилват чўл узра кезиб юрган тун шамолининг бир пасайиб, бир сусайиб, бир кучайиб гувуллашини эшлиб ётдим. Шамол ниҳоят очиқ қолган чий эшиқдан ўтов ичига мўрадади. Хонтахта устидаги газета парчасини шилдиратди, лапма чироқ пирпиради. Бу шамол шунчалик соғ ва эрка, шунчалар сирли ва ёқимли эдики, мафтун бўлиб, чий эшикни ҳаёлимга ҳам келтирмапман. Йирокларда туни билан чигирткалар чирил-

лади. Шунда Фозилга ҳавасим келаётганини пайқадим. У шу ерда туғилган эди. Шу ерга қайтиб келишни яна бир умр орзу қилди. Бунинг бошига кулфатлар тушган кезларда йирокларда ястаниб ётган шу поёнсиз кекса юртни эслаб, кўнгли таскин топди... Бугун у яна шу ерда. Яна илдиз отади. Шу заминдан куч олади. У орзусига эришди. Илҳаклик, изтироблар билан эришди. Энди у шу орзу — чўл жисмига сингиб кетади.

Кечаси аллақандай самовий шарпалардан чўчиб уйғондим. Овозлар шимолга учиб кетаётган ёввойи ўрдаклар, ғозларники эди. Фозил мироблик қилаётган сув айирғич ёнидаги тепалик ортида катта, сунъий қўналға бор. Бу ерда чўлнинг шимолидан ўтган канал сувларининг лойқаси тинади. Сув айирғичда так-симлангач, бетон ариқлар билан жанубдаги янги совхозлар томон оқиб кетади. Тонг саҳарда ана шу қўналға бўйидаги ёш қамишлар орасида писиб туриб ов қилгим келиб кетди. Афсуски, милтиғим ёнимда эмасди...

ЎНИНЧИ БОБ

Мана, ниҳоят, манзилга ҳам яқинлашиб қолдик. Кўриниб турган ана шу тепаликни айланиб ўтсан Фозилнинг макони кўринади. Кўхна ариқ қирғоғидаги турли-туман ўт-ўланлар орасидан биз тарафга ел эсаяпти. Ариқ ёнида йўл. Унда ҳеч кимса кўринмайди. Жанубда бир нарса йўлни чангитиб, кесиб ўтди. Нима экан у? Эҳ-ҳа! Туяқорин. Шамол билан яшинмачоқ ўйнаяпти. Ана у яшил кўкатлар устидан думалаб бормоқда. Бир қуш ўтлар орасидан кўтарилди. У хавфдан яширинмоқчи бўлиб ўзини жинғилзорга урди. Бу ғалати қушни туркманлар хўжасавдогар дейди. Туси кул ранг, пешанасида қора доғи бор, қора думли бу қуш аслида саксовул тўргайи. Ана, бута тагида бикиниб ухлаб ётган семиз кул ранг қуён шитир-шитир овоздан чўчиб, бosh кўтарди. Қаранг, у гап нимадалигини билмасданоқ ура қочди. Ўтлар, қуриган янтоқ, ковул, шувоклар устидан диркиллаб сакраб бораяпти. Шўрлик югуриб-югуриб тўхтади. Ортидаги шарпага қаради. Туяқорин битта бутага илашиб, тўхтаб қолган эди, қуён ҳафсаласи пир бўлиб бекорга ҳовлиқчанини сезди. Диккайган қулоқлари осилиб тушди.

Йирокларда, тоғли уфқ томонларда гирдоб бўлиб, қуюн кўтарилиди. Уларни санаб ҳисобига етолмайсиз. Баъзилар шунчалик юксакларга кўтариладики, нилуфар осмон губори билан қўшилишиб кетгандек бўлади. Пастак-пастак қуонлар кия бўлиб бир-бирининг изидан қувиб юрибди. Қуонлар тобора узоқлашиб боради. Уларни кўз илғамай қолади. Ерга сингиб кетганини ҳам, осмонда ғойиб бўлганини ҳам билмайсиз.

Йирокларда Дашибоз ва Такя харобалари ёнида қадди букик тутлар кўриниб турибди. Улар куёшнинг ётиқ нурларида чиройли товланади. Ана Каттақум саксовуллари орасидан ўтган йўлда чангтўзон кўтарилиди. Дақиқа сайин қора нұқта яқинлашиб келаяпти. Хойнаҳой бу Фозил. Ҳа, Фозил. Болаларини мактабга кўйиб келаяпти. Айтмоқчи, бу йил иккинчи ўғли ҳам, Муслима ҳам мактабга қатнаяпти.

Хув узокда номаълум юртларга учиб кетишга шай турган турналар карвонидек каналдан қазиб чиқазилган той-той қизиши ўюмлар кўринади. Ундан нарида яна чўл: Гуландом, Кушкўнмас, Хуррамшоҳ... Ана, Фозилнинг эски кигиз ёпилган ўтови. Ўтовнинг бикинида пахса уй қад кўтарибди. Ҳа, уй қуриш Фозилга ҳеч гап эмас. Томнинг ярмига шифер етмалти чоғи. Буқача тумшуғини ғарам беданинг ичига тикиб ковшанаяпти. Ўтов ёнида баллонсиз, гилдираклари ерга ботиб кетган вагонча дे-разаларида эрталабки күёш шуласи ўйнаяпти. Ҳу, тўқ яшил кўкатзор нима бўлдийкан? Эх-эх, хаёлимдан кўтарилиби. Бу ахир буғдойзор-ку. Кузги майсалар. Унинг четида тўриқ от ўтлаб юрибди. Уни совхоз Фозилга берган. От кишинаяпти. У ё Фозилини, ёки бизни сезиб безовталанаяпти. Ўчоқ ёнида ивирсиб юрган Мастира эмасми? Ўша. Сут пишираяпти. Чанг йўлдан Фозил ўтиб кетди. Елкаси чангдан оппоқ. Йўл нотекис бўлгани учун ҳам у ён, бу ёнига қарай олмади. Ҳечқиси йўқ. Бу йўллар тез орада текисланади. У уйига етди. Мотоциклни ўтов билан вагонча оралиғига киритди. Мастира биз ўтирган тепаликни кўрсатиб, эрига нималарнидир гапирди. Фозил бизга пешвоз чиқиб келаяпти.

*
* *

Кузда чўл осмонидаги булувларни кузатганда вужудингизни қамраб оладиган завқ-шавқни айтмайсизми. Туннинг алла-маҳалида уйгониб кетиб, ташқарига чиқасиз. Паға-паға булувлар ой ортидан мафтун бўлган ошиқдек эргашиб юради. Баъзан эса, сутдай ойдин тунда уфқдан карвон-карвон булувлар кўтарилади. Улар олам уйқуда ётганида самода кўш ҳайдайди. Ой кириб кетган қорамтири булат ва унинг оқиш-сағириш четлари чўл бағридаги эски беда ғарамларини эслатади. Дастрлаб кичик-кичик гурухлар ҳолида тундагина пайдо бўлувчи булувлар кунлар ўтиши билан тобора йириклишади. Улар самода кундузлари ҳам баҳузур кезиб юришади. Куёш нурлари улар билан кураша-кураша хориб-чарчайди. Кеч кузакда булувлар қўёш юзини батамом тўсиб олади. Баъзида қўёш тоғ тарафдан бир амаллаб қора булат пардасини йиртиб, чўлга маъюс, уялгансимон боқади.

Оғирлашган, қуюқлашган булутлар ерга яқинлашади. Тун ярмидаги ерга оғир томчилар думалайди. Кишини маст қиласынан ёмғир ва тупрок хиди чүлни түлдириб юборади. Енгил дашт чанги бу томчиларни жон-жахди билан шима кетади. Шундан сўнг, қиска фурсатли ёмғирлар тез-тез бўлиб туради.

Кеч куз кунларнинг бирида, вақт пешиндан оққач, узокларда гумбурлар эшитилади. Даастлаб бу заиф ва ғуссали овозларни англамай турасиз. Сўнгра булар кузги момақалдироқлар эканлигини пайқайсиз. Шу тунда бир нарса аён бўлади: энди узок, серёмғир қиши кунлари бошланади. Чўл қишининг оқ кўрпасида ором олади.

Биз ҳам йўлга тушамиз. Олис қирлар ортида ором олаётган дашт уйкусини бузгимиз келмайди. Лекин қалбимизда аллақандай армон қолганини пайқаймиз. Айни пайтда бундай армон бўлганидан севиниб кетамиз. Шу армон бизни яна чўл сари бошлайди. Мудраётган баҳор тонгини олис қирлар ортида кутиб олишга ошиқамиз. Унда ҳали қуриб улгира олмаган, хис эта олмаган нафосатни кўришга интиламиз. Бу олам гўзалликларини севиш, уларни қадрлаш, улардан завқ олиш, ҳаётимизни баҳтиёр онларга ҳамроҳ қилишдан фафлатда қолганимиздан, бир карга борлиқ вужудимизни чулғаб олган баҳтдан бошимиз кўкларга етади.

ҚИШЛОҚ МАКТАБИДА

Ўқувчиларнинг деярли ҳаммаси доска ёнида тўпланишган эди.

— Йўғ-е, эшитишимча, ҳали ёнимиздан ўтиб кетган оқ кўйлакли, кулранг шим кийган йигит, ана ўша синф раҳбари бўлармиш.

— Тенгқур-ку у?

— Бўлмаган гапни айтма, Саломат опанинг ўзлари-чи? Нима, ёмонми у. Факат ўзимиз аҳмогини чиқарип юрибмиз.

— Тур-е нарига, бирор сендан шуни сўраяптими?

Яна ғала-ғовур кўтарилди. Болалардан бир нечаси ташқарига чиқиб, тезда қайтиб киришди.

— Илмий мудир билан ўша йигит тўғри бизнинг синф томон келишяяпти.

Синф эшиги очилди. Хонага оқ кўйлак, тор почан шим ва қора туфли кийган кенг пешана, учеб кетаётган күш қанотларига ўхшаш қора қош йигит ва бароқ қош Раҳматов кириб келишди.

Илмий мудир Раҳматов янги ўқитувчини болаларга таништириб бўлгач, чиқиб кетди.

Ёш ўқитувчи Назаров стол четига қўлларини тираб тик турарди. Унинг сийрак соколи қирилган сип-силлиқ юзи ялти-рарди. У гоҳ олдиаги синф журналига, гоҳ синфхона бурчакларига тикилган кўйи болалардан кўзларини олиб қочарди.

— Муаллим, қайси институтни тугатгансиз? — дераза ёнидаги партада ўтирган соchlари ҳурпайган сариқ юзли бола сўради.

— Университетнинг тарих факультетини, — Назаровнинг юзиға қон тепди, томоғига нимадир тиқилгандек бўлди. — Таридан дарс бераман... Қизиқ-а, гапларимиз қовушмаяпти. Бир-биrimизни биринчи бор кўриб турибмиз, шундан бўлса керак... Ҳа, майли, кейин яхши бўлиб кетади. Факат бир нарсани келишиб олсак шу маҳалдан яхши бўларди. — У болаларга кўз югуртириб олди. — Гапнинг очиги, дарс беришда сизларни ҳам, ўзимни ҳам роса қийнасам керак, чунки тажриbam йўқ. Ердам берасизлар. Эшлишимча, синфингиз ёмон отга чиқсан. Агар шу рост бўлса, йигирма олти бола олдида битта ўқитувчи нима ҳам қила оларди, дейсиз... Ана шу гап. Кейин, мени, у ўқитувчи, деб тушунманглар, қандайдир эриш туюлаяпти. Қараб турсам, синфда энг кичиги ўзим бўлиб кўриняпман.

Болалар кулиб юбориши.

*
* *

Педсовет давом этяпти. Мактаб директори Абдиева ўрнидан турди. Унинг кичик кўзлари устидаги киприклари тез-тез пир-пиради, терилган ингичка қошлари чимирилди. Ҳисобот ёзилган тўғри йўлли дафтарни стол устига қўйиб, ёкут кўзли узукли бармоғини букиб қирсиллатди.

— Энди, ўртоқлар, ташкилий масалалар тушунилган бўлса, мен мактаб томорқасидан келган даромад тўғрисида ҳисобот бераман.

Ҳамма жим қолди. Илмий мудир Раҳматов қўлидаги йўғон қизил қаламни стол устига ташлади-да, гавдасини курсига тиради, ич-ичига тушиб кетган нурсиз кўзларини директорнинг юзига тикди.

— Мажлис чўэилиб кетяпти, шунинг учун гапимни қисқа қила-ман. Ҳўш, ўзларингизга маълум, қазиб олинган пиёзни ўқитувчиларга килосини ўн беш тийиндан етмиш етти сўмга, анорни қирқ тийиндан икки юз саксон бир сўмга, узумни эса ўттиз тийиндан бир юз эллик саккиз сўмга сотдик. Жами беш юз ўн олти сўм. Шундан...

— Карамни-чи? — ўсик соқолини тирнаб сўради физкультура ўқитувчиси Жумаев.

— Э, ха, айтмоқчи, карам қолиб кетибди. Икки машина эртаги карамни завхоз Термизга элтган эди. Бир ҳафтача бозорда ўтмай ётган, кейин ҳаммасини бир йўла „общепит“га топширган. Сўровдим, килосини 5 тийиндан сотдим, деди. Кўлимга бергани олтмиш сўм. Ўзиям еган-да, оч юрсинми? — Директор кулиб кўзини дафтарга қадади. У ёзувлар устидан ёкут кўзли узук тақсан кўрсаткич бармоғини юргизди. Иккала қўлини бирбирига ишқади, кафтидан эшилиб тушган кирни панжаларининг сирти билан қоғоздан суриб ташлади.

— Ана шу пулдан икки хил: катта ва кичик мих олдик. Скамейкалар, ўтирган стулларингизни ремонт қилдирдик. Жумавининг ҳар хил майда-чуйдаси учун завхозга 170 сўм, пол ювиш учун челак ва супургига юздан ортик сарфланди. Бозорда супурги икки сўм, янги парталар ортиб келган шоферга кира ҳаки берилди. Колгани тўқсон тўрт сўм. Бу ўзимизнинг ихтиёримизда, педсовет қандай қарор чиқарса, шунга асосланиб иш кўрамиз... Мана шулар. Саволлар бўлса, марҳамат.

— Битта савол: сиз бир юз етмиш сўм спорт инвентарлари учун сарфланди, дедингиз, — деди диванга орқасини тираб ўтирган Жумаев. — Мен фақат бешта футбол тўпини кўрдим, бошқасини...

— У ёгини завхоздан сўранг.

— Қаерга кетди у? Мен-ку мажлис бор, жилманг, деб тайинловдим, — Раҳматов ўтирганларга айбдордек қаради.

— Ўзингиз қаттиқ турмайсиз-да, ўртоқ Раҳматов, неча марта педсовет бўлган бўлса, бирон марта завхоз иштирок этганини билмайман. Қанақаси бу?.. Яна саволлар борми?

— Диван четида ўтирган Назаров берган саволим ўринли бўлармикан, дегандек қизариб-бўзариб аввал директорга, сўнг Раҳматовга қаради-да:

— Хосиятхон опа, билишимча, шу пуллар болаларнинг меҳнати эвазига келган... шу ... Болалар учун бирон нарса... ўкув куроллари,— деди-да, чайналиб қолди.

Абдиева ушлаб турган қаламининг чиқарилмаган учини лунжига тиқаркан, кўзининг таги билан Назаровга тикилиб турди.

— Ана бу яхши гап бўлди, — директор ёш ўқитувчидан кўзини оларкан, табассум килиб, — яхши таклиф деса ҳам бўлади, ўртоқлар.

— Бир оғиз гап мумкинми? — Раҳматов чап оёғига гавдасини ташлаб, ўрнидан турди.— Қандай бўларди, янги йил байрамида бир арча сотиб олиб, яна болаларга мукофот ташкил қилсак.

— Албатта, жуда яхши бўларди, — деган овозлар эшитилди.

— Келишдик-а. Ҳеч кимда бошқа савол йўқми? Кўшимчалар бўлмаса, иккинчи масалага... Ҳа, хўш, Назаров? — директорнинг тор пешанаси таранг тортилди, терилган қошлари чимирилди.

— Тушунтиrolмадим. Шу, қолган пулнинг ярмидан озроғига кўргазмали қурол олинса... Химиядан, тарихдан ўқитиш анча кийин бўлаяпти. Ўртоқ Турсунов ҳам шу йил битирган, иккаلامиз ҳам кийналиб қоляпмиз.

— Йўқ! Ўқув қуроллари, ўртоқлар, бизнинг томорқа даромадимизга кирмайди. Бунинг учун ҳар бир мактабга смета берилади. Ана ўшанда ўқув қуроллари дейсизми, кўргазмалиси дейсизми, оламиз.

— Унгача кутиб турамиз, — деди Жумаев кўксини стол қиррасига тиаркан.

Назаров у томон энгашди-да:

— Курисин тажрибасизлик, бемаънилилкка олиб боради-да. Бўлмаса, смета нима, даромад нималигини билмайсанми,— деди.

— Рост, рост, — Жумаев ўнг тиззасини қучоқлаб, диванга елкасини қўйди.

•

* *

Абдиева атиргул тагини белкурак билан юмшатаётган боланинг ҳаракатини кузатиб турганда, Назаров синфдан чиқиб келди.

— Сизга гапим бор, — деди у ёнидаги бўёғи кўчган скамейканинг ўртасига ўтиаркан. — Ўтилинг-чи... Ҳар йили ўнинчи синфлар анорзорни ишлашади. Болаларга айтсангиз, уйларидан белкурак, кетмон келтиришсин, дарсдан қолиб, ўша ерда ишлашсин.

— Қачон?

— Дам олиш кунидан кейин, агар об-ҳаво очик бўлса. Ҳар бирига ер ажратиб берасиз-да, муддатини ҳам белгилайсиз. Улар яхши ишлашади.

— Бўпти.

— Нега деганда, ҳозир анорзорнинг тагини бўшатиб қўйсак, ҳар хил ўтларнинг томирини совук уриб ўлдиради, ҳашаротга ҳам қирон келади. Ер эса қиши билан намни шимиб ётади. — Директор қора этиги учига ёпишган лойни қўлидаги чўп билан тирнаб туширди, кейин қаддини кўтарди: — Энди кабинетга кирайлик, бошқа гап бор.

Директорнинг кабинети залга кираверишда чап томондаги кичкина хона. Эшигига сариқ баҳмал парда тутилган, столлар-

нинг устига ҳам шу хил сариқ бахмал ташланган. Бир стол хона ўртасига тўғри қўйилган, яна бири унга кўндаланг тиркалган. Устида кулранг мармардан ясалган оғир сиёхдон.

Директор тўрдаги курсига ўтирди. Назаров хонага кираверишдаги биринчи курсига омонат чўқди.

— Гап шундай, ўртоқ Назаров, — Абдиева учи чиқарилмаган қаламни олиб стол устига урди. — Сизни ўнинчи синфга раҳбар қилиб тайинладик-а? Масъулиятини сезсангиз керак, албатта: шу синфнинг яхшилиги ҳам, ёмонлиги ҳам сизнинг бўйнингизда.

Назаров директорга тик қарай олмас, киприклари ўз-ўзидан пирпиради.

— Эшитгандирсиз ҳам, ўнинчи синф бошқаларга нисбатан анча бузуқ. Ўтган йили ҳам учта синф раҳбари алмашди, ахвол ўзгармади. Сиз ёшсиз, ўқувчиларни йўлга солишга курбингиз етади. Шунга ишонганимиз учун ҳам уни сизга топширдик. — Директор чаккасига тушган қора гажагини ялтироқ жун рўмали тагига тикиди-да, бармоғидаги узукни бураб тўғрилади ва қорнини ушлаганича ўрнидан турди. — Яна бир томони бор: ёш бўлганингиз, биринчи йил ишлаётганингиз учун, ҳали тажрибангиз етишмаслиги мумкин. Ўзингиздан каттароқ ўқитувчилардан сўранг, устоз Навоий айтгандаридек, орланиб сўрамаган ўзига золим. Уялманг. Энг муҳими, болаларни қаттиқ тутиng, талабни ҳеч бўшаштирманг. Уларга сал ён босиб, ўзларига қўйиб беринг-чи, ўххў, бошингизга чиқиб олишади. Ҳам маси ақлини таниб қолган: нима фойдали, нима зиён — фахмига етишади. Ишқилиб, ўқитувчи ўқитувчи, ўқувчи ўқувчи эканлигини унутманг.

Назаров директорнинг олдидан чиққанда паришон эди.

*
* *

Назаров қўлидаги дастаси йўғон белкуракни анор танасига сужди. Чўнтағидан катак гулли дастрўмолини чиқариб пешанасидаги терни артди.

— Қани, йигитлар, дам олмаймизми? Тўғриси, мен чарчадим.

— Йў-ғе, муаллим, наҳотки сиз чарчаган бўлсангиз, — деди белкурак дастасини ерга тираб, тупроқ ағдараётган Чори. — Хой, йигитлар... Шерқул, йифишитир-е, отангнинг еримиidi, мунча терлаб-пишасан, — ёнидаги йигитнинг билагидан тутди.

— Отамники бўлмаса, мактабники.

— Нима, сенга фойдаси тегадими? — Чори Назаровга кўзини қисди, ҳазил дегандек.

— Ўқияпмиз-ку, нега ношукурлик қиласан? Бу ҳам ўқиш, ҳам ўрганиш, — Шерқул пешанасидаги терни тирсаги билан артди.

— Икки йилдан бери ишлаб пол ювадиган челякка зормиз-у, ҳа, хўп, челяк ҳам ўтсин, кийим-бошимизни илиб қўядиган биронта тахта илгич йўқ. Ҳосилини кўрувдинг, қанақа эди. Муаллимларга бепул берармиш, дейишса лакқа ишонибман. Шунча пул қаёққа кетади.

— Катталарнинг ишига аралашма.

— Кичиклигимиз қоптими, — Чори зингашиб тупроқ олди, уни қисиб юмалоқлади-да, анор шохига қўниб турган чумчукларга отди, — Ўқиш жонга тегди. Одам бир-икки йил мириқиб, тер тўкиб ишласа...

Шерқулнинг пиликдек қўшилган қошлари кўтарилиди, у Назаровга қаради. Ўқитувчи эса белини қўллари билан ушлаб, чиройли бошини орқага ташлаб, осмоннинг шимоли-шарқдаги баланд буулутлар атрофида айланётган бургут галаларига қараб турарди.

*
* *

— Урушни ана шундай жонли тасаввур этиш керак, бўлмаса, унинг бутун даҳшатини тушуниш қийин. Дарслиқда ҳаммаси ёзилавермайди.

— Муаллим, сиз бунча нарсани қайдан биласиз? — сўрайди соддадиллик билан дераза тарафдаги қаторнинг биринчи партасида ўтирган қоп-қора, барзангидек Эргашали.

— Қайдан бўларди... кўпларингиз уруш ҳақидаги китобларни ўқигансизлар, киноларни кўргансизлар, таниш-билишлардан эшитгансизлар. Мен ҳам шулардан келиб чиқиб гапирдим.

— Жумаев муаллим урушда қатнашган, ҳикоя қилиб беради, лекин сизникидек чиқмайди.

— Диққат билан тингламасаларингиз керак...

— Нега энди ҳамма ўқитувчи сиздек эмас? — деди Зулфия шахло кўзларини Назаровнинг қоп-қора каствоми тагидаги оқ кўйлак устида турган чипор галстукка тикиб.

— Нега энди, — деди шошиб Назаров журнални ёпаркан. — Зинҳор ундей ўйламанглар.

— Қаерда-е, муаллим, — деди Чори қўли билан партанинг ён қиррасига куч билан ураркан. — Бошқаси кирса, қалтираб ўтирамиз. Паст баҳо қўйсин, розимиз, нима деса-десин-у, уришмасин. Одамнинг юраги олинниб қопти.

— Айбнинг кўпи ўзларингда, — Назаров журнални қўлтиқлаб синфдан чиқди.

Ўқитувчилар хонасидаги диванда ўтирган Назаров газета ўқиётган эди, эшиқдан тил-адабиёт ўқитувчиси Фаниева кирди. Ўнинчи синф журналини зарда билан столга ташларкан, тўрда ўз курсисида ўтириб, физикадан чизма чизаётган Раҳматовга ўшқириди:

— Ўнинчи синф бўлмади, бўлмади-да, одамнинг жонини сугириб олишдан тойишмайди. Синфга кирсам, юрагим зир-кирайверади, — у пўстлоқ очган лабини тили билан ялади, ютинди. — Ўлай агар, иложи бўлганда бирон соат ҳам уларга дарс бермасдим.

— Нима бўлди? — қулиб сўради Раҳматов, чизмасини айлантириб.

— Нима бўларди... Дарс тайёрлаш қаерда, уни айтиётганим йўқ. Чори билан Эргашали деганлари бор. Шу бугун иккаласи янги темани икки марта такрорлапман ҳам — сўрасам, муаллим, тушунмадик, дейишади. Менинг дарсимга бошка кириб ўтирма, тушунтирадиганини топиб ол, деб синфдан чиқариб юбордим. Энди дарсимга киритмайман, борсин, директордан рухсат олиб келсин.

Хонага директор кирди. У салом берди-да, қўлидаги қора сумкасини курси устига қўйиб, бўйнига ўралган малларанг шол рўмолини еча-еча Раҳматовнинг ёнидаги бўш стулга ўтириди.

— Нима гап, Фаниева, авзойингиз бузук? — ўзи эса бошини буриб Раҳматов чизаётган қоғозга қаради.

— Яна ўша ўн-да. — Ўқитувчи қовоини солиб жимиб қолди. Олдидаги журнални нари сурди-да, ўтираётиб, кириб келган Турсуновга қараб давом этди: — Бир менми десам, мана Турсунов ҳам дод, дейди. Турсунов қўлтиғидаги журнални столга ташлаб, ранги учиб қолган қоракўл теридан тикилган телпаги ни кўтариб қўйди.

— Ўн билан ишлаш жуда оғир: на дарс тайёрлашади, на жим ўтиришади, — у уни қизарган узун бурнини плаши чўнтағидан чиқарган оқ дастрўмолга қоқди: — Жонингни аямайсан, барibir, фойдасиз. Менимча, бошка йўл тутиш керак.

— Мен ҳам шуни айтмоқчиман. Бу алпозда давом эттириб бўлмайди. Нима қилиб бўлса-да, синфни ўқитувчилар жамоаси оталиққа олиши керак.

Полга тикилиб турган Назаровнинг дикқатини директорнинг овози бузди.

— Хўш, Назаров, сиз нима дейсиз? Бу қанақаси? — директор этик кийган оёқларини стол тагига узатди. — Хабарингиз бор-

ми ёки болаларнинг ўзига ташлаб қўйганмисиз?.. Ойда-йилда мажлис-пажлис ўтказасизми ёки...

— Ўтказдик... икки марта, — Назаров ҳамон полга тикилганича жавоб берди.

— Нега бўлмаса, ўқитувчilar синфингиздан норози?

— Билмадим. Лекин мен ҳеч сезмайман. Тўғри, улар шўхликка шўх, лекин...

— Кўйсангиз-чи. Нима қиласиз: ҳам ўзингизни, ҳам бизни алдаб, — деди гавдасини деворга тақаб қўйилган шифонерга ташлаб турган Турсунов. — Шўхликнинг ҳам чегараси бўлади, жойи бўлади. Балони билишмайди-ю, яна бунинг устига, аҳмоқона шўхлиги ортиқча.

— Бўлди. Қани, Назаровдан эшитайлик-чи, нима дейсиз? — директор қўлларини қора жунли пальтосининг чўнтакларидан суғуриб, стол четига тиради, ўрнидан турди.— Ўртоқ Назаров, болаларга нўхтангизни бериб қўйибсиз. Мен сизни огоҳлантирган эдим. Бу мутлақо ярамас ҳол. Биз сизга ўнинчи синфи ишониб топширганмиз. Уларнинг ҳаммаси ҳаётга йўлланма олиши керак бу йил. Нега сиз ўз масъулиятингизга бефарқ қарайсиз? Агар қўлингиздан келмаётган бўлса, айтинг, чорасини кўрайлик... Йўқ, ундей эмас, болаларни қаттиқ ушлаш керак. Бўлмаса, улар ҳеч кимни менсимай қўйишади. Болаларга ишониш зарар. Хайронман, уларнинг нимасига ишонасиз. Ахир, бола бола, катта катта деган гап бор-ку. Раҳмдиллик деган нарсани унутинг. Ишда кўнгилчанглик кетмайди.

Директор овозининг совуқ жаранглаши Назаровнинг баданини жунжиктириб юборди. Кўнғироқ чалинганда, у ўқитувчilar хонасидан биринчи бўлиб чиқиб кетди.

*
* *

Доска ёнида турган Турсунов формулани кўчириб ёзаётган болаларга қараб ўнг қўлидаги бўр билан тахтага урди:

— Бўлдими? Қани, қулоқ солинглар...

Эшик очилиб синфга Абдиева кирди. Ўқувчilar гурр туришиди.

Директор эшик томонга қараб ўшқирди:

— Кир бу ёққа деялман! Ҳе, бетамиз!

Синфга Шерқул кирди. У остонаяда бошини эгганича, кирза этиги тагида ётган пол ювгич латтага қараб турарди.

— Қаерга кетаётувдинг? А?!

— Районга, — Шерқул бошини кўтармасдан жавоб берди.

— Пишириб қўйибдими дарс маҳали. Кимдан сўрадинг? — Абдиеванинг кичик кўзлари ўйноқлади.

— Синф раҳбаридан...

— Дарс вақтида ҳеч қандай жавоб йўқ... Бўйингга қараса, кишининг ҳаваси келади. Садқаи одам кет. Чакирсан, ҳеч нарсадан хабари йўқдек безрайиб турибди. Яна: бидирлаб гап қайтарганини айтмайсанми... Нима учун гап қайтарасан, ўзингдан каттага, а?! Айт! Ё мактаб шундай таълим бераяптими? Қани катталарга ҳурмат!.. Уятинг йўқ сен боланинг. Бор жойингга ўтири! Кўчада салланглаб юрганингни кўрмайин, — директор эшикни қаҳро билан ёпиб чиқиб кетди.

— Ўтиринглар, — деди Турсунов ҳамон тик туришган ўқувчиларга. Шерқул секин юриб бориб партасига ўтириди. Бир оздан сўнг китобларни тахлай бошлади. Қовоқлари уйилганидан, пилидек қошлари кўзларини тўсиб қўйгандек эди.

Болалар кўнгироқдан сўнг қайтиб синфга кирганинида, Шерқулнинг ўрни бўшлигини кўришиди.

*
* *

Шерқул томдаги ғарам бедадан анча ташлагач, терлади. Паншахани ғарамга санчиб қўйиб, димогига ўтириб қолган аччиқ чангни аввал ичига тортди, кейин „қх-ҳа“ деб туфлаб ташлади. Кимдир бироннинг уй орқасидаги тош йўлдан отини тутиб чакирганини эшилди.

— Э, муаллим, келинг, келинг... Мен ҳозир. Йўқ, йўқ, ит боғловли.

Назаров кўча тарафдаги эшикни очиб ҳовлига кирди. Велосипедини деворга сужди-да, томдан ердаги беда устига сакраган Шерқулга қараб завқ билан кулди:

— Кўрқмайсизми? — у ўқувчиларни сизлаб гапиради.

— Паст-ку, муаллим.

— Қалай, ишлар яхшими? — Назаров қўлинини Шерқулга узатаркан сўради.

— Яхши, муаллим. Уйга кирайлик.

Иккаласи даҳлизга киришганда, ичкари уйда кимдир йўталди. Остонада бошяланг, оппоқ соқолини тутамлаб турган чол уни қарши олди.

— Қани, ўғлим, уйга. Шердил, кўрпача ташла тўрга... Хе, барракалла, ўғлим-е. Қани, ўтиринг. Муаллимлар йўқлайдган кунлар ҳам бўларкан-а... Ё пирим-е, — чол эмаклаб дераза томонга ўтиб, токчага елкасини тиради. Улар сўрашишди. Чой ичишиди. Чол ўтмишни эслади:

— Шундай қилиб, ўғлим, бу учинчиси, — деди Шерқулни боши билан кўрсатиб. — Супра қоқди. Кенжам. Бири, айтга-

нимдай, урушда ўлиб кетди. Ўртанчаси ҳозир жамоа хўжалигида бригадир. Буниси бўлса ўқияпти. Хей, ким билади ўкишдан бирон наф олишини. Дарди-ҳарана денг. Мактабга боради — иш, уйга келади — иш. Икки гапнинг бирида ўқидим нима-ю, ўқимадим нима, дейди. Билмадим, одам бўлишини. Ўғлим, ўқишнинг, билимнинг ҳам ёмонлик қилган жойи борми? Уришай десанг, йигит бўлиб қолган, эшитган қулоқقا ёмон.

Назаров Шерқулга қаради. У йўл-йўл дастурхон устидаги ушокларни териб олиб, пўстаклар йигилган сўқичак тагига ит-қитиш билан банд.

— Нега шундай, Шерқул?

Шерқул индамайди, бошини кўтариб, ўқитувчисига қараб кулимсирайди, дераза оша яланғоч олма шохига қўниб турган майнага тикилиб қолади:

— Тўғрисини айтсам, муаллим, одам ўкишдан безипти.

— Нега энди?

— Ўзим ҳам билмайман.

— Бир нима деб гапирсан жавоб шу, — деди чол қора сатин чопони ўнгирини тиззаси тагига бостиаркан. — Уч-тўрт кундан бери мактабни ҳам йифиширди. Эрта тонгдан туради-ю, этакни елкасига ташлаб кўсакка чиқиб кетади... Муаллимлар уришади, деб келади.

Назаровнинг қуюқ қора қошлари кўтарилди, кенг пешанаси таранг тортилди:

— Ҳеч тушунмаялман, — деди у дастурхон учини қайтараркан. — Нима, бирор учун ўқияпсизми?

— Шу, муаллим, туриб-туриб, алам қилиб кетади. Ўқийман, ўқийман, сал тушунаман. Шу тушунганимният айтишдан кўрқаман. Жавобим муаллимнинг кўнглига ёқмаса, койигани койиган: сен палон, сен пистон... Ўзимча, бундан чиқади, ўқишини уддалай олмас эканман-да, деб ўйлайман. Келажагим ўқиш билан битмас экан, ўқиб нима қиласман? Ҳозирги замонда бир парча нонни бир амаллаб топиб ерман... Бирорлардан ҳақорат эшитгандан кўра... ҳей, қўйинг, муаллим.

— Ўқитувчи билан тирашасан-да, бўлмаса, сенга нега бундай дейди? Нима; ўқитувчи ҳеч замон ёмон йўлга итарадими?

— Қўйсангиз-чи, ота, билмасангиз, нима қиласиз аралашиб. Нима, мен ахмоқмидим, тирашиб...

Шерқул ҳовлига кириб бўкирган сигирнинг овозини эшитиб, ўрнидан тургач, Назаров ҳам қўзғалди.

— Ўтирибсиз-да, ўғлим, гурунглашиб.

— Йўғ-е, ота, кўп ўтиридим, уйга қайтай, кеч бўлиб қолди.

Чол Назаровни ҳовлигача кузатиб қўйди. Назаров Шерқулни чақириб:

— Эртага мактабга боринг, ажойиб йигитсиз, майда-чуйда ўткинчи гапларга эътибор бериб юрманг. Умидсизланманг ҳам. Үкиш ҳамиша керак, — деди-да, велосипедини минди.

Шеркул ўқитувчиси орқасидан анчагача қараб қолди.

Аллақачон қош қорайган, ой юзини тўсган хира, қорамтири булутларни жанубдан эсган совуқ шамол ҳайдаб борарди.

*
* *

— Келинглар, очик-равшан, юракда нима бўлса, ўшани гаплашайлик, — Назаров стол устидаги блокнотни олиб, орқадаги бўш партага бориб ўтириди. — Қани, синфком, сўз сизга, мажлисни бошланг.

Синфком Ёқубжон Шодмонов ўрнидан туриб, пальтосининг охирги тугмасини ўтказа-ўтказа, доска ёнига борди, болаларга мурожаат қилди:

— Менимча, синфимиздаги аҳвол ҳаммага маълум, шунинг учун нима ҳақда гапиришни ҳам билмайман. Тўғри, ўтган йилгига нисбатан бу йил тартиб-интизом анча яхши, ўзлаштириш ҳам...

— Шодмонов, сиз ҳеч нарсани яширманг, ростини айтаверинг. Нега ўқитувчиларнинг кўпчилиги сизларни айблайди? — сўради Назаров.

— Болалар ўзлаштирмаётган фанлардан шу рус тили, химия ва яна... адабиёт. Бошқаларидан яхши. Яна бир камчилигимиз: болалар пол ювишдан қочишяяпти. Бугун ҳам Чори билан Зулфияга айтувдим, супуришибди-ю, ювишмапти. Ишқилиб, ҳар куни полнинг машмашаси.

— Супургини ҳам айт-да, супургини ҳам бирордан ялиниб-ёлвориб топиб келдим. Челак йўқ. Қаердан топамиз? — Чори жаҳлланиб қўшиб қўйди. — Пол мактабники бўлса, чelаги-ю супурги, латтасини топиб берсин-да. Токайгача уйдан ташиймиз. Томорқадан келган пулдан ишлатсин.

— Шодмонов, давом этинг.

— Муаллим, шулар, бошқа нима ҳам дердим.

— Бўлти, ўтиринг, Эргашали, сиз туринг.

— Эргашали түядек лапанглаб, доска ёнига боради.

— Адабиёт муаллимига ҳеч нарса деганим йўқ. Тўғриси, ҳеч нарсани тушунмовдим, такрорланг, деб сўрадим. Кейин тушунтириди. Фаниева муаллим эса эрталаб чап биқини билан турган эканми, сизлар мени масхара қилаяпсизлар, деб сўкиб кетди. Синфдан чиқариб юборди. Айтишсин, болалар дарсни тушунишмаган. Билмадим, муаллимларга тўғрисинни айтсанг ҳам

ёқмайсан, нотўгрисини айтсанг ҳам, — у ранги ўчиб кетган пальтосининг чўнтағига қўлини солди.

— Чори, сиз нима дейсиз? Нега рус тилидан учта икки баҳо олгансиз?

— Хе, муаллим, иккни қўяверади-да. Биз бундайларга ўрганиб кетганимиз.

— Ҳазилга бурманг, аниқроқ галиринг.

— Ҳазил эмас, муаллим, рости шу. Ҳа деб шеър ёдлатади. Бир куни уйда сахарда туриб машқ қилаётсам, овозимни эшишиб отам: ха, ўғлим, яна олтинчи синфга тушдингми, дейдилар. Жонли гап керак-да.

— Бошқа болалар ёдлаган-ку?

— Бир ёдлаган Эргашали бўлса, ана, сўранг икки кундан кейин ҳаммасини эсдан чиқарди... Муаллим, энди гапирай, ўрни келиб қолди.

Назаров бош ирғаб маъқуллади.

— Мен бир нарса тўғрисида гапирмоқчиман... Уч кундан буён Шерқулнинг йўклиги синфимизнинг давоматига таъсир қилаяпти. Хўш, бунда Шерқулни айблаб бўладими. Унинг ўрнида мен бўлсам, мактабга оёқ босмасдим, шунча маломатдан сўнг. Йигит киши қандай бошини кўтариб юради. Биз ҳам бирон нарса деёлмаймиз. Кеча районда кўрдим, мактабга бор десам, директоринг ўқийверсинг, деди. Хайрият, бугун ўзи кепти. Ҳали-ям виждони бор экан. Ҳамманинг олдида шарманда қилмаслик керак-да... Муаллим, гапираверсам бўлаверадими?

— Бемалол.

— Кейин, — Чори томогини қириб олди,— кимки гапирса, ўнинчи синф бошқаларга ўrnak бўлсин, дейишади. Қайси куни мажлисда кечикиб келаётган ўқувчиларга умумий бир чора кўриш, мактаб ҳовлисидаги тош, синган гиштни олиш, ариқни тозалаш керак, дегандим. Ҳамма маъқуллаган, қарорга ҳам киритган. Мана, бугун йигирма кун ўтди, бирор бир нарса демайди. Раҳбарлардан биронтаси болаларнинг бошини бириктириб, ишнинг устида турса, икки кунлик ташвиш. Ўтган йилиям синфимиз ўқувчилар бригадасини ташкил қилишни кўтариб чиқсан эди. Ҳудди шундай аҳвол юз берди. Ҳей, дейсанда, катталар шундай қилгандан кейин бизга нима. Жонкуяр йўқ. Ҳа деб аралашаверсанг, бурнингни бўлар-бўлмасга тиқа-верма, дейишади.

Назаров доска ёнига келиб болаларга назар ташлади. Ҳамма сердиқкат, жиддий ўтиради.

Декабрнинг бошида биринчи қор ёғди.

Бошлангич синф ўқувчилари залда шовқин-сурон кўтаришади.

Юқори синф болалари ҳовлида қорбўрон ўйнашяпти. Кечаси билан ёғаётган қор тинганича йўқ. Зинапояда турган Назаров буралиб ёғаётган қор орасидан ғира-шира шўппайиб турган яланғоч толларга қараб турибди.

— Муаллим, — деди Назаровнинг ёнига келган Шодмонов елкасидаги қорни қоқиб тушираркан. — Кеча болалар, мажлис қиласилик, унга Турсунов муаллимни ҳам таклиф этайлик, дейишганди... Ҳалиги масала...

— Хўп, хўп, жуда яхши. Дарсдан кейинми?

— Ҳа.

Назаровнинг чехраси ёришиб кетди.

— Турсунов муаллим биздан ранжиб юрибдилар. Биз бўлса хижолатдамиз. Орадаги тушунмовчиликни ҳал қилсан, девдик.

Синф мажлисига таклиф қилинган Турсунов Назаров билан ёнма-ён бир партада ўтирибди.

— Вазият, сизнинг назарингизда, қандай — Назаров вазмин савол берди.

— Менимча, айб болаларнинг ўзида. Муаллимнинг имкониятларини тушунишмаяпти.

— Бу нима деганингиз?

— Муаллимнинг ўзлари биладилар.

— Хўп, майли, ўтиринг. Қани, Шерқул, сиз, — Назаров ёзаётган қофозини ўраб карнай қилди-да, Шерқулга доска ёнини ишора қилди.

— Эшитамиз, қани, гапиринг. — Турсунов иягини тутиб турган қўлини кўксига кўяркан, қимиirlади, парта фичирлади. Шерқул Назаровга қаради, ўқитувчи бошини қимиirlatганини кўриб, юзига қон югурди.

— Мендан ўтган айб шу бўлдики, дарсга сал кечикиб кирдим. Муаллим мендан илгари келган болаларга гапириб турган эканлар. Кейин мени қўриб, ҳа, ҳали сен ҳам бормидинг, дедилар, дўй урдилар.

— Ҳа, хўп, айт-чи, қаерда эдинг ўша куни? — ўрнидан туриб кетди Турсунов.

— Сиз ўтириб туринг, ўртоқ Турсунов, ҳозир сизга ҳам сўз навбати келади... Давом этаверинг, Раҳимов, — деди Назаров овози дўриллаб.

Шерқул оғзига талқон согландек, оёғи тагидаги бўёғи ўчган полга бақрайиб жим қолди.

— Нега жим бўлиб қолдинг? А? Ҳа, ана шундай бўлади. Айбдор одамнинг боши ҳамиша эгик. Энди менга сўз беринг, — деди у Назаровга ўгрилиб.

Мактаб совуқ бўлганидан, Турсунов қалин кийинганди. Пальтосининг тұгмаларини ечганда, бўйнидаги шарфи салқиб тушди, ичидан кийиб олган паҳталик нимчасининг ёқаси томогига тегиб, ғашини келтирди. У қўлларини чўнтаклариға тиқиб, эшик ёнига борди, яна доска ёнига келиб тўхтади. Синфнинг салобати босдими, бир-икки бор томогини қирди, бармоқлари билан бурнини кисиб ичига тортди.

— Баъзи бир ўртоқларнинг гапини ҳозир эшитдик. Эмишки, Турсунов ўнинчи синфнинг обрўйини булғаб, бошқа синф ўқувчилариға айбларини айтиб юрган эмиш. Ҳўш, нима бўлти? Нима учун шундай? — У чўнтағидан қўлини чиқариб кўксига муштлади, — сизлар, ўнинчи синф ўқувчиларисиз, бурунларингизни юкори кўтарасизлар. — Турсунов кўрсаткич бармоғини бурни учига теккизиб, пешанасидан юкори кўтариб, юзини шипга қаратди ва кўзларини олайтирди. Шахт билан юриб бориб, биринчи партада ўтирган Шерқулга тикилиб, бармоғини бигиз қилди. — Сен, тур-чи ўрнингдан!

Шерқул ўрнидан турди.

— Сен менга аввал айт: ўқиш ниятинг борми ёки йўқ?

Шерқул бошини сал кўтариб яна тушираркан:

— Ниятим бўлмаганда, мактабга келиб ўтирасдим, — деди.

— Нега бўлмаса дарсга истасанг кирасан, истамассанг кирмайсан? Нима, сенга дарс ўйинчокми?

— Бир марта кечикдим, шунга ҳам шунчами? Узрли сабабим бор эди.

— Овозингни ўчир! — Турсунов Шерқулнинг қулоғига бориб қичкирди. — Сабаб, баҳона топишга устасан. Кўчада юрган писмиқи безоридан нима фарқинг бор! Ўқувчи бўлсанг, ўзингдан каттага гап қайтарасанми?

Шерқулнинг кўшилиб кетган қошлари кўтарилди, юзига қон тепди.

— Безорилик қилиб бирорни урганимни кўрдингизми?

— Ҳали урмоқ ҳам ниятинг борми?

— Нега безори дейсиз, бўлмаса?

— Туришингга қара-е... — Турсунов кўзлари билан Шерқулнинг бутун қиёфасини кузатиб чиқди-да, афсус, дегандек, бо-

шини чайқади, кейин пальтосининг чўнтағига қўлларини солиб, дераза томон кетаркан: — Ўтириш! — деди.

— Дўйк урманг, муаллим, ноҳақ бўлсам, исботлаб беринг.

Турсунов изига қайтди. Кўзларига қон кўйилиб қизарди. Иккала чаккасидаги қон томирлари бўртиб чиқди.

— Нима, сен мени тергов қиласяпсанми? — Турсунов тишларининг қисирлаши синфга эшитилди, у ўзини зўр-базўр босиб олди. — Ўқитувчи нима қиласарди, а?.. Ношуд! Мен сенга айтдим-ку, аҳмоқсан, деб, фирт аҳмоқсан. Бил, сендан яхши одам чиқмайди.

— Бас, етар, — Назаров партадан туриб, доскага яқинлашди. — Синф ўқувчилари тўғри даъво килишган экан. Турсунов дарсларни тажриба кўрсатмасдан ўтади, дейишганди. Химиядан бу хилда дарс ўтиш ғоят мушкуллигига энди икрор бўлдим шекилли, асабни заҳарлар экан...

*
* *

Ним коронги клубни босик ғала-ғовур босган. Болалар бир ярим қарич баландликдаги скамейкаларда ўтиришибди. Преэдиум аъзолари тўғри бурчак столнинг икки тарафига бўлиниб ўтиришишти. Абдиева, Назаров ва Турсуновлар ҳам шу ерда. Абдиева ўнг тирсагини стол четига тираган кўйи болалардан кўз олмайди. Тугмалари ечилган жигар ранг пальтосининг ўнгирлари семиз сони устидан сирғалиб тушган. Турсунов икки қўлини тиззалари устига кўйиб, доклад ёзилган қоғозларини тартибга келтираётган сепкил юз комсорг Фаёзовнинг ҳаракатларига разм солиб турибди.

Мажлисни бошқариб турган Шодмонов Фаёзовга сўз берди. Комсорг сепкил тошган бўйинини кафти билан ишқади-да, кўз ости билан мактаб директорига қаради. У, бошла, дегандек ишора қилди.

Фаёзов мактабдаги тартиб-интизом тўғрисида гапирди. Тайинли фикр билдирамади, мужмал сўзлаб, мунозарани музокарага чиқувчилар ихтиёрига ҳавола қилди.

— Хозир баъзи ўртоқлар ўнинчи синфдаги ахволдан хабарингиз борми, деб қолишиди... Тўғриси, мен ўнинчи синф билан таниш эмасман, — деди комсорг. — Шерқул Рахимов хулқи тўғрисидаги гапни ҳам шу ерда, болалардан эшитдим. Хозир муаллимнинг ўзлари бирон нарса демасалар...

Мунозара бошланди. Минбарга бирин-кетин ўқувчилар чиқишиди.

— Фаёзовнинг гапларини эшитдик. Бундан шундай хулоса чиқадики, мактабда факат ўнинчи синф бўш, тартиббузар, —

деди президиум аъзоларини тўсиб қўймай деб, четроқда гав-
дасини болаларга буриброк гапираётган пакана бола, — бош-
қа синфлар оппоқ. Мана, ҳаммага ибратли, мақталган тўқки-
зинчи синфни олинг. Ҳар куни бир янгилик. Ўнинчи синфдаги
ахвол бу ерда ҳам бор. Ўқувчи Жўраев Турсунов муаллим билан
ҳар куни жанжал қиласди.

— Ким у, қани, турсин-чи? Башарасини бир кўрайлик! —
Абдиева бўйини чўзиб залга кўз югуртириди. Дераза томонда-
ги бурчакдан узун бўй, озгин, чўзинчоқ юз бола турди.

— Ана у... Ўтган куни муаллим унга насиҳат қиласман, деб
бутун дарсни ўтолмай қолдилар. Умуман, Жўраев ўзига эмас,
бошқаларга ҳам халақит бераяпти...

— Чик-чи бу ёкка, — директор салмоқлаб сўради бола мин-
барга чиққач.— Хўш, нима гап? Нима бўляяпти ўзи?

— Ҳеч гапмас-е, муаллим, шунчаки, — деди-да Жўраев ўрни-
га бориб ўтирган пакана болага қаради ва бошини эгиб, пол
устида туфлисининг уни билан айланча чиза бошлади.

— Бу нима қилиқ? Ўзингни яхши тут!.. Нима, ҳозирги гап
ёлғонми? Одамга ўхшаб жавоб бер! Нега мунча қилпанглай-
сан?

— Йўғ-е, тўғри. Бир куни муаллимнинг ўзлари ҳеч нарсадан
ҳеч нарса йўқ мени уришиб кетдилар, — Жўраев чўзинчоқ юзи-
ни кўтарди. — Жаҳл билан доскага муштладилар. Досканинг
устига суяб қўйилган Менделеевнинг ҳайкали бошларига ту-
шиб кетди, — у ўзини тутолмади, елкалари силкинди.

Болалар орасида ғовур, босиқ кулги эшитилди. Абдиева
турди.

— Бор, ўтири! — директорнинг терилган ингичка қошлари чи-
мирилди. — Ҳамма гаплардан хulosса шуки, мактабда тартиб-
интизом бўшашиб кетган, энг ёмон томони шуки, ўқувчилар
билан ўқитувчилар орасидаги муносабат бузилган. Мана, бир
мисол: ўнинчи синфдан Раҳимов. Сен нима учун ўқитувчи билан
ҳар куни жанжал қиласан? Ўқитувчи сенинг ўртоғингми? Ўзингдан
кattани ҳурмат қилганингми бу? Нима учун дарсини
менсимайсан? Ёлаводинг чиқиб қолдими? Қанақа ота-она тар-
бия қилган сени, ҳайронман. Туришингга қара-е, ахмоқ! Ё мак-
таб сенга шундай таълим бераяптими? Айт! Сенинг танбалли-
гинг, ўжарлигинг бошингга етади. Оёғингни билиб бос, бола,
охирги марта огохлантираяпман, яна бир марта шундай ҳара-
катингни сеззам, маткабдан ҳайдайман.

Шерқул болалар ўртасида дераза томонга қараб тик турарди.

— Сен боланинг ўқиш ниятинг йўқ. Кун ўтса бўлди. Кейин
аттанг, дейсан, ахмоқ бўлганингни ўшанда тушунасан.

— Ҳалиям ўшандан кам эмас: икки гапнинг бирида сен аҳмок, сен палон, писмадон...

— Ҳаддан ташқари ўтказиб юборасан, кейин ўқитувчи айтиб юборади.

— Ўтказиб нима қипман?

— Ёлғон гапирма!

— Айбим бўлса, сўранг болалардан... Ўқитувчилардан ҳам сўранг. Ҳаммасининг топгани мен, ёпишгани-ёпишган. — Шерқул ўнг муштини кўзларига босди ва рухсат ҳам кутмасдан ўтириди.

— Ноҳақ айбланмасин,—деди Назаров ўрнидан шахт туриб.

— Ўтиринг жойингизга, — жеркиди директор. — Сизга сўз берилгани йўқ. Сизга сўз педсоветда берилади.

Назаров Абдиеванинг йилтиллаб турган кўзларига қарадида, жимгина жойига ўтириди. Турсунов унга энгашди ва шивирлади:

— Э!.. ундей деманг. Ўқувчилар олдида ҳеч қачон раҳбарга тик гапирманг.

Назаров унга беписанд қаради. Мажлис тарқади.

— Сизнинг фикрингизга қўшилмайман, — деди Назаров. — Одам боласи улар.

— Биз буни инкор этаётганимиз йўқ-ку.

— Гап бунда эмас. Улар ҳақиқатни излаётган пайтлари. Ҳозир топа олишмаса, умрбод йўқотиб қўйишади. Мени азоблаган нарса шу, — Назаров қуруқшаб қолган лабларини ялади.

*

* *

Шамол асфальт йўл устидаги чангни учирраб, шудгорга олиб бориб сочади. Кўча юзидағи толлар яланғоч. Назаров тугмалири ечилган кўк пальтоси чўнтакларига қўлларини тикқанича Турсуновнинг гапларини тинглаб бораяпти.

— Сиз, Назаров, болаларни кўп авайлайсиз...

— Улар ниҳол, — қўлини чўнтағидан чиқариб кафтини кенг очиб силкитди Назаров. — Салгина совук шабададан нобуд бўлиши мумкин.

— Умуман-ку, бу тўғри фикр. Лекин бизнинг мақсадимиз уларга илм бериш, шунинг учун уларни қаттиқ тутиш зарур. Бугун мажлисда директорга жуда ўринсиз гап қилдингиз. Кўркўронга болаларнинг тарафини олсак, улар кимни хурмат қилишади. Ўқитувчicha обрў қолмайди.

— Эҳтимол. Лекин мен ўзимни тутолмадим.

— Тўғри, кўнгилчанлигингиз бор, аммо кўнгилчанлик педагогикада ҳамиша ҳам иш беравермайди. Сиз уларнинг нимасини

ўйлайсиз: ўқишига қизиқиши мутлақо йўқ, бемаъни гуурни химоя қилиш учун эса жанг қилишига тайёр. Дастрраб мен ҳам шу, юрагимда борини бераман, деб ҳаракат қилиб кўрдим. Натижаси нима бўлди? Кўриб турибсиз, — Турсунов қўл силтади. — Минг уринманг, минг куюнманг — барибир... Биз ўқиган даврлар бошқача эди: нимагадир интилардик, келажагимизни кўра билардик. Булар-чи, кўнгли совуқ, ҳамма нарсага бефарқ, чунки ҳамма саводли бўлиб кетган, олий маълумотли. Ҳа-е, маълумот олмасак ҳам кун ўтар, деган фикрда. Бир амаллаб ўнни битирса... Сиз нима дедингиз?

— Менимча, ундан эмас. Мен ўз тажрибамдан келиб чиқиб айтаяпман. Улардаги камчилик бу бизнинг камчилик. Болаларни ҳаддан ташқари ўзимиздан йироқ тутишга ҳаракат қиласиз, натижада улар ҳаётида юз бераётган ўзгаришдан бехабармиз. Умуман, улар ҳаётидан узокдамиз. Кўпинча ўз шахсий турмушимизни: олти соат дарс бериб уйга чопиш, ҳар ойнинг охирида маошни олиб ётишни биламиз. Бурчимиздан кўра, шахсий хўжалик, манфаат устун. Биз, ахир, инсонни тарбияляпмиз-ку! Яна бир томони: улар билан ўтамизда чегара кўйиб қўйганмиз, бу эса ёмон одат. Ўйлаб кўринг: коллективимиз қирқ беш киши, ўқувчилар зса саккиз юз. Бу иккала коллектив иккита оролдаги тўдаларга ўхшайди. Назаримда, шу нуқсон болаларнинг маънавий бузилишига олиб бораяпти, нега деганда, орамизда алоқа йўқ, катталарнинг даваллиги, қўрслиги, бемаъни муносабати болаларда умидсизлик туғдираяпти.

— Сиз ўқитувчи билан ўқувчи орасидаги фарқни инкор этмоқчисиз.

— У фарққа ҳеч ким дахл қилаётгани йўқ... Менга қолса, ҳозирги вазиятдан кўра, ўша фаркнинг бўлмагани маъқул.

Турсунов Назаровнинг юзида қатъият ва самимий табассум кўриб, бошқа сўз қотмади.

*
* *

— Сиз, Турсунов, ўзингизга, хатти-ҳаракатларингизга бир қайрилиб бўқинг. Кулгили аҳволдасиз. Педагог деган номга муносибми? Ё институтда болаларни ҳақоратла, таҳқирла, деб таълим беришганми? — директор елвизакдан учлари тебраниб турган оқ пардадан кўз олмай сукут сақлаётган Турсуновга қаради. — Бўйнидан боғланган ит овга ярамайди. Улар билан ҳар куни сен-менга бораверсак, биз билим бермаймиз. Буни билим демайдилар. Билимсиз бола ҳаётга ярамайди. Ав-

вало, сиз обрў деган нарсанинг қадрига етинг. Болалар олдида неча пуллик обрўйингиз қолди, қани, айтинг-чи? Ўзингизнинг хатти-ҳаракатларингиз билан бутун коллективни шарманда қилдингиз. Мен сизни жиддий огохлантириб қўйяй: сизга ўхшаган масъулиятни сезмаган ўқитувчилар учун орамизда ўрин бўлмайди... Яна ким гапирмоқчи? Раҳматов, сизми?

Директорнинг ўнг томонида ўтирган илмий мудир ўрнидан турди.

— Турсуновнинг қилмишлари педагогга нохос. Наҳотки, ўқитувчи киши руҳининг инженери, деган гапни билмасак! Қани, беш йил институтда олган билим меваси? Ўқувчиларга қараб, сен одам бўлмайсан, деганингиз нимаси? Улар одам бўлмас экан, ўқитиб нима қиласми? Бунинг учун сизни жиноий жавобгарликка тортадилар. Ўқувчининг ўқишга қобилиятсизлигини фақат врачлар аниқлашади... Йўқ, ўртоқ Турсунов, бу билан биз ўқувчиларни мактабдан бездирамиз... Ий-е, ҳар бир ўқитувчи маткабнинг ақли, қолаверса, санъаткор артист бўлиши керак. Тўғри, сиз ҳали ёшсиз, кўп нарсани тушунмайсиз, буни биз ҳам биламиз, лекин бу сизга ақл-фаросатни ишлатмаслигингиз учун асос эмас. Билмасангиз, сўранг, ўрганинг. Ўзбошимчалик билан иш битмайди-да. Тағин бу ерда ўтирганларнинг менда қасди бор экан-да, деб тушунманг. Биз сизга ёрдам, маслаҳат бераяпмиз. Коллектив шунинг учун ҳам колектив-да... Яхшилаб ўйлаб кўринг, фикрларингизни, мана ҳозир айтинг, биз ҳам эшитайлик. Эҳтимол, бизда ҳам айб бордир.

Боши қуи эгилган Турсунов қаддини кўтарди. Узун бурни кизариб, юзининг ранги ўчиб, ўтирганларга қаради.

— Йўғ-е, сизларда айб йўқ... Айб факат менда. Мен, уришсам, сўксам, юрагимдагининг борини бераман, деб ўйлабман...

— Менга сўз беринг, — деб кўл кўтарди ҳамишагидек диван четида ўтирган Назаров.

— Бошқа гапингиз йўқми, Турсунов?.. Сўз сизга, Назаров, — директор қовоғини очмади.

— Бир оғиз сўз. Ўртоқлар, мен ҳозир Турсуновнинг ўрнида бўлганимда, билмадим, нима бўларди... Нега энди ҳаммамиз Турсуновга ёпишамиз? Тўғри, қизиқён, баджаҳл. Булар унинг нуқсонлари. Илм бериши-чи? Илм беришиямми? Йўқ! — Назаров чўрт кесди. Тез ва ҳаяжонланиб сўзлаганидан тутилиб қолди, аста-секин ўзини босиб олди: — Юрагида бор одамлар қизиқён бўлишади. Турсунов юрагидаги бор нарсасини, билимини болаларга бергиси келади. Натижаси эса кўнгил-

дагидек эмас. У жон куйдириб меҳнат қилади, виждони оғринади, нима қилиб бўлса-да, ҳали айтиб ўтиб кетгандаридек, институтда олган беш йиллик билимларини бергиси келади. Лекин болалар ўзлаштирмаляпти. Нега! Оддий бир савол: химияни тажрибасиз қандай қилиб ўзлаштириш мумкин? Кўлингда битта бўр, бу билан нима қила олардинг... Химия кабинетига кирсанг, ҳайрон қоласан — ўғри ургандек, бўм-бўш. Шундай замонда-я. Ўттиз йилдан буён қад кўтариб турган ўрта мактабда химиявий модда-ю приборлар бўлмаса. Вақтида балки бўлгандир. Ҳозир синган, тўкилган, йўқолган... Янгилаш керак. Химияни қўяйлик, мушкул фан. География билан тарих осон фанлар. Хўш, ҳаритасиз қандай дарс ўтиш мумкин? Номига бир-иккита ҳарита бор, уни ҳам сичқон кемириб кетган. Болаларга кўрсатсангиз — кулгу. Одам меҳнат қилади, меҳнатининг ҳосили, натижасини кўрмаса, куюнади. Бир куни мен Раҳимовни катта танаффусда районга, тарих кабинетидан ҳарита келтиришга юборишга мажбур бўлдим. Нозик тема эди... Бу ерда эса ҳаммамиз Турсуновни айблига чиқариб ўтирибмиз. Айбни Турсуновдан эмас, бошқа ердан излаш керак.

— Аъло! Хўп, айбни устимизга олдик. Энди эшитинг: сизнинг ҳарита-паритангиз, Турсуновнинг прибор-миборига чўнтағимдан чиқариб берайми? — директор ўсмоқчилади.

— Йўқ! —яна чўрт кесди Назаров. — Биринчидан, чўнтағингиздан чиқарган пулга мактаб зор эмас, иккинчидан томорқадан қолган пул бор эди. Эсингиздами? Мен йилнинг бошида шу пулнинг бир қисмига зарур нарсалар сотиб олайлик, деган эдим. Ўқув қуроллари учун смета бор, таъминлаймиз, дегандингиз. Йил тугаяпти. Мактаб бўлмаганда, унинг сметаси ҳам, томорқасидан келадиган пули ҳам бўлмасди. Бор экан бунинг ҳаммаси бир мақсадга — болаларнинг таълим-тарбиясига йўналтирилиши керак. Бундан ортиқ мақсад ҳам йўқ. Биз бу ерда айбдор излаб, сену менга бориб ўтирибмиз. Йил давомида ўтилган дарслар, сарфланган вақт кўзланган нуқталарга бориб етмади. Эртага имтиҳонда ўқувчиларнинг билим даражасини нима билан ўлчаймиз? Бирорларнинг шахсиятига тегиши биланми?..

— Баракалла, доно экансиз, бу маслаҳатларни илгаридан бермайсизми? — писанда қилди Абдиева.

— Шошманг, бу ҳали масаланинг ҳаммаси эмас, буларни бир амаллаб тузатиш мумкин, чораси топилади. Лекин масаланинг бошқа томони ташвишлантиради. Бу, умуман, тарбия

соҳасига боғлиқ... Биз болаларни ўз тарбиямиз билан бўғиб қўйганмиз: мустақил фикрлаш, ишлаш, юриш-туриш... Эртага булар ҳаётга йўлланма олишади, мустақил иш бошлашади. Бундан ташқари болаларни ҳақиқатдан маҳрум қиласа позади, уларни сўсиз итоат қилдириш билан иш битмайди. Тарбияга бу хилоф. Биз уларни ўзимизга жилла бўлса-да, ўхшашини истаймиз. Ўзимизга ортиқча баҳо бериб юборганмиз. Аслида, ўрнак бўлишга арзирлик одамлармизми? Нега энди улар бизга ўхшashi керак? Балки, биздан устунроқ бўлиб кетишар, бу табиий...

— Эркинлик деганда нимани тушунасиз, ўртоқ Назаров? Ё биз уларни қафасга солиб қўйганмизми?

— Уларда маънавий эркинлик йўқ.

— Тушунтириб беринг-да, бидир-бидир қиласиз-у, гапингиз-да туз йўқ. Куруқ гаплар билан бошни гаранг қилманг.

Назаров ўзини йўқотиб қўйди. Баъзиларнинг хиринглаб кулиши бунгами ёки директорнинг ўринсиз таънасигами қаратилганини англай олмай баттар ўсал бўлди.

— Мен ҳам гапирай, — деди Жумаев ўтирган курсисини олдига сурисиб, суюнчиғидан тутаркан. — Назаровнинг гапларида жон бор. Ўйлаб турсам, бир нарсани айтаман дейдилар-у, ё юраклари дов бермаяпти, ёки унтиб қўйдилар. У ёғини билмайман... Ҳа, майли, мен ўз фикримни айтай. Ҳали Назаров, биз болаларни ҳақиқатдан маҳрум қиласа позади, дедилар. Бу, ўртоқлар, умуман тўғри. Шу мактабда йигирма йилдан бери ишлайман-у, лекин Назаровга ўхшаш фикри тўғри ўқитувчини энди кўришим. Назаров ҳақ гапни гапирди... Тўғри-да, ҳар йили мактабимиз бор — даромади бор, ишни, ойликни тақсим қилиши бор. Ҳар йили бу масалаларни туб моҳиятини билсак-да, индамай қўяверамиз. Бирорлар ўз кунининг ўтишини билади. Орқаворотдан мишиш гап қилиб юришади: ҳа-е, энди катталар-да, қилса ҳам ўзлари қипти, жавобини ҳам ўзлари беради, бизга нима — оч қорним, тинч қулогим. Энди, бундай қарасам, бунақа нарса ёмон томонга олиб борааркан. Бир мисол: кечами, ўтган кунми, ёдимда йўқ, икки бола, қаранг: бола-да, кўнглида борини тап тортмай айтаверди. Бирори директоримиз ундаи деса, бирори илмий мудир бундай, фалон ўқитувчи ундаи экан, дейди.

— Сиз оғзингизни очиб туравергансиз-да, боланинг гапига лаққа тушиб, — Абдиева заҳархандалик билан кулди.

— Ким билади, бирордан ё уйидан, кўча-куйдан эшитган-да. Лекин шунақа камчиликлар борлигига ўзим ҳам ишонаман. Боланинг оғзига уриш... у рост сўзлаб турганда, қанақа бўларкан?..—

Жумаев қора кителининг ёқа чўнтағидан чиқиб турган ипни қўли билан кирт узаркан давом этди: — Ана энди йўласам, партадаги ўкувчи бундай нарсаларни, қўполликларни, пўписаларни ҳар куни ақл ўргатадиган устозлари орасида борлигини англағандан кейин кимга ҳам, қандай ҳақиқатгаям ишонсин. Ўртоқлар қўгила-рига олишмасин, айтдим-қўйдим. Келажак софдил, яхши одамларни кутаяпти...

— Сиз, Жумаев, келажакнинг ташвишини йиғиширинг-да, ишга ўтинг, физкультура болаларга нуқул футбол тептириш эмас.

— Хосият опа, дарс ўлик нарса, нисбий, уни тирилтирадиган, жон берадиган ўқитувчи... у... у тарбиянинг фидойиси... — Назаров пойма-пой сўзлаганидан қулоқларигача қизариб кетди.

— Айниқса, сиздақаси, — Абдиева оппоқ узун тишларини кўрсатиб кулди. — Бошқа гапингиз йўқми, Назаров? Яхши.

Назаров ўтириди, терлаган пешонасини қўл кафти билан артди.

— Бу киши сўзлаганда, эътибор қилдингизми, асабий. Ҳозир ҳам... Назаров, сиз йил бошида врач кўригидан ўтганмисиз?.. Ҳа, майли, буни кейин аниқлаймиз... Бундан чиқди, бу ерда ўтирганларнинг энг ақллиси сиз, — салмоқлаб гапирапкан, кўрсаткич бармоғидаги узугини бураб тўғрилади.

Назаровнинг пешонаси таранг тортилиб, қора кўзлари катталашиб кетди.

— Мен сизга айтсан, мактаб системаси, унинг хўжалиги, кирим-чиқим ишлари, икир-чикири у ёқда турсин, таълим беришда ҳам ўтакетган нўнок, ношуд одамсиз. Агар сиз ўқитувчи эмас, ақалли оддий одам деган сўзнинг фахмига етканингизда эди, кечакомсомол мажлисида, ўшанча ўкувчининг олдида, уялмай-нетмай: ноҳақ айбланмасин, деб менга — директорга аҳмоқона гап қотмасдингиз. Сиз ўзи нималарни ўйлаяпсиз? Нималарни тўқияпсиз? Нима, мен болани ноҳақ айблаб, қасдимни олдимми? Отамни ўлдирганми у? Ё биз мактаб мулкини еб-ичиб, сиз куруқ қолдингизми?.. Мен етти йилдан бери директорман шу мактабда. Демак, бу курсига адашиб ўтириб қолган эканмизда... Ҳмм... Сиз ҳеч балода йўқсиз. Йўқ-йўқ борсиз: ҳасад, кўролмаслик, баҳилликда борсиз. Шунча йил ишлаб гапи чиқмаган мактаб коллективини кўзғашга уриняпсиз. Сувни лойқалатяпсиз... Кўрининингиз бор, холос. Шунга маҳлиё бўлиб ўнинчи синф тақдирини топширибмиз сизга. Минг афсуслар. Мол оласи ташида, одам оласи ичиди, деб шунга айтишади...

— Кечирасиз, — Назаров унинг сўзини бўлиб ўрнидан турди.

— Ўтиринг, — амр қилди директор. — Гапириб бўлдингиз, энди халакит берманг бирорга. Сиз сўзлаганда, биз тинч туриб, хурмат саклаб эшитиб ўтирган эдик... — Абдиева нафис дастрўмол билан юпқа лаблари четларини артди. — Мактабда қайси синф ёмон — ўн! Қайси синфнинг болалари ўқитувчилар билан жанжал қиласи — ўн! Ҳамманинг оғзида ўнинчи синф. Нима, мактаб коллективи, маъмуриятнинг сиздан бўлак иши йўқми? Марҳамат қилиб, олаётган маошингизни ҳаллолаб енг-да. Коллективдан кир излагунча, ақлингизни йигиштириб, ўкувчиларингизни йўлга солинг! Ким сизни тарихчи, дейди. Ҳайф!..

— Бас қилинг! — Назаров илкис ўрнидан турди. — Ҳақорат ҳам эви билан-да. Индамаса, жардан ташлаб юборасиз, кузғуларга ем қиласиз... Ошиб кетганимиз йўқ, — у нафасини ростлади, ҳийла ўзини босиб олгач, давом этди: — Сиз билан баҳлашиб ўтиришни ортиқча деб биламан. Эътиборингиз учун асабларим жойида, врачнинг ҳам муҳри бор. Билинг, сизга ёмонликнираво кўраётганим йўқ. Ҳаёлингиздан чиқаринг буни, акс ҳолда, жаҳл устида менинг гапларимни тушунмай қоласиз... Хосият опа, етти йил директор бўлдим, дедингиз. Шунча йиллик меҳнатингиздан вижданан розимисиз?

Абдиева орқасини курсига ташлаган кўйи бир қошини чи-мирганча кичик кўзларини Назаровдан узмади.

— Жуда тўғри айтдингиз, мактаб системасидаги нуқсонларни. Етти йилда биттадан камчиликка йўл қўйилган бўлса, демак, еттина нуқсон бор. Иш йўқ жойда камчилик бўлмайди. Бу киши илм эмас, гап курсига ўқиб келган, шекилли, — директор ўрнида тебраниб, чехраси ёришиб кулди.

— Биламиз, кўп нарса етишмайди. Чорасини кўриш керак. Ўшанда айтдик томорқа пулидан харжлаб у-бу кўргазмали курол, орайлик, деб. Мумкин эмас, банк ўтказмайди, дедингиз. Наҳотки, бошқа йўлини қилишнинг иложи йўқ эди?

— Сиз жиноят йўлини кўрсатаяпсиз.

— Йўқ, нега жиноят? Арча ёки совға ўрнига ўкув куролларидан энг зарурларини сотиб олганимизда, бирор сизни тутиб берармиди? Хосият опа, ўтган етти йиллик меҳнатингиз бугунги талаб олдида... — Назаровнинг гапи оғзида қолди.

— Бас қилинг! Ақлни бошқаларга ўргатасиз. Ҳозирча мен директорман. Менинг буйруғимни бажаришга мажбурсиз, — Абдиева энди пайдо бўла бошлаган пешана ажинларини силади.— Ҳўш, нималар демокчи эдим... Ҳа. Ўртоқ Жумаев, гап сиз-

га тааллуқли. Юрагингиздаги давосиз дардни анчадан бүён айтмоқчи бўлиб юргандингиз, шундайми? Сиз лакма бўлманг, оддий физкультурачисиз. Ҳар куни болаларнинг қўлига тўп бериб стадионда чоптиришдан бўлак нарсани билмайсиз-у, сиёсатни, Назаровнинг хатти-ҳаракати, ниятларини қаердан биласиз? Ўзингиз ҳам Назаровдан қолишмайсиз, лекин биз ёшингизни, хизматларингизни, жанговор орденларингизни хурмат қилиб, чидаб келдик. Икковингизнинг дарс методингиз битта: сизга битта коптоқ бўлса, Назаровга машғулотга алоқаси бўлмаган воқеа-саргузашт айтиш. Давлатни, ёш авлодни алдаш бундан ортиқ бўлмайди.

— Йиғилишда масхара бўлманг, Хосият опа, раҳбарсиз, — мулойим кулди Назаров.

— Ёдингида бўлса керак, мен сизни бир неча бор огохлантирдим... Ўртоқлар, мактабда бундай худбин, калондимоғ, „билимдон“ одамларга ўрин йўқ! Мен қўйдек ювош, мўмин-қобил Турсуновдан хафа бўлиб ўтирибман. Гал бу ёқда экан. Эртага рапорт ёзиб районога бораман. Сиз, Назаров, ўқитувчиликка лойиқ одам эмассиз. Коллектив соғлом эди, унинг заҳарланишига йўл қўймайман... — Абдиева ўрнидан турган Назаровни қўли билан ишора қилиб ўтиргизишига уринди.

— Кечирасиз, сўзлаш ҳуқуқини сиз бермагансиз, шекилли.

— Коллектив маърузангизга муҳтож эмас! Ўтилинг!

— Бу коллектив фикрими?.. — Назаров ўтирганларга узоқ разм солди. Бирор миқ этмади. Фақат Турсуновгина бошини қўтарган кўйи, гоҳ Абдиевага бақрайиб қарап, беихтиёр қўли чўғдек иссиқ чўян пеккага теккандай сесканиб тушарди.

*
* *

Қоровул чол ўқитувчилар хонасидаги чўян пеккага ўт қала-япти. Эшик очилиб, хонага Назаров кирди.

— Э, домла, баравқт келибсиз?.. Ва алайкум ассалом! Бу, дейман тобингиз йўқроқми, чоғи?

— Йўғ-е, тоға. Ташқари совук, кор учқунлаяпти, — Назаров пальтосини ечиб, илгичга илди. Дераза токчасига қорни билан суюниб, қўлларини бир-бирига ишқади. Ҳовлида, шамолпана жойларда сийрак қор учқунлаб ўйнарди. Стадиондан мактабга томон Чори билан Зулфия бирга келишяяпти. Шўх шамол қадам теккан ердаги қовжироқ барг, хас-хушни учирив кетади, киз бўйнига ўралган парча-парча қизил гулли пахта рўмол попукларини тортқилайди, кўм-кўк пальтоси ўнгирларини ортга қайиради.

Хона ўқитувчилар билан гавжум бўлиб борди.
Назаров деворга қоқилган журнал жовонига қўл узатганда,
столида ўтирган Раҳматов:
— Журнални жойига кўйинг, Назаров, — деди оҳиста. — Хозир
директор билан районога борасизлар.

*
* *

Кўнгироқ чалинишига анча вақт бор эди. Назаров синфга
кирди. Болалар жамулжам. Совуқда узоқ қишлоқ йўлларини
босиб келган йигит-қизларнинг юzlари қизарган, кўzlари чи-
ройли порлайди. — Муаллим, журнални ўзим келтираман, ово-
ра бўлиб юрманг, — деди Чори.

— Йўқ, керакмас.... Ҳамма келдими? — Назаров болаларга
бир-бир қараб олди. — Хўш, болалар, мен сал фурсат сизлар
билин гаплашмоқчи бўлиб кирувдим... Қизиқ-а, шундай пайт-
ларда гап топилмай қолади.

Назаров самимий табассум қилди. Кўзларидаги ҳоргинлик
ўрнини қувноқлик згаллади.

— Ха, майли, кейинчалик гаплашармиз.

У стол устидаги оқ жундор телпагини олди-ю, бошига бос-
тириб кийиб олди. Эшикни секин ёпиб чиқиб кетди. Пашиша
учса эшитилар даражада жимиб қолган синфдаги ўқувчилар
коридорда тобора узоклашаётган так-тук оёқ тавушини нафас
олмай тинглаб туришди.

*
* *

— Даҳлизга чиқиб хабар олинг, нима шов-шув? — юzlари
салқи, тепакал, бақбақаси осилган районо мудири ёнида ўтирган
қорачадан келган методист йигитга ўгирилди.

Йигит чиқиб, яна қайтиб кирди.

— Нима гап? Кимлар экан?

— Бешинчи мактаб ўқувчилари. Ҳузурингизга киришмоқчи.

— Нима? — дераза тарафдаги қатор курсиларнинг бирида
ўтирган Абдиева туриб кетди.

— Тушунарли, — деди районо мудири. — Хозир замон шу-
нақа, эски аравалар пойгага чидаш бермайди. Ҳалақит берса
четга суриб кўйишади. Яхши иш бўлмапти. Назаров ҳақ.

Методист йигит яна ташқарига чиқиб анча ҳаяллаб қолди.

Тирсагини столга таяб, салқиган юзини буришириб, тепа-
кал бошини қашиётган районо мудири давом этди:

— Аксинча, сиз ёшларнинг кучидан, қобилиятидан фойда-
ланинг. Начора, жуда оғир — бўйинга олиш, лекин ёшлиқ ҳами-

ша ғолиб. У тояди, шикаст ейди, суринади, бироқ ҳеч нарса кўрмагандек, қаддини тиклайди, олдинга қараб кетаверади. Биз қоламиз. Кўйинг жанжалларни... Сезмаяпсизми, хонанинг ҳавоси ғалати-я, — деб ўрнидан турди мудир. — Дарчани очсанм бўладими?.. Сизгача Назаров кирган эди. Мактабга қайтириб юбордим. Карши эмасмисиз?..

— Сизни сўрашяпти, — деди хонага кирган методист йигит мудирга.

— Қизик, — мудир кулимсираганича чикиб кетди.

Ўн ҷоғли йигит ташқарида уни дарҳол ўраб олишди.

— Ўнинчи синфми? Эшитганмиз, интизоми йўқ, деганлари-ча бор экан. Синф раҳбарларинг Назаров шу ерда эди. Тутиб турсам бўларкан. Шу ахволда сизларни кўрганда, роса изза бўларди. Афсус, мактабга қайтиб кетди.

— Ростми? Чинингизни айтинг!..

Маориф мудири қўлларини очиб, наҳотки, ишонмасаларинг, ишорасини қилди.

— Раҳмат, муаллим!

— Назаровни уялтириб юрманглар...

Болалар туман марказига велосипедда келишган эди. Шоша-пиша велосипед рулларини буришди ва изма-из кимўзарга пойга қўйишиди. Йўлнинг ярмида Назаровга етиб олишди.

СҮҚМОҚДАГИ ОДАМЛАР

Арғамчи сой орқали Кофирниҳон воҳасига тоғ оша телеграф сими тортилаётган эди. Бу ишни кузакда тугаллаш кўзда тутилган бўлса-да, лекин ишчи кучи етишмаганлигидан қишига қолиб кетди. Алоқачилар тоғ шароити қийинчиликларига аста-секин кўнишиди, тоғликлар билан тил топиб кетишди. Дўст топишда, ширингүфтторликда алоқачиларнинг бошлиги Аъзамнинг олдига тушадигани йўқ эди. У қишининг зерикарли кунларининг бирида тоғда орттирган дўсти — ўрмон қоровули Абдулланикига борди. Эртаси эса Абдулланинг дўсти Садир исмли йигит меҳмонни эчки сўйиб, уйига таклиф қилди. Меҳмондорчиликдан чиқиб, алоқачилар ёнига қайтаётганда фалокат юз берди...

I

Тепалик ён бағридаги пастак чўпкори бино пешайвони устунига боғлаб қўйилган тўриқ от бошини хам қилиб турар, баданидан оққан тер ёллари учida қумалоқ бўлиб музлаб қотиб колган. Онда-сонда тепиниб пишқирганда, бурнидан чиқсан буғ катқалоқ ер узра ёйилади. Чор атроф, уй устига ўмровини ташлаб турган тепалик олачалпоқ қор билан қопланган. Вақт чошгоҳга яқинлашиб қолган бўлса-да, ҳаво юмшамаганди.

От сўқмоқдан олдинма-кетин келишаётган икки қишига лоқайд караб турганда, чўпкори уйнинг бир тавақали эшиги очилиб, қора сатин тўн кийган, ёш бўлса-да, соқол қўйган қиши чиқиб келди. У оти ёнига келиб айилни бўшатди ва худди одамга мурожаат қилаётгандек:

— Ташибиш билан бўлиб сени ҳам эсдан чиқарибман, — деди отни эркаларкан, гуноҳкорона овозда. У от бўйнига қўл ташлаганди, қумалоқ муз баданига текканиданми, жонивор бошини кўтариб силкинди, сувлиғини чайнади. Йигитнинг кўзлари устундаги михга илинган емли тўрвага тушди. У отнинг сувлиғини чиқариб, тўрвани бошига кийгизиб қўйди. Сўқмоқдан келаётгандар яқинлашиб қолган эди.

— Ассалому алайкум, уста бобо.

Олдинда келаётган ўрта бўйли, мошгуруч соқолли қария йигитнинг саломига алик олди ва вазминлик билан:

— Абдуллабой, тинчликми? — деб сўради.

— Тинчлик-ов.

— Тинчлик бўлса, нега мана бу ошнанг ваҳима қиласди? — Уста ўзи билан келган озғин қишини кўрсатди.

— Айтса айтибди-да, — озғин қишининг нима деганини ўз қулоғи билан эшитгандек жавоб берди у.

— Нима бўлди ўзи?— Уста пешайвон тагида тўхтаб, каштали белбоги орасидан қўлини ўтказиб олди.

— Ҳалиги, телефончи Аъзам ошнамиз...

— Э, кўрувдим уни мен. Бўйи терақдай, эшакка минса, оёғи ерда судралиб юрадиган ошнангми? Ҳа... Хўш?

— Зовга учиб кетибди... Уйга кирайлик, кўрасиз.— Абдулла олдинга ўтиб эшикни очди.

Уста пойабзалидан қорни қоқиб хонага кирди. Хона ичи хира ёруғ бўлганданми, ҳайтовур, унинг кўзлари анчагача сўкчаклар ёнида кўрпа-тўшак қилиб ётган кишини кўрмади. Аъзам сўкчакка юзини қаратиб ётгани учун, Абдулла уни ухлаган хаёл қилиб, кўрсаткич бармоғини лабларига қўйиб „жим“ деган ишорани қилди. Калишини бўсағада ечиб қолдирган уста маҳсида кўрпачага омонатгина чўқди. Абдулла остононда хонага кишини ҳам, ташқарига чиқиб кетишни ҳам билмай саросимада турган йигитта юзланди:

— Садир, уста бобо билан гурунглашиб ўтири, мен дастурхон келтирай.

— Дастурхонни нима қиласан, уйдан чой ичиб чиқувдим. Бунинг устига, вақт зик,— уста мезбоннинг ташвиш чекишини истамай гапирди.

— Чой қайнаб турибди, уста бобо,— деди Абдулла ёлворгансимон.

— Мен олиб келаман,— Садир ташқарига чиқиб кетди.

— Ҳа, майли. Энди бир бошидан тушунтир-чи, нима бўлганини,— уста тирсагини тиззасига қўйиб гавдасини энгаштириди.

— Булар туновин Катта Намозгоҳда ишларини тугатган экан. Бозордан қайтиб келаётганимда, учрашиб қолдик. Эртасига Кичик Намозгоҳга сим тортамиз, деди. Юринг, чой-пой ичиб, ҳангомалашиб қайтамиз, девдим, кўнди. Кеча уйда гурунг қилдик, эрталаб Садир уйига чақирди. Кейин Садирни қўшиб Арғамчига юбордим. Ҳалиги ҳангى эшакни Аъзам миниб олди. Эшакни Садир бирга қайтариб олиб келиши керак эди... Ясситованинг бузуғи бор-ку?

— Хўш?

— Ўша ердан ўтаётганда, эшак қурғур тойиб кетибди. Тованинг усти музлаб қолмаганми? Бу бечора бўлса йиқилган эшакни турғизаман, деб бутидан кўтариби. Эшак бўлса жон ҳолатда иргиб туриб кетган, яна йиқилган. Бу бўлса,— Абдулла имо билан Аъзамни кўрсатди,— илиниб турғанмикан, эшак кўкраги билан йиқилганда, оёғи тойиб кетган. Иккови ҳам сойга учиби. Аввал эшак, устидан буёқ тушган.

— Ё, пирим-э,— уста ёқасини ушлади. — Бу-ку, тоғни кўрмаган, ҳамроҳининг кўзи қаерда экан? Айтмаптими, пиёда етаклаб ўтинг деб.— Уста хонага дастурхон кўтариб кирган Садирга ўкрайиб қаради.

— Кўз очиб юмгунча бўлган-да, бу ҳам шошиб қолган, — Абдулла дўстининг тарафини олди.

— Фалокат оёқ остида деб шуни айтишади-да.

— Эшак-ку ўша заҳоти тил тортмай ўлган, эй, ўлса ундан нари, лекин бу кишининг омон қолганига ақлим етмай турибди. Насибаси бутун экан-да...

— Эшакнинг фалокати куррани ола кетди, демайсизми, Абдулла, — кўрпа тагидан Аъзамнинг бўғик товуши эшитилди. У юзини очмоқчи бўлди-ю, бироқ қалтис ҳаракат қилдими, инграб юборди.

— Насибангиз бор экан, ўғлим, безовта бўлмай ётаверинг.

— Бўлари бўлди, бўёғи синди, отахон, — Аъзам тирсаклари га таяниб турмоқчи бўлган эди, билаги тойиб кетди. Курак суги қарс этди. Абдулла сапчиб ўрнидан турди. Уста анграйганча қотиб қолди. Беморнинг кўз косалари кенг очилиб, сўнгра аста-секин юмилди. Пешанасида йирик-йирик тер томчилари пайдо бўлди, юзи оқариб кетди.

Ўлланиб қолган уста жимликни бузишдан кўрқандек энгашиб Абдулланинг қулогига:

— Нима қилдик? — деб шивирлади.

— Умид факат сизда, уста бобо. У ёқ-бу ёғини кўринг-чи?

— Одамнинг юраги бетламаяпти,— уста шундай деди-ю, айни пайтда тивит чакмонини ечиб, сурп кўйлаги енгларини қайтарди. У Аъзамнинг бошига энгашиб, астагина кўрпани кўтариб, қатлаб қўйди. Бемор оғир нафас оларди. Унинг узун оёқларига ёпишиб турган тринка шимга лой, эшак тўқими жунлари ёпишиб қолган эди. Уста ўнг кўлини шим устига қўйиб, эҳтиёткорлик билан оёқ учига томон пайпаслади. Қўл тизза тўпигидан ўтган ҳам эдики, bemor қаттиқ инграб юборди. Уста дарҳол кўлини тортиб олди. Аъзамнинг сўлғин юзига термилиб қолди.

— Оёқ чўрт синиб кетган-ку.

— Мен сизга нима девдим, фақат терисига илиниб турибди,—деди Садир ғулдураб.

— Уста бобо, оёқ-ку гўрга-я, лекин белимни ололмаётганимдан кўрқаяпман,— Аъзам кўзларини аранг очди.

— Белингиз ҳам оғрияптими?— Хушёр тортиб сўради уста.

— Танам иккига бўлинниб кетгандай. Оғрикнинг зўридан кўзларим косасидан отилиб чиқиб кетадигандек бўляпти.

— Бу ёғи нима бўлди энди, а? — Уста саросимага туғди. — Қани, чидағ туринг-чи, мен бир кўрай.

Аъзам кўлинингина кўтарди, холос. Гавдасини қимирлатишга мадори етмади. Уста чап қўлини Аъзамнинг бели тагига, ўнг қўлини эса корни оша ўтказиб олмоқчи эди. Шу пайт беморнинг елка ва кўкраги шундай бир шиддат билан кўтарилиб тушдики, бундан устанинг эсхонаси чиқиб кетаёзди. У ўрнидан туриб бошини чайқади ва Абдуллани имлаб ташқарига чиқди.

— Йиқилган жойдан бу ергача қандай олиб келдинг?

— Отда.

— Ҳм... Қизик устида келган...— уста ўйланиб қолди.— Менинг қўлимдан ҳеч нарса келмайди. Уни бу ахволда узоқ қолдириб ҳам бўлмайди.

— Садирни дўхтирга юбормайми?.. Барибир, дўхтири келиб нима қиласарди... Бошим қотиб қолди.

— Гап шунда-да. Агар дўхтирга одам юборсанг, вақтдан ютқазасан. Бир кунлик йўл. У ҳам келса, шаҳарга олиб бориш керак, дейди. Бунинг устига, куннинг совуқлигига қара... Ким билади дейсан, бирон кор-ҳол бўлиб колса...

— Уста бобо, маслаҳатингизни айтинг, нима қилайлик? Ахир, сиз устасиз, бундайларни кўп кўргансиз.

— Бундайини кўрмаганман. Мен чиқкан-синганларни амаллайман. Ҳозир эса чорасизман, тўғрисини айтяпман. Оёгини-ку, бирон нарса қилиш мумкин, менинг кўркувим белидан. Ҳали ушлаб кўраман десам, шилта тер. Куймучи шишиб кетган. Бу... яхшиликнинг аломати эмас. Бирдан-бир чораси — паствга, дўхтирга олиб жўнаш. Қанча тез бўлса, шунчча яхши.

— Ўххў, — деб юборди Абдулла.— Бу ахир тўشاқда ётиб шунча азоб чекяпти, худо билади йўлда нима бўлади.— У нажот излагандай, камардек қорайиб қўринаётган сўқмокқа, губор орасидан элас-элас қўзга чалинаётган водийга тикилди.

— Бошқа илож йўқ. Ахир, ўзинг айтдинг-ку, зовдан шу ергача отда олиб келдим, деб. Ҳеч бўлмаса, Арғамчи сойнинг адогигача олиб боринглар, у ёғига мошин-пошин топилар... Бўлмаса, ошнангни бой бериб қўйишинг мумкин.

Устанинг маслаҳати қатъий эди. Бу Абдуллани баттар чўчитди, ҳам шошириб қўйди.

II

Уста урина-урина пешинга бориб замбилини қўлдан чиқарди. Унга ёрдамлашиб юрган Садир Абдулланинг ўтовга кириб, чинни косада атала олиб чиққанини ва Аъзамнинг ёнига кириб кетганини кўргач:

— Уста бобо, мана, замбил ҳам таҳт бўлди,— деди эшиқдан қўзини узмай.— Энди Абдуллага айтинг, мени ҳам судраб юрмасин.

- У нима деганинг? — Уста ҳайрон бўлди.
- Уйда ишим кўп эди.
- Иш қочиб кетмайди. Ошнангнинг ошнаси сенинг ҳам ошнанг. Бошига ташвиш тушганда, дўст дўстлигини кўрсатади. Баҳонангни қўй. Бунинг устига, у меҳмон. Меҳмон — атойи худо.
- Баҳона эмас, сизга тўғрисини айтяпман,— бошини эгди Садир.
- Абдулланинг бир ўзи эплай олмайди. Куч-кудратим бўлганида, ўзим ҳам сизларга қўшилиб борардим. Ҳозир ортиқча юк бўламан. Ундан кўра, от-уловни ҳозирла. Кечга қолиб кетманглар тағин... Кун қисқа.
- Уста Аъзамнинг ёнига кириб кетди. Садир анчагача хомуш хаёл суреб қолди. Сўнгра овоз чиқариб Абдуллани чақирди. У чиққач, аста шивирлади:
- Устанинг отини сўра.
- Сеники-чи?— Ҳайрон бўлиб сўради Абдулла.
- Яғири чиқиб кетибди.
- Кеча дуппа-дуруст эди-ку? — деди Абдулла ишонқирамай.
- Ишонмаяпсанми?
- Йўғ-э, майли, устадан сўраймиз... Ҳой, уста бобо! Бу ёққа қаранг.
- Уста хонадан букчайиб чиқиб келди.
- Нима дейсан?
- Отингизни бериб турсангиз, девдим.
- Садирники-чи?
- Яғири очилиб қопти.
- Йўғ-э,— уста Садирга маъноли боқди. Садир бошини қуий эгиб турарди.— Бўпти. Садир уйга борсин-да, отни абзаллаб келсин,— уста бошқа сўз қотмай, хонага қайтиб кириб кетди.
- Аъзамга бир амаллаб атала ичиришди. Сўнгра уни кўплашиб олиб чиқиб, қават-қават кўрпа ташланган замбилга ётқизиб, бир учини Абдулланинг тўриқ, иккинчи учини устанинг самани эгарига маҳкам қилиб боглашди. Уста отларнинг ҳали у ёнидан, ҳали бу ёнидан ўтиб, замбилни силкитиб кўради. Унинг пухта ўрнашганига қаноат ҳосил қилгач:
- Ок йўл сизларга,— деди ва беморнинг кўкрагига қўлини қўйиб,— тезроқ тузалиб кетинг, ўғлим,— деди, далда бериб. У Абдуллани четга имлаб чакирди-да, тайнинлади: — Дўхтирга ўз қўлинг билан топшир. Ишни хом қилиб қайтма.
- Хўп, уста бобо. Биздан хавотир олманг,— ишонтириди Абдулла. Улар йўлга тушишди. Олдинда Садир, эшакка минган, ўртада икки от эгарига кўприк қилиб ортилган замбилда ўраб-чирмалган Аъзам ва орқада эшакда Абдулла кетиб боришарди.

Хадемай қишлоқ ортда қолди. Отлар дастлаб, бундай юк кўтариб юришга одатланмаганлари учун, анча қийналишди. Лекин улар ҳам бора-бора маромга тушишди ва кўнишишди. Замбил бошдагидек фирчиламас, дастаклар тоб еб ўрнашган, отлар ҳаракатига мос ҳолда тебраниб борарди.

Абдулланинг фикр-зикри кечада Аъзам учуб кетган зовда эди. Улар шу зовдан ўтиши керак бўлгани учун ҳам ҳар эслаганида юраги шув этиб кетар, яна бирон фалокат юз бермаса, деб вужудини вахм босарди. У атрофга аланглаб қааркан, ҳавонинг юмшаганини, осмонни оғлопқ булутлар қоплаётганини ва эрув бошланганини кўриб, булардан таскин топар ва агар ҳаво исиб кетса, ўша бузук товадаги музлар эрийди, отлар бемалол ўта олади, деган ўй билан ўзини овутарди.

Бир оздан сўнг ясси тованинг қораси кўринди. Сойнинг тик бетида хамирдек кўпчиб чиқсан товатош қорайиб турарди. Абдулланинг юраги гупуллаб ура бошлади. У беихтиёр олдинда кетаётган отларнинг туёғига қаради. Отлар эса хавфдан бехабар, осойишта ва дадил қадам ташлар эди. Тиззалари билан тўқимга таянганча гавдасини ғоз тутиб у Садирга қичқирди:

— Эҳ-ҳей, Садир, сал илдамроқ ҳайда. Йўлни териб юр, териб.

Садир эшагини тўхтатиб, чап оёғини тўқимдан осилтириб, ортига ўгирилди:

— Ўзинг олдинга ўтсанг яхши бўларди.

Абдулла унинг гапини әшиитмади. У эшакдан тушиб, чопқиллаганича бориб тўриқнинг жиловидан тутди:

— Чух, жонивор! Чух!— деб бақириб-чақириб отга далда берди.

Садир минган эшакнинг туёқлари музи эриган товатошга тақиллаб тегди. Отлар ҳам қимтинишганича илдам юриб, товага қадам босишли. Сойни от туёқларининг тақа-туқ товуши ва йироқ-йироқлардан қайтаётган акс садолари тўлдириб юборди. Бу эса Абдулланинг кўнглидаги вахмни сидириб ташлагандек, бир неча дақиқа бурун кўрқинчли кўринган бу сой энди ажиб оҳангларга макон бўлиб туюлди.

Улар энди тор сой ўзани бўйлаб боришарди. Абдулла тепада қолган ясси товага елкаси оша қааркан, унинг оддийгина йўл эканини, бир умр шу йўлдан ўтиб пинак бузмаганини, лекин бугуниги воқеалар давомида у жуда салобатли кўринганини ҳис этди. Сойнинг таги нуқул това, тошлардан иборат. Сойдан қишинёзин шўр сув оққанидан, кирғоқлардаги товатошлар ҳам шўрлаб, оқариб кетган. Тақа-туқ овозлари бу ерда янада жарангдор эшитилар, тик бетдан осилиб турган писта ва хатанак шохларида сакраб юрган митти тоғ чумчуклари, булбуллар йўловчилар-

нинг олдига тушиб, парвоз қилиб боришарди. Ўқтин-ўқтин Абдулла эшак тўкимига тирагиб, гавдасини кўтарганича Аъзамга қарар, у билан сұхбатлашгиси келар, лекин гапирса озор чекади, деган фикрға бориб, индамасди. Аъзам эса кўзларини очиб, сойнинг тик бетларига, ҳар қадамда ўзгариб бораётган манзарга, юксакларда шўппайиб турган сербутоқ писта, заранг, куриган шувоқ ва қиши бўлса-да, ҳамон салласини ташламаган йўғон пояли кавракларни томоша қилиб келарди. Энди у оғриқ сезмас, замбилга қаттиқ боғланганидан, қони уюшиб қолган кўлларини ҳам қимирлата олмас эди.

Орадан бир соатлар ўтгач, сой ўзани аста-секин кенгая бошлиди. Тик бетлар ўрнини силлиқ адир ўркачларига ўхшаш тепаликлар эгаллади. Бир тепалик ортидан иккинчисини баҳузур кўрса бўладиган уфқ очилди. Тепаликларнинг ўркачлари ҳам кия бўлиб, тобора паст туша бошлади.

Бироқ энг катта хавф олдинда эди. Кутимагандан Учли тирсак деб аталадиган жойда кўнгилсиз ҳодиса юз берди. Буни на Абдулла, на Садир ва на тадбиркор уста ҳам хаёлига келтирмаганди. Учли тирсак Кизил билан адирнинг чегарасида эди. Шу жойда сой харсанг тошни бурчак бўлиб айланиб ўтарди. Сўқмоқ ана шу тирсак бўлиб турган учли товатошнинг тагидан ўтиши керак эди. Садир одатдагидек ҳеч нарсага парво қилмай, эшакда ўтирганича ўтди-кетди. Отлар унинг изидан дадил бораверишди. Абдулланинг эшаги сувга интилди. Лекин унинг кўзлари отларда эди: биринчи от силтаниб, лўкиллаб тирсак тошга тегай-тегай деб ўтиб бурилди. Лекин саман от ўтолмай қолди. Абдулла жон ҳолатда: „Тўхта!“—деб кичкирди. Афсуски, у кечиккан эди — замбил тошга тирагиб қолди. Шу пайт орқадаги от мувозанатни йўқотди, оёқлари сирғалиб кетди. Тўриқ от эса шакир-шукур кўчган тош, Абдулланинг қичқириги ва тўсатдан ортдаги шеригининг тисарилиб кетганидан чўчиб хуркиди. Замбилнинг сўнгги икки учи қарс синди ва худди бирор итаргандек саман от билан бирга бир метрча чамаси нишаб сойга кулади. Адбулла эшакдан сакраб тушиб чопиб келганда, замбил тўнкарилиб ётар, от эса ўрнидан турмокчи бўлиб талпинар, бироқ замбильдан чувалган чилвир ип оёғига ўралашиб қолганидан, жойида типирчиларди. Абдулла замбилни даст ағдариб Аъзамга қаради, қаради-ю, юзини кўллари билан тўсади. Беморнинг афт-ангорини таниб бўлмасди, кум ва майда чағир тош аралаш қонга бўялиб ётарди. Бу орада Садир ҳам етиб келди. Абдулла дарҳол белбоғини сувга ҳўллаб келиб, Аъзамнинг юзига босди ва эҳтиётлик билан артди. Беморнинг нафас олаётганини ҳам, олмаётганини ҳам билиб бўлмасди. Иккаласи унинг бошида тошдек қотиб туришарди.

— Хали балога қолмасак эди, — деди Садир қуриган шувокни чайнаётган саманга қараб туриб.— Ўзи-ку, оёғим тортмаган эди-я.

— Нафасингни иссиқ қил. Нафасинг курсин,— деди зарда билан Абдулла.— У нима деганинг?

— Оёғим тортмадими, албатта, бир касофат бўлади. Яхшилик билан тугаса-ку гўрга-я.

— Бор! Отларни боғла, тагин қочиб кетмасин, — Абдулла шеригига егудек бўлиб қаради.— У белбоғининг тоза жойлари билан Аъзамнинг юзидаги шилинганд, ўйилган жароҳатлардан сизиб чиқаётган қонни артишда давом этди.

Садир тўрикни ялангдаги пистага боғлашга боғлади-ю, устанинг оти ёнига келиб тўхтади. Саман орқа оёғидан бирини кўтариб турар, сонидан бир парча териси шилинганд эди.

— Ҳой, Абдулла,— деди Садир,— устанинг отига бир гап бўлган.

— Нима қипти?

— Ўзинг келиб кўр.

Абдулла шеригининг ёнига келиб, отни айланиб кўрди-да:

— Ўлмайди,— деди жиддий оҳангда.

— Менга қара, Абдулла, устанинг отига товон тўлаб юрмайлик.

— Хотиржам бўл, ўзим жавобини бераман.

— Нима?!

— Отни уста менга берган, деяпман.

— Устани ташқарига чақириб от сўраган менми, сенми?— Абдулла қизишиб борарди.

— Мен.

— Нима? Тўхта, гап отда эмас, шекилли.

— Отда.

— Йўқ... Хўш,— Абдулла қийик кўзларини қисиб Садирга тик каради:

— Айтайлик, уста отини сенга берган. Нима бўпти?

— Мен уни эсон-омон эгасининг қўлига топширишим керак.

— Тўғри. Қачон?

— Ҳозир.

— И-ие, у-чи? — Абдулла Аъзамни кўрсатди.

— Уни сен биласан. Менга ошна ҳам эмас, танимайман ҳам.

— Айтдим-а, эрталабдан бери оғзингга талқон солгандай жим бўлиб қолувдинг... Ҳайвон экансан. Шунча йил ошнам, деб юриб кимлигингни билмаган эканман.

— Энди билдинг, мен шундайман,— безбетлик билан гапирди Садир.

— Кетмоқчимисан? Бор, жўна! Иккинчи марта ифлос юзингни кўрмай.

— Қизишима да, яхшилаб ўйлаб кўр. Мени тушун. Анови ўлиб-пўлиб қолса борми, бола-чақаси ҳам, ҳукумат ҳам сен билан мени тинч қўймайди.

— Сен ҳали шундан қўркиб ётибсанми... Ҳм-м! Сени одам деб юрган менга лаънат!— Абдулла юзини ўгирди.

Бу мунозаранинг ёмон оқибат билан тугашини пайқаган Садир лом-мим демасдан эшагига минди-да, саманнинг жиловидан еткалаб, йўлга тушиди. У биринчи муюлишгача эшакда борди-ю, сўнгра ортига бир қараб олиб эшагидан тушиб, отга минди ва қамчи босди.

Абдулла эса бу воқеадан донг қотиб қолган, жойидан жилса, оёклари қалтираб қулаб кетадигандек туюларди. У энди ўзини ўзи, нима учун Садирни боплаб дўппослаб, таъзирини бермадим, деб койир, аламидан ич-этини ерди.

III

Тоғларда тез қош қораяди. Абдулла жаҳлдан тушиб то аниқ бир қарорга келгунча атроф ғира-шира бўлиб қолди. У синган замбилини қачонлардир сой оққанда сув ювиб кетган камарга судраб кирилди. Қимирламай ётган Аъзамга қора ва далда, деб оти ва эшакни ҳам камарнинг рўпарасига боғлаб қўйди. Ўзи эса ўтин тергани қирга тирмасиб чиқиб кетди. Абдулла писта дарахтлари тагидан бир қучоқ ҳўл шоҳ-шаббаларни териб келганди, қоронғи тушган эди. У бир амаллаб гулхан ёқиб юборди. Оловнинг қизғин шульласи камардаги тош қатламларини, сой ўзанида ётган улкан харсангларни ёритди. Аъзам тилга кириб сув сўради. Абдулла унинг овозини эшитиб, ёш боладек севиниб, чопқиллаганча кўлмак сув излаб кетди. Яхшиямки, уйдан чиқаётганида пиёла ва у-бу егулик нарса олган экан. Ана шуларнинг асқотиб қолганидан ўзида йўқ хурсанд бўлди. У гулханга кўпроқ ўтин ташлади. Қизишган писта шоҳлари вишиллаб ёнар, Абдулла эса кўнглидаги хурсандчилик ўрнига хира кайфият чўкаётганини сезарди. Унинг фикр-ўйи таҳликали ва аёзли тунни қандай ўтказиш, бунинг учун нималар қилиш лозимлиги ҳақидаги ташвиш билан банд эди. Энг аввало, ўтинни кўпроқ ғамлаш керак. Шу хаёл билан гулхан ёруғи етган теварак-атрофда тимирскиланиб юриб ўтин йиғди. У гулхан бошида чўккалаганида, Аъзам бошини оловга ўгириб:

— Садир кўринмайди,— деди. У чилвирдан озод бўлган билакларини силарди.

Абдулла нима деб жавоб беришини билмай чайналиб қолди.

— Ҳа, Садирми?.. Уни қишлоққа юбордим. Биронтасини чақириб кел, деб,— деди-ю, лекин ёлғон гапирганидан ўзидан-ӯзи нафратланди.

- Сизларга ортиқча юк бўлдим-да.
- Оғайни, бизларга соғлиғингиз керак. Бунинг ҳеч ташвиши йўқ. Қалай сезяпсиз ўзингизни?— Абдулла Аъзамнинг ёнига ўтириди.
- Белимнинг оғриғи тўхтади. Назаримда, тошдан сал совуқ ўтятпи.
- Бўлмаса, сизга жой қиласман,— Абдулла гулханга яқинроқ ерга шоҳ-шаббаларни ҳафсалади билан териб чиқди. Сўнгра унинг устига замбилинг бир учини, кейин иккинчи учини кўтариб кўйди.— Кандай бўлди?
- Яхши,— Аъзам жилмайиб жавоб берди.
- Тортиниб ўтирманг, нима десангиз, шуни қиласман.
- Раҳмат, Абдулла. Сиз билан ўла-ўлгунча дўст бўламан.
- Ҳозир ҳам дўстмиз.
- Энди бошқача бўлади. Агар сизлар бўлмаганларингда, холим нима кечарди бу тоғларда.
- Одам бор жойда одам хор бўлмайди.
- Бизнинг хотин ҳали танимаса эди,— Аъзам ўзининг бу гапидан завқ қилди шекилли, анча очилиб кетди.
- Танийди. Соғ-саломат борсангиз бўлгани.
- У-ку шундай... Ўзимни яхши ҳис этяпман. Сиз мендан ховотир олманг... Бир нарсани ўйлаб ётибман.
- Хўш?
- Яна шу жойларга келармиканман?
- Бўлмасам-чи.
- Соғайиб кетсам, уйингизда бир ўтириш қилиб бераман.
- Кўй сўямиз, Садирни чақирамиз.
- Устаниям, албатта.
- Ҳаммаси яхши одамлар экан.
- Сойнинг тунги сукунатини отнинг ҳар замонда пишкириб қўйиши, гулханда ёнаётган хўл ўтиннинг вишиллаши, чирсиллаши бузиб турарди. Абдулланинг аъзойи бадани юмшаб, уйқу элита бошлади. У эшак тўқими устида тиззаларини қучоклаганича ухлаб қолди.
- У бир маҳал тошларнинг бир-бирига урилиб шалдираши ва қасур-қусуридан чўчиб уйғонди. Абдулла дастлаб уйқусираб бу овозларнинг қаердан келаётганини англамади. Тўриқ от кишнади. Унга жавобан узоқда яна бир от кишнагандек бўлди. Сал ўтгач эса гурунглашиб келаётган кишиларнинг товушлари барада кулоққа чалинди.
- Йўловчилар келаяпти дейман.
- Йўғ-э,— деб Абдулла ўрнидан туриб кетди.
- Садир бўлмасин тағин.
- Садирми?..— Абдулла сўкинишдан тилини тийиб қолди.
- Кўрасиз-да.

Йўловчилар уч отлик экан. Улар камар қаршисига етгач, тўхташди. Отдан биринчи бўлиб тушган киши сувни шалоплатиб, тошларга сурина-сурина, қоқина-қоқина шошиб кела бошлади.

— Нима бўлди, Абдулла?— Бу устанинг ҳаяжонли овози эди. У ҳансираганича беморнинг бошига чўккалади ва қўлини Аъзамнинг пешонасига қўйди.

— Уста бобо, маза қилиб ётибмиз,— Абдулланинг ўрнига Аъзам жавоб берди.

— Сизмисиз, меҳмон?

— Ҳа, мен.

— Ё пирим-э, қайси бирига ишонишимни билмайман. Эшитдим-у, жон-поним чиқиб кетди. Ҳа, Садир...— Устанинг гали оғзида қолди. Абдулла устанинг билагидан тутди, имо билан „гапирманг“ маъносида бошини илкис силкитди.

Устага ҳамроҳ бўлиб келганлардан бири ўқитувчи Саттор эди. У ёши ўтиб қолган кишиларга хос вазминлик билан гап-сўзларни эшитиб ўтирарди. Учинчи отлик йигит зса дарҳол ўтин териб келди-да, гулханни гуруллатиб юборди. Бир оздан сўнг уста ёруғда Аъзамнинг белини кўриб, чиройи очилганича мамнун кайфиятда:

— Ўглим, бир қасофатнинг бир шарофати ҳам бўлади, деб бежиз айтишмаган,— деди. Бунга мана ҳозир ишониб ўтирибман. Чамамда, кейинги йиқилганингиз наф қипти. Зовдан учганингизда бели сингандир, деб ўйловдим. Үндай эмас экан. Сон суякнинг боши — урчуғи чаноқ суяқдан чиқиб кетган экан. Иккинчи йиқилишингизда ўрнига тушибди.

— Қаранг-а,— деди ўқитувчи ишонқирамай.

— Меҳмон йигитнинг бардошига қойил қолиш керак. Оёғингизни-ку, ўзим ҳам тузатардим... Энди, ўғлим, йўлга чиққанмиз, дўхтирга кўрсатамиз.

Камардагилар гурунглашиб ўтириб, тонг отганини сезмай қолишиди. Улар атроф одам одамни танийдиган даражада ёришгач, яна йўлга тушиши.

Ўртада, йигитлар қуршовида икки от — Абдулланинг тўриги ва устанинг самани эгарларига маташтириб боғланган замбilda Аъзам ётарди. Унинг шилинган юзларидаги жароҳатлар котган, кўнгли ҳам тонг каби ёришиб келарди. Сойнинг ўзани энди анча кенгайган, унга адир устидан, ён-атрофдан келиб кўшилган нотаниш йўллар ҳам кўзга яққол ташланарди.

IV

Хужрада уч киши ўтирарди. Қотма, бошяланг радиист йигит иккала тирсагини рация турган стол қиррасига тираган кўйи деразага қарар, унинг ёнида алоқачиларнинг бошлиғи, ёнок

сүяклари бўртиб чиқкан, бўйчан Аъзам бир ой бурун гипс таҳтакачдан чиқкан оёғини узатиб, қўлидаги ғўдир ҳассани чертар, ахён-ахёнда бўсағага яқин бурчақдаги курсида кўксини босиб ўтирган Садирга кўз қирини ташлаб қўярди. Жимликни эшитилаётган шитирлаган ва чийиллаган товушлар бузиб турарди.

— Садир, неchanчиси бу?— деди қошини силаб Аъзам.

— Лаббай?— хаёл суреб ўтирган Садир қаддини кўтарди.

— Нечанчи фарзандингиз, деб сўраяпман.

— Ха, ҳа-я, олтинчиси.

— Дарди қачон бошланди?

— Туновин оқшом... Қийналиб кетди. Хотин-халаж ҳам ҳеч нарса қилолмапти...

Радист шошиб наушникни қулоғига тутди:

— Нима?.. Қабул... Ҳозир сўраб кўраман. Аъзам ака, Термиз об-ҳавони сўраяпти.

— Кўриб турибсан-ку, айт: ҳаво очик, де.

— Йўқ, яна самолёт кўнадиган жойни ҳам сўрашяпти.

— Менга бер, — Аъзам наушникни радистдан олиб қулоғига босди — Аҳвол танг. Оға. Кечгача бардош беролмаса керак. Нима? Кечки аёзни кутиш керак?! Ҳозир... Тахминан саккиз даражада иссиқ. Куёш чиқиб турибди. Ернинг сатҳи сал-пал эриган. Кўнса бўлади... Ўтиниб сўрайман, оға... Яхши, яхши, кутамиз... — Аъзам наушникни столга кўяркан Садирга юзланди.— Узоги билан бир соатдан кейин самолёт келади. Тайёргарликни кўриб қўйинглар... Кенглиги эллик, узунилиги икки юз метрдан кам бўлмасин.

— Аъзамбой, байроқча бизда нима қилсин.

— Э! Қизил байроқча бўлмаса... ана, белбоғингиз-да. Яна бирор-икковдан сўрарсиз, латта-путта бордир, ахир. Боринг, вақтни ўтказманг.

Садир чиқиб кетгач, Аъзам ўрнидан турди ва хона ичидаги ёқдан— бу ёққа оқсоқланиб юра бошлади. Ўзига ўзи фудранди:

— Шундай кунда ҳам дард тутадими...

Радист йигит мийигида кулиб қўйди.

— Дард устига чипқон. Усиз ҳам иш бошдан ошиб ётибди. Менга қара, Холбой, мен ҳовлида бўламан, агар бирон гап чиқиб қолса, дархол етказасан.

— Хўп.

V

Тушга яқин ҳаво исиди. Ялангликлар, паст-баданд тепаликлар ва йироқдаги водий юзасидан қуюқ, оқ тутунга ўхшаш буғ кўтарила бошлади. Боботофнинг ёнбағирлари қордан жимирлар, шимолдан шабада эсади.

— Бүёғи чатоқ бўляпти-ку, Холбой, — деди хонага қайтиб кирган Аъзам атрофни деразадан кузатаркан. — Тоғники шуда. Баҳор бўлса ҳам ердан қор аrimай ётибди.

— Хали баҳор эмас, Аъзам ака, — гап ташлади зерикиб ўтирган Холбой.

— Нега? Ойнинг неchanчиси? Ўн тўртими? Бўлди-да, яна нима ками колди... Баҳор ҳам, оға, сенга ўхшаб имиллагани имиллаган.

— Айтинг-е.

— Тўғри-да.

Бир оздан сўнг самолёт овози эшишилди. Иккаласи ҳам ташкарига чиқишид. Тоғ ўркачларидан ошиб ўтган самолёт қишлоқ сари пастлаб келарди. Болалар аллақачон ялангликларга чопиб чиқишиб,чуввос кўтаришар, уйларнинг олдида эркаклар, аёллар тўпланишганди. Ҳамма осмонда айланётган тўши сарик, бикинида қизил хоч тамға босилган самолётни кузата бошлади. Учувчилардан бирининг боши шундоқкина кўриниб турар, у қўл силтаб нималарнидир ишора қиласарди. Самолёт пастлади. Қизил ва сарик рангли белбоғ, пешанабоғлар, рўмоллар қадалган ер узра пастлаб шўнғиб учишга учди-ю, лекин қўнмади. Белгиларнинг охирига етгач, яна шиддат билан осмонга кўтарилиди. Самолёт қишлоқ устида икки марта айланди. Учувчи нималарнидир деб қўлларини ёзди. Сўнгра самолёт қанотларини гоҳ у ён, гоҳ бу ён ликиллатди. Бу „қўнолмаймиз“ дегани эди.

Қишлоқ аҳли узоқлашиб бораётган самолёт ортидан қараб колди.

— Нима қилгани бу, Аъзам ака,— Садир энди уни акалай бошлади. У узоқдан югуриб келганидан нафаси бўғзига тиқилиб ҳансираради.

— Кўриб турибсиз-ку, мана!— Аъзам ер узра қалқиб турган қуюқ туманни кўрсатиб, зарда билан гапирди. Туман эса тобора қалинлашиб, тоғ ўнгирларини ҳам чулғай бошлаган эди.

— Қандай кўргилик, қандай кўргилик бўлди бу, а? Э Худойим-эй! Аъзам ака, энди нима бўлади, шундай ўлиб кетаверадими? — Садирнинг аъзори бадани титради.

— Ҳовлиқманг! Кап-кatta одамсиз-у, нафасингиз совуқ. Уялмайсизми. Боринг уйга. Йиғи-сиғини тўхтатинг! Эркак деган ҳам шундай бўладими?— Аъзам асабийлашарди. У ҳамон тоғ тарафдан эшитилаётган мотор овозига кулоқ соларди. Аъзам Холбойнинг биқинига туртди:— Бу ёққа юр-чи! — Иккаласи рация турган хонага қайтиб киришиди.— Қани, Термизни сўра-чи, буёғи нима бўларкин?

Холбой наушникни қулогига тутди. Чийиллаган, пипилаган овозлар эшишилди. Алоқа ўрнатилди.

- Ўзингиз гаплашасизми?— сўради Холбой.
- Йўқ, ўзинг гаплашавер,— тўнғиллади Аъзам, лекин радиист ёнидан жилмади.
- Қабул, қабул... мен... Алло, самолётнинг қайтиб кетганини ўзимиз ҳам кўрдик. Ерни кўролмапти?.. Энди нима қиласиз? Кутиш керакми?
- Нимани кутиш керак, менга бер! — Аъзам ўрнидан сапчиб турди.— Одам ўляпти, тушуняпсизми? Бир эмас, икки киши...— У аввал жон-ҳолатда қичқирди, кейин тўлқиндаги овозни тинглай-тинглай тинчланиб, ҳовуридан тушди.— Умидимиз фақат сиздан. Бўпти, яхши. Иложи борича... Кўрамиз... Бизнинг қўлимииздан нима ҳам келарди. Ҳамшира нима қилсин... Икки соатдан кейин?— Аъзамнинг яна ҳафсаласи пир бўлди. У наушникни Холбойга қайтариб, жойига ўтирди.— Икки соатдан кейин яна учиб келармиш. Ишқилиб чидасин. Агар шунда ҳам қўнолмаса... Узоқнинг азоби шу-да. Қани энди марказроқда яшасанг. Бу ерда эса чор атроф, тоғ, тоғ...— Аъзам хона ичида у ёқдан-бу ёққа юра бошлади. Бир оздан сўнг эшикни очмоқчи бўлди-ю, нимадир ёдига тушиб, дархол изига қайти.
- Қани, яна Деновни ол.
- Улар нима қиласарди?
- Ишинг бўлмасин, гап бор.
- Холбой кўп уринган бўлса-да, иш чиқаролмади, шекилли:
- Радист қиз ташқарига чиқкан, афтидан,— деди.
- Жойида ўтиролмайди-да, а? Биз бу ерда жонимиз ҳалқумимизга келиб ётибди. Ишинг бир юришмадими, юришмайди. Тушунмай қолдим ҳеч нарсага... Икки соат эмиш, икки соатда нималар бўлмайди. Кўйма, ўша тўлқинни тутиб тур!
- Денов, алло, Римма, Римма... Аъзам aka сиз билан гаплашмоқчи. Қабул...
- Римма, Римма! Мен яна ҳалиги масалада. Нима? Медицина ахли оёқка турган? Менга қаранг, синглим. Термиз ҳам оёқка турган, лекин бундан на фойда... Фойдаси нима деялман. Самолёт келиб, қўнолмай кетди. Зарур илтимос бор: Ҳонжиззадаги геологлар билан уланинг. Уларнинг вертолёти бор. Воқеани тушуниринг. Бошлиқка хабар қилинг. Жавобингизни кутиб турамиз,—Аъзам оғирлигини курсига ташлади...
- Эшитаман, ха, радиист...— Холбой тугатолмади, Аъзам наушникни юлқиб олди.
- Мен Аъзамман. Бошлиқ нима деди? Вертолёт қаерда? Тоғда? Чорва... Хўш, хўш... Қачон комбикормани ташиб бўлишаркан? Кечгача? Кулок солинг, синглим, биз учун ҳозир бир минут ҳам ғанимат... Ха, қиммат. Илтимос, вертолётни топинг, айтинг. Чорва икки соат емиш емаса емас, лекин аёлни кут-

қазиши керак... — У наушникни Холбойга беришга берди-ю, лекин бу билан кўнгли тинчимади. Радистнинг елкасига қўлини қўйиб:— Ука, осмонни ўзинг ковлаштири. Риммага ишониб бўлмайди, зора вертолётни тутсак,— деди.

Хонанинг эшиги очилиб, Абдулла ва устанинг қораси кўринди. Устанинг учинчи бор хонага кириши эди. У ўрнидан турмокчи бўлган Аъзамнинг елкасига қўлини қўйиб:

— Безовта бўлмай ўтираверинг,— деди ва алокачининг сўлғин юзига тикилди. — Бирон натижа чикадими?

— Ўзимизга хизмат қиласидиган вертолёт чорвадорларга емиш ташиётган экан. Уни тополмаяпмиз. Термиздан келган санитар самолёти қўнолмай, қайтиб кетди.

— Охири баҳайр бўлсин-да.

Эшик очилиб хонага Садир кирди. У бурчақдаги курсига гуноҳкорона омонатгина чўкди.

VI

Вертолётнинг икки учувчиси ва бортмеханик тоғ қишлоғи — Новокўлдаги отарларнинг бирида тушлик қилиб ўтиришарди, ўнгирда тўшини қорга бериб ётган қулок-думи кесилган чўпон итлари осмондан тушган вертолётга чўчиб қарап, салла ўраган икки чўлиқ вертолётдан комбикорма солинган қопларни ташларди.

— Рустам, бор-чи, тағин комбикорманинг ҳаммасини ташламасин. Бибичаккага ҳам қолдириш керак, — деди биринчи учувчи қўлини кор билан ишқаркан.

Хипча бўйли Рустам тирсагига ёпишган қорни қоқиб, ўрнидан турди. Орадан бир оз ўтгач, у вертолёт эшигидан бошини чиқариб:

— Восит! Сени сўрашяпти,— деди.

— Нима гап экан?

— Билмадим.

Восит соябонли шапкасини бостириб кийди-да, вертолёт томон кетди. Сал ўтгач, қайтиб келди.

— Кани турдик. Иш чиқиб қолди.

— Нима гап ўзи? — сўради Рустам.

— Тоғ ортидаги қишлоқда бир аёл туғолмай ётган эмиш...

Чўпонларга айт, қопларнинг ҳаммасини туширишсин.

— Кимнинг топшириғи бу?

— Аъзам Чагамдан хабар беряпти, — Восит чарм қўлқопни кия бошлади.

— Аъзам? Алоқачи дарозми?

— Xa.

— Бало-е, шу ерда ҳам тинч қўймайди.

Баланд тепалик устида турган вертолёт парраклари айланиси билан итлар ура қочиши. Машина бир неча бор силкинганидан сўнггина қорга ботиб кетган филдиракларини сугуриб олиб, юксакка кўтарилиди. У Боботогнинг ўркачидан пастлаб ўтиб, икки тоғ орасидаги торгина водий томон парвоз этди. Қуёш нури жилоланиб турган улкан сой бўйларидағи кичик-кичик қишлоқлар кўринди. Улар устида енгил, лахтахатак туман сузиб юрарди.

— Аъзам ака, эшитяпсизми, самолёт гувулляяпти, — деди Холбой деразага қулоғини тутиб.

— А? Нима?

— Мотор товуши! — Холбой ташқарига отилди. Тоғнинг чўққиси — Заркосадан сал тубанда, ёнбағирда қора нуқтадек учиб келаётган самолёт кўзга яққол ташланди. Улар Садирнинг уйига чопқиллаб келишганда, самолёт қишлоқ устида чарх уради. Бу — эрталаб қўнолмай қайтиб кетган самолёт эди. Кабинада ўтирган учувчи бош бармоғини бигиз қилиб кўрсатди. Сўнгра тепалик устидан шитоб билан учиб ўтди-да, катта доира ясаб пастлай-пастлай ранг-баранг белбоғлар билан белгиланган майдонга шўнғиди. Унинг филдираклари ерга текканда ҳавога лой сачради, бир зумда самолётнинг думи лойга беланди. Болалар, сўнгра катталар самолёт ортидан чопишди. Паррак тўхтар-тўхтамас оқ халатли эркак ва аёл самолётдан сакраб тушишди. Енгилгина замбилни эса учувчи бошига кўтариб олди.

— Қалай, ўртоқ алоқачи,— деди учувчи шўх кулиб Аъзам билан кўришаркан. Учувчи кўзини қисиб кўйиб, ҳамроҳлари изидан Садирнинг пастаккина эшигидан бошини эгиб ҳовлига кириб кетди. Орадан ўн дақиқа ўтмай, одамларнинг кўзи Садирнинг эшигига тикилди. Эшик очилди. Оқ халатли аёл чиқиб, эшик тавақасини чап қўли билан ушлаб турди. Врач ва учувчи бемор ётқизилган замбилни кўтариб чиқишиди. Учувчи Аъзамнинг ёнидан ўтаётганида яна гап ташлади:

— Буларнинг жони қаттиқ, — деди у қошини учириб. — Хуллас, ўртоқ алоқачи, чақалоқнинг биринчи саломини эшитиш сизга эмас, бизга насиб қиласидиган бўлди. Ҳечқиси йўқ, хафа бўлманг, сиз исм топиб туринг.

Бу гаплардан атрофдаги олазарк одамларнинг чехрасида табассум кўринди.

Вертолёт қишлоқ узра айланаётганда, самолёт парвозга шайлананаётган эди. Вертолёт шундоққина қишлоқ ёнидаги тепаликка қўнди. Аъзам ундан бирин-кетин тушган кишилар томон бораркан, ҳализамон борлигини қамраган чарчоқни унутган,

факат жимирилаган қорданми, эсаётган аччиқ шамолданми ачишган кўзларини уқаларди.

Учувчилар тогликларга таниш йигитлар эди.

— Сизларни ҳам овора қилдик,— деди Аъзам янги келгандар билан салом-алик қиласкан.

— Эртароқ хабар бермапсиз-да, Аъзам ака,— деди Восит.

— Термиз бизни орқайин қилди. Зўр келгандан кейин одам йўлини топаркан ҳар нарсанинг. Мана, сизларни ҳам топдик-а. Агар шундай бўлишини билганимизда, аёл аллақачон туғрукхонада ётган бўларди.

— Тотдан ошиб ўтганимизда самолётни кўрувдик,— деди Восит сигарета тутатаркан.— Охири нима бўлди экан деб қўнувдик.

— Агар самолёт келмаганида, аёлни сизларга қўшиб Деновга жўнатардик.

Бу орада самолёт жойидан жилди ва зум ўтмай ҳавога кўтарилиди. У анчагина тўғри учуб борди-да, сўнgra қиялаб тоғнинг этагига қараб йўл олди. Садир самолёт фидиракларининг изи қолган жойда сарик, пушти, қизил белбоғларни териб юрарди. У тобора йироқлашиб, кичрайиб бораётган самолётдан кўзини олмасди.

— Холбой, бор. Деновга хабар бер, ҳаммаси жойида, де.

Садир етиб келди. У учувчилар даврасида турган Аъзамни қўлидан олиб четга тортди.

— Раҳмат, Аъзам ака, бизни бир балодан кутқардингиз. Болаларингизнинг роҳатини кўринг,— деди титраб.

— Кўйсангиз-чи. Мен ҳали сизлардан кўп қарздорман.

— Мени кечиринг, Аъзам,— Садирнинг қўллари қалтираб кетди.

— Нега энди?

Садир қўлидаги бир тутам белбоғ билан ёшли кўзларини тўсади.

— Жуда кўнглингиз бўш одам экансиз,— деди Аъзам баттар қизариб.— Атрофдагилардан уялмайсизми?

— Зиёни йўқ, болам, йигитчиликда бўлади.— Бу устанинг овози эди.— Ўтган ишга салавот. Сиз хурсанд бўлинг, шундай одамларга дуч келганимизга.— Уста Аъзамга маъноли қарди.— Чакалоқ умри билан туғилсин.

ОТА ХУЗУРИДА

I

Чагамдаги мактаб илмий мудири Саттор Полвоновнинг хаёлида фақат бир фикр айланарди: Ҳамиша ётсираб юрадиган Бойқобил бобонинг менда нима гапи бор, дерди ўзига ўзи. Дарслар охир-лайвергани сари, унинг кўнглидаги ғашлик ҳам орта борди. Бойқобил бобонинг бетоблигини эшитган бўлса-да, лекин нима учун уни, Сатторни йўқлатганидан таажжуб ва саросимада эди.

Вақт пешиндан оккач, бемор ётган хонага кириб борди. Кўрпатўшак қилиб ётган чол муаллимнинг келганини аллақачон эшитган бўлса керак, Саттор уйга кирганда қарийб ажабланмади. Саттор чолнинг рангпар юзига, анчадан буён таралмаганидан тўзғиб ётган мошгуруч соқолига кўзи тушди-ю, кўнглидаги ҳадик яна ҳам ошганини сезди.

— Келдингизми, ўғлим, — деди bemор инқиллаганича елкасини сўкчакка тираб, кўкрагини озғин панжалари билан силяркан.— Яхши қилибсиз келиб... Сизни чакиртирганимдан ҳайрон қолгандирсиз, ҳозир ҳаммасини тушунасиз... Бир бошдан айтиб бераман... Хой, келин, ким бор, менга чой дамлаб келтиринглар, томогим қуриб колди.— Бойқобил бобо бир амаллаб гавдасини ўнглаб, пахтаси қотиб кетган болишга ёнбошлади. Чолга дарҳол чой келтиришди. Саттор чойни қайтарди.

— Ўзингиз ҳам ичинг, болам,— чол чойни базўр ҳўплади,— Гап шундай... Кун-соатим яқинлашиб қолди. Сезиб турибман. Ҳаёл қиламан, ҳали бир замон ажал мана шу кўрпанинг тагидан панжаларини яланғочлаб чиқади-да, хиппа бўғади. Жоним ҳалкумимга келиб турибди. Охири неварамга... бор, Саттор муаллимни чакириб кел, дедим. Айтгандир... Ўлимимга розиман. Қиёмат қарзимни бир кунмас, бир кун барибир узишим керак-да. Бундан ҳеч ким қочиб кутила олмайди. Энди сиз ана шу қарз гапимни эшитинг. Қани, невараларим, сизлар уйдан чиқиб туринглар,— чол яна чой ҳўплади, санчиқ турган биқинини чангллаганича кўзларини юмди. — Бу гапди ўзингиздан бошқа ҳеч ким эшитмасин... Эй худо, ўзинг кечир... Сиз ота тарбиясини кўрмадингиз, ота меҳрига тўймадингиз, отасиз ўсдингиз. Бунинг ҳаммасига мен айбдор, мен гуноҳкор... Уҳ, — чол оғир-оғир нафас олди.

— Нималар деяпсиз, Бойқобил ака,— деди қулоқларига ишонмай анграйганича Саттор.

— Шошманг, болам, ётиғи билан тушунираман. Отангизнинг ўлимида мен ҳам иштирок этганман.

— Нима?

— Ҳа, отангизни мен шу қўлларим билан ўлдиранман, десам ҳам бўлади, — bemор кўкрагидан сирғалиб тушган нимжон қўлларини кўзи билан кўрсатди.

Бу гапларни Саттор Полвонов худди тушида эшитаётгандек бўлди. Бироқ айни пайтда бунинг туш эмаслигини ҳам равшан ҳис қилди. Шундан сўнг у жуда йирокларда гумбурлаган момақалдироқнинг овозидек бир товушнинг кулоғига чалинганини пайқади. Бу сирли гумбурлаш унинг ҳушини олиб кетди. У шу тобда чолнинг оғир изтиробдан ҳансираётганини ҳам, гапираётган воқеа тафсилотини ҳам англамасди. Қалбнинг чукур қатламларида кўмилган, унут бўлган ҳаяжон туйғуси учқунланди-ю, тобора алангаланиб, бутун вужудига ёйила бошлади.

— Гуноҳимни бўйнимга олганман. Сиз — Полвоннинг ўғли, мендан хун сўрашингиз мумкин. Мени кечирасизми, йўкми, ўзингиз биласиз. Лекин бундай қотилликни худо кечирмаган. У ахир бегуноҳ эди... Мана, сирни сизга айтдим, энди юким енгиллашди.

— Нега шуни илгарироқ айтмадингиз, Бойқобил ака?— деди ўзини тутиб олган Саттор.

— Жон ширин, болам. Бундай гапни айтиб бўлармиди. Энди айтдим. Бир оёғим ерда, бир оёғим гўрда. Бу гуноҳимни сизга айтмасдан ўзим билан гўрга олиб кетгим келмади.

— Отамнинг гўри каерда? Жойини биладиган одам топиладими?

— Мендан бўлак кимса билмайди. Сатторжон. Ўзим кўмганман... Тоғда. Катта карвон йўлнинг кунчиқар томонида баланд адирлик бор. Шунинг тепасидаги катта харсангтош остига бостириб кўйганман... Топасиз. Олачипор харсангтош... Устига капитарлар кўп ўтирган, хозир ҳам қўнади.

Саттор Полвоновнинг болалиги ва ўспиринлик йиллари кўз олдига келди. Ўша ўксик даврлар айнан кўз ўнгидан намоён бўлди. Мехрибон кўллар ёрдамига муҳтож бўлган пайтлари ота қиёфасини у бошқача тасаввур қиласди. Бугун эса ота хаёлдан ҳақиқатгача айланди. Йўқдан бор бўлди. Ўшанда ҳам, ундан кейин ҳам бошига кулфат ва қувонч тушганида манаман деб тургувчи ота сиймоси яна тирилди. У алғов-далғов йилларда бедарақ йўқолиб кетган отасини ҳамиша хаёлида яратиб юради. У болаларча содда кашфиётини бирорга айтишдан қизғанар ва ҳеч қачон бу хилқатни барча оталар қатори ўлдига ҳам, тирикка ҳам чиқаргиси келмасди.

Ота унинг учун кўзга кўринмас бир зот эдики, Сатторни шарпадек кузатар, унга ғойибдан далда берар, баъзида эса доғда қолдириб кетарди.

Саттор Бойқобил чолнинг ҳовлисидан чиқиб, элликни қоралаб қолганини, ҳаётда жуда кўп фаройиб воқеа-ходисалар гувоҳи бўлганини, неварали эканлигини унуглан бир ҳолда жийда барглари пилдираб учеб юрган хилват кўчадан йирокда савлат тўкиб турган адир томон қадам ташларди. У ўзини бундан қирқ йил бурунги

етимча чоғларини эслар ва бундан кўнгли вайрон бўлиб, хўрлиги келиб борарди.

II

Туни билан тўхтовсиз қўйган ёмғир тонгга яқин тинди. Отабола отга мингашиб йўлга тушганларида атроф ёришиб қолган, адир ўркачлари, Кизилтогнинг қирра чўққиларидағи қорамтири булутлар аста-секин ғарб тарафга сузиб борарди. От селоба дарахт, хушбўй ҳидли юлғун илдизларига қоқила-қоқила чукур сой бўйлаб қорайиб турган тоғ сари йўргаларди, туёқларининг тошга теккандаги тақ-туқи ва дадил кишинаши сойда акс садо берарди.

Ярим соат ўтгач, сойнинг қия бетларида сийрак пистазорлар кўринди. Улар атрофга олазарак, ҳадиксираб қараб келаётган бола кўзига чўнқайиб ўтирган, ҳали бир замон қучогини очиб ҳамла қилишга ҳозирланётган сирли маҳлукдек кўринарди. Бола унинг писта эканлигини билса ҳам, бироқ кучайиб бораётган кўркувни босолмади.

— Ота, кўрқяпман,— деди у бешотар милтигини елкасига ташлаб олган отасининг белидан маҳкам қулоқларкан.

— Нимадан кўрқасан, шер болам? Нима, овга биринчи марта чиқаяпсанми? Кўрқма, ҳозир Катта карвон йўлга чиқамиз.

Сўқмоқ қияланиб, тобора юкорилаб боргани сайин, тоғ тарафдан эсаётган совуқ шамол ҳам зўрайди. Ёмғирли булутларни бир сойдан иккинчи сойга ҳайдаб, таъкиб этаётган шиддатли шамол тоғ сукунатини бузди. У бола қалбидаги кўркувни ҳам учириб кетаётгандек бўлди.

— Шамолнинг юришиб қолгани яхши аломат, — деди отаси катта киши билан гаплашаётгандек жиддий оҳангда. — Бўлмаса, икковимиз уйда тишимизнинг кирини сўриб ўтираверардик, худога нола қилиб. Ишқилиб, овимиз барор олсин.

Бола тоғ ортидан қуёш мўралашини ва унинг илк нурлари Кизилнинг қайси бир чўққисига биринчи бўлиб санчиларкан, деб хаёлидан ўтказди. Ўша баланд чўқкини кўзлари билан излади.

— Энди қалай? — сўради отаси.

— Яхши,— бола энди қувониб қўнғироқдек овоз билан жавоб берди.— Фақат юзим совуқдан ачишяпти.

— Бу ҳам ўтиб кетади. Ҳозир қуёш чиқади.

— А-ха,— Саттор шодланиб кетди. Сатторнинг онаси йўқ эди. У онасини яхши эслай олмайди. Бироқ баъзан қўмсаб қолганида фира-шира туман орасидан ипакка бурканган бир аёл қиёфаси кўз олдига келади. Онаси ҳалок бўлган куни отаси

Олмабулоқ атрофларида ов қилиб юрган экан. Саттор отасидан онаси ҳақида ботиниб сўрай олмайди. Ҳамиша онаси тўғрисида гап кетганида отасининг боши эгилади, қовоғи солинади. Шу воқеадан кейин отаси Сатторни ҳеч кимга, ҳатто кекса онасига ҳам ишониб қолдириб кетмайдиган, ҳамиша ўзи билан бирга олиб юрадиган бўлиб қолди.

Саттор илгарилари ҳам отаси билан кўп марта овга чиқкан. Ҳар сафар ҳам сой сўқмоғидан, Катта карvon йўлига тушганларига қадар ҳадиссираб келади. Қизилнинг юксак чўққиларини ёнлаб ўтган йўлга тушишгач, енгил нафас олиб, қувониб кетади. Юксакликда чор атроф бутун борлиги билан намоён бўлади. Пастдаги сойга қараганда, бу ерда нур ва тиниқлик ҳам кўп. Отаси ҳар қачонгидан суюмлироқ, кучлироқ ва меҳрибонроқ кўриниб кетади. Тогнинг кимсасиз сўқмоқларида у билан бирга кетаётганидан хурсанд бўлиб кетади. Қишлоқда одамлар тилидан эшитган отаси тўғрисидаги мақтовларни эслаб кўнгли шодланади.

III

Саттор Полвонов Катта карvon йўлининг ғарб томонидаги улкан адирликда тўхтади. Сўнгги кунларда кечган хаёллари, отаси билан фикран килган мулокоти шу ерда ниҳоясига етди. У йўлдан сал четроқда кўк-яшил кўкатларни кўриб, от жиловини ўша томонга бурди... Ўт мўл жойни танлаб, отдан тушди, от оғзидан сувликни чиқарди. Бўйини кўкка чўзган отни айлануб ўтди, таранг тортилган айилни бўшатди ва эгарга қистириб кўйган гулмихни олиб, пойабзалининг пошнаси билан тепиб, ерга киритди. От сугуриб кетмасин деган хаёлда кўкатлар орасидан каттакон тош излаб топди-да, гулмихнинг устига бостириб кўйди. Шундан сўнг дўнгликка чиқиб, кўкатлар устига чўзилди. Саттор бош кўтармай ўт ямлаб кавшанаётган ва сомон ёпишган думини силкитиб пишқираётган отига разм соларкан, йўл-йўлакай ўз ўйлари билан бўлиб, ҳамроҳи — Бойқобил бободан анча илгарилаб кетганини шундагина пайқади. Чолдан дарак йўқ, факат адир устидан ёлғизоёқ йўлдан кўк эшак қулоқларини осилтириб, бир-бир қадам босиб келарди. Бир оз ўтгач, сойдан кўтарилган чолнинг қораси кўринди. У белбоғини ечиб олиб, елкасига ташлаган, ҳар замонда шамол шишириб учираётган қора сатин тўнининг барларини кўллари билан ўнгларди.

У етиб келди. Тўнини ечиб, астарини ағдарди-да, қатлаб устига ўтириб олди, кашталари ўнгиб кетган белбоғининг учини терлаган пешонасига босди.

— Уфф!.. Эшак ҳам менга ўхшаб қарибди. Ярамай қопти, ниқтайвериб сёқларим шол бўлиб кетди, — деди у чап тирса-

гига таяниб, қоқигул бандини курак тишлари билан курт-курт тишлаган кўйи ўтирган Сатторга қараб. — Нималарни ўйляяпсиз, болам?

— А? Ҳа, ўзим...

— Мен сал шошган эканман. Кела-кела шуни ўйладим, — чол белбоги билан елпинди.

— Нега?

— Отангиз воқеасини айтаяпман-да.

— Ҳа, — Саттор хаёлчан бош иргаб кўйди.

— Одам кексайгандан кейин ўзини омонат сезиб қоларкан. Бўлмасам соғайиб, тузалиб кетарканман, бу гапни сизга айтиб нима қиласадим. Энди пушаймон қиляпман... Отангиз худди тирилгандай кўз олдимда турибди. Мана шу жойнинг ҳаммаси менга таниш. Кечака бўлгандай.

Саттор Полвонов шу атрофдаги адирларнинг энг юксаги бўлмиш ўша харсанг тошли тепаликка қараб туриб, секин қадам ташлади.

Иккаласи олдинма-кетин йўлга тушишди. Рўпарада чол айтиган адирликнинг энг баланд қисми — ўша тепалик қад кўтариб турарди. Атрофдаги ёввойи жимжитлик, адирлар салобати, бўлиқ кўкатлар латофати, кенгликлар ва фир-фир эсган шабада Сатторнинг кўнглида гусса уйғотди. „Бу бегона, кимсасиз даштда бутун олам, барча одамлар ва фарзандлари унуган отам ётибди. У мана шу қирқ йиллик ёлғизликка қандай чидади экан? Бирон кимса келиб унинг қабри бошида ўтирмади, белги кўймади... Ёшим бир жойга бориб колганида дарагингизни эшитдим, мана бугун юрагимни ховучлаб ҳузурингизга келдим...“

Саттор Полвонов ўзини тута олмади. Елкалари силкинди. Кейинги йигирма йиллик ҳаётида биринчи бор ўпкаси лиммо-лим тўлди. У чўнтагини пайпаслаб дастрўмолини олди. Унинг кўз ёшларида қувонч ҳам, бир умр тўпланиб қолган аламли армонлар ҳам бор эди.

— Яқинлашиб қолдик, болам, — Бойқобил бобонинг қалтироқ овози Сатторнинг хаёлини бузди.— Эй, худо, бу нима кўргилик. Ўшанда қарзингни олмайсанми? Пешонам қурсин, Худо ҳам қилмишимга яраша жазомни кўзим ёруғлигига беряпти, нариги дунёда не кунларни солади бошимга.

Тепалиқдан сал қуида қорайиб харсанг кўринди. Тош устидаги бамайлихотир ўтирган ёввойи каптарлар нотаниш йўловчилардан хавфсирашиб, осмонга кўтарилишди. Улар олачипор харсанг узра доира ясаб, тоғ сари учеб кетишиди. Осмонда эса ўша болалигига кўрган булутлар — алвон, оппок, парқу, сутга чайилган ўқтам, оккушларга ўхшаб сузиб юришарди.

Саттор Полвонов харсангтош ёнида тиз чўқди.

ҲИКОЯЛАР

ОТА ЮРТ

Киш чўзилиб кетди. Буниси етмагандек, баҳор ҳам жуда серёғир келди. Кенг адирлар билан Кизил даранинг туташ жойидаги сой ўзанига қисилиб қолган Файзобод қишлоғи табиатнинг бу нотанти исканжасидан ерга қалишиб, қоришиб кетгандек бўлди. Сойдан ва газадан тушган машина йўллари ювилиб, бузилиб кетди. Гувалак лойдан кўтарилиган пастак уйлар, чор деворлар парча-парча бўлиб ивиб тушаверди.

Шодмон бобо тивит чакмонига ўраниб, ҳар эрта эчки ва корамолларни оғилхоналардан ҳайдаб чиқаради. Қишлоқ билан номдош Файзобод сойи эса уни ҳар эрта қовоғи осилган ҳолда тунд қабул қиласди. Сой бугун ҳам шундай тундлик билан ўз қучоғига олди. Чор атрофга таҳдид солиб, шовуллаганча бўкириб ётибди. Чол бундан, кеча қишлоққа ёқсан ёғир тогда ҳам анча қўйганлигини англади. Пишқириб оқаёттан бўтана сел шунинг нишонаси эди. Шуниси ҳам борки, минг пишқиргани, кучайгани билан кирғоқдан тошиб чикмайди. Баъзи йиллари қирғоқни ўпиралиб, уйларга яқинлашиб келган пайтлари ҳам бўлган эди. Одамлар бунга қўнишиб кетишган. Ёз келиши билан дарҳол янги уй қуриб кўчиб ўтишарди. Бу билан сой одамларга панд беролмасди. Шодмон бобо бундан ҳам оғирроқ йилларни кўрган, барибир, сой ҳеч нарса қиломаган. Тўғри, баъзи йиллари ўйинқароқ эчки-улок ёки бир-иккита бебош тана ва бузокни оқизиб кетарди. Сел оқизган молнинг эгаси бундан афсус чекса, Шодмон бобо „Хей, фалончи, мол кетса-кетибида-да. Ажали шундан экан. Насиб қилмаган нарсага пушаймон еманг. Ҳа, бош омон бўлса, мол деган жонивор топилади. Сизга келган бало ўшангга урсин“, деб насиҳат қиласди.

Шодмон бобо сой узра тўш ташлаб турган оқиш осмонга қарди. Булат қалин эди. Бу ҳали-бери ёғир тинмаслигини билдиради. „Неча кун бўлди-я, қовоғини очмаганига,— ўзича ўйлади. Бироқ у аслида бошқа нарсадан безовталанаарди. Ярим ойлар бўлди чамаси, айлантиргани айлантирган, қуйгани қуйган. Беш кун бурун күёш юзини бир кур кўрсатганди. Лекин бунинг оқибати хунук бўлиб чиқди. Сойнинг қишлоқ устига кўкрак кериб турган ялангоч ўнг бети силжиб кетди. Бетдаги яккам-дуккам хатанаклар ҳам залварли лой кўчкинини тутиб туролмади. Бир неча уйнинг жойича ер кўчиб, пишқириб оқаётган сойга чунонам зарб билан урилдики, бутун қишлоқ аҳлининг эсхонаси чиқиб кетди. Илгарилари ҳам ер кўчарди-ю, аммо бу йилгидек вахимали бўлмасди. Чол яна бир нарсадан безовталанаарди. Ўғли тўрт кун бурун район марказига кетганди, дараги бўлмаяпти. Йўлидаги бирорта сой ёки

селгани сув олиб кетиб, бечора ўтолмай юрибдими? Чол Тўхтанинг улдабуронлиги ва пухталигини эслаб, кўнгли сал таскин топди. Унинг руҳида осойишталик ҳосил бўлишига сой камарларида питирлаб, сайраб учиб-кўниб юрган булбулларнинг шўх овози ҳам сабабчи бўлди. Мана, улар ҳам жонивор-ку, ҳеч нима бўлмагандек, ҳеч нарсани кўрмагандек. Ёмғир ёғса ёғибди-да, кўчки кўчса кўчибди-да. Ёз келди, ҳаммаси жой-жойига тушиб кетади.

Туш маҳали Тўхта икки отлик билан чап томондан тик газа оша тушган йўлдан келиб қолди. Чол ўғлини кўриб тинчланди-ю, бироқ нотаниш меҳмонлар ким бўлди ва қандай мақсадда келаятикан, деб ўзига ўзи устма-уст савол бера бошлади. Отликларнинг бири ўрмон хўжалиги директорининг муовини — уни танирди. Яна бири эса райижрокомнинг вакили экан. Буни Шодмон бобо дастурхон устида гурунглашиб ўтиришганда билиб олди.

Файзобод узоқ тоғ қишлоғи бўлгани учун ҳам нуфузли меҳмонлар бу ерга камдан-кам келади. Уйда ўтирганларнинг серёғин, нокулай кунда йўлга чиқишига мажбур қилган эҳтиёжни билмоқ учун, чивич эчкини сўйиб, терисини шилаётган Тўхтадан:

— Бемаврид келишибдими? — деб сўради.

Тўхта бошини иргади-ю, қисқагина қилиб:

— Кейин айтаман, — деб кўйди.

Меҳмонлар ташқарига чиқишиганда, ҳамон ёмғир шивалаб ёғарди. Улар пиёда юришиб ўкираётган сойнинг юлғинзор жиякларини айланиб кўришди. Кўчки кўчган бет рўпарасида алланималарни баҳс қилишди ва икки соатлардан кейин уйга қайтиб келишди. Райижроком вакили уй билан ёнма-ён ўсган икки туп кекса тутни кўрсатиб ажабланди.

— Буни ким эккан? — деб сўради.

— Бобомдан қолган ёдгорлик, — деди Тўхта.

— Неча ёшда экан ҳозир?

— Мана, ҳозир ҳисоблаймиз-да, — гапга аралашди директор муовини. — Отахон, сиз неча ёшдасиз.

— Етмишдан ошдим, — дудмал жавоб берди чол.

— Демак, етмиш, у ёқдан ҳам ўнни қўшайлик саксон ёшга кирибди-да.

— Қойил, — деди вакил, сўнг сойнинг тоғ тарафидаги эски қишлоқ чор деворларини кўрсатиб сўради: — У ер ҳам қишлоқ бўлганми?

— Ха, ўн йил бурун қишлоқ ўша ерда эди. Сел ювавериб, ювавериб, кисиб қўйди.

— У ҳолда шу тутнинг тагига бир неча марта қайта-қайта кўчиб келган-да?

— Шундай.

— Бошқа жой қуриб кетибдими? Бир парча ерга мунча ёпишиб олишдан нима фойда экан?

— Ота юрти-да, ўғлим.— Шодмон бобо вакилнинг тўхтовсиз саволлари тагида қандайдир кек ва манманлик борлигини сезгандай бўлди.

— Отахон, энди ота юрт билан хайрлашамиз,— вакил ўсмоқчилааб гапиради.

— Майли,— чол меҳмон кетмоқчи экан деб ўйлади шекилли, сал чехраси очилиб бошини эгди.

— Йўқ, тушунмадингиз, бу ер билан умуман, сиз ҳам хайрлашасиз. Буни қаранг, лой кўчки бутун қишлоқни босиб қолади.— У ўпирилган адирликни кўрсатди.

— Худо кўрсатмасин, болам. Бир умр шу ерда яшаб келяпмиз, бирорни кўчки босганини билмаймиз.

— Отахон, фалокат сизнинг раъйингизга қараб ўтирадими, келади, бир кечада босади, вассалом.

Чол ёқасини ушлади-да, мунозарадан ҳафсаласи пир бўлдими, ўғлига „Сен мени кимга дучор қилдинг!“ дегандек қарашибилди. Тўхта отасининг авзойи бузилганини пайқади.

— Ота, директоримиз, районнинг катталари қишлоқни кўчирамиз дейишаяти.

Чол тўсатдан яна жонланди:

— Нима? Кўчиради, қаерга?

— Шу ерга, Газанинг устига. Нима бўлти, бир қадам йўл. Айтиб бўлмайди-да, бир кунмас-бир кун...

— Ўйлаб гапиряпсанми? — чолнинг кўзлари дарғазаб чақнади. Нима, қишлоқнинг ташвиши сенларга қолдими?

— Бўлмасам-чи, — вакил сўзни илиб кетди.— Шунинг учун бу ерга келдик. Эшитинг, отахон, янги қишлоқка машина йўл келади, электрлаштирамиз, янги уйлар қуриб берамиз. Фамхўрлик бўлса, шунчалик бўлади-да.

— Сен ҳам шу фикрдамисан? — Шодмон бобо ўғлига ёлворгансимон тикилди.

— Кўпчилик-да, ота, мен бу ердаги ўрмончиларнинг бошлиғи бўлсам, уларнинг турмушини, уй-жойини яхшилашни ўйлашим керак-да, ахир, шу қишлоқнинг увол-савоби менинг бўйнимда.

— Майли, сизлар кўчсаларингиз кўчаверинглар, лекин менга тегманлар. Мен шу ерда қоламан.

Чол бурилиб, юлғунзорда оралаб юрган моллар томон кетди. Меҳмонлар ҳам кетишиди.

... Бу йил Газада янги уйлар қурилди. Қишлоқдошлар бирин-кетин кўчиб ўтишди. Шодмон бобо эса аввалига, кўчмайман деб оёқ тираб олди. Лекин охири бўлмади. Элдан ажра-

либ қоладигандек бўлаверди. Рост-да, нима бўпти, Газа билан сойнинг ораси бир қадам.

Энди эса чол молларни ҳар куни сойга хайдаб тушади. Камарларда булбуллар шўх сайрайди, осмонда кўк каптарлар ғу-ғулаб учишади. Чолнинг аксарият вақти шу ерда ўтади. Ахир, чол умрининг кўпи ҳам шу ерда ўтган-да. У иккита кекса тутга, ҳувуллаб қолган чор деворларга Тўхтанинг, вакилнинг ва сизу бизнинг кўзимиз билан эмас, мозий хаёлот кўзи билан қарайди. Наинки бўлмасин, барibir, ота юрт-да.

ОНА ҚАКЛИК

Махсус топшириқ билан пистазорлар истиқболини ўргангани Боботоқقا борган эдим. Тоғда бир неча кун бўлиб, ишларимни тугатдим. Эрталаб тоғ қилшоқлари — Чагам билан Шаршара орасида ўнлаб чақиримга чўзилган сўқмоқ йўлга тушдим.

Кетяпман. Баҳор пайтлари тоғ сўқмоғида юриш нақадар гаштли! Сўқмоқнинг иккала четини коплаб олган майсалардаги тонг шудрингини енгил шабада шилдиратиб тўқади. Димокқа ўтган йилдан қолган чириган сомон, нам майса, сассик коврак ҳиди урилди. Енгил туман қоплаган водий устида қўёш чараклаб турибди. Шимолдан жанубга қараб оқаётган Сурхон улкан кумуш камарга ўшаб оқариб кўринади.

Куйган арча танаси йиқилиб ётган баланд қиялик жойдан ёлғиз каклик кўтарилиди-ю, чипор қанотларини кенг ёзганича тепамдан учиб ўтиб, ўзини пастдаги сойга ташлади. Каклик тушган жойда чил сайради...

Атрофдаги қирлар, адирлар, даралар, кенг сойлардан кўз олмай томоша қилиб кетавериб, йўлнинг ярмини босиб кўйганимни ва ҳавонинг авзойи бузилганини сезмай қолибман. Боботоғ ортидан кўтарилиб, тоғ чўққиларини ялаб келаётган булуллар шамол эсган сайин даҳшатли тус олар, бутун атрофни кўркинчли салобати билан чулғатаётгандай туюларди. Каклик ва чилларнинг сайраши тинди. Писта ва арча шохларида қўниб турган читтак, тоғ чумчуклари сой томонга учиб кетди.

Коплонсој қиялигидан пастга тушаётганимда, йирик-йирик ёмғир томчилай бошлади. Бундай пайтларда Коплонсоидан сел келишини кўп эшитганман. Ёмғир кучайиб сўқмоқ лой бўлмасдан сойдан чиқиб олиш учун юқорига тирмашдим. Сойдан чиқишим билан ўзимни тепасида эгри-бугри арча ўсган камарга урдим. Ёмғир тезлашди. У босинки овоз билан шовуллаб ёға бошлади. Шу пайт момақалдироқ гулдуради, ёмғир иплари орасида йирик-йирик дўл доналари оқариб кўринди. Бир оз ўтгач, ёмғир дўлга айланди. Катталиги олхўридай дўл қиялаб ёғар, ерга ке-

либ урилганда сапчиб кетар, мендан уч қадамча нарида қорайиб турган қўнғир тошга урилиб парчаланар эди. Тош ёнида шамол тебратиб турган коврак яшил ялтирок барглари, сариқ гулларининг бирпасда дабдаласи чиқди. Ковракнинг энди шўппайиб қолган танаси дўл текканда дирилларди, холос.

Шамол қуёш юзини тўсиб турган қора булат парчасини сурриб ташлади. Қуёш нурлари мен яширинган камар олдини ёритди. Бироқ дўл ҳамон шитирлаб ёғарди. Табиятда камдан-кам учрайдиган бундай манзарани илгари кузатмаганим учун завқланиб кетдим. Оёғим тагига думалаб тушган дўл донларини қўлимга олиб, эриб кетгунча чанталимда тутиб турман. Уч дақиқача ерни, харсангтошларни дўппослаган дўл тинди. Унинг сўнгги сийрак доналари қуёш нурида ялт-юлт қилиб ерга урилди-ю, тўхтади.

Камардан чиқдим. Ёнбагирликларда тўпланиб қолган дўл доналарини боса-боса яна сўқмокка тушдим. Қуёшнинг заррин нурлари майиб-мажрух бўлиб қолган ўсимликларнинг жароҳатланган таналарини иситди. Ердан ховур кўтарилилди.

Бир оз юриб, кенг ялангликка чиқдим. Бу ердан теварак-атрофни бемалол кузатиб бориш мумкин эди. У ер-бу ерда дўппайиб турган харсангтошлар панасида дўлдан омон қолган нам майсалар майин шамолда силкиниб туради. Қуёш нури узоқ водийда, тоғу тошда, писта ва арча дарахтларининг яшил япроқларида жимирлаб ўйнайди. Ялангликнинг кунчиқар томонидаги йирик сойда чил ва какликлар шўх сайрайди. Тоғ бағридаги ороми бузилган хаёт яна жонланиб кетди.

Ёнгинамдан каклик „парр“ этиб кўтарилилди. У эллик қадамча учиб бориб, кучокдай кул ранг харсанг устига қўнди. Чипор қанотларини худди уришаётган хўрозникидек хурпайтириб, икки ёнига осилтириди. Тош устида дарғазаб ҳолича у ёқдан-бу ёққа юра бошлади. У бир зум тўхтади-ю, кейин сайраб юборди. Каклик мени кўриб турарди. Бироқ унинг учиб кетмаётгани мени ажаблантириди. Тош отдим, учмади. Иккинчи отган тошим каклик қўниб турган харсангтош четига урилди-ю, парчаланиб кетди. Каклик шундагина осмонга кўтарилилди ва яна бир оз учиб боргач, иккинчи бир харсангтош устига қўнди. Мен томондан кўз олмасдан яна безовта сайрайверди. Масофа сал яқинлашиши учун, каклик дастлаб қўнган тош ёнига бордим. Тош олиш учун ерга энгашдим. Шу пайт кўзим ўлиб ётган какликка тушди. Унинг нам қанотлари лойга коришиб, шалпайиб қолган, тумшуқчаси эса ерга уни билан тиравиби ётарди. Ҳайрат билан унинг ҳўл қанотларидан ушлаб ердан кўтардим. Дўл тегиб жонивор қушнинг кўзини чиқариб юборибди. Қизғиш тумшуқласида қуюқ қон қотиб қолиб-

ди. Каклик ётган ерга қарадим: ниш уриб чиқсан майсалар орасидаги қуруққина ерда уч жуфт каклик тухуми турарди. Уларни кўлларимга олдим — илиққина эди...

Мажақланган она каклик жасадини жойига оҳистагина қўйдим-да, изимга қайтдим. Сўқмоқ йўлга тушдим. Зорланиб сайраётган нар каклик ҳалок бўлган жуфти ёнига, харсантустига учиб келди. Унинг мунгли сайробини анча узоклашиб кетганимдан сўнг ҳам эшишиб турдим. Кўланкаси тог ошган қора булутларга қарадим. Қуёш нури, тоғ шамоли уларни парчапарча қилиб юборибди.

Шаршара қишлоғига боргунимча фидокор она какликнинг мажақланган танаси кўз олдимдан кетмади...

ТОҒЛАРДА ГУЛХАН ЁНАДИ

Йилқилар чошгоҳга бориб ҳолдан тойди. Улар ёлғизоёқ йўлдан бошларини эгганича, бир-бир қадам ташлаб боришарди. Эрталаб узок сафарга отланишаётганда анча-мунча нағма кўрсатган икки ёш айғир ҳам ҳовуридан тушган, баъзан бирон йилқи яқин келиб қолғандагина ғужури кўтарилиб, сўқмоқдан чиқар, бошини кўтарганича, бор овози билан кишинашарди. Айғирлар ҳушёр келаётган Азимнинг амирона қич-қиришидан сўнггина тинчланишарди. Унинг ёрдамчиси Самад ҳам чарчаган бўлиб, отларни қистамас, уларни ўз холига қўйиб, эгарга бир ёнбош бўлиб ўтирганича, Азимнинг тўнғич ўғли Камол билан гап талашиб келарди.

Камол ўтган йили мактабни тугатгач, олий ўқув юртига кирмоқчи бўлиб, Термизга борган эди. Бироқ у таваккал иш тутмади. Ўз имкониятини чамалаб қўриб, курилиш техникумига ҳужжат топширди. Ўғлининг қандай касбни тутиши, қайси ўқишига кириши Азим учун барибир эди. У ўғлининг хоҳиш-истаги билан қарийб қизиқмаса ҳам бутун эркни унинг ўзига бериб қўйди. У факат, ўғлим ўқишини истабдими, ўқисин, тенгдошларидан ортда қолиб, кўнгли ўқисимасин, деб ўйлади. Шунинг учун Камол ўқишига кириб, уйга хурсандчилигидан терисига сифмай келганида ҳам пинагини бузмади. Аксинча, ўғлини енгилтаклиқда айблади. Камолнинг мамнун ва баҳтиёр кўзларига тик қараб:

— Ҳей, ўғлим, нимасига мунча севинасан, ўқишига кирибсан, яхши. Лекин ўқишининг тоғ одамига нима нафи бор?— деди ўсмоқчилаб.— Ота-бобонг, инчунун, мен ҳам ўқимай бир кунимизни қўриб кирибмиз.

Отанинг бу гаплари Камолнинг ҳафсаласини пир қилди. У то шаҳарга қайтгунча ўзини отасидан олиб қочиб, ётсираб юрди.

Бу йил ёзги таътилга келган Камол Азимнинг кўзига бошқача кўринди. Бўйи чўзилган, юзига ҳуснбузарлар тошганидан уялиб, ўзини ноқулай сезиши, кўзларида илгарилари пайқамаган қандайдир паришонлик отанинг кўнглини юмшатди. У энди ич-ичидан қишлоқдаги йигитлардай кийиниши, юриш-туриши билангина эмас, балки хулқ-автори билан ҳам алоҳида ажралиб турадиган ўғлиниг иккиланмасдан рози бўлганини сезмасдан илохи йўқ эди. Кечак эса яйловга мен билан борасанми, деб сўраганида, ўғлининг иккиланмасдан рози бўлганини кўриб, унга бўлган ихлос ва меҳри яна ошиб кетди. У ортда Самад билан ҳангомалашиб келаётган Камолга ўғринча назар ташларкан, қалбида оталаргагина хос фурурли ҳаяжон тошганини хис этарди.

Самад эса узок сафарда ҳамроҳ топилганидан хурсанд бўлиб, Камолни саволларга кўмиб келарди.

— Айт-чи, шаҳар яхшими, тоғ?

— Кимга қандай. Бу — ўрганишга боғлик.

— Мен сендан сўрайпман.

— Менгами! Албатта, тоғ яхши.

— Ана, кўрдингми! — дерди Самад маънодор бокиб, сұхбатдошининг нозик жойидан тутган кишидек.— Ҳеч ер токқа тенг келмайди...

— Лекин шаҳар ҳам ўрганганга яхши.

— Айтайлик, сен ўргандинг. Ўша ерда қоласанми?

— Йўқ.

— Ана шу-да, — таъкидлайди Самад.

Камол қамчи дастаси билан елкасини қашийди. Кўзларини пирпиратиб олға, сурувни бошлаб бораётган отасига қарайди. Самад яна уни гапга тутади:

— Ўқишини тутатганингдан кейин ким бўласан?

— Қурувчи.

— Нималар қурасан?

— Бинолар... — Камол мужмал жавоб берди. Ҳамсұхбатининг эзмалиги уни зериктирди. Отни қистади ва дам ўтмай гап мавзуини ўзгартириш учун сўради:

— Кечалари тоғларда совуқ бўлса керак?

— Ўзинг биласан-ку.

— Сўрайпман-да.

— Тоғ шамолидан ҳали лабларинг тарс-тарс ёрилиб кетади.

Камол беихтиёр лабларини ялади:

— Кечалари гулхан ёқамиз, роса гуруллатиб.

Орадан чорак соат ўтгач, арчазор ўрмон бошланди. Камол узалиб, арча шохини синдириб олиб, ҳидлади.

— Ҳой Самад ака, арча солиб тандиркабоб қилиб берасизларми?

— Отанг рози бўлса, биз ҳамиша гўштхўрликка тайёрмиз.

— Сенга ётиб ейиш бўлса бас, Самад, — деди Азим ён томондаги арча шохларини қўллари билан ёриб, чиқиб келаркан. — Еганларинг кабоб бўлсин.

Камол отасининг тантилигидан севиниб кетди.

— Отларни илдамроқ ҳайданглар, — деди Азим йигитларга, — қош қорайгунча Заркосага етиб олайлик. Ўтин-пўтинни кун ёруғида термасак, момоларинг тайёрлаб қўйгани йўқ у ерда. — У шундай деди-да, отини йўрттириб, олдинга ўтиб кетди.

Заркоса — тоғнинг энг баланд чўққиси. Унинг этаклари анча текис бўлиб, йилқиларни ёзда боқиш учун жуда боп ялов эди. Йилнинг ҳамма фаслларида бу ерда кучли шамоллар бўлиб турди. Ёзинг ўталарида ҳам унинг ёнбағирларида баланд арчазорлар тагида қор эримайди. Шамол турган пайтларда эса чор атрофдаги ўрмон ваҳимали шовуллайди. Кордан эндигина бўшаган соя-салқин ерларда баъзан бойчечаклар кўзга чалиниб қолади. Бўтакўзлар эса бутун сайҳонлик, арчалар орасидаги очик майдонларда гиламдек сарғайиб ётади. Бу ерда қиш билан саратор қўшни яшайди. Кундузи ёз бўлса, кечаси қиш. Кундузи кўкрагини шамолга бериб майкачан чопиб юрган киши, кечаси пўстинда совқотади. Камол шаҳарда юриб, ана шу тез ўзгарувчан манзара ва дақиқаларни соғинган эди. У ҳали узоқдан Заркоса чўққисининг қўроғшин рангли елкаларига кўзи тушиши билан болалигидан азиз бўлиб қолган шу ёввойи табиат қучогига қайтганидан шодланиб кетди.

Отаси билан Самад қўшхона тиклашга киришиб кетишганда, Камол арчазор оралаб юради. Усти сарғайиб, гард ва барглар билан қопланган қорни ғарч-ғарч босаркан, арча ва бошқа турли гиёҳларнинг ҳидини хузур қилиб сипкорарди. Қуюқ ўрмонзор ичига киргач, қалин қор устига чўккалаб ўтирди ва қорни ковлаб, тоза еридан бир чангаль олиб каппалади.

Қўшхонага қайтиб келганида, Самад унинг қўлидаги қорни қўриб:

— Ҳой, нодон, қор ема, бу ерда томоғингни даволайдиган дўхтири ҳоланг йўқ, — деб калака қилди.

— Нима, шаҳарда юриб нозиклашиб кетган, деб ўйляяпсанми бизнинг ўғилни, — деди Азим брезент чодирнинг учидаги ипни қозиқقا тортиб боғларкан.

Камол бу ҳазил гапларга ҳам, атрофни ўраб турган арчаларга ҳам, чўққилар, аллақачон яловга ёйилиб бош кўтармай кўкат кавشاётган йилқиларга ҳам боқиб тўймасди. Камол хур-

жундан арқон ва болтани олди-ю, чопқиллаганича ўрмон ичкари-сига кириб кетди.

Кеч кирди. Атрофдаги арчалар қоронғилик таъсирида кичрайгандек, ярим белигача тоғ бағрига кириб кетгандек, энди эса тоғ ўркачлари ва улар устида осилиб турган юлдузли осмон салобатли бўлиб қолди. Камол ўрмон ичидан қуриган шох-шаббаларни орқалаб ташиди. Сўнгги марта отасининг: „Бас, етар“, деган зътиrozига ҳам қарамасдан, бир бориб катта арча шохини судраб келди. Шундан сўнг очик жойда гулханга ўтин қалади. Самаднинг тоқати тоқ бўлди.

— Ёқсанг, ёқ-да, — деди зорланиб.

— Хали барвакт, соат тўққиз бўлсин, — Камол тунда рақамлари ёнадиган соатига қаради.

Камол роппа-роса тўқзида гулханни ёндириб юборди. Овқат ейишаётган Азим билан Самад дастлаб дастурхон бошида бамайлихотир ўтиришди. Кейин аланганинг қизғиши тиллари тобора юкорига ўрлагач, дастурхонни судраб орқага чекинишди. Бирпасда атроф ёришди. Коронғида кичрайиб кўринган арчалар яна салобатли тус олди.

— Ўрин солинглар, мен йилқилардан хабар олай, — деб қўзғалди Азим овқатдан сўнг.

Камол гуруллаб ёнаётган гулханга ўзини тоблар ва йирокларда арчалар ортида кўринаётган водийдаги сон-саноксиз чирокларга тикилар эди.

— Ҳой, бола, нега қаққайиб қолдинг, — Самад унинг елкасига туртди.

— Мана, бу учқунлар анави чирокларга ўхшайди-я, — деди талмовсираб Камол. — Самад ақа, Денов шаҳри қаерда, бир кўрсатинг?

— Деновми? Ҳу ана, фуж чироклар ёняпти-ку, ўша. Нима эди?

— Ўзим шундай.

— Менга қара, — деди синчковлиги тутиб кетган Самад шаҳар номини эшлиб гумонсираб. — Шаҳардан биронтасини топдингми дейман?

Камол ялт этиб қаради ва Самаднинг нигоҳига тоб беролмай кўзларини олиб қочди.

— Ҳа, боласи тушмагур, — Самад кўрсаткич бармоғини бигиз қилиб ўдағайлади. — Ҳали шундай де. Айт-чи, исми нима?

— Нималар деяпсиз?

— Гапир, бўлмаса, отангга айтаман.

— Кейин... Ана, отам келяпти...

— Бўпти, лафзингда турасан-а?

— Ҳўп.

Самад зўрма-зўраки йўталиб, ўрин сола бошлади.

— Мен чарчадим, ухлайман. Сизлар отлардан хабардор бўлиб туринглар, — деди Азим ва ечинмасдан шолчанинг четидаги ўринга кириб чўзилди.

Камол билан Самад гулхан атрофида ўтиришар ва Азимнинг ўйкуга кетишини кутишарди. Ниҳоят, узоқ чўзилиб кетган жимликни биринчи бўлиб Самад бузди:

- Қани, энди айт.
 - Секин, эшитиб қолади, — шивирлади Камол.
 - Эшитмайди, айтавер.
 - Нима қизиги бор сизга?
 - Аҳ-ҳа, ҳали айтмайсанми?
 - Айтаман дедим-ку. Ҳеч кимга оғзингиздан чиқармай-сизми?
 - Одам эмасман.
 - Бўпти, исми Ойхол.
 - Ойхол? Яхши исм экан. Ўзи ҳам ойга ўхшайдими?
 - Ким билади дейсиз.
 - Севиб қолдингми?
- Камол елкасини учирди.
- Ота-онаси яхши одамларми?
 - У ёгини суриштирганим йўқ.
 - Шаҳарнинг ўзиданми?
 - Ха.
 - Бечора укам, шаҳарлик бўлса, тағин лақиллатиб юрган бўлмасин.
 - Йўғ-э. Биз хайрлашаётганда келишганмиз: мен беш кун тоғда гулхан ёқаман, у эса қарайди. Гулханни кўриб, менинг ёққанимга ишонади.
 - Эй, содда укам. Гулханинг нимаси? Нима, тоғда сендан бошка киши гулхан ёқмайдими?
 - Менинг гулханим ҳаммасиникидан катта. Ўзи айтган: гулхан ёқасиз, мен гулханни кўриб сизни кўргандай бўламан, деган.
 - Ҳозир, мана, сен гулхан ёқдинг. Ойхол шунга қараб турганига ишонасанми?
 - Ишонаман.
 - Қизик... Мен ишонмайман.
 - Сиз сиз-да. Мен ишонаман. Ҳудди ҳозир ҳам мен билан бирга мени кузатиб ўтиргандек. Ҳув, чироқлар кўриняпти-ку, шу чироқларнинг ёруғида у ҳам мен тўғримда хаёл суряпти.

- Айнибсан, ука. Ёшинг нечада?
- Ўн саккизда.
- Чиндан ҳам гўдак экансан.

— Нега ундаи дейсиз? — Иzzат-нафси оғринган Камол Са-
мадни жеркиб ташлади.

— Хали сирканг сув кўтармай қолдими. Отангга айтсам-ку,
мулла қилиб кўяди.

— Айтсангиз айтаверинг, қўрқмайман, — деди Камол.

Азим эса иккаласининг гурунгини бошидан охиригача тинглаб ётарди. Ўғлининг тоқقا чиқишидан, отасининг кўнглига қараб иш қилишидан ҳам ўзга сабаблари борлигини энди англаган бўлсада, лекин бу сабаблардан ранжимади. Аксинча, у ўғлига нисбатан илгарилари жуда шафқатсиз бўлганини ҳис этди. Камол бугун кўз ўнгидаги балоғатга етган, орияти кучли, ажойиб йигит бўлиб гавдаланди. Демак, бир замонлар ўзини банд этган ҳаётнинг катта ташвишлари энди ўғлига кўчибди. Бу ҳаёт ташвишларининг илк шабадалари шу ёввойи тоғ чўққиларига ўғли билан ҳамроҳ бўлиб келибди. Самад билан сұхбатда илк дафъа ёлқинланган орият ўти унинг кўзларида порлаб турибди. Ана шу ориятни биринчи бор дадил туриб ҳимоя қилди. Ўғлининг дадиллиги ва журъати Азимни қувонтириб юборди.

— Самад, гапларинг мунча совуқ? — деди у ўрнидан турар-кан. — Камол, ўғлим, гулханга ўтин ташла, гуруллаб ёнсин. — Азим вазмин бўлишга уринарди. — Совқотдим...

ЛАҲЗА

Пистирма ҳам фойда бермади. Бургут унга йўламай қўйди. Оператор Рустамнинг сабр косаси тўлди.

— Ўлай агар, бунақанги аҳмоқона аҳволга тушмаганман, — деди у жиғибийрон бўлиб, канистрдаги иссиқ, чучмал сув билан оғзини чайқар экан. — Лаънати бунча ҳам ҳуркак бўлмаса. Мағрур, мард эмиш. Арзимас маҳлукқа мунча мақтov! Нафсга қолганда мард. Ўшанда ҳам ҳимоясиз жониворларга чанг солади.

— Эҳтиёткор бўлиб қолган. Бошқа чораси ҳам йўқ, — деди Низом лоқайди.

— Оёқни ҳам чўзиб бўлмайди. Сичқон ини минг танга, дегани шу бўлса керак... Бу нима кўргилик, қимир этсанг, чайла ағдариламан, деса.

— Биласизми, бургут нимадан чўчияпти?.. Пистирма чайланинг тўсатдан пайдо бўлиб қолгани унга ғалати туюляпти.

— Мен ҳам сезяпман. Чиндан ҳам чўчитиб юбордик чоғи, — Рустам увшган тиззаларини силади. — Келган пайтдаёқ, чайлани куриб қўйиб, бошқа ишларга кўл уриш керак эди. Ҳафта, ўн кунда кўзи қўнікарди. Исмоил эса ақл ўргатади, буйруқ беради. Мана бу омонат қафасда бир кун эмас, бир соат ўти-ролмайди. Аминман. Режиссёр эмиш... Ақл ўргатиш осон.

— Қаранг, қандайдир қүш кўринди, — деди Низом қуруқ қамиш тирқишидан бир кўзини ташқарига қадаб, — хув ана ўрмон тепасида, шимолга қаранг.

Рустам бароқ қошларидан сизиб чиқиб, қовоғига қўйилаётган терни мушти билан артди-да, ачишиб қизарган кўзини олисларга тикди. Кўзлари баттар ёшланди.

— Йў-ўк, ҳеч нарса кўролмайман. Ҳадемай, лаънати ифлос тердан кўзларим кўр бўлиб қолса керак.

— Сувни камрок ичинг, тер ҳам кам чиқади.

— Чидолмайман, силлам қуриб кетяпти.

Ўрмон устидаги кора нуқта кўзга яққол ташланди. У бургут эди. Йигитлар йироқдаги қушни яна чўчитишдан қўрқишиб, эҳтиёткорлик билан камера ортига тисарилишди ва шу алпозда тош қотишиди. Орадан сал ўтгач, бургут дараҳт устида доира ясад, аста-секин уяга пастлай бошлади. Тўқ кўнғир улкан тароқ қанотлари кенг ёйилиб, еллиғичдек оқиш думи шохшаббага тегиб, уя четига қўнди. Бир неча дақиқа бўйини чўзиб, ўткир кўзлари билан атрофни кузатди ва сўнгра оҳиста уяга тушди-да, нимжон, оппоқ, сертуқ полапонларига тўшини тудди. Уядан факат бургутнингmall боши ва қайрилма қора тумшуғигина кўриниб турарди.

Бу ҳолатда бургутни суратга олишнинг зарурати ҳам, қизифи ҳам йўқ. Аммо йигитлар қандайдир ҳаяжондан нафасларини ичига ютиб туришар, бутун вужудлари кўзга айланган эди. Қани энди бургути қурғур турли хил ҳаракатлар қилиб, нағма кўрсата қолса... Чорак, ярим соат ўтди. Жонивор ухлаб қолдими? Ахир, осмонда ҳадеб парвоз қилавериш ҳам тинкамадорини қуритади-да.

Куёш найзага келди. Ҳали бир замон чакалакзор орасида сайраган тўрғай, кекса тут ковакларидан бош чиқариб қуқулаган мусичалар овози тинди. Йигитлар ўзларини қизиган тандир оғзида ўтиргандек сезишса-да, қимир этишмас, юзларидан, яланғоч та-қимларидан тер қўйиларди. Қамишнинг узилиб тушган япроғи терига ёпишиб чунонам ачиштирадики, чидаб бўлмайди. Ҳаёл олиб қочади: бу кичитиб, ачиштираётган нарса тагин илон ёки бошқа бирон газанда бўлмасин. Рустам беихтиёр ўгирилади, болдиirlарини пайпаслаб кўради. Ассистент Низом унинг елкасига туртади. Бургут қаддини ғоз кўтарибди. Рустам объективга чап кўзини қўйиб, ўнгини зўр бериб юмади. Кадр ўртасидаги тўрда бургут боши. У атрофга олазарак бокмоқда. Наҳотки, сезиб қолган бўлса? Ана, қуш қанотларини ёйди. Одам қулочидек. Ҳавони шап-шап силкитди. Патдор панжаларини керганча осмонга кўтарилди.

— Бас, етади! — деди тоқати тоқ бўлган Рустам жаҳл билан тишларини ғижирлатиб. — Беш кун-а?..

Ўрмончилар уйи — кордонда жимжитлик ҳукмрон. И smoил ичкари хонада йиғма каравотда донг қотиб ухлаб ётибди.

— Жаннат билан дўзах орасидаги масофа ғоят қисқа-я, — деди Рустам тери қуриб, шурлаб оқарган кўйлагини ечаркан.

— Нима шовқин? — И smoил кўзларини аранг укалаб очди.

— Қойил-е.

— Оқшом бўлиб қолдими? — Ҳамон талмовсиарди И smoил.

— Яна мазах ҳам қилади, — Рустамнинг жаҳли чиқди.

— Жаннат, дўзах деган сўзлар қулогимга чалингандек бўлди.

— Жаннат роҳатини сен сураյсан, оғайни.

— Ким?

— Сен, ҳа, сен.

— Бу ҳаловат сизларга ҳам насиб этади. Ҳозир пулсирот-нинг нақ белидасизлар. Яна бир баҳя ва жаннат соҳилига тап этиб ҳатлаб ўтасизлар. Уқубатлар туш бўлиб қолади.

— Сен-чи? — Рустам курсига ўтирди ва каравот бошидан сочиқни олиб юзи, бўйнини артди.

— Менга орол — жаннат. Манзилдаман. Сизлар ора йўлда, сафарларинг чаласи бор. Имиллаб қолдиларинг. Афтидан, ортиқроқ гуноҳ қилиб қўйгансизлар.

— Бас, бўлди. Қуруқ гап қулоққа ёқмас. Майнабозчиликни кейин қиламиз. Максадга кўчайлик. Бу аҳволда ишлаб бўлмайди.

— Нима маслаҳат берасан?

— Чорасини кўриш керак. Бургут, афтидан, қуёш тагида шафтоликоқи бўлишимизни кутиб турибди.

— Демак, ким кимни енгади, қабилида кураш боряпти. Яхши... Ё сизлар уни плёнкага тушириб оласизлар, ёки... — И smoил ўсмокчилади, — унга тайёр ўлжа бўлиб тушасизлар.

— Яна мазах.

— Йўқ, йўқ, кечирасиз. Жаҳаннам азобини бирга баҳам кўрай десам, товуқ катагидек самовий чайлада менга жой йўқ.

— Умуман, шу бургут манзараси шартми? Бургутлар тўғрисида минг хил лента бор. Бирон янгилик беролса-ку, гўрга эди... Экранда бир неча дақиқа лип-лип этадими, йўқми, шунча машмаша...

— Бардош, бардош. Нима, жанг майдонини ташлаб қочмокчи-мисан?

— Ўргилдим бундай жанг майдонидан.

— Бургутдан воз кечиш... — И smoил ўйланиб. — Бу такли-фингни энг сўнгги чора деб қабул қиламиз... Ҳим... Мен эса

шунча қийинчилеклар билан ярим йил давомида олингган фильм-нинг биргина эпизоди туфайли кемтик бўлиб қолишини истамайман. Инсон қадами етмайдиган ёввойи табиат гўшаси ҳакида асар яратилса-ю, шу бургут бўлмаса, чақага қиммат... Тасаввур қилолмайман.

— Ха, ха, дарвоҷе, сокин самонинг ягона ҳукмдори, ёввойи табиат арзандаси — бургут бўлмаса қийин... Жуда қийин, — кесатди Рустам.

— Баракалла, биз ҳамиша бир-бири мизни яхши тушунамиз... Кани, чой-пой ичиб олинглар-чи. Учта ҳандалакни саватга солиб, қудукқа чўктириб қўйғанман. Низом, ўшаларни келтир.

— Тўғрисини айтсам, бундан ҳам оғирроқ шароитларда ишлагман: тоғларда, денгизларда, даштларда. Лекин бунақасига дуч келганим йўқ. Орол эмас, нақ дўзах, дўзахнинг ҳам энг қайнот қозони.

— Чошгоҳгача бўладиган тиниқлик, дарё салқини, шабадали эпкинлар-чи? Булар сенинг гапларинг.

— Кейин эса юз чандон қилиб бурнингдан сиқиб чиқаради. Гирд атрофи сув бўлган орол мудом сершабада, салқин жой бўларди.

— Соҳил ортидаги қум саҳролар оролга нисбатан баланд. Ўша тарафдан кўтарилиган ховур орол устини қоплаб олади. Дарёдан эса намлик кўтарилади. Шундан димлик хосил бўлиб, нафасни фиппа бўғади.

— Лаънати бургут ҳам айни шу пайтни кутиб туради. Буни сига ҳам розиман, плёнка иссиқда эриб, аппаратга ёпишиб қолмасмикан, деб кўрқаман.

— Ваҳима қилма... Ҳали ҳаммаси кўрмагандек бўлиб кетади. Бугун нариги соҳилдаги қишлоққа ўтдим. Илгарилари ўша қишлоқ одамлари оролда яшашган экан. Орол кўриқхонага айлангач, кўчиб кетишган. Бир чол билан ҳамсұхбат бўлдим. Кўриқхона директори таништирган эди. Факат, уч-тўрт кундан кейин келаман, бирон кори-ҳолини қилармиз, деб ваъда бериб қолди.

— Чолдан не наф?

— Қари билганини пари билмас. Вақтида зўр овчи бўлган, дейишади... Унгача ўзимиз эрмак қилиб турдикан. Бошқа иложи йўқ.

— Рост, айтганингдай, шайтони бўйнидан тушар.

— Оғайни, мен бир нарсага ишонаман: чарчоқлар, терлар шу ерда — чанг-ғуборлар орасида қолиб кетади. Биз эса бургут парвози, инсон ҳавасини келтирадиган садоқатини бирга олиб кетамиз. Ана ўшанда бу хилват орол жаннат ҳаловатини беради.

Чол бешинчи куни ўрмончилар катерида дарёдан ўтиб келди. У шунчалар озгин эдики, устидаги кийим-кечаги худди омонат кийгизиб қўйилгандек шалвираб турарди.

— Мавриларни тугаллаб, биз ҳам етиб келдик, — деди у ҳаммани ҳайратга солиб, йигитлардек қувнаб. Куруқ гавдадан бундай тетик ва ўқтам овозни эшитган Рустам тилини тишлаб қолди. — Кордонга бурилмай, тўғри шу ерга келганим яхши бўлди. Умуман, танлаган жойларинг маъқул. Бургут уясига нисбатан баланд. Уяда нима бўлаётгани қўриниб туради. Лекин қусури бошқа ерда. Чайлани ўз кўзим билан кўрай деганимнинг боиси бор эди, Исмоилжон, — чол афсусланган кўйи бошини чайқади.

— Эштайлик.

— Бўлмайди. Бу чайла ҳам эмас, пистирма ҳам эмас. Капа... Неча кишига мўлжалланган?

— Икки кишига.

— Ҳаммаларинг кўчиб кирсаларинг ҳам бўларкан.

— Ол-а! — Рустам шундай деди-ю, кулгисини яшириш учун четга ўгирилди.

— Аттанг, шунча вақтни бекор ўтказипсизлар... Ҳа, айтмоқчи, ким суратга олади?

— Мен, — деди Рустам ажабланиб.

— Узоқлик қилмайдими?

— Телеобъектив узоқни яқин қилиб, кўз олдингизга келтириб қўяди.

— Шерингиз ким?

— Мана, Низом — ёрдамчим, ассистент.

Чол иккаласига ҳам бошдан-оёқ разм солиб чиқди, кейин Исмоилга ўгирилди:

— Бўлмайди. Бир киши ҳам кифоя.

— Нима деяпсиз, амаки? Икки киши бўлатуриб жонимиз ҳалқумизга келяпти-ку, — Рустам очик зарда билан гапирди.

— Бир ўзингиз бўлсангиз, жойида туради.

— Ўҳҳў, — Рустамнинг дами ичига тушиб кетди.

— Ҳа, ҳа, гурунг камроқ бўлади. Алахсимайсиз. Жой ҳам кенг қолади... Иним, жонингизнинг роҳатини кўзласангиз-чи. Нима қиласиз қорани кўпайтириб... Пистирма ҳам ярамайди. Нега қамишдан ясадиларинг? Атрофда қамиш йўқ-ку: тутзор, паттазор. Чайла ҳам шулардан фарқ қилмаслиги керак.

Хаш-паш дегунча чол бир даста қуриган тут шохчаларини териб келди. У кекса дараҳтга ўсмирларга хос эпчиллик билан чиқди-да, чўкиртак оёқларини кериб, шохчаларни қамиш ора-

сига қалаб чикди. Пистирма фуж шохчалар орасида кўринмай қолди. Чол тутдан тушди, кийим-бошини қокди.

— Бу ерда қиладиган иш қолмади. Бугун-эрта дам олинглар. Бургут ҳам унгача кўнигади. Болаларининг емишидан хабар олсин.

— Бу бургут деганингиз биз кутганчалик эмас экан.

— Тушунмадим.

— Бемеҳр. Бунинг устига, кўрқоқ.

— Нега? — чол бепарво сўради.

— Жўжалари темирқанот, ҳали кўзи ҳам очилмагандир. Шунчалик меҳри қаттиқки, қайрилиб ҳам қарамайди. Тухумдан очиб чиққанига хафта бўлди.

— Ҳа-я, bemehr деганингизга кўшила олмайман, аммо нодонлиги бор: шўрлик, одамлар менинг полапонларимни кўришмаган, хира пашшадек айланаверсам, сездириб қўяман, деб ўзини олиб қочиб юрган. Нодонлик. Бу-ку қуш экан, нодонлик одамни ҳам нобуд қилади...

— У бошқа олам, биз бошқа. Мақсадимизни сезиб, озор бермаслигимизни тушунса-ку...

— Бунинг нимасини суратга оласизлар?

— Қуш ҳаётидан бир неча дақиқа бор-йўғи, лекин шунда ҳам парвоз, ҳам турмуш тарзи, ҳам фидойилик ва ҳозир айтганим, ҳам садоқат бўлса....

— Мушкул иш экан, — чол ўйланиб қолди.

— Қош қўямыз, деб кўз чиқаришдан кўрқаман. Жўжалар умрига завол бўлмасак ҳали.

— Баъзан шунақаси ҳам бўлади.

— Шундай фожиага хисса кўшишдан оғирроқ виждон азоби бўлмаса керак.

— Дилгир йигит экансиз, яшанг.

Исмоил чўнтағидан дастрўмол олиб бўйини артди, қовоғи солик Рустамга кўз қирини ташлади.

— Мен сизга айтсан, бу бургутни танигандай бўлдим.

— Йўғе?

— Ҳа, у кўпни кўрган. Жўн алдовларга учмайди ҳам. Аммо чинакам хавф туғилганда, ҳеч нарсадан қайтмайди ҳам... Оролда катта қишлоқ бўларди. Мактабда зоологиядан дарс берганман...

— Наҳотки, таажжуб!

— Она бургут ўшанда шу ерда яшар, жўжа очар, учар, учеб кетар ва яна ҳар йили қайтиб келарди...

— Буни кутмаган эдим, — Рустам ўзига ўзи гапиргандек мин-ғирлади.

— Яъни? — чол ҳайрон бўлиб сўради.

— Ўқитувчи бўлганингизни.
— Ҳа... Вақт, — деди чол ўйчан ва давом этди: — Шип-шийдам қилиб кетаркан. Мен бошқа нарсани айтмоқчи эдим. Бутун қишлоқ кўч-кўронини бир кунда ортди, кўчди-кетди. Бирон киши шундан бўён бу юрга оёқ босгани йўқ. Мен ҳам зарурат туфайли, илтимосингизга кўра келдим.

— Миннатдормиз, отахон.
— Бургутлар эса ҳар йили шу ерда: яшайди, бола очади, учирим қилади... Одамнинг ота юрга муносабати нисбий. Қаерда тўқ, тинч яшаса, шунга мослашиб кетаверади... Ана, қаранг, айланяпти. Бечора-е, холи қолдирганимизни дархол сезди-я. Қайсиdir, бир дараҳт панасида кўзи тўрт бўлиб, кетишимизни пойлаб турган экан-а... Ҳа, булар учун юрт ўзгармас... Янглишаётгандирман: балки буниси мен билган она бургут эмасдир. Йигирма йилдан ошди: қизидир, неварасидир. Аммо бу уя ҳамиша банд, эгали. Янги-янги авлодлар дунёга келяпти.

— Ана шу садоқат учун уларни ҳамиша севиш керак, — Исмоил ҳаяжонланди.

— Сиз мени кечиринг, — Рустам чолнинг қоқшол елкасига қўлини қўйди.

— Нима учун?

— Бир оз кўрслик қилдим.

— Ҳечқиси йўқ. Кўриқхона директори қай азобда ишлаёт-ганларингни айтувди. Ўрганмаган кишига қийин. Буни ҳам билган билади... Ота юртимизни кинога оляпсизлар, хурсандмиз. Қўлимиздан келадиган ёрдамни бермасак, гуноҳ бўлади.

— Раҳмат сизга.

*

* *

Кейинги кунларда уяга яқин йўлда, тутзорда одамларнинг пайдо бўлиши, уларга чап бериб, узоқ-узоқларда айланиб юриши, узоқ қаровсиз танаффуслар мурғак жўжаларга унчалик ҳам пугур етказмаётганига одатландими, ҳайтовур, бургут кундуз кунлари бутунлай қорасини кўрсатмай қўйди. Чол ҳам бедарак кетди. Бир куни кечкурун кайфиятсиз, ҳоргин ҳолда кордонга кириб келди.

— Ҳа, отахон, тинчликми? — Рустам хавотирланиб сўради.
— Бўлмади, иним.
— Нима бўлмади?
— Ҳа, қўяверинг... Қалай, ўзларингда нима янгилик?
— Йўқ ҳисоби.
— Биламан. Бу кекса она бургут гаҳ деса қўлга қўнаверадиган анойилардан эмас... Ҳа, майли, шу ердан излаймиз.
— Нимани?

— Кейин айтаман... Икки қариянинг орасига тушманлар. Қани, кўрамиз: ким кимга фириб бераркан.

... Кечанинг алламаҳалида чолнинг шовқин-сурони ҳаммани оёққа турғазди, у қалтираган қўлларида лампа тутганича, йиғма каравот тагини ёритар, ҳансираб, бўғилиб гапиради:

— Жонивор-ей, ўз оёғинг билан келдингми, а? Сен менинг ғамимни ебсан-да. Ўжар чолни бекорга уринтириб юрмай, деба? Мен бўлса сени қишлоқда, боғда, дала-даштда излаб юрибман. Тинкам қуриди-ю... Йигитлар олдида сал қолди-я, шарманда бўлишимга. Сен бўлсанг бу ерда, ёнгинамда, оёқларим тагида пишиллаб юрибсан.

Рустам уйқули кўзларини уқалаганича, чолнинг ёнига чўккалади ва шу заҳоти ўзини орқага ташлади.

— Илон!

Йигитлар тапир-тупур қилиб яримяланғоч ҳолда ташқарига отилишди. Ичкаридан чолнинг овози эшитилди.

— Нима, илон кўрмаганмисизлар! Хурсанд бўлмайсизларми? Бай-бай-бай. Ниҳоят, кўнглим жойига тушди-я... Борингга шукур.

Чирокдан, тўс-тўполондан қўрқан илон бурчакка тиқилиб, яrim кулча бўлиб, хавфни даф этишга шай турарди. Чол ўзини босиб олиб, хонага киришга журъат этган Исмоилга чироқни тутқазди.

— Қимирламасин. Халта топиб келай, — деди ва ташқарига чиқиб, бир оздан сўнг қофоз қоп ва бир метр чамаси учи айри чўп топиб келди. Йиғма каравотни хона ўртасига суриб қўйиб, қоп оғзини илонга яқинлаштирди, айри чўп билан уни итариб, қопга тиқди.

— Омадни қаранглар-а.

— Нима қиласиз буни, отахон?

— Бебаҳо нарсани қўлга киритдик. Мушкулимиз энди осон бўлади. — Чол қоп оғзини ип билан маҳкам боғларкан, гапдан тўхтамасди: — Қулоқ тутсам, пол устида нимадир судраляпти. Аввал англай олмадим. Сичқонлар чийиллагач, сездим: илон... Бу илон илгарилари ҳам хонага кириб-чиқиб юрган, факат сизлар сезмагансизлар.

Трусиқchan йигитлар Исмоилнинг каравотида яланғоч оёқларини полдан олиб, коринларига чалкаштирганча ёнма-ён ўтиришарди. Чолнинг сўнгги гапи уларни сескантириб юборди.

— Шериги бўлса-я. Ҳамроҳини излаб келиб қолса, нима қиласиз?

— Қўрқманлар, важоҳати совуқ бўлгани билан заҳарли эмас. Шунчаки чипор илон. Хонага сичқон овлаб кирган.

Қоп шитирлади, илон бу шитирлашдан чўчидими, ўзидан-ўзи вахимали вишиллади.

— Юрагим қинидан чиқиб кетаёзи-я, — деди Рустам. — Чақса нима бўлади?

— Илоннинг жигига тегмаса, одам билан иши йўқ. Бехосдан босиб олса, дуч келган ердан ҳаппа тишлайди. Унинг ҳам жони ўзига ширин. Тишласа яра қилади.

— Заҳарлиси-чи?

— У бошқа гап...

*
* *

Йигитлар ўринларидан туришганда чол ҳам, қопдаги илон ҳам йўқ эди. У қуёш анча кўтарилгач, буқланган қоғоз қопни қўлтиқлаб келиб қолди.

— Энди кувватни сизга берсин, — деди у Рустамга юзланиб. — Илонни бургут уясига боплаб жойлаштириб келдим. Тонг сахарлаб гумдон бўлган экан. Жўжалари каттагина, патлари оппоқ, ўсиб қопти. Мени онаси чоғлаб, тумшуғини капиллатиб очгани очган. Бармоғимни тутсам шундай тортадики, ҳали тумшуғи қотиб улгурмаган-у, узиб оламан дейди-я... Энди, Рустамжон, яхшилаб эшигинг. Бургутлар эрталабки овга кетишган. Дарранда-ю парранда ёз салқинини хуш кўради. Бир бечора безарар илонни курбон бериш эвазига эҳтиёткор бургутларни илинтиромкчимиз.Faflatда қолманг. Улар бир марта алданиши мумкин... Илонни эса шохга шундай мустаҳкам боғладимки, хотиржам бўлаверинг. Хушёр бўлинг: омадингиз бир неча дақиқага боғлиқ. Кейин пушаймон бўлиб юрмасангиз бас.

Камерани у ёқдан-бу ёққа кўтариб юрмаслик учун пистирманнинг ўзида штативга қулай ўрнатиб қўйишганди. Рустам аҳён-аҳёнда объективдан жўжалар ҳаракатига разм солиб кўярди. Бири худди мушук боласидек ёнбошлаб ётипти, иккинчиси тумшуғини чўлга тираб мудраяпти, онда-сонда жунжиккандек патларини ҳурпайтиради.

Пистирма билан бургут уяси оралиғи олтмиш-етмиш қадамча. Эски уя шунчалик каттаки, улкан патта дарахтини анчагина эгиб турибди. Пастки қатламларида турли хил дарахт шоҳшаббалари ўнгиб, оқариб кетган. Уя ичидаги қушлар лати, эски латта-пutta, қандайдир ҳайвоннинг увада териси.

Орадан хийла вақт ўтди. Ташқарида шамол тўхтади. Чизилловуқ хониши эшитилди. Лекин пистирма тирқишлиаридан ҳавонинг юқори қатламларида ҳамон сақланиб турган салқин шабада кириб турибди. Илон туфайли тунда чала қолган уйку элитяпти. Рустамнинг кўзлари ўз-ўзидан юмилиб кетди...

Гурр этган овоздан сесканиб уйғонди. Бадани чиппа ёпишқок терга ботганди. Бир гала чүмчук бургут уясига яқин патта шохларига гоҳ қўниб, гоҳ учиб, тинимсиз чуғурларди. Рустам объективга тикилди. Оппоқ жўжалар бесаранжом. Бир-бирининг пинжига тиқилиб олиб, тепага, ёй шаклида эгилиб турган шохга қўрқа-писа қарашади. Юқоридан нимадир осилиб тушди-ю, бир-икки буралиб, яна шохга чирмашиб олди.

— Чоли тушмагур-ей, топган жойини қара-я. Боплапти-ку, — деди пиҷирлаб ва камерани елкасига ўнгайроқ олди.

Чумчукларнинг чуғур-чуғури, ҳаракати кучайган сайин илоннинг безовталиги ҳам ошиб борди. Энди у тез-тез бошини пастга ташлар, кўринмас ип билан шохга маҳкам чатиб ташланган гавдасини зўр бериб сұғуриб олишга уринар, жон ач-чиғида шохни, ўз танасини ғажирди.

Рустам қамиш тирқишини кенгроқ очиб кўмлөқ соҳил осмонига қаради. Шу пайт қандайдир соя пистирма устидан шиддат билан лип этиб ўтди-ю, ўрмон тарафга ғойиб бўлди. Зум ўтмай, соялар иккита бўлди. Рустам бургутларнинг соясиниги на кўтарди.

Камерани елкасига тиради, аппарат шифиллай кетди...

Биринчи бургут осилиб турган илонга пастдан туриб панжалари билан чанг солди. Бироқ қанотлари шохга тегиб, жўжалар устига чалқанча йиқилди. У шошиб ўзини ўнглади-ю, уядан пастга шўнғиди. Шериги юқоридан қанотларини йиғиб, ўқдек ташланди. Шох унга ҳам панд берди. Уя атрофидаги бир неча шохчани синдириб, силкитиб у ҳам ҳавога кўтарилиди.

Рустамнинг кўзлари ҳеч нарсани кўрмасди. У бир маромда шифиллаётган камерага, жон-жаҳди билан ёпишган кўйи ташқаридаги ҳаёт-мамот жангни асл моҳиятини сезар-сезмас суратга оларди. У аппарат кўзи билан қаради.

Дастлаб шошиб ҳамла қилган бургут бу гал саросимага тушмади. У тўғри илон чирмаб боғланган шохга қўнди. Шох унинг оғирлигидан эгилиб, жўжаларнинг нақ устига бориб қолди. Бир зумда бургут осмонга озод кўтарилиди. Унинг панжасида шахд билан узиб олинган илоннинг ярим танаси гажак бўлиб буралади...

Иккинчи бургут уяга қўнди. Қанотларини дум томонга қайчи шаклида йиғди. Кўкраги кенгайиб ҳурпайди. Сояси жўжаларни қуёш нуридан тўсди.

У камерасини қўлтиқлаб пистирмадан тушаётган Рустамга ўқтам қаради-да, мағрур бошини бамайлихотир уя тубига эгди. Қайрилма тумшуғи билан дир-дир титраётган жўжалар қанотини тарай бошлади.

ЎТАЁТГАН КУНЛАР

Эсон, куз охирларида етиб келаман, деб ваъда берганди. Сора ҳар куни кўзи тўрт бўлиб йўлга қарабди. Эридан дарак бўлавермагач, кўнгли оғринди. Дугоналар ҳазил-хузуллари-дан ўзини олиб қочадиган, гапга аралашмайдиган одат чи-қарди. Уй ташвишлари билан ўз ёғига ўзи қоврилиб юрди. У дардини ҳеч кимга айтмас, айтолмас ҳам эди. Кузнинг сўнгги кунларига хос ғуссали кайфият, дилхасталик унинг вужудини кемираради.

Далаларда ғўзапоялар қовжираб, жигар ранг тус олди. Аёллар ерга тушган пахталарни териб юришибди. Сора ишга кечи-киб чиқди. Дугоналари унинг сўник кўзлари, шишган қовоқларига караб, дилини оғритмасликка уринишган бўлишса-да, Зархол ўзи-ни тутолмади:

— Ухх!... Кексайиб қолганингни билмай қоласан, — деди ёнида энгашиб „подбор“ тераётган Сорага боқиб.

Сора лом-мим демади. Аёллардан бири қўшни эгатдан:

— Тавба денг, дугона, сиз ҳали кексайдим деманг, шукур қилинг. Агар ўзингизга сал қарасангиз, ҳалиям кўпларнинг юра-гига ўт ёқасиз, — деб шараклаб кулди.

— Ҳазилингизни кўйинг, дугона. Ўзимизникиям етади, шукурки, ҳали бирон марта туртиш ў ёқда турсин, қаттиқ сўзини ҳам эшит-ганим йўқ.

Сора бошини кўтарди. Этагини ечиб, елкасига ташлади-да, келган эгатидан изига қайтди. Унинг кўзлари ёшга тўла эди. У ўнг кўлидаги кўсак бандини тишлаганича, тарози то-мон борарди.

— Куриб кетмагин, дугона, — деди Тожимастон семиз, бил-килдоқ билагини қашир экан.

— Менга нима, кўр бўлсин, — деди Зархол унга ўгрилиб. — Шўринг қурғур, латта. Садқай одам кет...

— Бечоранинг кўнгли бўш-да. Кўнгли бўшдан кулманг.

— Кўнгил, кўнгил, дейсиз. Ундан кўнгилнинг бўлганидан бўлмагани яхши. Уруғи куриб кетдими, эркакнинг. Агар мен шу латтанинг ўрнида бўлганимда эди, ўша дарозни осто намдан ҳатлатмас эдим, — Зархол қайтарилган енги билан пешонаси-даги терни артди.

— Эркакнинг ёмонига Худо бас келмаса, бандаси бас ке-лолмайди, — деди Тожимастон Соранинг изидан караб туриб.

— Ундан умр қургандан кўра ўлганим авто. Илгарилари Сорага раҳмим келарди. Энди қаҳрим келади. Бориб ўша да-роzinинг терисига сомон тиқсан, дейман. Гулдай жувонни сўлдирди-кўйди.

Сора кечгача дала четида ёлғиз ўзи тўкилган пахта териб юрди. Тушликка ҳам чиқмади. Дугоналарининг ўзига нисбатан буғунгидек ўринсиз таъналарини биринчи марта эшитаётгани йўқ. Буларга кўнишиб кетган. Сора Эсонни кутарди. Бироқ турли хаёлларга бориб, эрининг тез орада келмаслигини юрак-юрақдан сезиб турса-да, кўнглининг аллаерида яшириниб, баъзан вужудини илитиб турган умид билан яшарди.

*
* *

Дарё томондан шамол эсади. Тупроқ йўл чанги ва йўл четидаги личанзордан хас-хуслар қуюн бўлиб осмонга кўтарилиди. Тобора юксакликларга ўрлаётган, гир айлананаётган қуюн тўпратўғри Соранинг қишлоқ четида мунғайиб турган уйи томон бостириб келаверди. Шамол уй ортидаги теракнинг зарҳал сарик япроқларини, томга босилган маккапояни юлиб-юлқиб, боғ сари учирив кетди.

— Ҳавонинг авзойи бузук, бир нарсани бошламаса эди, — деди Сора инқиллаб ўрнидан тураётган, соchlари кулранг, оқ ёноқ суяклари бўртиб чиқсан, юз, бўйин терилари устухонига ёпишган қайнонасининг туришига ёрдамлашаркан.

— Эй, Худойим-ей, раҳминг келиб эртароқ қарзингни олсанг нима қиласарди. Бир тўрва юк бўлиб қолдим...

— Қўйинг, хола. Ҳозир иссиққина сут олиб келаман. Қаймоқ келтирсам-чи, холажон.

— Қаймоқни кўнгил кўтармайди, жон болам, — деди кампир бикинини кўллари билан ушлар экан, ҳолсизланиб.

Ташқаридаги ўчоқда тутун бурқсийди. Ўчоққа қорни билан суяб кўйилган чойдишнинг оғзи очик. Буғ кўтарилиб турган сув юзида кул гарди сузиб юрибди. Сора тизза ва қўлларини ерга тираб, ўчоққа пуфлади. Тутаб ётган фўзапоя ёниб кетди.

— Совуқ сувда ювинманг, хола, човуштириб бераман. Соvuкни кўряпсизми?

— Бугун бир нарсани бошлайди, — деди пастликда оқариб кўринаётган дарёning нариги қирғонидаги адирликлар устидан кўтарилиган булатлардан хира кўзларини узмай. — Қишлиқ ўтинни нима қиласамиз? Кизим, роса қийналиб кетдинг... Ҳа, кун кўрмай ўлгир, — кампирнинг овози бўғилиб қолди. У кўк гулли чит кўйлагининг енги билан киртайган, нурсиз кўзларини артди. — Ҳамманинг эри, фарзанди уйда. Ўтин, уй-рўзғор, бозор-ӯчарини қилиб юрибди. Бизникига нима бўлди? Ҳа, Худодан толгур!

Тушга бориб шарқ томондаги тоғларни қора булут босди. Дарё устида сийраклашиб турган туман қуюқлашди. Шамол ку-

чайиб, булутларни ҳаракатга келтирди. Атроф қоронғилашди.
Унсиз, вазмин шовуллаганича ёмғир қуя кетди.

*
* *

Ёмғир кечаси билан тинмади. Сора тун ярмида туриб, девор тагида түнкарилиб ётган тоғорани тандирнинг оғзига қўйиб, устидан эски шолча тортди.

— Ёмғирми, қизим? — сўради ичкарига кирган Сорадан кампир.

— Ха, — деди Сора кўрпани очиб, ўринга киаркан.

Сора эрта тонггача ухлай олмади. Тонг ҳам, жўрттага қилгандек, шундай ҳам чўзилиб кетдики, Соранинг назарида, у шу давр ичиди бир неча кунларни бошидан кечирди. Эрталаб сигир соққани оғилхонага кирди. Сигир бурчакка тиқилиб турарди. Қаппайган қорни тагидан буғ кўтарилади, елкаси ёмғир томчиларидан ялтиради. Ўртадаги чукурча шиптирга тўлган, ўқтин-ўқтин чакканинг чўлп-чўлп овози эшитилади.

— Вой, бечорагина, говмишим-ей, совукқа қотдингми?

Сора сигирни ташқарига олиб чиқди. Кап-кatta бўлиб қолган бузоқ совуқдан жунларини ҳургайтириб, зенинибина онасига эргашди. Сигир тут тагига тушган юмшоқ баргларни тили билан ямлаб, чайнай бошлади. Сора хашак келтириш учун оғилхонага кирди. Оғилхонанинг беда босилган қаноти чўкипти. Томнинг чириган дастаси синиб, босилган беда боғларига тиралиб қолган эди.

*
* *

— Хўш, Сорахон, зернгдан хат-хабар борми?

— Йўқ, — деди маъюсланиб Сора.

— Ҳм... Менда ишинг бормиди? Айтавер, тортиниб ўтирма.

— Кечаги ёмғирда оғилхонамиз чўкибди. Бир-иккита эркак бўлмаса, эплашим қийин.

— Хайрият, оғилхонанг чўкибди. Мен сенинг уйингдан хавфсираб юрибман. Юз марта айтдим. Колхознинг уйига кўчиб ўт, деб. Ниманг қолди ўша ерда? Айт-чи? Ҳеч тушунмадим сенга, — деди бригадир елкаларини учирив. — Хўп, де, эртага кўчириб ўтказаман... Ҳа, айтмоқчи, қайнонанг соғми? Ўлмади, ўлмади да, шу кампир, а?

— Кўйинг, бечоранинг ўлимини тиламанг.

— Мен шу кампирни бошингга битган бало деб тушунаман. Ҳаммаси бир гўр.

Сора гапирмоқчи бўлиб оғиз жуфтлади-ю, лекин бошини ўраб олган пахта рўмолининг учларини тишлари орасига олди.

— Неча арава ғўзапоя олиб бориши? — сўради биргадир Кодир. — Эшматга буюрган эдим.

— Тўрт арава. Ғўзапоямиз етади. Бечора кампир сизни кўп дуо қилиб қолдилар.

— Кампир-а? Ху, алвости...

— Ундей деманг, Қодир ака. У жуда яхши одам. Агар ҳовлида шу кампир бўлмаганида, билмадим, ҳолим нима кечарди, — ўксинди Сора.

— Хўп, майли, хафа бўлма, ҳазиллашдим. Оғилхонани со-злашга эртага тушдан кейин борамиз. Ошга кучинг етадими?

— Ош айлансин бошингиздан.

*
* *

Киш ўтиб баҳор келди. Соранинг боғидаги дараҳтлар чунон ҳам гуллаб бердики, ҳар кун даладан қайтганида, у боғни айланар ва беҳад қувонганидан ёноқларига қон югуради.

Эртадан кечгача шимолдан шамол эсиб, кўнгилни хушлайди. Пастда оқариб кўринган дарёдан ёввойи ўрдаклар ғагалаши эшитилиб туради. Сора эри Эсон ёзиб юборган бир қатор маслаҳат — топшириқларни сидқидилдан бажаради. Кишлокқа тушиб эртапишар оқ бош карам кўчатларини сотиб олиб келди. Кузда ҳайдалган томорқани кичик-кичик жўяклар коплади. Уларни бир текис карам кўчатлари билан безади. Дастлаб шалпай-ган кўчатлар бир-икки кун ўтгач, қаддини ростлашди. Илк баҳор шабадасида япрокларини дирдиратиб турганидан Соранинг кўнгли тоғдек ўсди.

Дала-даштга, томорқага, дарё соҳилларига етиб келган баҳор кампир қалбида ҳам куртак отди. У бу йил қишида тирик қолганидан тил учиди куюниб галирса-да, лекин унинг нурсиз кўзларидағи учқундан яна бир баҳорни кўриб, қалбан қувонаётганини се-зиш мумкин эди. У уззукун инқиллаб-синқиллаб юрса ҳам тинмай, кўлидан келганича ишларди. Келини даладан қайтгунча эшик-орани супурар, сал кун кизигач, сигирни етаклаб бедазор четидаги ариқ устида, хиллираган ям-яшил майсага ўтлатгани олиб чиқарди. Эрмак учун кийимининг этагида ялпиз терарди. Кечқурун эса келини пиширган ловияли угро ошни ичаркан, тинмай Сорани олқарди.

Сора шанба куни анорзорни тепиб чиқди. Зўр бериб ишлаганидан, унинг юzlари қизариб, кўй кўзлари тиниқлашди. Қайнонаси ўтган йилдан қолган ўт-ўланлар илдизларини териб юраркан, келинига қараб:

— Очилиб кетаяпсан, келин, — деди.

Сора астойдил уялганидан бошини куйи эгди.

— Қани эди, жувонмарг Эсон ҳам одамларнинг боласидек уй-гинасида ўтириб, рўзғорига бош бўлса... Одам бўлмади. Унга бозрма-бозор кезиш бўлса, савдогарчилик қилиш бўлса, бас. Касби коринг қурисин сенинг...

— Кўйинг, хола, хафа бўлманг, тузалиб кетадилар. Ҳали кўрасиз, шу гал келганларида тамомила бошқача бўлиб қайтадилар.

— Кошкийди, қизим. Бўйнидан шайтон тушиб, одам бўлса... Эй, Худойим-ей, бошимизга не-не савдоларни солмади. Эл-юртдан уялиблар ўлдик.

Сора шу баҳорда ўттиз бешга кирди. Лекин одамлар Сора-нинг ёшига ёш қўшардилар. Унинг ҳаётининг кўп қисми дарбадар эр ташвишларини ўлаш билан ўтиб кетди. У бу ташвишларга шунчалик ўрганиб кетдики, ёшини ҳам, шахсий хузур-ҳаловатини ҳам унутди. Назарида, унинг энг баҳти даври — қизлик онлари бўлиб, у ўтмиш хотиралари орасидан ҳар замон лип этиб чиқиб қолар ва ҳудди шундай пайтлардагина баҳтнинг нашъасини тотгандек бўларди. Эсон ундан саккиз ёш катта бўлса-да, анча ёш, навқирон кўринарди. Одамлар буни ҳаётини ташвишсиз, кўча-кўйда, фароғатда ўтказаётганидан, деб билишарди: шу туфайли ҳам хотини Соранинг йилда топ-ган-тутгандарини ёки томорқадан чиккан маҳсулотларни олиб кетгани келганида юзига солишарди. Бундан Сора изтироб чекарди. Аксинча, эрининг ажинсиз, таранг пешонаси доим йилтираси, куюқ ўсадиган соқолини доим қиришилаб олиб юришига ҳаваси келарди. Унинг юзидағи ҳалимлик, осудалик Сорани ҳамиша ром этарди. У эрини ҳар эслаганида, унинг чехрасидаги шу ҳалимлик, майнин табассумни кўз олдига келтираси, ҳаётида содир бўлаётган қийинчиликларни арзимас, ўткинчи ва беҳуда, бир кунмас-бир кун ҳаммаси фавқулодда ўзгаради-ю, олам унга кулиб бокадигандек туюларди.

АРМОН

Совчилар келиб кетган куннинг эртаси Солия хола қизини яна гапга солди:

— Мен сенга ҳайронман, Назокат, нимани ўйлаяпсан? Нимага умид қиляпсан, тушунмайман. Ахир, қиз деган ҳам ўз қадр-қимматини билиши керак-да. Ҳар куни совчини боғлаб қўйибдими? Тўрт келади, беш келади, ҳафсаласи пир бўлиб кетади-колади. Ёшинг бир жойда... Одамнинг уруғ-аймоқ назаридан қолиши ёмон гап. Бундай воқеаларнинг кўпини кўрганмиз. Охири баҳайр бўлишига кўзим етмайди... Нега индамайсан? Галир, ахир! — она хўрсинди.

— Бошим ғовлаб кетди, эна. Нима қилишимни билмайман. Мен унга синашта бўлмасам, кўр-кўрона тегиб кетавераманми? Кейин нима бўлади? — Назокатнинг кўзларида сўлим саросима, андиша учқунланади.

— Ҳеч нарса бўлмайди, қизим. Ҳаммаси ўз ўрнига тушиб кетади. Бир-бирига синашта бўлмай турмуш кургандар камми? Ана, Омон билан Тожинисо ҳам яшаб юришибди-ку. Нимаси кам? Ҳамма ҳавас қилади. Ўшалар бир-бирини таниб, севиб турмуш курганмиди? Йўқ.

Хайтовур, қизининг юмшаганиданми, Солия холанинг овози ва келтираётган далиллари қатъийлашади. Кўнглида умид пайдо бўлади. У титрок, ҳаяжон ва меҳрибонлик билан давом этади:

— Чўчима, қизим. Тирикчилик қилиб юрган одамларнинг аксарияти ана шу хилда турмуш қуришади. Севги кейин кела-ди. Ҳа, ишонавер. Ҳаётда ҳар нарса бўлади. Ҳозир ёшсан, чи-ройлисан, бозоринг чаққон. Яна икки йилдан сўнг нима бўла-ди? Буниси қоронги. Ёши ўтган қизнинг қадри ҳам кетади.

— Қўрқитманг, эна, — Назокат безовталаниб онасига қарайди.

— Мен сени қўрқитаётганим йўқ. Бор гапни айтяпман. Ўйлаб кўр, қизим. Биласанки, сенга ўз ҳукмимни зўрлаб ўтказолмайман. Ақл-фаросатинг ўзингга яраша. Шуларга ишониб масла-ҳат беряпман. Ахир, Қобилжон бегона эмас. Тоғагинангнинг ўғли. Кўргансан, биласан. Ўзингдек олий маълумотли. Чиройига ҳавас қилса арзиди. Феъли-хўйи ҳам исми жисмига қуйиб қўйган-дек мос. Ўйла, қизим, ўйла. Дугонанг Тожинисоникидан ҳам сенинг ҳаётинг яхши бўлади.

Дугонасининг исмими эшитганда, Назокатнинг қалбida ал-лақандай илиқ ҳис жўш урди. Тожинисони кўриш, у билан сух-батлашиш истаги туғилди. Ишга отланаётган онасини бўсаға-гача кузатиб қўйгач, ўз хонасига кирди. Тошойна олдига бориб паришон юзлари, маъюс кўзларига тикилиб қолди. Ойнадаги аксида кўрган сўниклик хонада ҳам ҳукмрон эди. У бу ерда узок қоломаслигини ва ҳозирги дамда кўнглига қил ҳам сиғ-маслигини англаб, атлас кўйлак бичиш баҳонаси ҳамда шу туфайли Тожинисо билан дардлашишни ният қилиб, ҳовлига чиқди.

Тожинисо ҳовлида ёлғиз ўзи эди. У бешик тутқичига ўнг би-лагини осилтирганича чакалогини эмизиб ўтиради.

— Келинг, келинг, — деди у, ўтирган кўйи шивирлаб. — Ух-лаб қолди, ҳозир тураман.

— Омон aka қаерда?

— Мактабдан қайтганлари йўқ.

— Эҳ, эсим курсин, ўзим кўрувдим-ку, жадвал тузиб ўтирган-ларини.

— Дарсингиз йўқмиди бугун?
— Биринчи соатлар эди... Уйда қиладиган ишингнинг тайини бўлмаса, дикқатинг ошаркан. Зерикиб, сизникига чиқдим.
— Жуда яхши қилибсиз... Мен ҳозир, — Тожинисо шундай деди-да, ташқарига чиқиб кетди. Назокат юмшоқ кигиз устида бешик тебратаркан, унинг бир меъёрдаги шикирлаган овози, негадир, яна кўнглидаги фуссани ёдига солди. Чалкаш фикрларни хаёлидан қувиш мақсадида хона деворларига кўз юргутира бошлади. У таниш суратни кўриб қолди. Назокат тиззасига суюниб ўрнидан турди. Ўнг кўли билан бешик тутқичини ушлаганича суратга боқди-қолди. Ҳар гал шу хонага кирганида, рамканинг бурчагидаги бир йигит сурати унинг зътиборини тортмасдан қолмасди. Бу Омоннинг дўсти Назир билан тушган сурати эди. У пайтларда иккаласи ҳам ёш, кўхлик бўлишган. Бунинг устига, Назир худди: „Мана, биз шундай чиройлимиз, ақли расомиз, бироқ шўхлик ва муғамбирлик ҳам бизга бегона эмас“, деяётгандек бокиб турарди. Омон дўсти тўғрисида чурқ этмаса-да, Тожинисо эрининг барча дўстлари орасида уни кўпроқ мақтарди. Шуниси ажабланарли эдики, у ҳам ёши ўттизга яқинлашиб қолганига қарамасдан, ҳамон бўйдоқ эди. Назокат бу йигитни меҳмон бўлиб келган пайтларида бир неча марта кўрган, кузатган, беихтиёр кўзлари кўзларига тўқнаш келганида, сабабсиз қизариб-бўзарган. Айниқса, бир воқеа ҳеч ёдидан чиқмайди. Аксинча, шу воқеани эслаганида этлари жи мирлаб, қизиб кетишини ҳис этади.

Ўтган ёзда Назир ва яна бир йигит хотини, бола-чақалари билан меҳмон бўлиб келишди. Аёл, унинг эри ва Омон билан Назирлар — тўрталаси университетда бирга ўқишган экан. Ўша кечаси меҳмонлар ҳовлида, тол тагидаги чорпояда узок вақт чақчақлашиб гурунг килишди. Бу Назокатнинг чунонам ҳавасини келтирдики, негадир, ўзини қўярга жой тополмай қолди.

Эртасига йигитлар дарёга тушиб, балиқ овлаб келишди. Тожинисо меҳмонлар туфайли ташвиши органи сабаб Назокатни айтириб келди. Назокат артезиан қудуғи ёнида, цемент устида балиқ тозалаётганида, Назир ювингани келиб қолди. У қизнинг балиқ сўйишига анчагача қараб турди-да, кейин пичокни кўлига олиб: „Балиқни қорнидан эмас, елкасидан сўйиш керак“, деб хаш-паш дегунча бир товоқ балиқни ёриб ташлади. Ўшанда Назокат роса хижолат чеккан эди. Буни сезган Назир: „Хечқиси йўқ, синглим, ўрганиб кетасиз“, деб кўнглини кўтарган эди. Сўнгра Назир ярим белигача яланғоч бўлиб, атрофга сув сачратиб, роса ювинди. Назокат кўз қири билан йигитнинг ўйноқи мушаклари, йўғон томирлари, дарё бўйида юрганида ширмон нондек қизариб қўйган баданига тикилиб, энтиккан эди.

Шундан сўнг ҳам у бир неча бор келди. Бир куни Тожинисо эридан Назокат билан қизиқчанини эшитиб қолиб, бундан дуғонасини хабардор қилди. Шундан сўнг ҳам Назокат билан қуюқ муомала қиласиган бўлиб қолди. Назокат эса сабабсиз шодланаётганидан, қувониб юришидан ажабланарди.

Шу хотиралар қизнинг хира кўнглини эндиғина ёритиб, илита бошлаган бир пайтда эшик очилиб, хонага Омон кириб келди. Назокат худди Гуноҳ устида кўлга тушган боладек қизариб-бўзарип бешик тебратишни унтиб, ўтириб қолди. Кейин ўзини тутиб олди ва Омонга кулимсираб қаради. У Омонни ҳам, Тожинисони ҳам илгарилари ўзи сезмаган бир тўйғу билан яхши кўрар, назарида, буларнинг ҳар иккаласи ҳам, улар яшаётган уй ҳам ғойибдан келаётган сирли нурлардан ёришиб тургандек кўринарди. Бу нурли тўйғу баъзан уни ҳам шодликлар оламига олиб кирап, қулдирар, арзимаган нарсалардан ҳам маъно, ҳам мазмун топдираварди. Бир пайт Тожинисодан яқин кунларда Назирнинг келишини эшитганда, ўйламай-нетмай:

— Дугонажон, агар келса, мен бехабар қолмай, у ёқ-бу ёғимга қараб, одамга ўхшаб кийинай. Тағин, ҳа, бир қишлоқи ландавур киз экан-да, деб ўйламасин, — деди. Бу гапларни айтишга айтди-ю, аммо ўзи уятдан адои тамом бўлди.

Назирдан дарак бўлмади. У қузда ҳам, қишида ҳам келмади. Омон дўстининг бор-йўклигини унугтандек кўринса-да, Назокатга дуч келган пайтларда ноқулай аҳволга тушар, сўнгра қизга ачинганиданми, дўстидан куонганиданми, асабийлашарди. Унинг дарди ўзи билан бирга, ҳеч кимга ёрилмасди.

Йил ўтди. Назокатнинг ёшига яна бир ёш қўшилди. Яна гап қўзғалиб қолди. Орага азза-базза одамлар тушди. Қишлоқ советининг раисаси бўлиб ишлаётган Солия хола оға-инилари олдида масаланинг чўзилиб кетганидан хижолат чекар ва айни пайтда қизига тазийқ ўтказа олмаётганидан жиғибийрони чиқарди. Назокатни кўндиришга қурби етмаётгани сабабларини изларди. У, эркаксиз уйнинг фариштаси бўлмайди, деган ақида-ни эслаб, фифони кўкка етарди. „Ҳаётга келиб, эр меҳрига тўймасанг, бола тарбия қилиб, ўз йўлимга сололмасам мен ким бўлдим? Бутун умримни фидо қилиб тарбия қилган якка-ю ягона қизим ҳам менинг маслаҳатимга юрмаса, нима қилай? Ахир, она бўла туриб, наҳотки, сенга ёмонликни раво кўрсам?“ дер ва юм-юм йигларди.

Урушнинг сўнгги йилларида ҳалок бўлган эрининг жафосини кечира-кечира рухан, жисмонан тинка-мадори қуриган бу аёл муштипарлиги билан рад қилиб бўлмас ҳурматга, иззатга лойик эди. Назокат гоҳида аросатда қолганида, ана шуларни ўйлар ва меҳри ийиб кетиб онаси бағрига ташланарди. Шу онани, меҳрибон хил-

қатни баҳтиёр ва шод кўриш истаги ҳар қандай орзу-ниятдан ҳам кучлироқ кўринарди.

Назокат Қобилжонга турмушга чиқишга розилик берди.

Нон синдириш ҳам тўйчалик тантана билан ўтди.

Тўйга тайёргарлик бошланди.

Дам олиш куни чошгоҳда яп-янги „Волга“ Омоннинг уйи ёнида тўхтади. Томорқада пиёз ўтоқ қилиб юрган Омон қўлидаги чўкични ерга қадаб, меҳмонларга пешвуз чиқди. Худди шу пайт Назокат ҳам ҳовлида тандирга нон ёпаётган эди. Меҳмонлар эски танишлар: Назир, унинг дўсти, хотини ва болалари билан келишганди. Назир бир даста чучмома, сариқ гул, лолаларни қўлида силкитганича, табассум қилиб келарди.

Орадан икки соат чамаси ўтар-ўтмас, меҳмонлар қайтиб кетишиди. Кечқурун Омоннинг тажанг ҳолда дўконга кетганини кўриб, Назокат дугонасиникига ўтди. Тоҳинисо ҳам хомуш эди. У деразага боқиб ўтиради. Дераза токчасида, банкада меҳмонлар келтирган дашт гуллари сўлий бошлаганди.

— Тинчликми, дугона? — деди нафасини ичига ютиб Назокат.

— Ҳа, — Тоҳинисо ютинди, жим бўлиб қолди. — Бўлар иш бўлди...

— Нима гап ўзи? Айтсангиз-чи?

— Энди фойдаси нима...

— Йўқ, айтинг.

— Маслаҳатга келишган экан... Айтувдим-ку, эсингиздами?...

— Вой, ўлай!...

У хиёнат қилган кишидек ўзини йўқотиб кўйди, толмовсиради. Бу зарбанинг кучи ҳали-бери ўзига келтира олмаслигини хис этиб, ҳовлига отилиб чиқди...

Адирлардан ўт-ўланлар ҳидини оламга ёйиб хур-хур шабада эсарди. Аммо ундаги хидлар, жамики нарсага нур пуркаётган эпкини, ёввойи ва асов эркалиги Назокатни четлаб ўтиб борарди.

— Йўқ, йўқ, мен нима қилибман?... Ҳеч нарса бўлгани йўқ. Фақат ўзимга хиёнат қилдим. Шунинг учун ўзимдан ўзим жиркан-япман...“

Шунда ўтган ёзда чорпоя устидаги қаҳқаҳалар, Назирнинг шўх ва қув қарашлари ёдига тушди. Келажак ҳаёти давомида ана шу парча-парча, узук-юлук хотираларгина очилишга улгура олмай, нобуд бўлган гунчалардек армон бўлиб қолажагини эслади-ю, ҳўнграб юборди.

СОФИНЧ

*То зиндаам маро нест жузмадҳи ту дигар кор
Кишту дурудам ин аст, хирмон ҳамину шутгор.**

Рудакий.

Ҳамхона бемор изтиробдан ингранди.

Дераза ёнидаги каравотда чойшабли кўрпага бурканиб ётган Абдусаттор бобо уйғониб кетди. Бошини кўрпадан чиқариб, бемор томонга қаради. Бемор жимиб қолган эди. Вақт ярим кечадан ошган бўлса керак, ҳамма ёқ сукутда. Ҳозиргина уйқусираб алаҳсиган бемор энди бир зайл пишиллаб, хуррак отарди. Чолнинг уйқуси кочди.

Чол шифохонага тушгандан буён унга ҳамроҳ бўлган беморларнинг нечанчиси экан бу? Ҳаммасини санаб, эслагиси келмади. Улар соғайиб кетишиди. Ўша-ўша, тирикликларини қилиб юришибди. Чол эса ҳамон шу хонада ётибди. Унга беморлардан кўра, шифохона мухити кўпроқ таниш бўлиб қолди. Дардга йўлиқ-қан кишига вақт ўтмаётгандек туюлаверади. Унга ҳозирги осоишишталиқ ва жимлик ҳам одатий. Бекорчилиқда уйқу ҳам хадеганда келавермайди.

Икки ойдан буён ҳар нарсани ўйлайвериб, эслайвериб боши ғувуллайдиган бўлиб қолди. Лекин туннинг алламаҳалида уйғониб кетиб, икки-уч соат ўй-хаёлсиз ётишнинг ҳам иложи йўқ.

Кейинги пайтларда у узоклардан келадиган товушларга ҳаёлан эргашадиган одат чиқарди. Ҳар қалай, бўлмағур, бехуда фикрлардан кўра, ғойибдан эшитилаётган овозларга ошно бўлиш бирмунча завқли ва яхши эрмак. Мана, ҳозир ҳам одатича, борликқа чўйкан қоронги сукунатдан бирон сас-шарпа ахтара кетди...

Ана, тогди. Жуда олислардан қандайдир мотор овози эшитилди. „Машина дегани бунчаям имилламаса, асфальт йўл кимсасиз бўлса, босмайсанми газни!... Йўқ, тўхтаб турибди, шекилли. Шуниси ҳам яхши. Агар „шаг“ этиб ўтса-ю кетса, кейин мен қаердан овунчик излайман“.

Абдусаттор бобонинг ёши олтмишлардан ошган бўлса ҳам моторларнинг фарқига борар, чол бекорга бутун умрини темир-терсак, техника орасида ўтказмаганди. Ҳозир қулоққа чалингани трактор мотори эканлигини пайқади.

Трактор келяпти. Кизиқ, бемаҳалда йўлга чиқсан ким бўлди? Эҳ-е, тракторига плуг ҳам тақиб олган-ку... Занжирлар йўлда

* Тирикманки, сени куйламоқдин ўзга йўқ ишим. Шу — хирмоним, шу — шудгорим, шудир экиш-тикишим.

учраган тошларни эзив, янчиб, шилдирамоқда. Кабинада неча киши экан?

Чол ўзини хаёлан кабинада ҳис этди. Қани эди, беморлар уйғониб кетишса-да, унинг юзларига, чақнаган кўзларига, мушт бўлиб тугилган чайир панжаларига бир боқишига. Ҳасаддан кўзлари ёнармиди. Касал эмиш!...

Трактор ўтиб кетди. Мотор овози ҳам қоронгилик қаърига ёйила-ёйила, охири тинди. Чол ҳар тундагидек, бу гал ҳам шу овоз изидан эргаша-эргаша мудраб кетарман, деб ўйлаган эди. Бўлмади. Йироқларда яна бир трактор товуши тириллади.

— Тушунарли, — деди чол минғирлаб. — Хе, эсим курсин, дарров фаҳмлаб олмайманми?

Кундузи касалхонага раис ўғли келганди. Абдусаттор бобо ўғлини кўрди-ю, хурсанд бўлди. Бироқ хонага у билан изма-из кириб келган докторга кўзи тушгач, қовоғини солиб олди. Чол уни касалхонадан чиқишига рўйхушлик бермай турган яккаю ягона киши, деб биларди.

— Қалай, ота, яхшимисиз? — сўради ўғли, елкасидаги оқ халат барларини тиззалири орасига қисиб.

— Неча марта айтдим сенга, батамом соғайиб кетганман, деб. Мана, бу дўхтири жўрангга айт, уйга рухсат берсин. Бир йигит ўз отасига ҳам шу йигит менга қилганчалик яхшилик қилмас. Раҳмат, ўғлим, жуда меҳрибон экансиз, — чолнинг овозидаги тажанглик доктор йигитга малол келди шекилли, қизариб кетди.

— Э, отахон, сиз соғ бўлсангиз, бир кун ҳам тутиб турмасдик.

— Ётиш шундай давом этаверса, узилиб қоламан, ҳолим бешбаттар бўлади, — Абдусаттор бобо гапини охирига етказди-ю, филт этиб ютинди.

— Туновин сизни кўриб кетган жўраларингиз идорага киришди. Арзингизни уларга ҳам айтибсиз-да.

Чол сергакланди:

— Мехнатга ўрганган одам бекорчиликка бардош беролмас экан. Ана шуниси ҳар қандай дарддан ҳам ошиб тушяпти.

— Сиз энди ишни ўйламасангиз ҳам бўлади, отахон. Ёшлардан иш қолармиди, — деди доктор.

— Қиши ҳам бошланиб кетди, — луқма ташлади раис. — Уйжой, мол-ҳол омон бўлса. Ёзапояни ҳам ғарам қилиб ташладик. Сизга иш қолмади хисоб.

— Ҳм-м... — ота томогини қириб, раис ўғлига термилиб қолди. — Кўнгилга буйруқ бериб бўлмас экан. Тарки одат — амри маҳол дейишади. Ишга қўл урмасак, аралашмасак, ўз-ўзимиздан чўкиб кетаверамиз.

— Қайсар одамсиз, отахон, — доктор шундай деди-да, ота ва ўғилни холи қолдириб, чиқиб кетди.

— Мени шу ердан тезроқ олиб чиқмасанг бўлмайди, ўғлим, — ота доктор қайтиб кириб қолишидан ҳадиксираб, тез-тез гапиравди. — Соппа-соғман. Энди уйкумдан ҳаловат қочяпти. Ўзим касалхонадаман, кўнглим даштда. Бетоб ётиб кўрмаган одамга бунинг қандай азоб эканлигини бир ўйлаб кўр.

— Қўймадингиз-да, ота, — деди ўғли юмшаб. У ўйланиб қолди ва сал ўтгач, тиззасига шапиллатиб урди: — Майли, бугун доктор билан гаплашиб кўраман. Агар ўзингизни тетик сезаётган бўлсангиз...

— Гап битта, ўғлим.

... Чолни касалхонага дала бошидан, юрак ўйноғи тутиб қолганда олиб келишди. Ўшанда терим айни қизиган пайт бўлиб, қишлоқдаги ҳамма — ёшу кекса далада эди. Ҳавода мезон иплари учиб юрарди. Олтин куз завқи, ташвишлари ҳаётида биринчи марта четлаб ўтиб кетгани чолга жуда алам қилган эди: ҳозир ҳам далада унинг улуши қолгандек, армон билан ўкиниб, ўғлидан сўради:

— Дала қалай?

— Қандай бўларди, — раис отасининг гўдакона гапидан кулди. — Шудгорни бошлаб юбордик. Бу ёғи тўй, одамлар энди дам олади.

Демак, далада чол қиласиган иш қолмабди-да, аттанг.

Абдусаттор бобо илк бор тракторга ўтирганида, нуроний отаси ҳаёт эди. Ўғлим шайтонга қўл берди, деган янгиш фикрда юрган отаси бир куни техника кароматини кўргиси келиб кетди. Далага чиқиб, „Фордзон“ ҳайдаган қора шудгорни кўриб, беихтиёр ёқасини ушлаганича: „Шайтоннинг эмас, ҳазрати Довуднинг қўлини тутибди, ўғлим“, деган эди. Кейин ўғлини шогирд килиб олди. Кийим-боши мойга беланганича ёнилғи, сув таширди тракторга. Энди қарабсизки, раис.

Эртага... Йўқ, йўқ. Энди бугун деса ҳам бўлади, ўғли келади. Уни касалхонадан олиб чиқиб кетади. Ўғлига кўпдан бери айтмоқчи бўлиб юрган бир-икки оғиз гали бор. Шуни айтади. Кулса ҳам айтади.

— Дехкон даласи — унинг дастурхони, — дейди. — Бор будинг, ризқ-рўзинг ундан. Уйингга келган меҳмон ҳам, қариндош-урӯғ ҳам, дўсту биродаринг ҳам шу дастурхоннинг қутфайзига қараб ҳукм чиқаради. Уни нондек, нон ушоғидек ардоклаш керак. Ерга беҳурматлик, бемехрлик катта гуноҳ. Одам ўзи овқат еган идишини дарҳол ювиб-чайиб олиб қўйгани сингари, ҳосили йиғиштириб олинган далага ҳам шу таҳлитда

муомала қилиш керак. Киш келгач, уни ўз ҳолига ташлаб, бу ёқда айш-ишрат қилиб юриш яхшиликтан эмас...

Далада қиладиган иш қолмаган эмиш. Бекор гап!

Абдусаттор бобонинг дарёдек жўшқин фикрларига жўр бўлиб, катта йўлдан яна тракторлар ўтиб бораради. Чол хаёлан ёғду сочаётган чироклар, зулматни ёриб бораётган баҳтиёр тракторчи йигитни кўз олдига келтириди. Навқиронлик, куч-ғайрат, сиҳат-саломатлик қандай яхши...

Чол яна ширин хаёлга толди: дала чети. Чол плугни тушириди. Баҳор, ёз ва куз фасллари шифа-шиға хосил тагида қолган заминни ўткир тишлар ағдара кетди. Димиқкан қатлам сийнасини очиб, ҳаводан нафас оляпти. Ана, чукурлигини ҳам чамалаб кўрди. Ажабо, нега мунча илик, ҳароратли бу тупроқ? Хиди-чи? Унда тандирдан энди узилган нон, хирмондаги янги пахта ва яна қандайдир юракка яқин, таниш ҳидлар бор.

Трактор танҳо қолган дала-даштни уйғотиб олға интиляпти. Тонг отиб келяпти. Дўстона ҳашарга кечиккан қарғазоғчалар кирлар оша учиб келиб, чуғурлашганича қора шудгорни қоплаб олишди. Улар ер танасига канадек ёпишган қуртларга кирон келтиряпти. Даشتда яна байрам бошланди. Трактор, кушлар, одамлар, хориб-чарчаган заминга, ерга кўмаклашяпти.

Улар орасида Абдусаттор бобо ҳам бор. Қандай баҳт!...

БЕДАНАЛАР

Қош корайди. Дарё соҳилидан бир чақиримча узоқда жойлашган қишлоқда чироқлар ёнди. Ҳамроҳим — шу қишлоқдаги мактаб директори Абдураҳмон ўрнидан туриб, гугурт чақиб, папирос тутатди.

— Бўлди. Энди ўрдак учгани билан кўринмайди. Борига барака, кетдик, — деди.

Мен чоққина қамиш пистирмадан чиқиб, ҳамроҳим ёнига бордим. У кўярда-кўймай милиғимни қўлимдан олди:

— Икки елкага ҳам юқ теппа-тенг бўлсин. Сиз ўлжани кўтариңг.

Биз тушган йўл дарё қирғоғига қияланиб келган бедапояни кесиб ўтарди. Куз кунларининг фирғана-шира оқшомларида бедазорда яёв кезиши жуда гаштли. Ҳаво турли хил ҳидларга шунчалик тўйинган бўладики! Тўпикка урадиган нозик йўнғичқага оёқ боссангиз, худди патли гилам устида юрган чоғлайсиз ўзингизни.

Хаёлларга берилиб кетарканман, оёғим тагидан тўсатдан париллаб кўтарилилган қуш шарпасидан чўчиб тушдим.

— Бедана, — деди ҳамроҳим. — Қўрқдингизми?
— Очигини айтсам, қўрқдим. Беҳосдан...
— Ҳечқиси йўқ. Хосиятли қўрқув бу. Менинг ҳам бошимдан ўтган: ширин хаёл суриб кетаётганимда, жонивор оёғим тагидан париллаб кўтарилади. Юрагим қинидан чиқиб кетай дейди. Орадан сал вақт ўтар-ўтмас, ҳаммаси жойига тушади, хали бир замон мени банди қилган хаёллар яна авж олади. Энди уларни бу қушлар, тун сўкунати, сирли шарпалар бойитгандек бўлади.

Йироқларда, бедапоянинг дарё соҳилига яқин четида ёлғиз бедананинг қўнгироқдек овози янгради.

— Яхши-я, — деди энтикиб ҳамроҳим.
— Нимасини айтасиз.

— Ана шу бедана учмаганида, уйгача оғзимизга толқон со-лгандек борармилик, ким билади... Бу кургурлар кўп хаёлларга туртки беради. Мен беданаларни жуда яхши кўраман. Келинг, яхшиси, бир воқеани ҳикоя қилиб берай... Ўн йил бўлди чоғи. Ўша пайтларда университетнинг тўртинчи курсида ўқирдим. Шаҳарлик қиз — ҳозирги қайлиғим билан бир неча йил синашта бўлиб юриб, охири турмуш куришга қарор қилдик. Бу орада унинг ота-онаси, қариндош-уруғлари билан сиртдан танишиб олган эдим. Эски удумимиз бўйича, дастлаб қишлоқдан совчилар келишди. Тўй куни белгиланди. Никоҳ кечамиз ҳам қўнгилдагидек ўтди. Бир неча кун ҳовлида тўй кайфияти сезилиб турди. Чор атрофи баланд пахса девор билан ўралган ҳовли эртаю кеч хотин-халаж, эркаклар, узоқ-яқиндан келган қавм-қариндош, меҳмонлар билан гавжум бўлиб турди. Ҳовлидагиларнинг овозлари, кулгилари тез-тез кулоққа чалиниб туради. Биз ёш келин-куёвга ўзбекнинг барча расм-русумига хос безатилган маҳсус хона ажратиб беришди. Уятчан бўлганимдан, ташқарига чиқмасдим. Фақат китоб ўқир, кўзларим толган пайтлари деразадан тўрпарда оша ҳовлига, у ёқдан-бу ёққа ўтиб туришган одамларга қараб ўтирадим. Тор ҳовли сатҳи турли довдараҳтлар, гуллар билан ўралган. Тунука қопламали томга тирмашган қия темир сўри орасидан жовуз узуми бошлари осилиб туради. Ҳовлига адашиб кириб қолган шамол аҳён-аҳёнда ток япроқлари ва дарахт учларидаги баргларнигина тебратиб ўтади. Самонинг аллақайси четида самолёт гувуллайди.

Шунда хаёлларим ҳам самолёт ортидан номаълум ва сирли бўшликларга, ортда қолган бўйдоқлик кунларига талпинаётганини пайқаб қолдим. Дастлаб, бу ўйларга кўп ҳам парво қилганим йўқ. Лекин орадан беш кун ўтгач, бошланган янги ҳаётимда янгича бир мунислик ва безовталиқ пайдо бўлганини сездим. Биринчидан, ҳамиша бирга ўсган, юрган дўсту биродарлар, оғай-

ниларимнинг мени ўз ҳолимга ташлаб кетганиданми ёки тўсатдан шаҳарликларнинг менга унчалик таниш бўлмаган ҳаётига тушиб қолганимданми, ҳайтовур, ўзимда ожизлик ва ётсираш сеза бошладим. Бундай кайфият, албатта, ҳар кимда ҳам бўлавермайди. Ўша пайтларда ҳар нарсадан таъсиранаверадиган йигит эдим.

Ҳар тонгда беданалар овозидан уйғонардим. Дастрлаб ёш бедана сайрарди. Назаримда, уни кимдир хивич билан уриб мажбуран сайратарди. Уйқу қочиб кетади. Шундан сўнг ҳовлидаги баланд темир сўрига осилган қовоқ қафасларда бир-биридан тиниқлиги, мунислиги билан ажralиб турдиган куш хонишларини тинглаб ётаман. Ҳар қалай, тонг арафасидаги хаёллар тундагилардан бирмунча таъсири бўларди. Беданалар тўртта эди. Айниқса, биттасининг овози мулойим, ёқимли, жарангдор эди. Бирорининг эса овози жуда таъсири бўлиб, гўё у сайрамас, балки сайрайман деб уринар эди-ю, уддалай олмай куйибишиб хирилларди. Унинг беўхшов овози, талпинишларига раҳмим келар, кўнглимни фусса босарди.

Барваста, ҳамиша қўлларини орқасига олиб, чарх қилиб юрадиган қайнотам беданалар парваришини ҳеч кимга ишонмас, ҳар куни эрталаб учиди илгакли сими бўлган узун хода билан ярми тўр, кесик қовоқ қафасларни бирма-бир тушириб олар, ҳафсала билан ҳар бирига тариқ сепар, сувдондаги сувни алмаштиради. Мен бу меҳрибон, камгап кишининг ҳаракатларини завқ билан кузатардим.

Ниҳоят, орадан бир неча кун ўтгач, бизни эрталабки нонуштага таклиф қилишди. Даструрхон теварагида ўтирганларга оҳистагина салом бериб, бўш турган жойга ўтирдим. Ҳаво дим эди. Ёмғир хиди келарди. Ток барглари орасидан осмонда сузуб юрган тўп-тўп кул ранг булатлар кўринарди. Атрофни зимдан кузатарканман, кўнглим ёриша борди. Ҳаммаси дилкаш одамлар эди.

Нонуштадан сўнг қадррон бўлиб қолган беданаларни кўзларим билан излай бошладим. Қайнотам буни сезди, шекилли:

— Ўғлим, беданалар сизни безовта қилмаяптими? — деди.
— Йўқ, — дедим.

— Қишлоқда ўсгансиз-да. Қишлоқ яхши, ўғлим. Менинг ҳам ёшлигим қишлоқда ўтган. Киши кексайгандан сўнг тугилиб-ўсган жойларини кўмсайверар экан. Бир-икки йил қишлоқда яшаш орзуим бор. Қишлоқ яхши...

— Орзуингиз энди рўёбга чиқадиган бўлди, — завқланди қайлиғим. — Ўқиши тутатайлик. Мана, күёвингиз олиб кетадилар...

— Насиб қилса, — қайнотам самимият билан кулди.

Нонушта кўнгилдагидек ўтди. Турдик. Хонага қайтиб кирдим. Қайлиғим яшил атлас кўйлагини шилдиратиб ёнимга келди-да:

— Биласизми, бувим нима дедилар, — деди. — Ҳар куни ҳаммага салом бераркансиз.

— Салом бердим-ку, — дедим ҳайрон қолиб.

— Мен, бувижон сиз эшитмагансиз, у киши салом бердилар, дедим. Бувимнинг қулоқлари оғирроқ, овозингизни сал кўтариб гапиринг... Дадам эса сиз тўғрингизда, худди қизлардек уятчан экан, дедилар...

Бу гаплар, негадир, менинг ҳамиятимга тегди. Кўнглим озор чекиб, дилим сиёҳ бўлди. Шу пайт жўрттага қилгандек, бедана сайради. Деразанинг тўрпардасини кўтариб, тутқун қуш харатларини кузата бошладим. Бедана кичкинагина, кулранг, ёнғоқсимон бошчасини сарак-сарак қилиб, тўр катакларига сўйканар, юқорига сапчир, қовоқ қафас чайқалар, сувдондаги сув ерга тўкиларди. Ўша дамдаги ҳолатим ва бедана тутқунлигига аллақандай ўхшашлик бордек туюлди. Руҳимни эзғилаётган шикаста кайфиятнинг учини топгандек бўлдим.

Шундан сўнг бедананинг эртаю кеч сайрашини тоқатсизланиб кутадиган бўлиб қолдим. Ўзимни эса овоздан қолган бешинчи беданадек ҳис эта бошладим.

Ховлида беданалар сайрагарди. Бу қушларнинг овози менга азиз ва қадрдон эди. Улар узоқ қишлоғимни, унинг яшил ўтлоқларида кечган болалик кунларимни эслатарди. Ўша қишлоқ четидаги бедапояда от ёлидан тузоқ қилиб, эркин, хушовоз беданаларни овлаганимиз, нам йўнғичқа шабнамида почаларимизни хўл қилиб, чопқиллаб юрган беғубор, беташвиш кунларни бир-бир кўз ўнгимдан ўтказардим. Шунда беданалар сайраган қишлоқ тунларини, оқшомларини жуда соғинганлигимни англадим... Наҳотки, буларнинг ҳаммаси ўтиб кетган бўлса? Наҳотки, мен бугун уйландим, улғайдим? Наҳот, ўша завқли, файзли дамлар энди ҳеч қачон такрорланмаса, деб уйлардим...

Киши баъзан улғайишдан ҳам чўчийди. Дарвоҷе, бунинг ҳам ўз каромати бор: улғайиш — камолот, камолот эса кузга қиёс қилинади. Лекин у пайтлари бизнинг ёзимиз эндигина бошланган эди.

Узоқ йили қайнотам вафот этдилар. Бордик. У севган ва мени ҳам мафтун этган беданалар аввалгидек сайрашарди. Бир неча кун уларни парвариш қилдим.

Келаси йили меҳмон бўлиб бордим. Беданаларнинг тўрталаси ҳам нобуд бўлган эди.

Энди ҳар сафар шаҳарга тушганимда, ташвишларга лиммолим янги ҳаёт остонасида менга турмушнинг кўп ҳикматларидан дарак берган ўша тутқун беданаларни ҳам, қайнотамни ҳам бир хил ҳурмат ва эҳтиром билан ёдга оламан...

Тунги бедапоядан салқин, роҳатбахш шабада эсарди. Беданалар эса ҳамон коронгида бир-бирини чорлашиб, сайраб-сайраб қўйишарди.

ЧОЛ ВА ДАРЁ

Мен у билан қандай вазиятда ва қаерда учрашганимни ҳеч тасаввур этолмайман. Орадан, мана, қанча йиллар ўтиб кетибдики, ўша дамларда кечган саргузаштларни бир-бир эсласам, чол гўё рўёдан, хаёлдан чиқиб келиб, сўнгра ғалати ва сирли сиймога айлангандек туюлади.

Қармоқларни дарёга ташлаб, қумлоқ оролда тўлишиб, қизарib кўтарилаётган ой ёруғида нонушта қилиб ўтирадик. Ёнгинамиизда олдинги оёқларига бошини қўйиб ётган итимиз — Оқтой қандайдир шарпани сезиб, дик этиб ўрнидан турди ва вовиллаганича қамишзорга қараб чопиб кетди. Қамишзор рўпарамизда бўлиб, уни оролдан торгина, саёз ирмоқ ажратиб турарди. Оқтой хуриб-ғингшиб ёнимизга қайтиб келди. Бир оздан сўнг қамишларни қасир-қусур синдириб ўзига йўл очиб келаётган бир кимсанинг қораси кўринди. Оқтой нотаниш кишига ташланишга журъат қиломай, ёлини тик қилганича орқа оёқлари билан қумни таталар, оёқларимизга суйканиб, келгиндига таҳдид қиласарди.

— Оқтой, жим ёт! — деди акам итга пўписа қилиб, ўрнидан тураркан.

Нотаниш киши ирмоқнинг нариги томонида туриб қолди. У хириллаб йўтала бошлади. Шунда мен уни танидим: бу ўша балиқчи чол эди. Чол ирмоқдан кечиб ўтиб, бизга қараб юрди. Чолнинг пайдо бўлиши акамни анча қувонтирди. Афтидан, у бирон-бир сұхбатдошга муштоқ бўлиб турган экан. Иккаласи тик туришганича қувноқ сўрашишди. Кейин йўл-йўлакай гурунглаша-гурунглаша қўшхонага келишди. Ит ҳам чолни таниди ва бекорга қизишганидан уялгандек, аввалги ҳолида — тумшуғини оёқларига қўйиб, бизга термилиб ётди.

— Бу ҳам кепти-да, — деди чол тамаки ўраркан, мени имо билан кўрсатиб.

— Ҳа, мендан қолмайди, — акам мамнун оҳангда жавоб берди.

— Ёшлигига табиат қучогида кўп юрган бола оқкўнгил бўлиб ўсади, — деди чол.

У ҳар гал биз билан дуч келиб қолганида, сұхбат қурганида, фурсатни топиб, албатта, шу гапини такрорлар эди. Мен эса буни чолнинг паришонхотирлигига йўядим.

Гулхан шуъласида чолнинг оппоқ соч-соқоллари сарғиши кўринар, факат ўқтин-ўқтин тамакисини тортганида, юзига қизиллик югуради. У ҳамиша тиззасига етадиган узун резина этик кийиб юрар, бу унинг бўйчан гавдасига қандайдир салобат бағишиларди. Мен эса пашшалардан кутулиш учун оёқларимни кумга кўмиб, Оқтойнинг ёнгинасига чўзилардим. Иссиқ кум куни бўйи юриб толган, чағир тошлар урганидан зирқираб оғриган оёқларимга ором берарди. Қулоқларимга катталарнинг босинки гурунги чалинар, тобора оғирлашайтган киприкларимни зўрма-зўраки очиб, камюлдуз осмонда чинқираётган ўнлаб, юзлаб балиқчи қушларнинг овозини эшита-эшита ўйкуга кетардим.

Акам мени уйғотишга кўзи қиймай, ёнимда Оқтойни қолдирив, ўзи ёлғиз кечаси билан кўкан қармоқларни текширгани кетарди.

Одатда, мен чошгоҳга яқин турардим. Дарё узра чўккан тинклиқ ва осудаликка маҳлиё бўлиб боқардим. Шунда оролнинг йироқ бурчидаги дарёга қармоқ ташлаб ўтирган акам уйғонганилигимни кўриб, мени ёнига ҷақириб оларди. Рўпарадаги қамишзор ва дарё соҳили оралиғидан ўтган энсизгина сўқмок йўлда чолнинг буқчайган гавдаси кўриниб қолар, у ҳам қўлидаги узун илгакли таёғини сувда юргизиб, кўкан қармоқларини излаётган бўларди.

Мен мудом чолга ажабланиб қаардим. Унинг ҳаёт кечириштарзи ҳам, шахси ҳам, машғулоти ҳам менга гаройиб ва сирли кўринарди. Биз-ку, Сурхонга ҳафтада бир марта балиқ овлагани келардик, лекин қачон келмайлик, уни албатта дарё бўйида кўрардик. Акам у билан учрашганда, дарёнинг табиатини, балиқларнинг қаерда оз-кўплигини сўрар, чол эса очиккўнгиллик билан балиққа мўл жойларни айтар ва ҳар гал унинг маслаҳати билан иш тутсак, овимиз барор оларди.

Чолнинг тутилган балиқларни сақладиган узунчоқ, катта сават тўри бўларди. У саватни пишиқ чилвирга боғлаб, сувнинг чуқур жойига ташлаб қўярди. Саватга, у тутган балиқларга қизиқсиниб қарашимни пайқайдиган чол ҳамиша чилвирни қўлимга тутқазар ва саватни сувдан чиқариб, ундаги балиқларни томошаша қилишга рұксат берарди. Саватда эса ҳамиша йирик-йирик, танглари одамнинг тирногидай катта, тўқ сарик буғдой балиқ, мўйловлари шоғдан лакқалар, ялпок, оппоқ дарё зогоралари фуж бўлиб ётарди. Мен уларни томошаша қилишдан эринмасдим. Чол бу балиқларни бозорга чиқариб сотмас, балки таниш-билишлари-

нинг уйига олиб бориб берар, баъзида эса синашта мижозларнинг ўзлари келиб, олиб кетишарди.

Бир йили чол ғойиб бўлди. Уни дарё соҳилида бутун ёз бўйи кўрмадик. Акам тоби қочиб қолгандир ёки ов жойини ўзгартиргандир, деган гумонга борди. Лекин ўша йили, назаримда, Сурхон кирғоқлари чолсиз, унинг хириллоқ йўталисиз, фуж-фуж балиқларисиз, тунлари юлдуздек милтирайдиган папироси чўғларисиз хувуллаб қолгандек бўлди. Кейин эшитсан, катта бир ташвиш билан Москвага, эски қуролдош дўстлариникига кетиб қолган экан.

Орадан бир ой ўтгач, у яна пайдо бўлди.

Орадан бир неча йил ўтди. Ўрта мактабни тугатдим. Кунларнинг бирида олий ўкув юртига кетишдан олдин дўстларим билан сўнгги марта Сурхон бўйларига балиқ овига йўл олдим. Йўлда чолни учратиб қолдик. У менга, дўстларимнинг дуркун бўй-бастига анчагача қараб турди, сўнгра акамни сўради. Мен, иши чиқиб қолгани учун келолмади, дедим. У менга киртайган нурсиз кўзларини тикиб туриб:

— Неварам, ана шундай, — деди, — ишимиз чиқади, ташвишларимиз кўпаяди, кейин кексаямиз, ҳафсаласиз бўлиб қоламиз. Ёшлар эса биз босган йўллардан қимтиниб чиқиб келишаверади. Шунинг учун ҳам буни тоғ чўққиларига ўхшатишади, - чол адирлар ортида чўкиб ётган залварли Боботоққа қаради.

Чолдан ярим чақирим узоклашганимиздан сўнг, унинг гаплари ҳам, жиддий нуроний чеҳраси ҳам хаёлимдан батамом кўтарилиб кетди.

. Энди эса баъзан ўша узоқ йилларни эслаб, ҳафсала қилиб, балиқ овига бориб қолсан, акам (энди у балиқ овига кам чиқадиган бўлиб қолди) чол ҳақида билганларини хикоя қиласди.

Чолнинг умри ҳарбий юришларда ўтган экан. Биринчи жаҳон урушида оддий жангчи бўлиб иштирок этган, подшоликдан нишонлар олган. Иккинчи жаҳон уруши йилларида катта бир қисмга бошчилик қилиб, бомба тагида қолиб, контузия бўлган экан. Акамнинг айтишича, у доимо ёнида қўмондонлик томонидан берилган ва ўз исми ёзилган эсадалик тўппончасини олиб юаркан. Орден ва медалларининг ўзи бир кути, дейишади.

Сўнгги урушларда одамзод бошига тушган барча кулфатларни кўравериб, кўзлари қотиб кетган бу чол ҳаётининг охираша шу Сурхонимиз қирғоқларини, шу йирик ва сахий жануб қуёши нурларига чўмилган дарёни, унинг ёввойи соҳилларини ўз оромгоҳи деб танлаганининг боисини кейинчалик тушундим.

Дарё оқимига, унинг мангу шиддати ва шошқалоқлигига паришон термилиб ўтиарканман, ўша чолни эслайман. Наҳотки,

шу ирмоқ, шу тошқин сув, шу яшил ўтлоқ ва қамишзор қирғоқ уни овутган, қалбидаги жароҳатларига малҳам бўлган, бир умрга ўнгарилмас асабларини юмшатган ва ҳаётнинг абадийлиги, гўзаллиги ҳақидаги қўшиғини унга айтиб, меҳрибон онадек аллалаган бўлса?

Мен ҳам шу қўшиқларни, шу аллани илғаб олаётгандекман.

КУМ ҚЎРҒОНЛАР

— Соялаб ётишдан бошқа нарсани билмайсиз, — деди йигит беғараз кулиб, — ҳали бодингиз қўзғайди, ҳали юрагингиз санчади...

— Одам бўлмайсан, Носир, бефаросатсан. Садқаи йигит кет. Йигитга муносиб гапми шу? Хе, турқинг қурсин!

Бола таҳқирга парво қилмади. Ялангоч ориқ сонларига ёпишган хас-хашакни қоқди-да, ўрнидан туриб кетди. У қамиш ўсган зовур ёқалаб дала адогига, соҳил бўйи ёввойи жийдазор ўрмонга кириб, кўздан ғойиб бўлди.

— Чакки қилдингиз, Мардонқул, — деди Зокир, йигит турганда исқирт кўрпачага тушган хасларини қоқаркан. — Ёш болада, кўнгли қолиши мумкин.

— Кўяверинг, ўрганиб кетган. Унга гапирдингиз нима-ю, деворга, бари бир. Сув юқтирамайди.

— Шундай бўлса ҳам, бироннинг боласи-да... Баёвгина қурина-ди-ку. Эпчил, хулқ-атвори ҳам, юриш-туриши ҳам бинойи.

Зокир эски дастурхондан зардоли олиб, чангни пуллади ва оғзига ташлади: — Мардонқул, нима дедингиз?...

— Бетгачопар.

— Яхшиям бу гапларни бизнинг ўғиллар олдида айтмадингиз, шўрлик роса изза бўларди.

— Айни кишининг юзига айтинг. Изидан айтилган гап гуноҳ,

— Мардонқул оёқларини чўзиб, билагига ёнбошлади.

— Ўзингиз уни шунга, яъни бетгачопарликка ўргатиб, яна хафа бўлиб ўтирибсиз, — Зокир кулди ва зардоли данагини жағ тишлари билан қарсиллатиб чақди.

— Бироннинг боласи, тўғри. Биз ҳам ёпишиб ётганимиз йўқ-ку. Яхши одам бўлсин, деймиз. Ўзингизникими, ўзганикими — бари бир. Ниятимиз яхшилик, тўғри йўлга бошлаш.

— Яшанг, Мардонқул, соғдил, яхши одамсиз-да.

Мардонқул оғзининг таноби кочиб, жилмайди, ўрнидан туриб ўтирди.

— Ўрганиб қолибман шу болага, — деди у юмшаб, — биринки соат кўзимдан йироқлашдими, безовтала наман: қаерга кетди, нима бўлди?... Бу даштда у қора. Шолипоями, қумми,

боғми, ишқилиб, қораси кўриниб турса бас, кўнгил таскин топади. Курғур бўлса, ола ҳаккадай, кўним билмайди. Чакқон деганингизга ҳам қўшиламан. Чой дамлаш, овқат пиширишни ҳам болпайди... Топқирлигини айтмайсизми. Бир куни карасам, қўлида бир даста ёввойи жийданинг гуллаган шохи. Ҳой, нега жувонмарг қилдинг, десам: „Сизга келтиридим, чой ўрнига дамлаб бераман, юрагингиз санчиғига даво“, дейди. Бинойидек чой. Хидини айтмайсиз, димокқа гуп-гуп уради... Юрак ҳам тинчигандай.

— Сиз бўлса, уни бефаросатга чиқариб қўйдингиз.

— Ҳа-я... Эшитинг. Ёзнинг айни қизиган кунларидан бири. Пешин маҳали. Қани, юринг, мен сизни бир жойга олиб бора-ман, деб қолса бўладими. Ҳой, ҳозир атроф олов бўлиб ёнаётган бир дамда шу зарурми десам, зарур, деб оёқтираб олди. Биласиз, бир тарафимиз кум. Қовун-тарвуз экканмиз. Ўша тарафга бошлади... Бир яланг кум тепага чиқариб, қани, ечининг, деса бўладими. Мен ҳазиллашаяпти, деб ўйлабман. Қарасам, кўйлак тугмаларини ечаяпти. Тўғриси, довдираб қолдим. Кўрқманг, сизни атайнин шу ерга олиб келдим. Кейин қувқараш қилиб, бу ердаги қумнинг фарқига бордингизми, деди. Кум кума-да... Ҳе-ей, сахрои, дейди. Ана у кулранг, донадор кум, бу эса бошқача... Майнинлигини кўринг, жайдари буғдойнинг унидек юмшоқ, ранги ҳам қизғиш-сариқ. Қўлимга олиб шопириб кўрдим. Қумдадақа кум. Фарқига бораманми мен. Биласизми, деди охири, ана у донадори сувоққа, буниси соғликка ярайди, деди. Туркманинг бир киносини кўрган экан. Келинчак қайнатаси-нинг бод касалини шу йўсин даволаяпти. Тур, йўқол-е, дедим. Канадай ёпишиб олди, қўймади... Мени иссиқ кумга кўмди! Вой, вой, вой!... Жаҳаннам азоби. Чиданг, чидаганга чиқарган, деб елкамдан босгани-босган. Буниси етмагандай, ўша мур-райган чолча ҳам бардошингиз йўқ экан, деб масхара килади. Чол тушмагурни кўрган бўлсан экан, кошки... Нимасини айтай, ҳар кеча тахта бўлиб қотиб қоладиган бел курғур юмшади-қолди.

Мардонқул пешонасидаги терни билаги билан артди.

— Ана, кўрдингизми? Бундай шерик билан фахрланса арзиди.

— Рост-ку-я, шу, бетга чопарлиги ёмон-да...

— Ота-онаси яхши одамлар бўлса керак?

— Отаси қамалиб кетган, авария қилиб. Жўжабирдай жон. Оиланинг тўнғичи шу... Бундай болалар ўқиши керак. Нима ҳам дердингиз — турмуш...

— Чанқаб кетдим. Зардоли устидан сув ичсам, зиён қилмас-микан?

— Ичаверинг, булоқнинг суви... Бу ҳам ўша бетгачопарнинг иши... Ўрмондан булоқ топиб, кўзини очди. Шунча йил яшаб, булоқ борлигини пайқамабмиз. Ичиб тўймайсиз. Болаларга ҳам айтинг: шолипоя, дарё сувидан ичишмасин, қоринни дамлатади.

— Неча йил бўлди, бу ерда ишлаётганингизга? — Зокир пиёладаги сувни сипқориб, лабларини карнай қилди: — Рост, жуда ажойиб сув экан. Бай, бай... Шахарга ҳам олиб кетамиз.

— Йилини сўраяпсизми?... Эҳ-ҳе, тепамиздаги қўшпатта одам бўйи эди. Энди танаси белимчча...

— Йўқ, ундан ҳам ёш эдим.

— Эслайсиз-а?

— Эсламай бўладими. Мен нега жигибийрон? Ҳозирги қўпчилик ёшларнинг дарди ҳам, ташвиши ҳам йўқ. Хаёли ўзида эмас, учиб юради. Биз-чи? У кўрсаткич бармоғини бигиз қилиб кўкрагига қадади. — Эрта-ю кеч ўлиб-тирилиб ишлардик. Бошқа илож йўқ: замон оғир, нон чучук... Булар зса тайёрига эга. Қийинчилик кўриптими булар. Шароит мана бундай! — Мардонқул бу гал бош бармоғини кўрсатди. Буларнинг жиловини тортиб турмасангиз, иш чатоқ.

— Ошириб юбормаяпсизми?

— Ҳа, муғамбирсиз-а... Бўлса бордир. Сал оширмаса ҳам бўлмайди. Баъзан иш бериб қолади... Лекин, билингки, ҳозирги гапларим Носирга тегишли эмас. Ёш бошга ташвиш тушса ёмон бўлади... Барибир, билдирамайди, танти.

Қирғий таъқибидан қочган бир гала майначуввос кўтариб, паттага кўнди. Мардонқул апил-тапил дастурхонни ўраб, челак оғзига босди-да, ўрнидан туриб, бақира кетди:

— Ҳайт, падари лаънатлар, нарига йўқол!... Топган жойини қаранг-а.

Майналар гурр кўтарилди, учиб бориб ўрмончилар турадиган ёлғиз уй — кордоннинг томига кўнди.

— Ҳа, Зокиржон, мен насосдан хабарлашай. Сиз соялаб дамингизни олинг. Чой дамлаб келайчи?

— Йўқ, йўқ, бундай сув турганда, — Зокир чеалакнинг қорнидан тутди.

— Қайтишда болаларга зардоли олиб келаман.

— Раҳмат, мен ҳам тўполончилардан хабар олай. Дарёни бошига кўтариб ётишгандир.

*
* *

Зокир жийдазор ўрмонни кесиб ўтиб, дарё сохилига чиқди. Болалар ҳеч ерда кўринмасди. Анча пайт атрофга қараб турдида, охири таваккал қилиб, дарё ёй шаклида айланиб ўтган лук-

зор тарафга кетди. Илгарилари лукзорнинг ўрни қумлок соҳил эди. Ўғиллари чўмилиб ўрганишгани учунми, луқлар ўсган бўлса ҳам, ҳар гал ўша тарафга чопишарди. Зокир одам бўйи ўсган қалин лукзорга яқинлашгач, моллар юриб пайхон қилган сўқмоқни кўрди. Билаги билан юзини тўсганча анча юргач, болалар шовуруни эшилди. Ниҳоят, қумлок соҳил ҳам кўринди. Болалар билан Носир қумга чўккалаганларича ғалати машгулот билан шунчалик банд эдиларки, лукзорнинг шитирлаганини ҳам, Зокирнинг яқин келганини ҳам сезишимади. Зокирнинг уларга халяқит бергиси келмади. Луқ панасига, сояга ўтириди-да, болаларнинг ҳаракатини кузата бошлади. Хаёл уни узокларга олиб кетди. Кечагина гўдак эди булар. Етилиб қолишибди. Муса ўн учда, Фиёси тўққизда. Кенжаси эса бешга киряпти-я... Вақтнинг ўтишига қаранг. Ҳадемай... Носир-чи? Борингки, йигирмага киргандир. Барибир, бола-да. Шу дамда улар учун ёшнинг фарқи ҳам йўқ. Ҳаммаси бир жон, бир тан.

Чўкалаб ўтирган Носир ҳар замон тиззаси билан юриб бориб сувдан кум ҳовучлаб олади-да, изига қайтади. Ҳовучини боши узра кўтаради. Сув аралаш қум панжалари орасидан лахта-лахта бўлиб сизиб тушади.

— Биз аввал минора қурамиз, чунки минорасиз шаҳар шаҳар эмас. Биласанми, нима учун? — сўрайди ёнидаги Илёсдан. — Билмайсан-а! Биз шаҳар қурамиз. Минора эса атрофни, узок-узокларни кузатиш учун керак. Унда соқчилар пойлоқчилик қиласди: ёнида камон, қўлида найза, эгнида совут, кўксида қалқон. Қоп-қора ҳабашдай.

— Нега улар пойлоқчилик қиласди? — Кенжа ўғил анграйиб сўрайди.

— Бехосдан ёв келиб қолса, ҳалойиққа хабар бериб, оёқка турғизади... Шаҳарни ҳимоя қилиш керак-да. Бўлмаса, ёвуз душман уни вайрон қилиб кетади. Шаҳар қуришдан не фойда, қачонки у кўрикланмаса.

Зокир тагига луқ ётқизиб, ёнбошлаб олди. Болалар орасида кизиб кетган гурунгдан, негадир, завқланиб кетди.

Носир овозини барада кўйиб, дўмбира куйига хос хиргойи қилишга тушди. У бироздан сўнг, қўлларини чўзиб, қумликларни кўрсатди:

— Ху, анави тепаларни кўряпсизларми?... Ҳа, баракалла. Дарёнинг у бетида ҳам бор. Улар шунчаки тепалар эмас, бир замонлар катта-катта кўрғонлар бўлган. Ҳар бирининг номи ҳам бор: униси — Оқтепа, ёнидаги Искандар бахши, буниси эса Дунётепа... Келинглар, биз ҳам кўрғонларимизга ном қўямиз. Илёс билан иккимизники Искандар бахши, сеники, Фиёсбек — Дунётепа, Мусаники — Оқтепа. Келишдик-а?...

У тирсакларини қумга ботириб, энгашиб, қум кўргонларга зидан разм солди:

— Афсонавий шаҳар бўпти. Киноларда ҳам бунақасини кўрмайсан, — деди ва қулогини ерга бериб, болаларга жиминглар, дегандек ишора қилди. Тўсатдан чехраси жиддий тус олди, қаттиқ хавотирланган одамникidek кўзларини катта-катта очди:
— Жим! Эшиятпизларми? Узокларда итлар хурияпти, отлар кишнайпти, туёклар дупири...

Болалар узок соҳилга, ўрмон ортидаги қум тепаларга боқишиди.

— Иш чатоқ. Душман бостириб келяпти.Faflatda қолдик. Мана, ҳаммамиз таҳлика... Эсиз, Искандар баҳши дўмбираси айни авжига чиққан эди-я. Аттанг, чала қолди... У-ух, шаҳарни қуршаб олишяпти-ю, лаънатилар... — Носир илкис ўрнидан турди ва товони билан қум чизиб, кўргонларни ҳалқа ичига олади. — Кўргон ичи тўс-тўполон. Болалар, аёллар йиғляяпти... Душман отган камон ўклари кўргонга дўлдай ёғиляпти. Ҳалокат яқин. — У бир ердан бир ҳовуч майдад тош топиб, минораларни нишонга олиб, қулата бошлади. Унинг жазаваси қўзиди. Бир неча дақиқадан сўнг бутун гавдасини кўргон устига ташлади. Ҳашпаш дегунча кўргондан ном-нишон ҳам қолмади.

Носир вайрон бўлган кўргон узра бармоғини қумга чукур ботириб, дарё тарафга ариқча очди.

— Қаранглар-а, ана, кўряпсизларми, сув оқяпти. Бу оддий сув эмас, ҳалок бўлган кўргон ҳимоячиларининг қони. Оқяпти, дарёга интиляпти... Тамом!...

Илёс чинқириб юборди. Буни ҳеч ким кутмаган эди. Ҳатто, Носир ҳам шошиб қолди. Фиёс билан Муса жини қўзиган шайтонмижоз Носирнинг харакатларига ҳануз тушунолмай, ўз кўргонларини тарқ этишиб, Илёснинг ёнига чопиб келишди. Бироқ Носирнинг топқирилиги яна иш берди.

— Шошма, Илёс, шошмасанг-чи! Сен, ахир, йигитсан-ку. Ха, тушундим, кўркма, ҳали жанг тугаганича йўқ... Мана бу одамларни кўряпсанми? — у болаларни кўрсатди. — Булар қўшни кўргон одамлари. Сенга ёрдамга келишяпти. Дадил бўл! — Носир Муса билан Фиёсни тирсаги билан туртиб имо қилди. — Оббо, йиғламасанг-чи... Қани, йигитлар, Илёсбекка мадад беринглар. Билакларингни қумга босинглар. Балли, азаматлар! Босқинчи ёвга шундай зарба берайликки, келганига минг пушаймон бўлсин.

Кўргон устида қўллар, панжалар жангни қизиб кетди. Уч жуфт қўл бир-бирини шафқатсиз тимдалади. Ниҳоят, Носир панжалари мағлуб бўлиб, қум устига жонсиз шалвираб тушди.

— Дўстлар, душман даф этилди. Биз ғалаба қозондик!..
Кўрдингми, Илёсбек.

— Кани менинг кўргоним? — пиқиллади Илёс.

— Шошма, ана энди сенга аввалгидан ҳам катта, мустахкам кўргон қурамиз. Уни хеч бир душман ололмайди. Сенини ҳам, ху, эски тепалар ҳам қайта қурилади...

Чорак соат ўтгач, кўргон тайёр бўлди. Минора қад кўтарди.

— Илёсбек, қара, сенинг содик навкарларинг яна посбонлик қилишяпти... Сен кўрқма, бу, ахир, эски замонларда шундай бўлган. Ўша соҳилдаги тепалар ана шундай қонли воқеалар шоҳиди... Довул турса, улар чангини дарё, ўрмон устига сочади. Тунлари эса қулоқ солсанг, Искандар бахшидан дўмбира овози эшитилади... Ишонмайсизлар-а? — у чуқур нафас олиб энтикли. — Биламан, шамол хуштак чалади. Лекин, барибир, дўмбира овозига ўхшаб кетади... Дунётепа тупрогини эса боғдаги дараҳтлар тагига соламиз. Чақақумда дараҳт ўсармиди. Мевасини едиларинг, қандай?.. Ҳа, балли. Демак, орзу ўлмайди. Инсон ўлса ҳам, орзуси ўлмайди. Уни шамол, ер, сув, осмон ҳамиша елкасида кўтариб юради... Мана бундай қилиб! — Носир эпчиллик билан Илёсни елкасига миндириб олди ва соҳил бўйлаб чопиб кетди.

*

* *

— Бунча қорасиз, тоға? — деди Илёс Носирнинг елкасидан оёғини ошириб тушаркан, йигитнинг иргайдай таранг, эски зарангдай силлиқ қурагини силаб, — менини эса оппок, фу!..

— Қуёшда куйиш керак, дўстим, ана шунда баданинг қорайди, кучинг кўпаяди. Менинг ёнимга кел. Иккаламиз бирга бўламиз. Бу ерда эрта-ю кеч яланғоч юрсанг ҳам, барибир, хеч ким кўрмайди. Кийим кийсанг терлайсан, баданга чилп-чилп ёпишади. Ўх-ҳа... — у елкаларини учириб илкис силкинди. — Баданинга кўйлак ёпишганини жуда ёмон кўраман.

Илёснинг кўзига қум кирди шекилли, зўр бериб ёшланган кўзларини муштумчаси билан арта бошлади.

— Ундей қилма, баттар бўлади, — деди Носир. — Қани, менга қара-чи... Ҳеч нарса йўқ... Биласанми, бир нарсани сўрамоқчиман сендан.

Илёс лабларини қимтиб, бош силкитди.

— Ҳаёт нимадан иборат?.. Биласан, муғамбирлик қилиб, мени синамоқ мақсадида жўртага айтмаяпсан. Сен менинг фикрими билмоқчисан. — Носир бу гапларни ёш болага эмас, ўзини тергагандек, ғалати оҳангда гапирди: — Ҳаёт мана бу кум зараларидан таркиб топган. Шаҳарлардаги осмонўпар бинолар,

ялтироқ дераза-ойналар... Фақат у оёғимиз тагида ётгани учун беписанд. — Носир дафъатан Илёснинг ҳафсаласи пир бўлиб, кумга ўтириб қолганини кўриб, жонланиб, қизишиб кетди:

— Ишонмайсанми? Ҳа, бу менинг гапларим эмас, олимларники. Ер шари космик зарралардан пайдо бўлганми? Ишонмасанг, аканглардан сўра, улар билишади.

Ўз қўргонлари билан андармон Муса ва Фиёс ишларини ташлашди-да, Носир билан Фиёс орасида жиддий тус олаётган мунозарадан яна бирон кори ҳол юз беришидан қўрқиб, беихтиёр улар даврасига қўшилиши.

— Зарра эса зарра бўлишдан аввал ундан ҳам кичик — чанг, ғубор, тўзон бўлган.

— Кўйсангиз-чи? — менсимаган бўлди Фиёс.

Носир унга ялт әтиб қаради ва пешанасини кумли қўллари билан чангллади:

— Тўғри, жуда узоклашиб кетдик, кўзлар илғамай қоляпти... Киска қиламан, хуллас, шу зарралар бир-бири билан қўшилишиб, бирикишга ҳаракат қилган. Кейин эса минг-минглаб асрлар ўтиб ерга, биз яшаётган Ер шарига айланган... Кейин бошқаси: сув, ўрмон, ўсимликлар бино бўлган... Бу бечора кумлар ҳамон қўним билмай дайдиб юрибди. Еримиз эса коинот оламидаги сайёralар орасида мана бундай, — Носир кумни титкилаб, мошдай тош топиб кўрсатди. — Учиб юрипти... Демак, мен ҳақми?..

Жуда йироқлардан, қарийб ғойибдан яна мавжуд борлиққа қайтганидан севинган Илёс:

— Ҳақсиз, ҳақсиз! — деб чапак чалди.

— Бу ҳали ҳаммаси эмас... Ҳаммаси яна ўз ҳолига, зарраларга, чанг, ғубор, тўзон ҳолига қайтади.

— Биз-чи? — ҳангуга манг бўлиб қолган Илёснинг кўзлари бетоқат жавдиради.

— Биз ҳам...

— Фиёс, отам қани?

Илёснинг тўсатдан отасини қўмсаб қолиши болаларнинг хушини яна жойига туширди.

— Сен қўрқма, — деди Муса. — Эҳ-хе, ҳали унгача гап кўп.

Носир билан акаларининг гаплари бир жойдан чиққани Илёсга жуда-жуда алам қилиб кетди шекилли, ўрнидан туриб атрофга маъюс қаради ва луқзор устида боши кўринган отасига кўзи тушди.

— Ота!

— Мен шу ердаман, ўғлим.

Болалар булоқдан канистрни тўлғазишиб, сув келтиришди.- Носир кўлида жийда шохини ўйнаб келарди. Шох қуриган бўлса ҳам ундаги узумнинг кичик бошлариdek шода-шода қизил жигар ранг ёввойи жийда фоят чиройли ялтиради.

— Нима ковшаяпсан? — ўсмокчилаb сўради Мардонкул.

Носир бир сиқимча чигитдай-чигитдай данакни пуфлаб ташлади.

— Жийда, — деди у лаб бурчларини артаркан.

— Шоқол жийда-ку.

— Нима бўptи?

— Уни шоқол, тустовук, курту қумурсқа ейди. Сен, ахир, одамсан-ку.

— Шунинг учун ҳам улар юрак санчиғидан нолишмайди.

— Ҳай, шайтон-ей, — қўл силтади Мардонкул.

— Мана бу сенга, Илёсбек, уйга борганингда кўринарли жойга осиб қўй. Мардонкул ака рост айтдилар, буни ёб бўлмайди. Ўтган йилдан қолган, эски. Қара, қотиб кетипти. Кузда келсанг, бир кучоғини сайлаган жойингдан узиб бераман... Ма, ол. Ўзиям баланд-да, кушлардан омон қолган шохи экан. Кўлларимни тимдаланганини кўр, мушук тирнагандек.

Мардонкул ўрик келтиргани кордонга кириб кетгач, Зокир:

— Носир, роса зериксанг керак-а? — деб сўради.

— Мана буларга ўхшаш бешта укам бор. Шуларни соғинаман. Мардонкул ака эса ҳадеганда уйга жавоб беравермайди... Унга ҳам қийин-да, ўзи қолади...

— Яна келсак, қўрғон қурамизми? — Илёс кўзларини қисиб сўради.

— Вой, азамат-ей, албатта. Сен билан биз ҳали бу қумларда шундай қўрғонлар қурамизки, қўрганларнинг ақли шошади.

ДОЛҒАЛИ ДАРЁ

Эрталабки совуқ юмшаб, асов оқим узра тўлғанаётган оқиш тутун янглиғ дарё ҳовури ҳавога сингиб борар, олис соҳилларни элас-элас пардага чулғаётган рутубатли губор осмондан ёғилар, чор атроф сарҳадларни кўздан бекитарди. Тонг сахарлаб донлагани дала-даштга учиб кетган қарға, зоғча, загизғонлар унсизгина учиб, ўз манзилларига қайтишмоқда. Оломон тўпланган соҳил ҳаво ва заминнинг ғалати, сирли талвасасидан бўғриқмоқда эди.

— Ҳавонинг авзойи бузилди, сезяпсизми? — деди озғин паканагина зиёлиномо киши, кўм-кўк плашининг ёқасини кўтарган кўйи хаёлсираб ўтирган шеригининг ҳорғин юзига боқиб.

— Ҳа-я. Бундай кунда иссиққина хонада ўтириб, ошхўрлик қилишдан кўра завқлироқ эрмак бўлмас-ов.

— Ҳали ҳам кеч эмас, — жонланди ҳамроҳи чўнтағидан дастрўмол олиб, қизарган узунчок бурнини қоқаркан. -Ўйлаб кўрсан, келганингиздан бўён дурустроқ мәҳмон ҳам қилолмапмиз. Айтганингиздай, отамлашадиган кун бўляпти-да.

— Мен-ку жон-жон деб рози бўлардим, аммо сезиб турибман, Дазирага бугун ўтмасак, кейин иложи бўлмайди. Озиб-ёзиб бир келибман-у, дўстимни кўрмай кетсан инсофдан бўлмас. Бунинг устига, у келишимдан хабардор. Ишонмасангиз, мана, ўқиб кўринг, — чўнтағидан буқланган сарғиш телеграммани олиб зиёлиномо кишига узатди.

— „Келишингни эшитдим. Кўриб кет мени. Соғинганман. Ҳабар берсанг бас, кутиб оламан. Наврўз“, — овоз чиқариб ўқиди шериги.

— Биласиз, кейин бир умр ўпка-гина қилиб юради... Нима де-дингиз? Шуниси ҳам борки, йигит сўзидан, арслон изидан қайтмайди. Кўйинг, кўнгилни икки қилмайлик. Йўлга чиқдик қайтиш йўқ. Ахир бу сафарни мен неча йил орзиқиб кутдим... Яна қачон вақт, имконият топилади, дейсиз.

Район газетасининг муҳаррири Турғун Назарни ҳам, марказдан келган машхур адаб Чори Чагонни ҳам орқаворотдан танийдиган одамлар оломон орасидан чиқиб, ўзларини таниб-танимаганга, эшитиб-эшитмаганга солишиб, уларнинг ўзаро суҳбатига зимдан қулоқ тутиб атрофларида айланиб юришарди. Буни сезган муҳаррирнинг завқи ошиб, кичкина бoshини мағрур тутишга уринар ва ора-чорада оломондан четда, соҳилдан ўпирилиб тушган катта кесак ўла устида ўтирган, бошига одмигина телпак бостириб кийган кишига қараб-қараб кўярди.

— Ана у кимсани танидим, — деди шивирлаб Турғун Назар. — Тұхматчиликда айбланиб, қамалиб кетган зди. Газетада танқид ҳам қилғанмиз. Шу оқланиб чиққанмиш.

— Бундайлар ҳозир кўп, — бепарво сўз қотди Чори Чагон. — Мансабдорми?

— Оддий ўқитувчи. Сенга ким қўйипти, дейман, катталар билан чап бўлишни. Оёғингга қараб, кўрпа бичмайсанми... Сездингизми, янги мақол. Бирон жойга илдириб кўйинг.

— Ростгўй одам ҳамиша дакки ейди.

— Ҳасадгўй-чи?

- Буниси виждонига ҳавола... Ана уларни ҳам танирсиз? — дафъатандан адид мийигида кулди-да, қия соҳилдан қўл ушлаби юқорига кўтарилаётган йигит ва қизни кўрсатди.
- Йўқ, — норози оҳангда жавоб берди муҳаррир.
- Мен эса танийман.
- Кўйсангиз-чи.
- Рост. Булар севишганлар. Балки қонуний келин-куёвдир.
- Жуда ёш-ку улар?
- Менга ҳам ғалати туюлиб турибди. Лекин, барибир, улар менга таниш.
- Ҳазиллашяпсиз.
- Биламан, ишонмайсиз. Қараб туринг, ҳозир гул билан қайтишади. Мени айтди дерсиз.

Коп-қора тутун буруқситиб келаётган теплоходдинг яқинлашганини кўплар сезмай қолди. Оломон орасида ғала-ғовур, тартибсиз ҳаракат бошланди. Елкаларига халта, сумка осган, қўлларида чамадон, дипломат кўтарганлар элдан бурун ғимирлаб қолишиди.

Пахталик шим ва енгсиз, авраси жун нимча кийган қотмагина йигит палубада чопиб юрар ва занжирли чангакни чамалаганча соҳилдаги йўғон темир қозикқа залвар билан отишни мўлжаллаб келарди.

— Қочинглар, чангак тегиб кетади! — деб бақирди кемачи йигит. У қулочкашлаб отган чангак панжалари темир қозикдан анча юқорига, соҳилга санчилди. Ўзи ҳосил қилган тўлқинда лапанглаб турган кема ҳамон оқим ҳукмида бўлганидан, занжирли чангак таранг тортилди ва нам тупроқни тирнаб, пастга қараб силжиди. Шу пайт оломон орасидан чопиб чиқсан собик маҳбус чангакка чанг солди ва уни ердан суғуриб олиб, қозикка илдирди.

— Бор экансиз-ку, — деди нашъя қилиб кемачи йигит. — Хизмат бўлмаса, ака, энди бунисини ҳам ушлайсиз. — У палуба устидаги занжирларини шилдиратиб судраб келган бир учи кема қўруғига боғланган иккинчи чангакни узатди. — Ўртоқлар! — оломонга муражгаат қилди кемачи йигит. — Шошмангизлар, ҳозир сизлар билан капитан гаплашмоқчи.

Кемачи йигит занжир занги юқини ислики ялтироқ пахталик шимиға артди-да, бошқарув бўлинмага, дарға ёнига кириб кетди. Ташвишманд оломон жимиб, дарғанинг палубада пайдо бўлишини кута бошлади. Капитан қораси ҳадеганда кўринавермагач, шовур-шувур, сўнг ғала-ғовур авж олди.

— Шунча кутганимиз каммиди? — деди кимдир норози овозда.

— Тартиб бўлмади бўлмади-да.

- Ўзбошимчаликларга қачон чек қўйиларкан?
- Сабр қылсаларинг-чи, бирон жиддий гап, сабаб бордир. Оломоннинг ғазабига дучор бўлишга кимнинг кўзи учиб турибди.
- Тепса-тебранмас экан-да.
- Бас қилинглар, келяпти!

Палубага ётқизилган тунука қоплама устида қарс-курс, гурс-гурс қадам ташлаб келган яғриндор, мўйловига оқ оралаган барваста дарға оломонга бепарво назар ташлади-да, секин йўталиб гап бошлади:

— Кечирасизлар, тутилиб қолдим. Рация орқали гаплашаёт-ган эдим. Гап бундай: кеча тоғларда кучли ёмғир ёғипти. Дарёдан сел келяпти.

— Сел! — оломон орасида саросимали шовқин тўлқини кўтарилиди.

— Ха. Ҳали у биздан узоқда. Аммо манзилга етгунча, у бизга етиб олиши ҳам мумкин. Қандай куч билан келяпти, айтольмайман. Рациядан айтишларича, катта сел.

— Бу ёғи нима бўлди?...

— Шунинг учун огохлантиряпман. Кейин мендан нолиб юрманглар. Кемага чиқиш ихтиёрий. Кимнинг юраги бетласа, марҳамат. Юрак ўйноғини кўришга тоқатим йўқ.

Турғун Назар адабнинг енгидан тортиди:

— Нима қилдик? — жовдираб қаради у ранги қув ўчган ҳолда юз-кўзларини пирпиратиб.

— Ўйлаб қолдим...

— Такрор айтаман, — дерди овозини барада қўйиб капитан, — селда қолиш ҳеч гапмас. Кейин доди фарёднинг фойдаси бўлмайди.

— Сиз-чи. Сиз нима қиласиз?

— Ҳм, — кулди дарға ҳамон бепарво оҳангда. — Биз кетамиз. Ишимиз шунақа. Кемани бу ерда қолдириб бўлмайди. Писта пўчоғидек ўйнатиб, олиб кетади. Ҳавфдан холи қўлтиғимизга лангар ташламасдан иложимиз йўқ.

— Биз-чи, биз нима қиласиз?

— Айтдим-ку, ихтиёрий, деб.

— Кемага тушганинг жони бир. Биз сизга ҳамроҳ, — соҳилдан ўқтам овоз янгради.

Ҳамманинг боши ўша томонга ўгирилди. Тик қирғокда йигит ва қиз ёнма-ён туришарди. Улар кўл ушлашиб, тупрок чангитишиб, пастга тушишди. Қизнинг қўлида бир даста чучмома, лолақизғалдоқ, йигит сершоҳ чўлковракни қўлтиқлаб олган.

— Трапни ташла! — деди дарға шеригига. — Вақт зиқ. Беш минут муҳлат.

— Айтганим бўлдими, — деди Чори Чагон жилмаяркан, ёнидан коврак анқитиб ўтган йигитга маҳлиё боқиб.

— Кўйсангиз-чи, нима гап бўляпти-ю, сизнинг хаёлингиз қаёқда.

— Қани, бошланг, — Чори Чагон ўзини четга олиб, Турғун Назарга йўл берди.

— Қадамингиз қаерга бошлаётганини англайпсизми? Бошингизни тебратманг... Улар гўдак, нимани тушунади, ўшаларга эргашамизми?

Собиқ маҳбуснинг трап — зинадан юкорига кўтарилаётганини кузатиб турган адид ҳамон мийигида куларди. Одамлар турнақатор изма-из палубага чиқишмоқда эди.

— Мен уяламан, — деди Чори Чагон.

— Оломоннинг ярмидан кўпи жойидан жилгани йўқ...

— Уларнинг йўриғи ўзлари билан... Йўл беринглар-чи, — адид кемага чиқаётгандар сафига кўшилди.

— Ишқилиб, охири баҳайр бўлсин, — Турғун Назар чорасизликдан зир қақшаб, одамларга мўлтираб қаради, тўлқинда солланаётган кемага кўзининг қири тушганида алвастини кўргандек, нафаси ичига тушиб кетди.

Кема уч марта қисқа-қисқа „хўп-хўп-хўп“ этиб босик гудок берди.

— Ҳой, мухбир ака, чангакни қозиқдан бўшатиб юборинг, — деди кемачи йигит.

— Қанака мухбирман, сенга!

— Кечирасиз, ака. Илтимос, чангакни узатинг.

— Трапга тегма, — ўшқирди муҳаррир кўллари қалтираб, чангакни бўшатаркан. У кимнингдир ёрдамга келганини, кўл узатганини кўриб, трапга чопди. Муҳаррир кемага чиққач, соҳилда сеҳрлангандек тик турган одамларга сукланиб қаради, вужуди бўшашиб, юраги қинидан чиққудек гупуллаб ураётганини сезди-да, лоҳасланиб секин палуба тўсинига белини тираб, ўгирилиб олди.

*

* *

Кема шитоб билан оқим сари сузиб кетди. Тумшуқда дизель мотор пот-потлар, қуйруқда сув пўртана ҳосил қилиб қайнар, йироқларда ўпирма соҳиллар гир айланар ва тобора кичрайиб, кўздан узоқлашарди. Дарғанинг таҳдидли огохлантиришини хисобга олмаганда, кеманинг сузиш зайлар одатдагилардан фарқ қиласди. Палубага талайгина одам чиққан, бъазилар чамадонлари қиррасига қўнимли ўтириб олишиб, сигарет тутатишар, бир неча ёш-яланг тўсинига бел бериб, магнитофондан

таралаётган хорижий рок-музиқа тинглашар, бўғиқ оҳангда ўзаро гурунг қилишарди. Бу ҳол-хотиржамлик Турғун Назарга далда бўлди. У бошини кўтариб, кема қўйруғидан ҳар иккала тарафга ёйилиб, бир-бирини қувлаётган тўлқинларга қаради, улар бир-бирининг устига сапчиганда шалоплаган овозлар эшилди. У меҳмонни кўзлари билан излаб кетди. Чори Чагон кема саҳни ўртасида оёқларини хийла ёйиб, бошқарув бўлинмаси баланд тахта тўсинига қоқилган „Эркин“ деган ёзувга қараб турарди. Мұхаррир у сари қадам ташлаган эди, боши айлануб, яна кўнгли беҳузур бўлиб кетди. Қандайдир бадбўй, ўткир талх хид томогига тикилиб, нафасини бўғди. Тумшукдан эсаётган шабада қўланса коврак ҳидини тўзғитиб эсаётганини англағач, юраги баттар ўқиб кетди. У тўсиндан ушлаганча юриб, йигит билан қизга яқинлашди:

— Ука, шу коврагингни ташла, кўнглимни айнитиб юборди.

Турғун Назарнинг гапини тушунмаган йигит анграйиб қарди ва фахмлагач, кулимсиради:

— Ҳалитдан-а?

— Илтимос...

— Буни дарёга ташлаш учун даштдан терганим йўқ.

— Хиди қурсин.

— Биламан, ҳиди ёмон, таъми ундан беш баттар — тахир, ачиқ. Лекин даво. Шунинг учун ковракни яхши кўраман... Ке-чирасиз.

Гапини икки қилишга одатланмаган димоғдор мұхаррир ижирғаниб пўнғиллади, тўсиндан ушлаганича, кема қўйруғига ўтди. Чори Чагон кема саҳнидан юриб, унинг ёнига келди. Елкасига кўлини қўйди:

— Сизни соҳилда қолиб кетди-ёв, деб ўйлагандим, — деди у паришон.

— Нега қоларканман? — сир бой бермади мұхаррир. — Чангакни ечиб узатдим.

— Бало экансиз. Лекин толиққансиз, ранг-рўйингиз айтиб туриби.

— Йў-ге. Фақат ковракнинг ҳидига тоқатим йўқ. Ҳайронман, ана у киз қандай чидаётган экан.

Чори Чагон кулди.

Кема саҳнида дарға ёрдамчиси пайдо бўлиб, одамлардан четда, тўсинга кўкрак тираб дарёга тикилиб кетаётган ўқитувчи ёнига борди ва билагидан тутиб „Эркин“ деган ёзув четига суюб қўйилган лангарчўпни кўрсатиб, нималарнидир тушунтириди.

— Номи ғалати-я — „Эркин“. Ўглининг исмими, дейман. Арзандасини яхши кўрса керак.

Мұхаррирнинг бу ўринсиз топқирилгидан Чори Чагоннинг афти буришди, лекин чурқ этмади. Дарға ёрдамчиси улар та-рағфа шаҳдам қадам ташлаб келарди.

- Мұхбир ака... — унинг гапи оғзида қолди.
- Ҳой, қанака мұхбир?! — ўшқирди мұхаррир. — Ҳа деб мұх-бир, мұхбир, дейсан.
- Кечираңыз, газетанинг каттаси-да сиз.
- Бу бошқа гап. Газетанинг каттасини мұхаррир, дейдилар.
- Биз — авом. Ҳаммасини мұхбир деймиз.
- Бас қил!
- Сизни капитан сүраяпти. Ёнига бораркансиз... Ҳа-ха, сиз-ни, мұхаррир ака.

Йигитта зергалиб қүшдай енгил юриб, алпанг-талпанг пилди-раб кетаётган мұхаррир ҳаракатига разм соган Чори Чагон, яхшиямки, жуссаси кичик, бўлмаса, талвасаси сезилиб колиб, шарманда бўларди, деб кўнглидан ўтказди. Шу чоқ у ўзига қада-либ турган собиқ маҳбус — ўқитувчининг нигоҳини сезди. Бу кўзлар унга таниш ва қадрдан эди. Китобларини ўқиган, сұхбат-ларини тинглаган минг-минглаб мұхлисларга хос сукли, эрка-ловчи, суйканувчан самимий бир қоникма назар жилvasи юра-гига жиз этиб тегди. Зум ўтмай кўзлардаги бу холис жилва, сук йўқолди-ю, ўрнини ҳакир андиша ва заиф нотавонлик эгаллади. Адибнинг кўнгли алланечук ўксинди. Шу тобда ўқитувчини гап-га солиш, кўнглини овлашга қаттиқ эҳтиёж сезди. Бироқ капи-тан бўлинмасидан оғзи кулоғига етгудек бўлиб жилмайиб чиқиб келаётган Турғун Назарга кўзи тушди-ю, ҳозиргина ўйлаган қаро-рини ҳаёлидан қочириб кўйди.

- Тинчликми? — деди у ёнига келган мұхаррирга.
- Капитан бало экан. Сизни танипти. Бир китобингизни кўрса-ди — ёғ босиб, муқоваси титилиб кетипти. Суратингиз бор экан. Шуми, деб сўради. Салом денг: айтинг, биз уни, китобларини яхши кўрамиз, деди.

Орага узок ва нокулай жимлик чўқди.

- Сизга ҳавасим келади, — ниҳоят, Чори Чагон сўз қотди.
- Нимага?
- Ҳамиша одамлар орасидасиз. Неки бўлса кўз ўнгингизда.
- Қайдам. Қани бунга вақт бўлса: чопа-чоп, елиб-югуриш, топширик, мажлис. Булар эса четда қолиб кетади, — мұхаррир қўли билан доира ясаб, палубадаги одамларга ишора қилди.
- Булар эмас, биз, яъни сиз-у мен, дессангиз тўғри чиқаркан.
- Ҳар кимнинг юмуш-ташвиши ўзига яраша, етиб-ортади. Тўғри айтдингиз, энг мұхими, шу юмушлардан кераклигини — лавозим, нуфуз, касбга бевосита дахли борларини топиб олиш керак. Афсуски, бунга имкон йўқ. Йўл беришмайди, ҳар қадам-да тўғаноқ.

- Бу ҳолда умрни ютқазиб қўйиш ҳеч гапмас экан.
 - Кимдир қилиши керак-ку бу ишларни ҳам...
 - Соҳил осмонига қаранг, шаҳар кўриняпти, — Чори Чагоннинг тўсатдан, томдан тараша тушгандек толмовсираб айтган бу гали мұҳаррирни эсанкиратиб қўйди.
 - Қанака шаҳар?... Қўйсангиз-чи. Мен кўрмаяпман-ку... Балки саробдир?
 - Шаҳарларнинг бесамар давралари кўзимга кўриниб кетди.
 - Биламан, — деди ҳамияти оғринган Турғун Назар сўник оҳангда.
 - Ўз фикрларим билан ёлғиз қолишга ҳаққим бор-ку, сен бўлса яна гийбат, фиску фасодлар оламига тортяпсан, демокрисиз.
- Чори Чагон мұҳаррирга ялт этиб қаради ва дарҳол хушёр тортди.
- Узр, сизни бу қадар нозиктаъб деб ўйламагандим. Азбаройи сидқидилдан хурсандман сиздан.
 - Биласиз-ку, ҳозир ҳам топширикни бажаряпман. Лекин бугунгидек, омадли топшириқлар камдан-кам бўлади. Бунақалар бизга тегмай қолади, илиб кетишади.
- Адид беихтиёр қаҳ-қаҳ уриб кулиб юборди.

*
* *

Кирғоқдан хийла узоқлашган кема дарё ўртасига қараб катта тезлиқда сузиб борар, икки ёнга таралаётган ўркачли тўлқинлар соҳиллар томон кўпикланиб чопар, қумлок канорага шалоплаб урилар, сапчир, қуллатар ва шугина насиба билан кифояланиб, тинчир, ортда қолиб кетарди.

Орадан ярим соат ўтгач, дарё қўпириб, вахимали талвасага туша бошлади. Кема зўриқиб, палуба тунука қопламалари зириллай кетди. Ҳаводаги рутубатнинг сийраклашгани йўловчиларни сергаклантирди. Улар ўринларидан туришиб, атрофга олазарак назар ташлашарди.

- Йўловчилар, дикқат! — деди кичкириб, бўлинмадан югуриб чиқкан кема ёрдамчиси. — Ўн-ўн беш минутлардан кейин сел этиб келади. Факат вахима бўлмасин. — Кемачи йигит ҳаяжонини харчанд босишга уринса-да, номаълум ҳавфнинг шаксиз, аммо хали юз бермаган зарбаси шарпаларидан довдираётганини яширолмади. — Ҳамма кубрикка тушсин. Палубада бирон зот қолмасин. Ўртоқлар, такрор айтаман, вахима бўлмасин, капитанимиз бунақа селларнинг кўпини кўрган. Мухбир ака... Ҳа, эсим курсин, кечирасиз, сизлар биринчи бошлангизлар.

— Вой, қандай яхши! —деди кубрикка биринчи бўлиб тушган қиз чапак чалишдан ўзини аранг тийиб. —Шинам, озода, иссиқ! Биз эса юқорида совқотиб ўтирибмиз.

Кубрик кеманинг пастки саҳнидаги команда хонаси бўлиб, ашёлари дағал ва саноқли бўлса-да, мустаҳкам эди. Эски тахта ва қандайдир туриб қолган оғир хидни туйишга улгурмаган Турғун Назар йигит қўлидаги ковракни кўриши билан бурнини жийириб, бармоқлари билан қисиб олди.

— Ҳозир, ҳозир, акажон, — деди йигит шошиб, дипломатини очиб цеплофандаги шоколадни ағдараркан. — Йўлини қила-миз, ҳидими гиппа бўғиб оламиз... Мана, хурсандмисиз?

Бироқ коврак хиди хонага таралиб улгурган, йигит эса ўрнидан туриб зўр берганича бурун катакларини кенг очиб, ҳаво симирарди.

— Кўяверинг, — деди Турғун Назар, — бўлар иш бўлди.

Кеманинг бутун гавдаси илкис-илкис зириллади ва бир ёнбошга оғиб, ўқтин-ўқтин лапанглай кетди.

— Нима бало, оқимга қарши сузяпмизми? —муҳаррир калта бўйини чўзиб, қулогини кубрик деворига тутди. —Бизни жаҳнам обзига кўндаланг қилмоқчи шекилли.

Пойгакда тиззаларига қўлини қўйиб ўтирган ўқитувчи ўрнидан туриб, темир зинадан юқорига, бошқарув хонасига чиқиб кетди.

— Сизга йўл бўлсин? —муҳаррир Чори Чагоннинг ўрнидан турганини кўриб, саросимага тушди.

— Кўришим керак.

— Нима деяётганингизни биласизми? Шаштингиздан қайтинг, зинхор қайтинг!

— Қизик-да, — Чори Чагон кулди ва қувноқ чехраси синика бошлаган, нигоҳлари бекарор қизга қаради. — Кемага тушганинг жони бир: кўрдинг нима-ю, кўрмадинг нима! Шундайми, ука?

Хаёлсираб ўтирган йигит аввал толмавсираб қаради, кейин қулокларигача қизариб кетди. Адиб зинанинг ярмига бориб, энгашиб изига қаради: Турғун Назар хона ўртасида у ёқдан-бу ёққа юра бошлаган эди.

Капитан ортдан одам шовурини сезиб, ўгирилиб қаради ва адибни кўриб хўмрайди, лекин лом-мим демади.

Кема ўнгланиб олган, дарё ўртасида оқимга қарши оҳиста сузиб бормоқда. Бир неча дақиқадан сўнг дарё кучли зилзила-да суви чайқалган улкан сарҳовуздек лапанглай кетди: ички, кўзга кўринмас тўлғоқдан ларзага тушди, яқин-йироқларда бешик-бешик тартибсиз тўлқинлар, уор-уор пўртаналар қурил-

лаб, чарх айлантира бошлади. Дарга олға қараб турар, қандай-дир мурватлар, ойнаванд милли ускуналар ҳаракатига разм солар ва қулай фурсат топиб ҳамла қилишга өзгеланаётган ваҳший махлукдек ўз-ўзидан кучаниб, пайлари бўртиб, бўзариб-қизариб борарди.

Йироқда, дарёning кенг саҳнида ғалати қора девор ҳошияси пайдо бўлди. Дизеллар бор куч билан ўкира кетди. Қора девор билан орадаги масофа яқинлашган сайин кема тезлиги ҳам ошиб борарди.

Дарёдаги оқим, бешик-бешик тўлқинлар, чарх урган пўртналар бир зум ҳаракатдан тўхтади. Кейин тўсатдан буларнинг ҳаммаси — тўлқин ҳам, пўртана ҳам, оқим ҳам бир жон-бир тан бўлиб, худди гала йиртқичдек бирваракайига олдинга, қора девор оғушига чопа кетди. Гўё тубсиз даҳшатли ўқон ҳосил бўлган-у, ҳаммаси сеҳрланган кўйи унинг беаёв домига зириллаб югуради. Бу — атрофни ваҳшатга солиб, улкан дарё оқимини тилсимлаб, ўз комига тортган аждаҳо куч — сел эди.

Дарга рўпарасидаги ёмғир тозалайдиган чўткалар шигиллаб ишлаб кетди. Чори Чагон шу дақиқада кемада кетаётганини, энди эса коп-коронғи жаҳаннамга дуч келишини, ҳали бир замон тубсиз ҷоҳга қуляжагини жисман ҳис этди-ю, юраги ўйноқлаб, оёклари қалтираб, вужудини совуқ тер босиб, темир устунга беҳол ёпишди.

— Ўзингизни тутинг, домла, — шивирлади қулоғига унинг кўлтиғидан тутган ўқитувчи.

Чори Чагон хиралашиб тинаётган кўзларини очди: кема нишабликка шаҳд билан кетиб борар, олдинда эса ваҳимали, афсонавий малла тоғ кўпиреб, елка-ўмровларини шишириб, ёлларини шопириб, беаёв бостириб келарди. Кема қора девор тўшига бор куч билан кўкрак урди. Пастда, кубриқда нимадир полга гурсуллаб қулади. Одамларнинг айюҳанноси, қий-чуви эшитилди. Лаҳзада атрофни зулмат қоплади. Кема тумшуғига нималардир гуп-гуп урилди ва еп-енгил пўкақдек ҳавога, бўшлиққа учиб кетди.

Адид ўзини йўқотди. Унинг кўз олди батамом тиниб, коронғи-лашди. Бутун вужуди, онги ҳаётида биринчи марта унга, унинг идрокига бўйсунмади, итоат қилмади. Сип-силлиқ ялтироқ темир устунни кўллари билан тутганча, сирғалиб, полга беҳол чўқди.

*
* *

Чори Чагон ўзига келганида, боши узра одамлар тўпланиб турганини кўрди. Қулоғига кимнингдир дарғазаб фигони эшитиларди:

— Бу иблис ҳаммамизни бир гўрга тиқиб, нобуд қилмоқчи. Била-туриб, шундай хавфга ташлаганини кўринг-а!

Адиб кўзини очди. Ёнида қиз чўккалаб ўтирас ва унинг пешанасига қўйилган хўл дастрўмолни узунчоқ, нозик бармоқла-ри билан босиб туради. Турғун Назар эса сассиқ ковракни кап-кап чайнар ва дағдаға қиласади:

— Биласанми, ким кетяпти кемангда, а? Бошинг билан жавоб берасан!

— Ҳе, мухбир ака, чўксак бирга чўкамиз. У ёқда ҳаммага бир кўз билан қарашади: айбсиз, айбдор, номсиз, номдор деган гап бўлмайди.

— Ақл ўргатма! Сендан сўраётганим йўқ... Ана, капитанинг-га қара, яна хўмраяди-я!

— Нима, сизлардан бошқа одам йўқми кемада, — дарға-нинг овози дўриллади. — Бунча ваҳима!

Чори Чагон дарғанинг бир лаҳза ўгирилган юзида ҳалокатли хавф-хатардан эмас, ошкора кўрқоқликдан, ожизлиқдан жирканиш ифодасини кўрди. Шу чоқ унинг аъзои бадани аччиқ аламдан қизиб кетди. Ана шу вайсақи мухаррирчалик ҳам бўлмаганини — руҳан, жисмонан заифлигини одамлар олдида кўр-кўронада намойиш этганини ҳис этди-ю, баттар терга ботди.

— Қаердан олдингиз ковракни, ё пиrim-эй! Бу ёкка беринг. Усиз ҳам гапларингиз сассиқ, — деди йигит мухаррирнинг кўли-дан ковракни юлқиб оларкан.

— Ҳе, қизғанчик, — Турғун Назар афтини буришиди.

Дарға ёрдамчиси шкафдан термос олиб, пиёлага чой қуйди-да, Чори Чагонга узатди:

— Ичинг, амаки, ҳеч қиси йўқ, ўтиб кетади, — деди ва ўрнидан туаркан, баланд овоз билан қичқирди. — Энди ҳамма бўлинмани бўшатсин! Истаганлар палубага чикиши мумкин. Халақит берманглар бизга.

Ташқарида эса қуёш олмос нур сочар, чараклаб кўз қамаштирас, нилий уфқлар тип-тиник, ложувард кучогини кўз-кўз қиласади. Дарёда бўтана қайнаб, оқим хансирар, ҳалокатли хавф ўтгани билан селнинг шашти ҳали сўнмаган эди. Ҳавода нам тупроқ ва чиринди, ўткир ўт-ўлан ҳиди анқийди. Кема оқимни кия кесиб, яқинлашиб қолган тўқайзор қирғоқ сари оҳиста сузиб борарди.

Ёш йигит ранги оплок оқарган қиз олдида гирдикапалак. Овунтироқ билан овора. Турғун Назарнинг чехраси тунд. Ковракнинг бадбўй талх таъмини эндиғина сезгандек, юзини ҳадеб буриширади, ўқтин-ўқтин кекиради. Ўқитувчи белини палуба темир тўсинига тираган кўйи теллагини тиззасига уриб қоқади. Кимдир бурқситиб, сигарета тортялти.

Чори Чагоннинг дарға билан гурунглашгиси келиб кетди. У бошқарув бўлинмасига кирганида, дарға ёрдамчисига жойни бўшат, деган ишора қилди.

- Келинг, домла, ўтиринг. Қандай, ўтиб кетдими?
- Ўтишга-ку ўтди-я, лекин уялтириб кетди-да...
- Эътибор берманг, бундай ҳоллар бўлиб туради.
- Мана, чойдан ичинг, — деди Чори Чагон термосдан пиёлага чой қўйиб дарғага узатаркан.

— Раҳмат. Чойни кейин ичамиз. Соҳилда, — унинг кенг юзи ёришиб кулди, мўйловини мушти билан тузатди.

Шу пайт кема бехосдан қалқиб, силкиниб кетди. Қўйруқ томонда ниманингdir кемага урилган кучли залварли дукур-дукури сезилди. Дақиқа ўтмай, дукур шарпаси чап биқинда пайдо бўлди. Кема қўйруғи сувдан хийла кўтарилиб тушди.

— Домла, ёрдамчини чақиринг, — деди дарға пешонасини қаширкан.

Чори Чагон ёрдамчининг бўлинмага чопиб тушганини ва шу заҳотиёқ палубада дарғанинг кораси кўринганида жиддий ишқал чиққанини пайқади. Палубада ҳаллослаб юрган дарға тунука қопламали полга ялпайиб ўтириб олган муҳаррирга қоқиниб кетишига сал қолди.

— Бошқа жой қуридими, домла? Кубрикка тушиб ўтирсангиз бўлмайдими?

— Нима қиласай, коптоқдек ўйнатаётган бўлса. Кубрик ҳам очик лаҳад.

Дарға унинг ҳасратини эшитмади. Қўйруқнинг гоҳ чап, гоҳ сўл томонига гавда ташлаб пастга қаради. Қандайдир сирли, даҳшатли маҳлук кема қўйруғини қўлида ушлаб, элакдек нарибери ўйнатмоқда эди.

— Падарига лаънат! — деди дарға ўқитувчи ёнига келгач. — Катта дараҳт чангалига тушиб қолганга ўхшаймиз. Сиз ҳар эҳтимолга қарши лангарчўпни олинг... Хой, ука, сиз бу ёққа келинг, — деб чақириди қиз ёнида турган йигитни имлаб. — Бу кишиига зарур бўлганда ёрдамлашиб юборасиз. Ҳозир ёрдамчим ҳам чиқади. Фақат эҳтиёт бўлинглар.

— Хотиржам бўлинг, капитан! — деди йигит шўх кулиб, қизнинг билагидан тутиб, кубрикка кузатаркан.

Чори Чагон кубрик зинасига оёқ қўйди-ю, ўйланиб туриб, дарҳол изига қайтди. Рулга ёпишиб олган дарғага:

— Ёнингизда турай, халақит бермайман, — деди. — Кўркманг, отдайман.

Дарға курсини имлаб кўрсатди.

Мотор бир меъерда гуп-гуплаб ишлар, сел ихтиёрида қолган кема онда-сонда гоҳ куйруқка, гоҳ биқинга урилаётган зарб-

дан зир-зир титрарди. Дарға кўзларини бакрайтириб олдинга тикилганча, зўр бериб хаёлларини бир жойга тўплашга уринарди.

Нихоят, у аниқ бир қарорга келди чоғи, моторга газ бериб, рулни оқим ўртасига бурди. Шу пайт кутилмаган ҳодиса юз берди. Руль дарғага бўйсунмай қўйди. Кема чукур оқимга киргач, пўкак сингари доира ясаб, айланана-айланана оқимга ўз ихтиёрини берди. Дарғанинг пешанасини тер қоплади.

— Неча селга дуч келганман, лекин бундай аҳволга тушмаганман, — деди у ўзи билан ўзи гаплашаётгандек вазмин оҳангда. — Кизиқ... Афтидан, кема қўйруғи дараҳт танаси билан томирлар орасига тиқилиб қолган. Ажралиб чиқолмаяпти. Бу чангалдан чиқиш керак.

Кабина қаттиқ силкинди, кема тагига гурс-гурс зарб урилди. Кабина томида шатир-шутур овоз эшишилди. Бу улкан тут дараҳтининг барг ёзиб улгурмаган ялангоч шохлари эди. Кема тут танаси устида ғалтак сингари сирғалар, тезкор оқим эса узун ва бақувват шохларни чархпалакдек ўйнатиб, кема бикинида айлантиради.

— Лъяннати, осминогнинг чангалига ўхшайди-я, қаранг, домла. Боплаб туширди, дейман, — ҳамон мулоҳаза қиласарди дарға. — Оқимга кўндаланг ҳайдасам, тут бўйи басти билан тик туриб кетиб, кемани чапа қилиш тайин... Оқим билан кетсанчи? Бўлмайди. Йўқ, йўқ. Узиб ташлаб кетиш мушкул... Селга қарши шаҳт билан газ босиб ҳайдасак-чи?... Кучимиз икки баравар ошади. Бошқа йўл йўқ. Бу ҳамроҳдан қанча тез қутулсак, шунча яхши. Саёзроқ жойга боргудек бўлсак, кемани тешиб юбориши хеч гапмас.

Дарға тормозни боса-боса кема тумшуғини оқимга қарши бир амаллаб буриб олди. Дизель мотор зўриқиб гуруллади, кема танаси тўлғоқ уриб титрай кетди. Нихоят кема ўкириб-бўкириб, олға ташланди: тўши бир неча бор турган жойида депсинди, кўтарилиб тушди, тагида катта тўлқинлар пайдо бўлди. Кема қўйруғида нимадир касирлади, гавдаси талвасага тушди, сўнгра оқимга қарши енгил сизиб кетди.

— Чангалдан қутулдик шекилли, — дарға пешанасидаги терни енги билан сидирди. — Домла, чиқиб қаранг-чи, ташқарида нима гап.

Ўқитувчи лангарчўпни тик тутганича қўли билан забардаст танаси гоҳ кўриниб, гоҳ чўкиб чикка-пукка бўлиб оқиб кетаётган тутни кўрсатиб кулар, юзидағи терни телпаги билан артарди.

— Илдизлари ўзидан баттар кўрқинчли-я. Сал қолди чангалида илиб кетишига. Қаранг, ҳалиям лопиллаб турибди. Қамчи-

дек тегди-я, — дерди йигит чаккагини қизга тутиб.

— Домла, бекор кубрикка тушдингиз-да, — деди дарға ёрдамчиси адигба ўқитувчининг кўлидан лангарчўпни олиб, жойига кўяркан. — Текин томошадан қурук қолдингиз.

*
* *

Одамлар енгил нафас олишди. Палубада яна ўзаро гангир-гунгур сухбатлар бошланди. Чори Чагон қўйруқ тарафда, одамлардан холироқ жойда тўсинга кўкрак ташлаб пўртсанани, тара-лаётган тўлқинларни, нилуфар осмонни томоша қиласар, руҳияти яна асл ибтидосига қайтаётганидан, вужуди нурланиб бораётганидан шодланарди. У йирок тоғ ўнгирларида туни билан селоба ёмғирини ташлаб, юқидан қутулиб, юксакликларга кўтарилган хирмон-хирмон парқу булутларга, улар орасидаги тубсиз чинни кулчалардек зумрад кўк парчаларига суқланиб қараб, беихтиёр энтикарди.

— Шу ердан соҳилгача сузиг бороласизми? — Турғун Назарнинг таниш овози уни чўчитиб юборди.

— Нима дедингиз? Ҳа-а... — адебнинг энсаси қотди. — Бу журъат қаердан келди сизга?

— Сиздан сўраяпман, — мұҳаррир адебнинг хаёлчан юзига тикилди. — Чори ака, алмат кун бўлди-я.

— Шуни ёзинг, — жонланди Чори Чагон.

— Эслашга кўрқаман. Кечалари тушимга кирса, шайтонлаб қолсам керак.

— Мен эса шаҳарни эслаб ўтирибман. Хонанишин бўлиб қолганимиз. Ўйласам, баъзан ойлаб осмонга қарамас эканмиз. Хаёлдан кўтарилиб кетаркан. Тўқизинчи қаватдаги деразадан бокқанда ҳам осмонга эмас, — унда кундузлари тутунли ғубор, тунда ёп-ёруғ шафак, — ерга, ивирсиб юрган одамларга, физиллаган машиналарга қарайсиз. Онда-сонда ёмғирдан сўнг чайилган осмон парчасини дафъатандан кўриб қолсангиз, юрагингиз ёзириади...

— Бу ерда эса ҳаммаси ёнма-ён.

Адеб мұҳаррир гапини илғамади. У фикрларини дилида давом эттиради: — Улуғворлик, мангалиқдан сенинг вужудингга нур, ранг, сас ёғилади. Ўз ўрнингни ана шу абадият маконда излайсан. Хаёлларинг ҳам, жисминг ҳам шулар билан яхлит... Шаҳарда эса аксинча қувват-қудратинг, хаёлинг яратган олами ни нурлантироқчи бўласан. Нега?... Балки ижоднинг асл мөҳияти шу армон, олғи-берги, кемтиклиkdir.

Капитан ёрдамчиси улар томон тез-тез юриб келди:

— Мухбир ака... нима қиласар, эсимда қолмаяпти. Ҳалиги, нима эди?

- Гапиравер, ҳей шайтон.
- Домла, сизларни соҳилда кутишяпти.
- Соҳилда? Ким?
- Наврӯз ака. Капитан рациядан хабардор қилган экан.
- Чори Чагон ҳаяжонини яшиrolмади:
- Капитангра раҳмат айтинг.
- Хўп бўлади.
- Ёрдамчи йигит кетмоқ бўлиб бурилган эди, муҳаррир гап қотди:
- Нима, капитаннинг тили танглайига ёпишиб қолганми.
- Азза-базза...
- Мухбир ака... яна, — йигит томоғини қирди. — У киши рулда.
- Одамларнинг жоҳил, тажанг бўлиб бораётгани мени чўчи-тади... Даргани олинг. Студентни олинг. Турган-битгани за-ҳар. Шунчаям кўрс бўладими!
- Кўйинг, Турғун Назарович, — юлатмоқчи бўлди адаб. — Уларнинг иши шунақа: кўравериб, кўникиб кетишган.
- Йўқ, нимасига мунча чиранади. Бўлса, кўлида руль бўпти-да, у бўлмаса, бошқаси...
- Бугапингизга қўшилолмайман. Ахир, одам ўзини ўзи мус-тақил тутса, идора этса ёмонми?
- Мустақиллик, зеркинлик, ишонч. Ҳаммаси бўлмагур саф-сата.
- Одамлардаги мутелик сабабларини кераксиз жойлардан излаймиз... Кўрқоқлигимиз ҳам, билсангиз, ана шунда.
- Эркакми, аёлми, гўдакми, — ҳар бирининг раҳнамоси, со-ҳиби бўлмаса, ҳоли хароб.
- Дарғага нега таъна қиляпсиз? Кўлини кўксига қўйиб, кул-лук қилганича итоат бажо келтирмагани сизга ҳурматсизлик бўлиб туюлдими? Ахир, у бундан жиддийроқ иш билан банд-ку! Мабодо, шундай қилса, жирканардим. Мулоҳазалар учун узр. Дарғанинг ҳам, студентнинг ҳам кўрслиги учун кечирим сўрай-ман.
- Бу гап инсофдан.
- Факат бир гап: дарға ўз касбига, қўлига, кўзига, тош-ме-тин қалбига муте. Бошқа мутелиги йўқ. Қарам ва муҳтоҷ ҳам эмас. Унинг хатти-ҳаракати буни инкор этади.
- Чори ака, айлантирасиз-ўргилтирасиз ўзингизнини жуфт қиласкансиз, — кувлик билан деди муҳаррир калта бўйини қашир-кан.
- Одамлар ундан ҳайиқишиди. Нега? Чунки ҳали айтганин-гиздек раҳнамо, руль кўлида. Биз ҳам ўзимизда йўқ журъатни унда кўрдик. Бунга ишондик ва ихтиёrimизни унга бердик.

Бошқа илож ҳам йўқ эди. Биз бўлса, ундан иллат излаб туриб-миз...

— Булар манман, худбин, айтди дерсиз. Манманлик шилимшиқ, юкумли хислат. Ароқхўрники кўзга ташланиб туради, у ўз муттаҳамлигини сезади. Манман эса ўз харакатини фазилат, деб билади. У ўзинигина эмас, яқинлашган ҳар бир кимсани заҳарлайди... Гапларим нотўгрими?

Адиднинг ҳамиятига тегаётган бўлса ҳам Турғун Назарни охиригача эшитиши жазм қилди:

— Қизик. Давом этаверинг.

— Кибр-ҳавони сенга ким қўйипти. Бу турқи совук иллатни қаердан илаштиридинг?... Студент-ку, ҳали гўдак. Ёнидаги соҳибжамолга ўзини кўрсатмоқчи. Унга ярашар ҳам. Бироқ сени қандай жин урди. Студентни кечириш мумкин, нари борса, юз ўгиришинг мумкин. Дарғанинг манманлиги устомонлик билан яширинган, яширган. Ўзига ўзи маҳлиё. Кўлини кўксига қўйиб, раҳматлар айтадиган юзлаб йўловчи мақтовининг қули...

— Башарти, нозиктаъблigliгinzни ҳурмат қилмаганимда эди, атайлаб менга, қизим сенга айтаман, келиним сен эшит, қабилица ваз ўқияпти, деб ўйлардим.

— Зинҳор.

— Одамлар ҳар хил бўлади, Турғун Назарович, биласиз-ку, — адид муросага борди. Умуман, бу бетайин олди-кочди баҳсдан зерикиди.

— Мен учун масъулият, жавобгарлик ҳис этиш тўйғу туйнукалири аллақачон ўргимчак уясига макон, деганингизда ҳам хафа бўлмасдим.

— Ҳар нарсани ўзингизга олаверманг. Калака қиляпти, деб ҳам ўйлаётганим йўқ. Аксинча, сиздан миннатдорман. Кимларгадир ўшқирдингиз, ҳатто шаънига тегишгача бордингиз. Бу ахир виждонингиз амири, маслагингиз, асло сохта жиддият эмас. Сал яхшилик звазига ўзимизни ерга уришга, тиз чўкишга, ўзлигимизни унтишга устамиз. Сиз эса бунга қаршиносиз. Шунинг ўзи мустақиллик эмасми? Мустақил, эркин бўлмаган одам ҳеч қачон ўз ҳуқуқини ҳимоя қилолмайди. Унинг елкаси ҳамиша қисиқ, тили қисқа.

Борар манзил — катта посёлканинг уйлари кўриниб қолди. Кемалар тўхтайдиган кўлтиқда бир неча моторли қайиклар кўзга чалинди. Балиқчиқушлар галалари осмонда чаппар уриб учишарди.

Дарё ҳансирашдан тўхтади. Сел ўтиб бўлган эди. Қорамтириб ўз бўтана оқим ҳамон кўпикланар, ҳас-ҳашак, шоҳ-шабба пўртналар домига тушганида зир айланар, улар исканжасидан қутулгач, оқимдан ўзар, шошқалоқ тезлик билан оқарди. — Булар

нима бўпти, кемани титратган, одамларнинг ўтакасини ёрган баҳайбат тут олдида. Ўшандай улкан дараҳтни оқизиб кетдия. Кудратингга балли! — деб ўйларди Чори Чагон. Дастрлаб бошқалар қатори уни ҳам васвасага солған улкан тутга энди раҳми келарди. — Кимdir уни қадаган, ўстирган, у эса ўзи куч олган юрт, заминга безак бўлган. Балки ёши юзда, ҳатто ундан ҳам кексароқдир. Кимлар унинг соясида паноҳ топмади. Энди эса у кўзларига кум, лойқа тўла долганинг ҳукмида ўйинчоқ. Хали бир замон ундан бало-қазодан кўрқандек кўрқсан эдик. Бошидан не қисмат кечганлиги ўша онларда ҳеч биримизнинг хаёлимизга ҳам йўламади. Хавф туғилганда эс-хушимизни йўқотиш у ёқда турсин, имонимизни ҳам унубиб юборамиз. Балки у одам бўлганимиз учун, нажот излаб кемамизга ёпишиб олгандир. Биз кўркув, қаҳри ғазаб билан ундан юз ўғирдик. Кейин орқасидан мазахлаб кулдик. Ҳамиша шундай нотантилик. Бир ёқлама ўйлаймиз ва шу иллатимиздан яна шод бўламиз.

Чори Чагоннинг бу хил шикаста ўй-хаёлларга, кечмиш тафсилотларига берилишининг асосий мантиқ сабаби — мудҳиш сел бўлиб, сўнгги таассуротлар тўзонида кўзга ташланмай турарди. Вақти келиб, у лоп этиб эсга тушади-да, ўзини ҳамиша кучли ва иродали, қатъий ва кўрқмас хис этиб юриб, тақдир тақозоси туфайли, бошига тушган таҳликали ҳодиса олдида эсанкираб қолганидан ўзида йўқ нафратланади, ғазабланади.

*

* *

Кема қўлтиққа киргач, лангар ташланди. Қумлоқ соҳилда тизилишиб, бир-бирининг пинжига тикилишиб турган оқ чорлоклар ҳавога кўтарилиди ва теплоход устидачуввос кўтаришди.

— Мана, манзилга ҳам етдик, — деди Турғун Назар трапдан бирин-кетин тушаётган йўловчиларнинг ташаккурини жиддий мамнуният билан қабул килаётган дарға ёрдамчиси ёнидан ўтаётаб. — Ҳаммаси ортда қолди: сел ўтди-кетди, тут оқди, жонимиз ҳалқумимизга келиб бақирдик-чақирдик. Дарёнинг эса парвойи палак, ҳеч нарса бўлмагандек, ҳеч нарса кўрмагандек.

— Мураккаб олам, мураккаб одам... — Чори Чагон дарё сарҳадлари кўринадиган очиқ жойга чиққач, ора йўлда узилиб қолган мавзуга қайтди: — Хой, дўстим, ким бўлишимиздан қатъи назар, умримиз, ҳаётимиз ана шундай бесписанд, камсуқум, дагал, одамлар кўлида эканлигини сезмаймиз. Булар ана шу сиз айтган дарёга ўшашади. Шовқин-суронсиз ишини қилиб ётибди. Забонсиз уммон. Шуҳратпарастлик, лаганбардорлик, мансабпарастлик уларга етти ёт бегона. Биз эса ана шу буюк қалб-

га йўлай олмай, каашф этолмай ўтиб кетаётган бадбаҳт зиёлилармиз... Хали капитан бўлмасида йигирма йил бурун босилган китобимни кўрдим. Увада. Бу — чироқ, — дейди дарға. — Атрофифда юрган одамлар кўриниб турибди...

— Хўш, нима бўпти? — таажжубланди мұҳаррир.

— Энди эса кўздан, назардан четда — кўхна шаҳарнинг пастқам ҳовлиларида кечмиш чиркин турмуш тафсилоти-ю, одикочди саргузаштлардан нарига ўтолмай қолдим. Демак, умр — алдамчи, беҳуда ақидаларга, мабодо, манманлик, мақтаниш ҳам ақида ҳисобланса, — ютқазилди.

— Ўзлигингизга шафқатсиз экансиз.

— Илгарироқ шундай бўлганда қани эди!

— Айни мавриди-ку?

— Айтишга осон.

Дарё томондан бешик-бешик долғалар карвони бир-бирини кувлаб келди, жияклари кўпикланган соҳилга сапчиди. Дарё ўтрасида тутун буруқситиб теплоход оқимга қарши сузиб борарди. Палубада халойиқ тирбанд. Чори Чагон нотаниш кемада кетаётган йўловчиларга астойдил омонлик тилади, нечундир, ҳаяжонланди ва ўпкаси тўлиб-тўлиб, томоғини қирди. Умр, одамлар, мангулик бобида кечган хаёллар Чори Чагон хотирасидан кўтарилганича йўқ эди. Ҳамон олис, унут бўлган, аммо гоят қадрдан ҳиссиёт олами — одамларга, ҳаётга яқинлик сезар, бир замонлар буларнинг ҳаммасини севғанлигини, улар билан этириноқ яхлит бўлганлигини эслади. Энди эса орага тушган чоҳ кенгайиб, ўтиб бўлмас даражага етканини ўқсиб тан олди. Азиз гўша — ота-она қучогини тарқ этиб, узоқларда дайдиб юра-юра таъзирини еб, тавбасига таяниб қайтган фарзанддек ўзини ғарив ва ожиз ҳис этди.

Адиднинг кимнидир илҳақ кутаётгандек бўлиб, бир жойда депсиниши Турғун Назарга эриш туюлди.

— Ҳамма кетиб бўлди-ю, нега қаққайиб турибмиз?...

— Мухбир ака, шошмай турингизлар, ҳозир капитан чиқади, — деб қичқирди ёрдамчи.

Мұҳаррир Чори Чагонга ялт этиб қаради.

„Эркин“ палубасида тапир-тупир қадам товушлари эшитилди. Дарға ва собиқ маҳбус ўқитувчи кораси кўринди.

*
* *

Чори Чагон тўлқин чиқариб ташлаган оқ-сарғиши ғадир-будур қамиш томирларини боса-боса кемадан узоқлашди. Тик соҳилдан туриб бутун борлиғи билан намоён бўлган дарёга боқди. Дарёда долғалар ўркач-ўркач. Муздек шамол эсади. Соҳил шалоплайди. Оғир нафас олаётган дарё тўлқини хуруж

килганида соҳилдаги қўға, хас-хашак, шоҳ-шабба, ўсимлик илдизларини кумлоқ соҳил сари суриб келади, сўнгра кўпикланиб ортга қайтади.

Кул ранг қанотли балиқчиқуш оппоқ кордек тўшини сувга уради, тўлқинлар устида қийиб-қийиб учади, „чир-рок“ деб қичқиради.

Чори Чагон энтикли ва бўтана долғаларга тўш ташлаётган оқ чорлокдек парвоз килгиси келиб кетди.

СЕВГИ ҚЎШИҚЛАРИ

Сиренъ гуллари

Мен ўша пайтларда катта ғала-ғовур шаҳарда бир яхудий дўйончининг уйида ижарага туардим.

Баҳорда деразам ёнида бир туп сиренъ гуллади. Унинг ним-пуштиранг, алвон гуллари, япроқларида эртаю кеч боларилар фувулашашар, баъзан туннинг алламаҳалида деразаларни очган чоғимда анвойи ҳиди хонамни тўлғизиб юборарди. Ҳар куни унинг ёнидан ўтарканман, ғаройиб ҳаяжондан, ўша дамларда вужудимни қамраб олган шодлик туйғусидан сармаст бўлардим.

Ўша йили қалбим қувончларга лиммо-лим эди. Эндиғина қулф ураётган баҳор дилимдаги эҳтиросларни яшнатиб юборганди. Мен илк севги шодликлари, жафоларини кечирардим. Баҳор ва севги бир-бирини тўлатиб, сирли оғушига тортар, севги туйғулари ва баҳор нафосати уйғуналигидан, тантанасидан ўзимга сиғмай юардим.

Бироқ қизга севги изхор қилишга юрагим дов бермай юардим. Сиренъ чаман бўлиб гуллаган кунларнинг бирида анчадан буён дилимга туғиб юрган аҳдимни катъий ўйлаб олдим. Ўша куни шаҳардаги катта майдонларнинг бирида учрашиши аҳду паймон қилиб ўйга қайтдим. Мен севгилимга тунларни бедор ўтказган хаёлларим, эҳтиросларим шериги — деразам ёнида гуллаган сиренъ гулларидан тақдим этмоқчи эдим. Барча орзу-умидларимни, қалб сўзларимни шу гулларга ўраб хадя этмоқчи эдим. Гуллар менга умид бағишлаган эди.

Кечки пайт ўйга келдим. Лекин ҳовлини таний олмадим. Не кўз билан кўрайки, сиренъ ўз ўрнида йўқ эди. Хонам деразаси тагини топталган гул япроқлари босиб ётарди, дераза токчаси, тирқишилари гулбарглардан тўзиб ётарди... Сиренни ток ва бошқа мевали дов-дараҳтларни тўсиб, ўсишига, ҳосилига халакит беради деб, уй эгаси кесиб ташлаган экан.

Ўша кеч қиз билан учраша олмадим. Сиренъ гулларининг топталишини ёмон аломат деб билдим. Ҳар қалай мен худди шу фикрни хаёлимдан ўтказган эдим.

Дархақиқат, бу шундай бўлиб ҳам чиқди. Менга эҳтирослар туғёнини ўша оқшом ҳам, ундан кейин ҳам қизга айтиш насиб қилмади. Ҳаммаси қалбимда қолиб кетди.

Ана шу воқеадан кейин ҳам кўп йиллар ўтди. Ўшанда кечирган қадрдон, сармаст туйгулардан энди анча йироқлардаман. Ёш ҳам анча жойга бориб қолди. Лекин ҳар йили баҳор келгач, кўчаларни яёв кезиб юрарканман, ҳовлиларда барқ уриб гуллаган сиренларга кўзим тушиб қолади-ю, оромимни йўқотаман. Ўша дамлар тафсилоти, баҳтиёр орзулар бот-бот ёдга тушади. Шундай пайтларда покиза, армонли мұхаббатим сирдоши — сирень гулларини бир умрга севиб қолганимни юрак-юрагимдан ҳис этаман. Ўшанда кечирган туйгуларим хотираси қалбимга меҳмон бўлиб келади-ю, ҳаёт ташвишларига одатланган, кўниккан вужудимни алғов-далғов қилиб кетади.

Ҳовли эшиги

Ҳамон бўйдоқона ҳаёт кечираман. Бўш вақтларимнинг кўпини уйда ёлғиз ўтказаман. Баъзан паришон хаёлларимни қувмоқ бўлиб, деразамнинг оқ ҳарир пардасини очаман-да, ҳовли эшигига қараб ўтираман. Гоҳо-гоҳо нотаниш йўловчи эшикни қия очиб, ҳовлига бош суқади. Шунда борлиқ вужудим ҳаяжондан титраб кетади. Ўтмишнинг завқли дамларини қўмсаб турганлигимни ҳис этаман. Эшик очган кимсанинг нотаниш эканлигини кўрганимдан сўнг, ҳолсизлик, ҳиссизлик яна қайтади. Паришонлик мени яна ўз гирдобига олади.

Ана шундай кунларда қадрдон манзаралар, хотиралар кўз ўнгимдан бир-бир саф тортиб ўтади. Унинг сиймоси шу манзаралар орасида юлдуздек порлаб туради... Нихоят, ҳовли эшигини очиб, у ҳам мўралайди. Кейин жиякларига пишиқ ғишт терилган йўлакда унинг сарвдек қомати пайдо бўлади. Поншналар ғиштга тегиб тақиллайди. Ҳовли сукунати бузилади. Ана, унинг юzlари, кўzlари... Лов-лов ёниб келяпти. Чехрасида ибо ва андиша, соғинч ва изтироб. Кўзларимиз учрашади. У йироқдан мамнун боқади. Гумон ва андишалар ўрнини баҳтиёрлик, дилгирлик эгаллайди. Мен унинг жуссасидек бежирим, хушбичим пальтосигача, ҳатто оппоқ сумкасигача термилаб қараб тураман. Яна ҳаяжонларим ўз қирғогидан тошиб чиқади. Мен ана шу сармаст туйгулар амрига бериламан.

Бироқ орадан анча вақт ўтгач, хотира ва хаёллардаги мавхумият ўзини сездириб қўяди. Баҳор тошқинлари каби кўпириб, шовуллаб оқкан ҳисларим ҳам самарасиз ўтиб кетади. Ҳам-

маси туман орасига киргандек ғойиб бўлади. У ҳам қандай пайдо бўлган бўлса, шу зайл дийдоримга йўламасдан, армонларда қолдириб, ном-нишонсиз йўқолиб кетади.

Ховли сахни яна мунгайиб, хувиллаб қолади.

Ховли эшиги ёпиқлигича турибди. Уни хеч ким очгани йўқ. Фақат илҳақ хаёлларимгина бўм-бўш ҳовлини бир зум остин-устун қилганини пайқайман ва негадир, шунда бир замонлар кечмиш баҳтиёр ва шодон дамлар қадрига етмаганимдан куюнаман.

Йўллар

Тош йўлнинг ўнқир-чўнқирларидан сакраб-сакраб бораётган „газик“ машинасининг олд деразаси дарз кетган. Унда ботиб бораётган куз қўёши нурлари турфа рангда жилоланади. Ҳар қачонгидек, бу галги сафаримиз ҳам тафсилотларга бой эди. Шу боисдан бўлса керак, кечга бориб толиққанимни ва мудроқ босаётганини сездим. Бир зум кўзларим юмилган экан, машинанинг қаттиқ силкиниб тўхташидан чўчиб уйғондим. Даشتдан қайтаётган моллар машина йўлини тўсиб олган эди. Поданинг ўтиб кетишини кутадиган бўлдик. Машинадан тушдим. Икки томон пастак адирликлар билан тўсилган. Рўпарада эса яшил пахтазор ястаниб ётарди...

Бу нимаси? Ана у қирғоқлари тик дарё бўйида сукут сақлаб турган толзор танишга ўхшайди. Бу адирликлар ҳам, унинг ўркачлари ҳам. Поди ортида қолиб кетаётган чанг-тўзонли йўл. Бу хира муаллақ туманлик орасидан сузиб келаётган пахта ортган тележкалар ҳам таниш. Шунда вужудимни зилдек эзиб ётган чарчок чок-чокидан сўкилиб кетди. Қалбимнинг аллақаерида бир нарса портлагандек ва у ҳали бир замон вулқон каби отилиб чиқадигандек туюлди.

Ана шу ноаниқ ғулғулалар садоси тобора тиниқлашиб борди. Рухиятим бирдан енгил тортди. Мен азиз хотиралар кучогида қолдим. Улар худди ёшлиқдаги қадрдан дўсту биродарлар каби, мени қуршаб олишиб.

Бу туйғулар илк севги хотиралари эди. Мен худди шу тошлоқ йўлдан, худди шундай оқшом дамлари даладан у билан бирга қайтардим. Биз бир-биримизга қарай олмас, бироқ ҳар бир ҳаракат, ҳар бир нафас олишда қалбимиздаги эҳтирослар түғёнини илғаб олардик. Теварак-атроф чанг тўзонга эмас, окиш туман каби ҳарир пардага бурканди. Мен ўзимни беҳад баҳтиёр сеза бошладим.

Поди ўтиб кетди. Биз ҳам йўлга тушдик. Машинамиз кишлоқ оралаб боряпти. Йўл четидаги бир ҳовлига кўзим тушди. У оддий-

гина уйга ўжшаб кўринса-да, ўша дамда, назаримда, терак бара-вар ёлқинланаётган гулхан эди. Бу ўша қизни мендан хуфя тут-ган чўнг деворлар. Ўнг бикинида тўрт нафар бола бир-бира ни кувлашиб, қийқиришиб ўйнашяпти. Шу дамда мен олис ўтмишини ҳам, ҳозирни ҳам ва ниҳоят, сирли келажакни ҳам ўйламасдим. Ҳаёлимда ёлғиз ўша — унот бўлган севги завқ-шавқи, изтиробла-ри оловланарди. Мен ғайритабиий бир вазиятда ўша дамлар би-лан ҳамнафас, ҳамдам эдим.

Йўллар мени яна илк севги ошёни билан учраштириди. Мен шу биргина хотира меҳмон бўлганидан, ўша кезлардаги-дек қувониб боряпман.

Охири йўқ йўллардамиз. Энди қишлоқ ҳам ортда қолди. Ма-шинамиз ҳамон силкиниб боряпти. Шунда жуда ёшлигимда ака-ларимиз, опаларимиз тилидан эшитган бир қўшиқ ёдга тушди:

Ёр юрган кўчаларни супурай сочим билан,
Чанги чиқса, сув сепай кўздаги ёшим билан...

Мен ниҳояси йўқ йўлларда кета туриб, шу қўшиқни такрор-лайман ва илк севгининг ҳам худди шу қўшиқ каби ҳар эслан-ганда дилни ўрташини пайқайман.

Тушларим

У қиз аҳён-аҳёнда меҳмон бўлиб келади: ўнгимда эмас, тушла-римда. Шунисига ҳам шукур қиласман. Ҳар гал у билан учрашга-нимда, эҳтиrossиз ҳаётим безанади, қалбим умидбахш туйгу-лар билан тўлиб-тошади.

Мен уни яқинда яна тушимда кўрдим.

Улкан ва ғира-шира ўрмон эмиш. Сокин дарё бўйида ўти-рибман. Ўрмондаги турли-туман қушлар овозини тинглайман. Шунда ўрмон ичкарисидан қалбни ҳаприқтирувчи қандайдир мунгли товуш эшитилади. Аввалига буни ҳам ўрмон қушлари-нинг мунис сайраши, деб ўйлайман. Йироқларда шоҳ-шабба-лар қарс-қурс синади. Қарайман. Дов-дараҳтлар яrim белига-ча туманни ёриб бир қиз мен томон чопиб келяпти. У мени чорляяпти. Қандайдир зўр ҳаяжон оёққа турғи-зади. Унга пешвоз чиқаман. Танийман. Ўша қиз! Ўрмонда нима қилиб адашиб юрибди? Қадамларим тезлашади. Юзларим ло-вуллаб ёнади. Ана, у самбиттоллар танасини нозик панжала-ри билан ушлаганча тўхтаб қолди. Худди тумандек момик ва нафис, латиф ва енгил либос боши, бўйнига ўралиб, учлари тўлқинланяпти. Қиз мени кўрди-ю, сесканиб кетди. Унинг ҳам юзлари, кўзлари ловуллаб ёнди... Кейин у маъюсланганича изига бурилиб кета бошлади. Нима бўлди унга? Ё озор етказ-димми? Кўнглида армон, гумон бормикан?

У яна туман оғушига шўнгигб кетди. Туман денгизи устида унинг узун оқ ҳарир рўмоли ҳилпиради. Энди у мени чорламасди.

Изидан кета бошладим, сўнgra югурдим. У йироқларга, кўз илғамас сирли шафақ сарҳадларга кетиб бораради. Буталар, маймунжон ва самбиттоллар илдизлари, шоҳ-шаббаси оёқларимга илондек чирмашади. Оёқларим, юзларим тимдаланади, тизиллаб қон сизади. Мен эса ҳамон югурияпман. Нихоят, нам тупрокқа юзтубан йиқилдим...

Уйғониб кетдим.

У келди. Яна хаёлларимни безовта қилиб келди. Бир замонлар оташида ёнган илк севги энди қондек мусаффо, қондек шифобахш туйғулар үйғотиб кетди. Мен ўша малакнинг келганидан хурсандман. Ҳар гал хайрлашганимизда, висол дамларининг яна такрорланишига умид қиласман.

Алвон кунлар

Бундан бир неча йил бурун хизмат важидан жанубдаги шаҳарлардан бирига йўлим тушиб қолди. Ўшанда меҳмонхона олдидаги майдонда, хиёбонда кечки пайт сайр қилиб юриб, уни кўриб қолдим. Дастлаб кўзларимга ишонмадим. Бу кутилмаган учрашув мени гангитиб қўйди. У хийла узоқлашгач, исмини айтиб чақирмаганимга ачиндим.

Ўша тунда алламахалгача ухлай олмадим. Хаёлларим тарқоқ ва паришон бўлиб қолди. Бироқ иссиқ кун ҳовури туннинг салқин ва дилбар ороми билан алмашингач, фикрларим равшан тортди. Энди менинг беозор хаёлларим қушдек қанот чиқариб, бу нотаниш шаҳардаги сон-саноқсиз уйлар, ҳовлиларни кезиш учун сафарга отланди. Лекин унинг ҳовлиси, тақдири ҳам шу шаҳар тунидек менга қоронғи эди.

Эртаси куни уни бекатда кўриб қолдим. Бир нотаниш йигит билан бирга эди. Йигит олти-етти ёшлар чамасидаги қизчанинг қўлидан тутиб турар, у эса боланинг тим кора соchlарини нозик бармоқлари билан тараради. Йигит ҳам, у ҳам, болалари ҳам бир узукнинг кўзилик чиройли, бенуқсон эди. Мен уларни йироқдан кузатиб турдим. У ҳамон хушчақчақ, худди ўша ёшлигимдагидек беозор, баҳтиёр ва қувноқ эди. Кейин такси машинасига ўтиришиб, кетиб қолишиди. Мен куни бўйи шаҳар кўчаларини кезиб, кечки пайт ҳориб-чарчаб меҳмонхонага кириб келдим.

Учинчи марта учрашганимизда, кўзи кўзимга тушди. Мен унда фавқулодда ўзгариш кўраман, деб ўйлаган эдим. Бироқ мен ўйлаганчалик бўлмади. У дастлаб ҳайрон қолди, сўнgra

ширин табассум қилди-да, эски бир анчайин танишини кўрган-дагидек бош иргаб ўтди-кетди...

У ўтиб кетди. Аммо мен учун азиз дақиқалар мұқаддас эди. Шамол қаби учишга шайлантган ўша дамлар хотирасини тўхтатиб қолдим. Ўшанда мен баҳтли эдим. Ҳозирги пайтда менга шу хотиralарнинг ўзигина олам-олам қувонч баҳш этаётганини хис этдим.

Энди эса бу шаҳарга йилига икки марта: баҳор ва кузда келаман. Баҳорги сафарларимнинг бирида тўсатдан уни кўриб қолдим. Шунда кўнглим ўсганини, қашшоқ ҳисларим бойиганини сездим. Ҳаётим, елдек учиб ўтаётган умрим кунлари мазмундор бўлиб қолди.

Кеч кузакда ҳам бу шаҳарга келиб тураман. Энди уни камдан-кам учратаман. Афтидан, кундалик турмуш ташвишлари, вазмин ҳаёт салобати уни ҳам ўз ҳукмига олган. У онда-сонда болаларини эргаштириб, шаҳар кўчаларида пайдо бўлади, йўлимда дуч келади. Ортидан узоқ тикилиб қоламан. Болалари ҳам ўзидек озода, покиза, меҳрибон. У ўтиб кетган кўчаларда ёлғиз кезаман. У нафас олган ҳаводан мен ҳам нафас оламан. Ана шундай пайтларда шу ва шу каби туйғуларга ошно бўлганимдан кунларим алвон тонгда кечаётгандек нашъя қиласи.

Лекин ҳамиша бир шарпанинг кезиб юрганини ҳам сезаман. Мен бу азим шаҳарда кўриб юрган аёл у эмас. Негадир ундаги таниш, ўхшаш белгиларгина мени ром этади. Шунча йиллар ўтиб уни илгаригидек севмаслигимни ҳам биламан. Унинг ҳозирига ҳам, тақдирига ҳам бефарқ қарайман... Мен учун азиз нарсалар ўша, олисларда қолиб кетган ёшлигимга ҳамроҳ ўша севги шодликларидир. Мен ҳамон ўша беғубор, пок туйғулар билан яшаётганимдан мамнун бўлиб кетаман ва ҳар гал инсон умрини безаб тургувчи ана шу эҳтиросларнинг мангу қолишини ва ҳамиша шу туйғулар қалбда бўлгандагина киши баҳтиёр бўлишини юракдан хис этаман. Мен ана шу умр безаги — илк севги, ёшлигим, мен учун бир умр мұқаддас бўлиб келаётган ва қолажак туйғуларим билан учрашганимдан бошим кўкларга етиб юради. Ҳаётим, бенаво, бекут кечаётган кунларим серфайз бўлиб қолади.

ЭССЕ

САРБАСТА СУРХОН

Эсимизни таниганимизда, ҳаётни севиш, эъзозлаш учун аввало ота-онани қадрла, дейишарди. Кейинчалик билсак, ота-онага бу юксак ҳурмат башорати пурхикмат бобокалонларга бориб тақаларкан. Вақт-соати келиб, қон-қардош уруғ шажарасига чанқоқ меҳр тушаркан. Таажжубки, буниси ҳам тўла қаноатлантира олмайди, чунки етти бўғин-етти пуштдан сўнг қон-қардошликтининг изларини топиш амри маҳол бўлиб колади: уруғ-аймоқни боғлаб келган занжир ҳалқалари узилган маржон мунчоқ сингари мозий сўқмоқларида тиркираб, сочилиб кетади.

Хаяжонга согувчи бу азалий саркаш жумбок сирини билим деган саодат ошкор этди. Ҳаётни, одамларни севиш ўзўзидан бўлмаслиги, бунинг учун, энг аввало, юртни севиш лошимлиги аён бўлди.

Алқисса, неки муборак, неки муқаддас, неки мангур, — ҳамма-ҳаммаси ана шу юрт бешигига қарор топаркан. Юртни астойдил севдик. Ота-она, бобокалонлар шажарасига қизиқишимиз сингари, бу асов туйғу ҳам юрт тарихи сарҳадлари сари бебош хаёлларни бошлаб кетди.

Унинг оқсоч, сергубор уфқлари фоят узок кўринди. Шунда ҳамиша баркамол ҳаёт нақл қилди: тарих ҳудудсиз вақт маскани, ҳар бир тирик инсон унинг нишонида. Унинг олмос назаридан на шоҳ, на гадо, на зоҳид, на фозил, на доно, на жунун қочиб қутула олади. Кекса тарих билан тил топишганлар асл йўлдан адашишмайди. Башарти, ҳисоб-китобларинг пухта, режаларинг оқил ва расо, лафзинг ҳалол ва қўлларинг пок бўлса — бас, унда омад ва рўшнолик насиб этди, деявер. Зотан, тарих эзгулик ва доноликнинг ягона мангур барҳаёт дараҳтидир. Бу дараҳтга мудом куч-кудрат ато этгувчи илдизлар она тупрок қатларига чукур кетган. Тупроқ эса бор бисотимиз: ўликлар ҳам унда, азиз авлиё-анбиёлар ҳам унда, наслу наслаблар фахри — кошона обидалар, ҳақир гўрхоналар ҳам унда. У тириклар ризқ-рўзи, келажак авлодларнинг умид чечаклари барқ ургувчи мулки башардир.

*

* *

Катта бир йигилишда муҳлислардан менга савол тушди. Жавоб беришга тайёр эдим-у, аммо савол мазмуни йигилиш маъруzasига алоқадор бўлмаганлиги сабабли ҳамда бесамар му-

нозаралар усиз ҳам чўзилиб кетганлиги боис ўзимни тийдим. Толиби илм аҳли, меҳнаткашлар билан бўлган кўплаб учрашувларда ҳам шу хил саволларга дуч келдим. Айнан ошкоралик, қайта куруш, демократия қарор топгани сайин одамлар кўнглида кўп замонлар тўпланиб, бироқ отилиб чиқишга йўл тополмай ётган ҳад-хисобсиз саволлар, сиру синоат, тахмину гумонлар ўз жавобини талаб қиляпти. Замона зайлига қарангки, ҳар бир кимса ўз дардини рўй-рост айтяпти, ҳак-хукукини талаб қилишга кўникма ҳосил қиляпти. Лекин менга аталган саволлар салмоғи, мазмуни ўзимни ҳам ташвишлантириб келган салоҳият — она замин дардлари, ватанин севиш, ҳаётга муҳаббат хусусида бўлганлигидан қалбимни жизиллатди. Шунда ўзимча, буларга, албатта, фуржали, баҳоли қудрат жавоб бериш ва бир ёки бир неча учрашув, йиғилиш доирасидагина эмас, кенг миқёсда мушоҳада қилиш заруриятини хис этдим. Дарвоҷе, қайси бир адидни бу азалий муаммолар кийноққа солмаган? Бу қутлуғ ва мангу маслак, айниқса, остонасида турганимиз — XXI аср арафасида ғоят дардкаш тус олди.

Инсон руҳиятини алғов-далғов, безовта қиласидан туйғулардан бири — ҳаётдан қониқмаслик, қаноатланмаслик. Руҳий теранлик ва мукаммал камолотга интилиш чексиз бўлгани сингари, бу саодатнинг олмос қирралари ҳам ҳамиша оҳанрабодек ўзига тортаверади. Ҳар инсон муайян макон ва замонда яшаркан, ўзлигини, ўраб турган теварак-атрофни англашга, ҳаяжон ва ташвиш ўйғотгувчи түғённи билишга иштиёқманд бўлади. Ватанпарварлик — юртни севиш, инсонпарварлик — ҳаётни севиш, фидойилик — меҳнатга ташналиктни тақозо этиши билан бирга, унинг ботиндаги илдизларига бўлган чанқоқ синчковликни ҳам уйғотади. Аждодлар топиб айтишган: ҳеч бир кимсанинг бешиги осмондан тушмаган ва, албатта, унинг киндиқ қони тўкилган она юрти бўлади.

Шундай воқеанинг гувоҳи бўлганман. Жамоа хўжалиги хисобот йиғилиши бораяпти. Раис ношуд эди, боз устига, ортиқча гап-сўзлардан ўзини олиб қочиб юрадиган кўрқоқ раҳбар эди. Ўзи туғилиб ўсган узоқ қишлоқ аҳли арзи додини айтаётган оқсоқол чол таъналарини бошини ҳам қилиб эшишиб ўтирибди: „Хой, ноинсоф раис, ақалли қишлоғингдаги кекса тутга ин қурган лайлакдан ўрнак олсанг бўлмайдими? Куш бўлса ҳам ҳар йили канда қилмай, адашмай-нетмай, Хиндистандек узоқ элдан учеб келиб, ўзи туғилиб, тетапоя бўлган уясининг ҳолидан хабар олади, зиёрат қилади. Ахир, сен одамсан-ку, наҳотки, қушчалик бўлмасанг!...“

Ўшанда аламзода чолнинг гапидан қулган эдим. Кейин эса унинг гаплари кўп йиллар ўйлантириб юрди. Лайлак табиатнинг ёзилма-

ган қонунлари измида. Инсон-чи? Аслида, у ҳам. Аммо тан олгиси келмайди, баъзида истиҳола қилади. Ўзига кўп бино қўйиб юборган одам руҳан қашшоқлашганини илғамай қолади. Эзгулик, маънавий қадриятлар баракаси учган, путури кетган қалбда ҳамиша худбинник, жаҳолат уя қуради. Замон ва замин, одамлар ва ҳаёт изми кўп ҳолларда ана шундай кимсалар қўлида бўлгани тарақкиётга озмунча зил етказмайди.

Табиатнинг битта қонунини ҳеч қачон унутмаслик керак. У ўзи ақл-заковат, фаҳми фаросат ато этган фарзанди — инсондан ҳамиша мурувват кутади. Акс ҳолда, ношукур бандасига жазоси ҳамиша тайёр. Чунки табиатда ҳеч қачон бўшлиқ бўлмайди. Газлидаги зилзилалар бунга мисол. Замин қаъридаги газни ўнлаб йиллар сўриб олишди. Эвазига ҳеч вақо беришмади. Табиат эса ер ковакларини осонгина, бир силкиниш билан текислади-кўйди. Орол денгизи тортилди. Тузли кумбўронлар ям-яшил хосилдор воҳаларга хуруж бошлади. Ҳаммасининг ҳисоб-китоби бор. Буни тан олмаганлар она табиатнинг bemуруват, калтабин болаларидир.

Инчунун, инсон табиати ҳам шу хил. Унинг лойини табиат шундай мўрт қилиб қорган. Инсон табиатида ҳам ҳеч қачон бўш жой бўлмайди. Умид-орзуласар сўнса — ўрнини умидсизлик, ҳафсаласизлик эгаллади; муқаддас маслаклар таназзулга юз тутса — ўрнини ҳиссизлик ва лоқайдлик забт этади; яқин одамларинг, ҳаётта меҳринг совиса — аянч хорлик шу заҳоти эшик қокади; ўлимни кўп ўиласанг — ёш бўлсанг-да, кексалик сенга сирдош, ҳамроҳ бўлади. Ҳаётни севиб, умидвор яшаш — умрни ҳамиша безайдиган буюк хислатдир.

Шунга ўхшаш турли-туман мuloҳазаларга бориб, мухлисларим билан мулокот қилишга жазм қилдим. Инсон ҳаётини муштараклик ва үйғунликка ошно қилгувчи тўртта азалий моддият ва маънавият илдизлари — табиат, тарих, тирикчилик ва тараққиётни асосий мавзу қилиб олишга уриндим. Ердаги ҳаёт, башарият равнақи ана шу барҳаёт чор гумбаз аро кечади. Шуниси ҳам борки, тирикчилик ва тараққиётни идора қилиш, уни бир амаллаб эпақага келтириш ва ҳатто вақтингчалик ютуқлар билан ўзни овутиш ҳам мумкин. Аммо табиат ва тарихга хиёнат қилинса — уни ўнглаш қийин. Куш қаноти билан тирик ва гўзал бўлгани каби, ҳар бир миллатнинг қўш қаноти — табиати ва тарихидир. Булар таҳқирланса, менсилемаса, эл-элат бекадр, беписанд, беғурур, бебурд бўлади ва моддият, маънавият илдизларига мудхиш зил кетади.

Аввал ибтидо она табиат нидосига қулоқ тутайлик. Элнинг жамики улуғворлиги, бойлиги, мероси, жасурлиги, тантилиги, саховати, закийлиги ёлғиз у туфайлидир.

Бир умр маҳлиё боққанимиз, қалбимизда эзгу армону орзулар кўпиртирган она табиат бир неча авлод кўз ўнгидаги тўзигани сир эмас. Унинг бисотидаги ноз-неъматларни орка-олдимиизга қарамасдан кўкка совуришимиз шунга олиб келди. Ўйламай-нетмай мусодара ва талон-тарож қилганимиз оқибативой бўлганига кўзимиз етиб қолди. Бунинг фаҳмига етдиг-у, бош чанглаб қолдик.

Нега шундай бўлди? Нега биз табиат эҳсонларига осмондан тушган, ердан чиқсан текин луқмадек бирварақайига ташландик? Борингки, буни билим, техника, тараққиёт шарофати десак, унда асрлар оша борига шукур қилиб, камтарона, табиат билан бақамти ҳаёт кечириб келган аждодлар сабр-тоқатли руҳини камситган бўламиз. Бунинг устига, ҳаётнинг бош илинжларига бу хил ашаддий ҳужум асло яхшиликка олиб келмайди. Биз орэу қилган фаровон, бекаму кўст турмуш кўнгилсиз сабоқ ҳозирлаб қўйган экан. Вақтинчалик хом-хатала режалар, шиор ва даъватлар тузогига тушиб қолдик. Энди қаерга бокманг, иллат кўрасиз.

Зумрад осмондан тоза ҳаво эмас — кислота ёмғир, заҳар еғилиялти, ҳаётбахш олмос қуёш нури эмас — мудхиш таҳликали озон ўпқони ваҳшат билан кўз олайтиряпти. Сув ҳавзалари нинг ягона манбаи — тоғ ўрмонлари жиддий талафот кўрди ва кўрятти, тобора сийраклашяпти. Улкан тошқин, асов дарёлар беписанд жилғалар кўйига тушиб қолди. Жамики тирик мавжудот — одамзод, ҳайвонот ва наботот бешиги, олтин замин атальмиш унумдор тупроқ минерал ўғитлар, пестициidlар, гербицидларга шунчалар тўйинтирилдики, унинг „олтин қўлли“ бободехқон, дала қезмай соҳибман, деб кўкрак урган шухратпаст раҳбарлар меҳри кароматидан сарзиёда бўккани, ўқчигани элимизга, наслимиизга минг хил дард бўлиб қайтди. Кундалик та новулдаги озиқ-овқатлар шулар билан бисёр тўйинди. Дардчил беморлар сони кўпайди, дарднинг тури ошди. Қишлоқлараро оққан ариқлар у ёқда турсин, ҳатто тоғ дарёлари сувини ичиш ҳам хатарли бўлиб қолди. Имконини топган пулдор амалдорлар ичимлик сувини тоғ булоқларидан ташийдиган бўлишди.

Бир жамоа хўжалиги директори менга сирини очди. У шахсий эҳтиёjlари учун алоҳида қовун, тарвуз, сабзавот, пиёз етиши тиаркан. Заҳарли химикатларни асло йўлатмайман, деб мени ишонтирмоқчи бўлди. Ўз соғлиги, ороми, пуштикамарлари ташвишини қилган бу соддадил раҳбарнинг мулоҳазаларидан ичимда кулдим. Чучварани хом санабсан, оға. Сен тановул қилаётган бу неъматлар, аксинча, кўпроқ заҳарланган. Чунки маҳсус то-

морқанг химикатлардан фориғ бўлгани сабабли ҳам неки заҳар, ҳашарот бўлса, бўккан ерлардан қочиб, уя қуриш учун шу ерга талпинади.

Яна бир воқеа ҳеч ёдимдан чиқмайди. Етмишинчи йилларнинг ўрталари эди чоғи, фўзага кўсак қурти қутуриб хуруж қилган пайтлар. Икки бободехқон орасида „Намуна“ жамоа хўжалиги ерида баҳс бошланиб кетди. Бири бутифос кўсак қуртини ўлдиради деса, иккинчиси бунга оёқ тираб зътиroz билдиради. Шунда бир неча кўсак қуртини териб олишиб, бутифосга аралаштириб, шалдироқ қозозга ўрашди-да, нам тупроқ тагига кўмиб қўйишди. Чошгоҳ ўтди, пешин ўтди. Кечқурун улар даладан қайтишаётганда кўсак қурти ҳолидан хабар олишмоқчи бўлишди. Тирик молу одамзодни қисқа фурсатда суробини тўғрилайдиган бутифос кўсак қуртларини аллақачон асфала-софилинга жўнатгандир, дейишиб, ҳалиги жойни очиб кўришиди. Хар иккала дехқон қофоз ичидаги манзарани кўришиб, ёқа ушлашди. Қуртлар шундай етилган эдики, кўз кўриб тургани билан ишониб бўлмасди... Ҳозир, чамамда, бутифосдан фойдаланилмайди. Ажаб, кўсак қурти эса қарийб тугади. Иссиқ жоннинг озори учун нималар қилмадик-а?

Ўша йиллари Москвага аҳолидан шикоят тушган экан шекилли, заҳарли химикатлар билан иш олиб борадиган бир гурух олимлар келиб қолишли. Ҳалқнинг суюк-сугидан ўтган-да: одамларнинг заҳарланиб дардга чалиниши, мол-ҳолининг нобуд бўлаётгани, касалхоналар беморлар билан тўлиб-тошганлигини ёзишган эди. Шунда бир олим: „Пахтани „Оқ олтин“ деб аташларини билардим-у, аммо бунинг тагидаги маънони англамаган эканман“, деди. У кезларда юкори ташкилотлардан тазиқ жуда кучли бўларди. Шўрлик олимлар текшириш натижаларини ошкор килишдан чўчиб, жуфтакни ростлаб қолишли. Ўшанда ҳам ўзаро баҳс кетган эди. Раҳбарлардан бири: „Олимлар вахимага, бўрттиришга уста“, — деди. Шунда бир профессор: „Бу-ку кўз ўнгимиэда, мен ҳатто ер тагидан ўн газ чукурликдан чиқаётган артезиан сувидан ҳам заҳарли химикат биримасини топаман“, — деди. Айтганини исботлади ҳам. Икки юз метр чукурликдан отилиб чиқаётган сувни пробиркага солиб, аллақандай бирикма билан қоришириб, фалончи, энди томоша қилинг, агар сув тагида чўкинди ҳосил бўлса, билингки, заҳарли химикат. Бир оздан сўнг реакцияга кирган моддалар тинди ва шиша пробирка тагида қизғиш-қўнғир чўкинди пайдо бўлди. Мунозарани бошлаган раҳбар эса, бунда қандайдир „хийла, гирромлик“ кўргандек бўлиб, ишонмади. Профессор эса ўжар экан чоғи пахтазор этагидан оқаётган сувдан пробиркага солиб, ўша усулини яна такрорлади. Бирикма-

лар тингач, иккала пробиркадагини раҳбарга берди-да: „Бу ҳали ҳолва, — деди бош иргаб, — бу авлод ўтади, яна ўтар, лекин буни истеъмол қилаётгандарнинг пуштикамари ҳоли не кечади. Ахир бу заҳри қотил наслдан-наслга ўтади-ку. Хуллас, келажақда ҳам ташвишларинг кўп бўлади...“ Кейин буларга тожик алюмин заводи ҳавога пуркаётган фтор бирикмалари қўшилди. Етти иқлим ҳавас қилса арзигулик, деб мақташадиган водий иқлими, табиатига мислсиз путур етказилди.

Одамларнинг руҳий дунёси хусусида нима дердик. Рух, тафаккур соғлом, сарафroz ва мукаммал бўлганида эди бугунги муаммолар олдида бармоқ тишлаб ўтирасидик.

Нега, кўра-била туриб, ўзимиз яшаётган ҳаёт дарахти илдизига болта урамиз? Баднафсликми? Балки. Ёки ўз кучимиз, ҳар нарсага қодир қувваи- кудратимизга эш бериб, ортиқча ҳаволаниб кетганимиз важидандир? Эҳтимол. Бехуда шухрат-парастликми? Элу юртни ҳароб қилиш ҳисобига келган шухратнинг қадри неча пул бўларкан? Айтсан тилим, айтмасам дилим куяди, деганлари шу.

Азиз ўқувчим, адид ҳам олимлардан андаза олиб, жуда ошириб юборди, деб ўйлаётгандирсиз. Асло. Аминманки, бу мавзуларга ҳали кўп бора қайтамиз... Энди эса, сал фурсат соғ, олам мусаффо бўлган ўтмиш замонларга сайр қилиб, шаффоғ ҳаводан тўйиб-тўйиб нафас олайлик, зумрад булоқлардан қониб-қониб сув ичайлик, нилий ложувард осмонга боқайлик, шовуллаб турган, Ҳафиз Таниш Бухорий айтганидек: „Жаҳондаги оқар сувлар файр килган дарёлар“ (Аму ва Сурхон дарёлари назарда тутилган. *Муаллиф*) лабларидан юриб, кекса тоғлар сари бош олиб кетайлик.

*
* *

Неки азиз, неки суюкли, неки ардоқли бўлмасин, табиатдаги барқарор, хокисор, аммо донолик барқ урувчи, изтироб ва армон ўйғотовчи; рўшноликка, эзгуликка ҳамроҳ қилувчи ақидаларга менгзатилади. Ана шуларнинг аввал ибтидоси дарёdir.

Дарёлар — тирикликтининг бош мезони, андазаси. Дунёга бир бор келиб кетувчи инсон ҳаётини дарёга ўхшатамиз: умр — оқар дарё. Энг диловар, безавол — болалик; туйгулар жўш урган — ёшлик; эҳтирослар сармаст этган — йигитлик; осуда ҳаёл ва турмуш ташвишлари ин қура бошлаган — балоғат йилларини дарёларнинг мароми билан ўлчаймиз.

Дарё соҳилларида ўтириб унинг азалий ва мавжли долғаларига тикилиб, ўйларга чўмарканмиз, хеч кимга ва хеч қачон айттол-

майдиган дил рози, изтиробларимизни у билан баҳам кўрамиз. Унинг эркин, хотиржам ва бепарво эпкинидан қалбга яқин қадрон манзаралар учратамиз. Шунда жунбишга келиб, таранг тортилган асабларимиз мўъжизакор табиб афсунидан шифо топгандек ором олади.

Биз сувдан чиққанмиз ва яна сувга қайтамиз, деган кадими юонон нақли бор. Аслида ҳам шундай. Одам танасининг етмиш фойизини сув ташкил этади. Демак, суякларимиз, мушакларимиз, жамики аъзоларимиз сувда сузиб юради. Қолаверса, ҳар бир инсон ўзича бир дарё. Аммо, тақдир — қисмат деган бир балои азим чинакамига кўпириб, жўшиб оқишига кўп тӯғоноқ бўлади. Назаримда, узоқ келажакларда одамзод яна денгизларга, жаҳоний уммонларга қайтса ажабмас. Билакс, ер ва само узра чарх ураётган чиқит газлар, замин таназзули уни сувости муҳитига қайта мослашувига мажбур этади.

Воҳамиз ҳам бундан миллион йиллар муқаддам сув тагида бўлган. Боботогнинг энг юксак чўйқиси — Заркосада бир этак денгиз чиганоқларини ҳайрат билан терганимда бунга ишонганиман. Ернинг ички қобиги ўзгариши натижасида денгиз ўз изида улкан пиллапоялар қолдириб чекинган. Боботоғ пойидағи Қизил, унга тиркалган адирликлар, Чумчуклисой сакратмаси ана шундай пиллапоялардир. Миллион йиллар бурунги ўша жаҳон баҳридан Аму, Орол ва Каспий денгизлари улгу бўлиб турибди. Таассуфки, Сир, Аму ва Оролнинг тақдирни аён бўлиб қолди. Юз минглаб йиллар давомида шарқираб оқсан, шовқини, мавкеи оламни тутган бу хавзалар одамзоднинг нафсий важоҳати домига дош беролмади.: атиги ярим аср мобайнида ингичка тортиб, ҳалокат ҷоҳларини қоралаб қолди.

*
* *

Турғунлик йиллари айни авж олган маҳалларда вилоят раҳбарияти илтифоти ва муруввати билан бир кинога сценарий ёзган эдим. У шундай қалом билан бошланарди: „Воҳага ҳаёт элтгувчи тўпори тоғ дарёлари ана шу марварид — инжу томчилардан тўпланиб, ирмоқлар пайдо қиласи ва ҳайбатли тоғлар ўмровига тирсак тираб, чуқур дараалардан йўл солади; ўзи сингари ўнлаб, юзлаб жилғалар галасига қўшилади-да, асов Тўплангни ҳосил қиласи. У эса, ўз навбатда, Хисортогнинг совуқ қаъридан жунжиккан Қаратоғ дарёси билан қўшилиб, Сурхондарёни бунёд этади... Мухаммад Солих „Шайбонийнома“да айтганидек: „Боши Термиз — оёғи мулки Ҳисор“ деб аталмиш диёр номига кўчади.

Ўлканинг шимоли-ғарбида бир ғаройиб олам бор. Уни Ҳисор-Бойсун тоғ силсиласи, дейишади. Майдони 5913 квадрад километрни ёки вилоят мавқеининг 27,3 фоизини ишғол этади, ёки Андижон вилоятининг умумий майдонидан бир ярим баробар каттадир. У шимоли-шарқдан жануби-ғарбгача 12, ғарбдан шарқка 60—70 километргача бўлган Бойсунтов, Чўлбайир, Сурхонтов, Хўжа Каршавар, Мачитли, Қолдирга, Сувсиз, Закрак, Хирратов сингари юксаклиги 750 метрдан 4688 метргача етадиган паст-баланд ўркачли тоғлар ўлкасиdir. Темурийлар замонида бу ўлка Фан, манғитлар даврида Кўҳистон деб аталарди.

Ундаги мангу музликлар, тармалар йил ўн икки ой эrimай ётади. Сурхон воҳасининг ҳаёт қон томирлари — Тўполанг, Коратоғ, Сангардак, Хўжаипок, Шеробод дарёлари ана шу қорликлардан бошланади. Мингларча сойлар, жилғалар, чашма ва булоқларни ўз қанотига олиб, юзларча чақирим тош-метин йўл босиб, воҳа текисликларига оқади.

Тоғли ўлка қадимдан инсон севиб, ардоқлаган масканлардан бири. Сангардак дарёси ўзанида жойлашган қадимий манзилгоҳлар изи бунга гувоҳ. Келгинди ёвлар файирлигини оширган, сайёхлар завқини тоширган бир диёр. Умри шу тоғларда кечиб, ота-боболарининг үдумларини ҳамиша эъзозлаб келаётган қариялар ғаройиб афсона, ривоят ва воқеаларни ҳикоя қилишади. Узоқ йили Сангардак адогидаги Чанглөк қишлоғига сел келиб, жуда эски бир қабристонни ювиб кетди. Қишлоғнинг юз ёшли табаррук казо-казо кексалари ҳам бу ерда қабристон бўлганидан бехабар эканликларини эътироф этишиди.

Искандар Зулқарнайн Бақтрияга (ўлканинг қадимиј номи) бостириб келганида хукмдор Хориен бошлиқ маҳаллий халқ унга қарши бош кўтарган эди. Жаҳонгирнинг кўли баланд келгач, Хориен тоғларда қурдирган ўз қальясига яширинади. Искандар ҳарбий юришлари баён этилган манбалар, чунончи, юнон тарихчиси Арриан қалья таърифини келтиради: „...Тоғдаги бу қалья Хориенники деб аталар ва ўзи ҳам бир қанча амалдорларни олиб, шу ерда жон сақлаган эди. Ҳамма томони тик тушган зовлардан иборат. У ерга фақат биргина ёлғизоёқ йўл билан бориш мумкин. У ҳам бўлса, гоят машаққатли ва ҳалокатлидир. Атрофи чоҳ, кўшинни қальага бошлаб бориш учун аввало шу чоҳни текислаш лозим“

Деги Канора, яъни Оқсувнинг бошланишида Қальайи Шерон деган манзилгоҳ борлигини эшишиб, бир куни яёв йўлга тушдик. Хориен — Шерон сўзларидаги оҳанѓдошлиқ тинчлик бермасди. Деги Канора ва Оқсув иккаласи икки сойдан отилиб чиқиб, туашган жойда Қальайи Шерон мўъжазгина бир

орол бўлиб кўзга ташланиб турарди. Атроф эса гир айлана, қат-қат тик кесма жинслар. Ўтган 23 аср бу жойлар манзара-сига кўп ўзгаришишлар киритган чамаси. Тоғ ўнгиirlари сил-жиган, ер қимиirlашлар, шўх дарёлар оқизиқлари бу ерларни хийла ўзгаришиб юборган.

Шу ўринда бир тарихий далилни келтирмоқчиман. XVI асрнинг 40—50- йилларида Туркия ва Португалия ўртасида Хинди-стонни ўз таъсир доирасига киритиш йўлида қаттиқ денгиз жанглари кетарди. Турк флоти талафот кўради. Шунда флот кўмон-дени, адмирал Сейди Али Раис омон колган флотини Гужарот ва Шимолий Хинди斯顿га бошлаб боради. Шериклари билан куруклиқдан Марказий Осиё, Эрон, Озарбайжон орқали ватанига қайтиб боради. Кейинчалик у сафар хотираларига бағишилаб „Миръотул мамолук“ („Мамлакатлар кўзгуси“) асарини ёзади. Мавзуумизга бевосита даҳлдор парчани келтираман: „...Чағониёнга (ўлканинг ўрта аср номи), яъни Ҳисори Шодмонга келдик. Ўзбек сultonларидан Темур Сulton номига қўйилган ерга келиб, ондин сўнг Сангардак тоғидан ошдик. Тоғдан ёмғир ёққандек сув томчилари тўхтовсиз томиб турарди. Тоғнинг этагида шу томчилардан бир катта сой ҳосил бўлган эди. У ерда Ҳақ Таолонинг қудратини томоша килдик...“

Турк адмирали Сейд Али Раис Сангардакнинг турфа ранг манзарасига гавҳар бўлиб турган машҳур Шарракмозорни эмас, балки Оқсувни назарда тутган чоғи. Қарияларнинг айтишича, чорак асрча бурун Деги Канора тик зовнинг нақ белида худди маржон сингари ёйилиб, кенг шаршара холида оқиб турган. Кейинчалик тоғ кўчиб, бу шаршара кўчки тагида қолиб кетган. Эндиликда бу ирмоқ ўпир илишдан пайдо бўлган одмигина кўлча жиягидаги тошлар орасидан сизиб чиқади-ю, пастга, нишабликка оппоқ тойчоқдек кўпириб, сакраб, ўйноклаб тушиб кетади.

Араб тарихчиси ва сайёхи Мақдисий бундан минг йил бурун тоғлар орасидаги Сангардак йирик қишлоқ бўлиб, пойттаҳт Чағониёндан бир кунлик йўл чамаси масофада эди, деб ёзади. Унинг замондоши Ибн Ҳовқал эса иккита — ички ва ташки Сангардак бўлганлигини айтади.

Чағониён шаҳарларини Кеш (Шахрисабз) билан боғлаб турган карвон йўли ҳам шу ердан ўтган. Инқилобгача Сангардакликлар, атрофдаги қишлоқ аҳолиси кун кўриш, пул топиш ниятида шу йўл билан қўшни Шахрисабз ва, айниқса, Самарқандга бос олиб кетганлар. Тоғликлар ғоят оғир турмуш кечирган бўлсалар-да, ўз эркини ҳар нарсадан устун қўйганлар. Дарё ўзани бўйлаб кетган сон-саноқсиз шотилар, кўприклар минг бор қайта қурилиб, минг бор тошқин селлар домида колган.

Сангардақда ажойиб хунармандлар, косиблар, кулоллар, мискарлар, темирчилар яшаган. Тоғликлар маъдан излаб топиб, эритишиб, ишлаб чиқариш қуроллари ясашган.

*
* *

Тўполанг бошланадиган ҳавзада Айғиркўл бор. Дастваб кўрганимда Ҳисортог елка кериб, қуёшга қадаҳ тутаётгандек бўлиб кўринган эди. Ўша сафардан ғоят кўп таассуротлар билан қайтганимдан хабардор шоир дўстларим қовоғари ҳид олгандек атрофимда ўралашиб қолишиди.

Хокисор ижодкор ҳамиша дардманд. Дард, кайфият, ёшу қарилкни суриштирганлиги сингари, илҳом, изтироб изхори шикаста дилда бод қўзғайди. Шунда мен уларга далда бериб, қоғоз-қаламга тикилаверган билан шеър чиқмайди, ундан бадбўй, шўртак тер чиқади, келинг, терни узоқ сафар машак-қатларида қолдирайлик-да, илҳомга асқайдиган ширани болари сингари изғиб излайлик, дедим.

Хуллас, Айғиркўлга боқдим-у, миллион йиллар бурун жаҳонбаҳрлари сари қулоч отган денгизнинг етим кўзини кўрдим.

Кўл бўйида мункайган, қоқшол, пайлари бўртиб чиқсан, панжалари косовдек бир чол эчки боқиб юрарди. Мўъжазгина кўлни зиёрат қилгач, чол гурунгига эҳтиёж сездим. Омадимнинг юришганини қарангки, Айғиркўлдек кекса, унингдек заиф, тоғ тиркишларидан ҳозиргина бир амаллаб аранг чиқиб олгандек ҳорғин чолдан тоғ ҳавосидек мусаффо, кўл сувидек зилол, тиник ривоят эшилдим.

*
* *

— Одамзод бу дунёга беихтиёр келади, ҳайрату маҳлиё яшайди, ғаму андух, армон билан кетади, деган экан шоир Саъдий, — деди у кутилмаганда мени лол қолдириб муский оҳангда. — Бу ривоят ҳам эски дунё армонларидан бири...

— Кадим замонларда бир чол чўл-устухон кампири билан шу кўл бўйида кун кечирган экан. Наридан-бери тириклик ўтказиб юрган чолу кампирнинг ёлғиз қувончи, овунчоги биргина байтал бўлган. Уни на кўкка, на ерга ишонишган. Ҳадиксирашнинг сабаблари бўлган. Атрофда ёввойи ҳайвонлар изғиб юрган. Бунинг устига, ора-чорада кўл сатҳи жимиirlаб, вахимали овозлар тараларкан. Баъзи кунлари олам тинч бўлсада, ғалати тўлқинлар пайдо бўлиб, кўл ўз-ўзидан кўпириб, чайкалиб, безовтала наркан.

Кунларнинг бирида чол тонг маҳали соҳил бўйлаб от тизгинидан тутиб, ўтлатиб юрганида сувдан чиқиб турган ҳайбатли отбош махлукни кўриб қолади. Бу сиру асрордан ҳанг манг чол кўркиб кетади. Шундан сўнг махлукни кўриш, кузатишга ҳарчанд уринмасин, бефойда бўлиб чиқаверади. Фақат чол гафлатда қолган тунлари отбош сувайғир қумлоқ соҳилда излардан кашта тикиб кетаркан. Бора- бора чол сирли махлукнинг безарарлигига ишонч ҳосил қилиб, унинг қилиқларига ҳам, изларига ҳам, кўлни тўлқинлантириб ўкиришларига ҳам қўл силтаб қўйипти.

Байтал балоғатга етибди. Табиатнинг занжиртоб узвий қонунлари уни ҳам буровга олиб, ҳузур-халоватига чанг солибди. У тинмай ер тепиниб кишинар, чолу кампирни ёнига йўлатмас, кўзлари косасидан чиққудек қонталаш бўлиб кетибди. Иштаҳадан қолиб, қариялар кўз ўнгидага кун сайин озиб кетаверибди. Чол байталдан жудо бўлишига кўзи етиб, кишандан бўшатиб унга эрк берибди... У шўрлик қайга ҳам борарди, чор атроф тоғ бўлса.

Баҳор айни авжида экан. Чол байтални дараклаб кўлни айланиб юриб, гаройиб ҳодиса устидан чиқиб қолибди.

Күёш эндиғина тоғ ўркачидан мўралаган. Байтал қумлоқ соҳилда айланар, кўлдан эса танаси бениҳоя узун, сип-силлик, қора-қўнғир ялтирбош махлук чиқиб келарди. Сувайғир байтални думи билан ўраб олмоқчи бўлди, бироқ салт байтал бир ирғишлиб, думи устидан сакраб ўтди. Сувайғир қанчалик уринмасин, байтал тутқич бермас, туёқлари билан қум сачратар, соҳил бўйлаб чолар ва яна кўзлари лов-лов ёниб, отбош махлук сари талпинарди. Нихоят, сувайғир байталга чопипти. Чол қалт-қалт титраб, ўзини панага олади.

Сувайғир байтал билан куйиккач, кўлга қайтиб тушади ва ном-нишонсиз ғойиб бўлади. Чол бу ҳодиса тафсилотини сир тутмокни ният қилиб, кампирига ҳам лом-мим демайди.

Орадан йил ўтгач, байтал қора- қўнғир, юлдузларга сапчишга ҳозир дуркун тойчоқ тугади. Чолу кампир қувончининг чекчегараси йўқ. Тойчоқ кун сайин эмас, соат сайин ўсоверади. Унинг руҳсори, турки-таровати, хушқоматлилигини таърифлашга тил ожизлик қиласарди.

Йил ўтиб, яна баҳор келди. Кўл яна безовталанди, тунлари вахимали гулдуради, айғир отнинг кишинашидек кўрқинчли овозлар тоғларда акс-садо берди.

Чол яна сувайғирдан тойчоқ умид қилиб, байтални қумлоқ соҳилга етаклаб борди ва гулмихга қантариб қўйди, ўзи эса ҳарсанг тошлар ортига яширинди.

Кўп кутди. Кун ўтди, тун ўтди. Сувайғир эса қорасини кўрсатмади. Шу алпозда вақт ўтаверди, отбош махлукдан эса дарак бўлмади. Ўйинқароқ ва шўх қулун она атрофида парвона.

Ниҳоят, бир куни махлук сувдан чиқиб келди. Байтал унга суйкаланди, жовдираф қаради. Қулун эса дастлаб бадбашара, қўрқинчли, баҳайбат махлукдан ётсираган бўлса-да, кейин тинчиidi ва унга яқин бориб марварид томчилар ялтираб турган силлиқ бўйинини ялай кетди.

Шунда кутилмаган ҳодиса юз берди. Сувайғир қулуннинг ийифидан тишлади-да, сувга шўнғиб кетди. Чолнинг фифони фалакка етди. Зор-зор йиглаб, соҳил бўйлаб тентираб, чопиб кетди.

Яна ҳафта ўтди, ой ўтди. Сувайғир қайтиб кўлдан чиқмади. Байтал озиб- тўзиб, охири жон берди. Сувсар янглиғ яғринли қулуни, якка-ю ягона илинжи — байталдан жудо бўлган чол савдойи бўлиб қолди. У бошига тушган бу мудҳиш кулфат сабабчиси — сувайғирни ер муштлаб лаънатлади.

Тўсатдан кўл чайқалиб ҳаракатга келди. Тўлқин ёриб сувайғир чиқиб келди.

— Нега фифони-фарёд қиляпсан, чол? — деди у тилга кириб.

— Нима қилиб қўйдинг, бадбахт махлук?! Хонумонимни куйдирдингку-сен!

— Хонумонни куйдирган сенсан, эси паст чол” — гулдирабди сувайғир.

— Бу не сирки, билмай гарангман. Не айб учун бунча разолат?— сўради чол.

— Унутма, тириклиқда бандиликни раво кўрган зот эрк қадрини сира билмайди. Айт-чи, нега уни банди қилдинг сен?

— Нимани?... Кимни?... — ҳайратланди чол.

— Байтални сен ахир банди қилдинг-ку!... У қуёшнинг дала-дашту, тоғу тошида яйраб юрган хур қизи эди. Кўзларида зиё порларди.

— Бундан сенга не наф, эй бадфеъл махлук? Мантиқ қаерда?... Билсанг эди, сени ўйлаб қантаргандим уни қозикқа. Сенга осон бўлсин, қувлаб юрма, деб.“

— Қувламоқнинг завқи сенга ёт.“

— Ҳолингга бок, эй, улкан шиллик қурт, қувламоқни сенга ким қўйди. Сенга раҳм қилиб байтилимни банди қилгандим.“, — фифони ошарди чолнинг.

— Мен бу уммонаро ёлғиз дайди — саргардон. Унинг эрки, хур жамоли менга куч берди. Иккаламиз бирлашган онда икки олам нурафшон бўлди.“

„— Хеч бўлмаса сен тойчогимни қайтиб бер менга. Суянчи-
ғим қолмади, ишон“, — илтижо қилди чол.

„— Кечир мени, тойчогимни сенга бермайман. Унинг вужу-
дидага менинг қоним бор.“

„— Ундаи қилма, илохий жонзот! Ахир, сендан зот — насл
олмоқни ният қилгандим. Усиз ҳолим хароб, шафқат қил, Ай-
ғир!....“ — чол ялинди.

„— Ўзгага бандиликни раво кўрган кас бошқага ҳам тиз
чўкар тайин.“

*
* *

Айтишларича, шундан сўнггина чол бўлган воқеани кампи-
рига ҳикоя қилган-у, ўша захоти жон берган. Кампир ҳам бу
ходисани узоқ бир оғайнинг айтган-у, у ҳам жон берган.

Айғир афсонаси эса тоғликлар орасида тарқалиб кетган.
Неча- неча авлод ўтибдики, ундаги ҳикмат — эркка ўчлик тоғ-
ликларнинг қон- жонига сингиб келяпти.

*
* *

Бундан уч минг йилча бурун Марказий Осиёда, жумладан
Қадимий Бақтрия — „минг шаҳарли“ туғи баланд кишварда эл-
элатлар онгини, қалбини ром этган бир муқаддас китоб яра-
тилган. Зардуштийларнинг бу қомусини „Авесто“ деб аташ-
ган. Унинг дунёга келишида бобокалон аждодларимиз катта
хисса кўшган. Бу китоб башарият тарихида мангу барҳёт ти-
риклик шаънига битилган илк шоирона мадхия бўлди. Сўнгги
йилларда археолог олимларимиз „Авесто“ ватани бизнинг юр-
тимиз, деган тахминларни айтишяпти. Бунга далил Жарқўтон-
дан топилган оташпастлик расм-русумларига дахлдор асо-
ри-атиқалардир.

„Авесто“ ризқ-рўзи мулки заминда кечмиш одамзод қав-
мига қилган насиҳати ва ўгитлари ҳозирги кунда ҳам жаран-
глабгина қолмасдан, балки минг йилликлараро бизнинг қил-
мишларимизга разм солиб, кўз-кулок бўлиб турипти. У замон-
лар ҳали табиат она сутидек пок, беғубор, бетакрор эди. Аммо
донишманд шарқ заковати ғойибдан бизни тергаётгандек, гўё
аждодларнинг ўткир ва синчков нигоҳи бизни таъқиб этаёт-
гандек.

Муқаддас китоб „Авесто“ сахифаларига бир назар ташлай-
лик:

„.... Кимки ушбу ерга... чап ва ўнг, ўнг ва чап қўли билан
ишлов берса, ерга барака киради... Зоҳидга замин шундай дер-

кан: „хой, инсон, менга чап ва ўнг қўлинг, ўнг ва чап қўлинг билан ишлов бераркансан, билки, мен чарчоқ билмайман, турили анвойи нозу-неъматлар, мўл ҳосил туғавераман...“

Ерга чап ва ўнг, ўнг ва чап қўли билан ишлов бермайдиган инсонга замин шундай деркан: „Менга ишлов бермайдиган (эъзозламайдиган) инсон, билки, ўзгалар остонасида мангу бошинг эгик, ўрнинг эса садака сўраб юргувчи гадолар сафиди бўлади...“

„... Ва Охура Мазда деди: „Олийҳиммат моҳитобон Йима, Виваҳантлар шунқори! Жумла жаҳон борлиқ қаҳратони қиш йўллаб гуноҳкор оламни кучли бўрон, шавқатсиз изғиринлар билан ўраб-чирмайди, хеч бир куч оламни қишдан даф этолмайди; шунда юксак тоғлар ва Ардва (дарё) бўйи пасттекисликларига бўктарув қор тушади.

Ва шунда хавф ва хатарга чалинган манзиллар, тоғ юксакликлари, чуқур водийлар ва мустаҳкам қўралардаги молу ҳол жон сақлаш учун ўзини чор атрофга уради.

Бу қаҳратон қишдан олдин қишвар (диёр) серўт яйловларга бой манзил бўлади. Қалин корлар эригач, мамлакатни тўфон босади. Шунда, эй, Йима, мулки олам баҳтига залила кўл ҳосил бўлади. Унинг теварак гардишида молу ҳолнинг излари кўринади. (кордан юз кўрсатган замин тириклик илинжи.)

У улкан кўра чор атрофининг ҳар буржи бир асов от елдирим масофада бўлсин. Унга сен — тўпори жонзод, молу ҳол, одамлар, тулкилар, қушлар уруғини элт, қирмиз ёл тилли машъалалар ёқ. Чор атрофининг ҳар буржи бир асов от елдирим масофадаги улкан кўра-кўрғонда инсон манзилини бино қил, атрофи асов от елдирим масофа — майдонда молу ҳолга кўра кур.

У ерга ариқ қазиб сув элт, равон йўлу кўчалар ясат, макон бино қил, уни юксак девор ва чуқур хандак — чохлар билан ўраб ол.

У ерга дунёдаги энг гўзал, парипайкар, аъломижоз эркак ва аёллар наслини эк. У ерга дунёдаги энг зўр, баҳайбат, хушбичим, кучли, ҳушқомат ҳайвон турларини ундири.

У ерга оламаро энг антиқа, нодир, юксак ва хушбўй, сарвқомат ва дилбар бисёр кўкату дараҳтлар уруғини сеп. У ерга энг ширин, энг асл мевалар уруғини қада.

Шу манзил кўра- кўрғон дунё тургунча бир-бирига дилбанд, пайванд этиб аёл билан эркакларни жуфти ҳалол қилиб ярат.

У юртда хеч қачон на ўринсиз можаро, на чакимчилик, на жаҳолат, на ноумидлик, на қашшоқлик, на алчоқлик, на хиёнат бўлмасин. Ёвуз Аҳрамонга ҳос хосият — бачканалик, майиб-мажрухлар, бадбашара ногиронлик ва бошқа қусури-нуқуслар

асло доримасин. Инсон қавми иллатлардан холи ҳолда мурод топсин...

Унутма, кимки ерга меҳр қўйиб, зироат экса – у донишманд, порсо, ҳақ ва адолат уруфини сепади!“

*
* *

Табиат ягона қутлуғ онаки, унинг оғушида тириклик кулф уради, тарих кечади, келажак юз очади. Одамзод тупроқнинг аввал- ибтидолигини билгунга қадар ўн минглаб йилларни ке-чирди. Кейин унга меҳр қўйди, дон экди, дараҳт кўкартириди. Тўпланган ҳосилни қора кунларга яраб қолишини англагач, тупроқдан лой кориб, идиш- товоқ қилишни билиб олди. Сополни ўтда тоблашни ўрганди. Хумларда фалла, тирикликка аскатадиган турли нозу неъматларни узоқ вақт сақлаш эвини топди. Сўнгра лойдан девор, кўрғон тиклади. Манзилгоҳлар, қишлоқлар, шаҳарлар пайдо бўлди.... Ва ниҳоят, дорилбақога юз тутган марҳумларнинг жасадини унга – она тупроққа берадиган бўлди.

Она тупроқ одамзод бешиги, тарих эса унинг қўшиғи.

Ҳар бир авлод у қўшиқ сирларини ўз билганича қабул қила-ди, ғалвирларига солиб, элаб кўради, мевасини татииди, мозийнинг улкан тажрибаси олдида таъзим бажо келтириб, унинг оламшумул оҳангларига ўз созини пешлаб кўради. Тарихнинг энг буюк сабоғи – авлодларни бесамар ишлардан, нафс ту-файли содир бўладиган фожиалардан огоҳ этиш. Бироқ бу сабоқ ҳамиша ҳам изчилик билан қарор топавермайди. Одам-зод қавмига ҳос унтувчанлик устун келиб, ҳар гал авлодлар ўз шиорини майдонга ташлайди, ўз йўриғи билан иш кўрмоққа уринади.

Мудом шундай бўлиб келади. Инсоннинг эш бермас инти-лишларини тизгинлаш, инсоғ ва имон доирасида яшашга ўрга-тиш мақсадида динлар яратилди, санам-у маъбудалар, худо-ларга сажда қилдирилди. Бу изланишларнинг туб негизи ҳами-ша ҳақиқат бўлиб келган. Бироқ асл – ҳақиқат инсоннинг ўзи эканлиги ҳамиша ҳам эътироф этилавермайди. Худодан кўркиш асосига курилган қаттиқўл динлар ҳам турли хил манфаатлар курбонига, куролига айланди, парокандаликка учради.

Турли-туман оқимлар, мазҳаблар, таълимотлар юзага келди; қонунлар, қомуслар яратилди. Кўп ҳолларда бу мерос ҳам олғир найрангбозлар қўлида қўғирчоқ бўлди.

Одамзод эса тинчимайди, ҳамон изланишда: ер қаъридан, самодан, мозийдан, уммонлар тубидан, башарият бисотидан излагани излаган. Нимани?... Ҳақиқатни!!!

Ўтмишда шундай ҳодисалар бўлганки, улар онда-сонда худди юз йилларда бир марта ўзини намоён қиладиган думли юлдузлардек, одамзод кўз ўнгида ёрқин из қолдириб, учеб ўтади ва ҳамманинг дикқат-эътиборини тортади. Ана шундай ёрқин, ибратли ҳодисалардан бири – қадимда ғоят машхур бўлган Буюк ипак йўлидир.

Нега уни бугунги авлод эслаб қолди?

Бунда буюк ҳикмат бор.

Осиё – Ер куррасидаги энг улкан қитъя. Маъноси эса форсийда тегирмон, дегани. Минглаб йиллар давомида юзлаб қабидалар, эл-элатлар, ҳалқларнинг беадад харакати, қуони, хуружи, улар тепкилаб, пайҳон қилиб ўтган майдон. Ҳамиша ҳаёт гавжум бўлган тарих пўртанаси, чорраҳаси. Оқимлар шарқдан ғарбга, ғарбдан шарққа оғиб, оқиб турарди. Бу одамзод оқимида мустабид жаҳонгирлар, гадолар, руҳонийлар, савдогарлар, зоҳидлар, фозиллар, жаҳонгашта сайёҳлар, сиёsatдонлар чархипалак айланарди.

Искандар Зулқарнайн лашкари босқинчилик урушларидан сўнг одамларнинг дунё тўғрисидаги билимлари сарҳадлари бехад кенгайди. Давлатлараро борди-келди, савдо-сотиқ алоқалари кучайди. Қулдорлик жамияти тараққий этган салтанатлар Рим, Парфия, Кушон ва Хитой империялари ўзаро рақобат рақсига тушдилар. Баъзилари аввал урушларда куч синашиб кўришди. Лекин бундан иш чиқавермагач, савдо, маданий алоқаларни йўлга кўйишга мажбур бўлдилар. Ана шу замонларда Буюк ипак йўли Шарқда япон ороллари, ғарбда Ўртаер денгизбўйи мамлакатлари оралиғига кўприк бўлиб тушди.

Савдо-сотиқ асосий важ бўлса-да, айни пайтда элчилар айрибошлиш, турли ҳалқлар маданиятини ўрганиш, ютуқлардан баҳраманд бўлиш изга тушди. Буюк ипак йўли ғоят мушкул, мураккаб, чигал, олатасир, тўлғоқли даврларни бошидан кечирди. Мангу барҳаёт турмуш, тириклик – эллар тақдири, қисматини улкан пўртанага қамраб олди, пайванд қилди. Башарият яратган энг бебаҳо, бокий анъаналар, бисотлар, мерос умумбашарий аҳамият касб этди. Ҳалқлар бир-бирини ҳам тажрибада, ҳам ғояларда, ҳам маданиятларда бойитди. Ипак йўли ҳалқлар, давлатлар орасидаги тинч-тотувлик, яхши кўшничлик алоқалари рамзига айланди.

Ўрта Осиё, шу жумладан, унинг марказида бўлган юртимиз ҳам ана шу пўртана қисматига шерик бўлди. Юрт тупроғи ҳам яхши, ҳам ёмон кўпдан-кўп тарихий воқеалар кечган табаррук саҳна хизматини ўтади.

Босқинчилик урушлари, салтанатлар зафари ва инқирози, талафотлар ва вайроналиклар, озодлик ва мустақиллик учун жанг жадал курашлар — ҳаммасига гувоҳ бу юрт. Унинг ҳар тупроғи ўтмиш аждодлар қонига тўйинган, улар армонлари-нинг бўйи анқиб туради.

Буюк ипак йўли эса турли замонларда гоҳ ғойиб бўлар, гоҳ уруш, тўс-тўполонлар тўхтагач, яна мангу тирик афсонавий Семурғ күш сингари Осиёнинг кўз илғамас сарҳадлари узра бўй кўрсатар, унинг тоғли, саҳроли, ўрмон ва тўқайзор йўлла-рида кети кўринмас карвонлар тимсолида кўнғироқдор овоз таратарди.

Бу карвонлар ўлқадан-ўлкага, элдан-элга кўчиб юаркан, худудсиз урушларнинг бенафлиги, одамзод саодати йўлида дўстлик ва биродарликдан бўлак буюк хикмат йўклигини таш-виқ этар, ҳалқлар қадриятларини бир-бирига улашар, элат-ларни бирлаштиришга уринарди.... Кейин эса Осиёнинг кенг-ликларида алган олган у ёки бу кирғин-барот, талончилик, босқинчилик урушлари кўтарган тўфонлар ғубори орасида колиб кетарди, унутиларди.

Унут бўлган у ипак йўли бугун яна ҳалқлар тилида, дилида. ЮНЕСКОнинг ташаббуси билан асрлар ғубори, саҳролар қуми, куйиб кул бўлган шаҳарлар ҳаробалари тагида қолган, асрлар сайқалига, фожиасига шерик, авлодлар кўз ёшлари билан ювил-ган, шуур ва армон, қайғу ва саодат хикматига бой карвон йўллари яна ёдга тушди.

Инсоният яна ўз доирасига қайтаяпти. Асрларнинг сабоғини тарих баркашида олиб, кўтариб чиққан бу йўл — тараққиётга аскотиб турибди. Унга эҳтиёж кучайди. Барча босқичларда ипак йўли улкан тирик қон томирлари сингари ҳаётбахш кучга эга эди. Унинг тарихий қисматига шерик мамлакатларда ҳозирги кунда кечётган буюк уйғониш, янгиланиш, улғайиш ипак йўли-га яна ҳаёт бахшида этишни тақозо этмоқда.

*
* *

Осиёда Буюк ипак йўли, осмонда Сомон йўли гоҳида мени ўйга толдиради. Қандайдир ўхшашликлар кўраман, кўргим ке-лади.

Бу йил Кушонлар салтанатининг илк пойтахти Далварзинте-пада япон олимлари ўзбек ҳамкаслари билан илмий текши-риш ишлари олиб боришиди. Мозийда Далварзинтепа Буюк ипак йўлидаги улкан манзил эди. Икки мамлакат олимлари ўтмиш аждодлар изларини излашяпти.

Илк бор юртим равон йўлларида японларнинг „TOYOTA“ машиналари кўзга ташланиб қолди. Чин-мочин матолари дўконлар расталаридан ўрин оляпти. Ҳиндилар меҳмонхона қуришяпти. Термиизда БМТ ваколатхонаси ишлаб турибди. Аму узра қурилган кўприкдан жумла-жаҳон моли ўтмоқда. Ўзбек элиниг кичик бир бўлаги — юртим жаҳонга эшик очмоқда.

Юрт обидалари ипак йўли қисматига шерик манзиллар осори атиқалари рўйхатига олинган. Бу — юрт учун улуғ фахрдир.

Аммо фахрлана оламизми? Ўтмиш обидалари, маданият қадриятларига; аждодлар руҳига муносиб ҳурматимиз борлигини кўрсата оламизми? Жаҳон бизга қарайди. Уялиб қолмасмикинмиз. Ахир, Буюк ипак йўли соҳиблари, яратувчилари бўлган аждодлар меросхўримиз. Меросга муносабат маданият, мафкура, садоқат, матонат, фидойилик даражасини кўрсатади. Ёдгорликларнинг аянчли ахволи учун кечаги ялтоқ, журъатсиз, лаганбардор ўтмишдошларимизни айблаб турсак, яна ношудлигимиз ошкора бўлиб қолади. Айбни кимларгадир тўнкаш осон, бироқ унда ўзимизнинг ҳам улушимиш борлигини тан олиш оғир мушкулот. Начора бизга факат бир нарса далда беролади — бундан кейин бу ҳолнинг ҳеч қаҷон тақрорланмаслигига ишонч. Ишонч эса амалдаги иш ва фидойилик билан мустаҳкам, событ.

*
* *

Дастлаб ерни сув босди. Ер қобигидаги силжишлар, ўзгаришлар натижасида қурукликлар ҳосил бўлиб, унда илк бор кўкатлар, дараҳтлар, сўнгра эса жониворлар: дарранда, парранда ва газандалар пайдо бўлди.

Миллион йиллар бурун бутун Ер шари олимлар таъбири билан айтганда, ТЕТС — тириклик белбоғи билан ўраб олинган. У Ўртаер денгизи, Марказий Осиё ва Марказий Америкагача ястанган. Юртимиз ҳам ана шу тириклик камарининг биринчиси бўлиб, унда илк бор ҳаёт қулф урган.

Машҳур биолог-олим И. Васильченко кўп йиллар Сангардак ва Тўполанг ҳавзаларини кезиб, қадимий замонларга оид фоят ноёб табиат улгулари-обидаларини излаб топди. Эндиликда бу кашфиётлар фан мулкига айланган. Бу тоғларда дунё аҳамиятига эга нодир ва антиқа дараҳтлар: ёввойи анжир, анор, узум, хурмо, чинор, дараҳтсимон юлғунлар ўсади. Киштут дарёси Тўполангга қуйилган жойдан бир чақирим қўида машҳур Жангалактўқай бор. Ханузгача миллион-миллион йиллар бурун ер юзидан йўқолиб кетган ёввойи чинор, биота — саври, дўлананинг фоят нодир турлари, Ҳисор узуми, бошқа ерларда учра-

майдиган синч дарахтлари; Ганашсой, Олқар, Боғча, Даҳана-даги дарахтсимон юлғунзорлар; ёввойи нок, олма, хурмо, шумтоллар табиат мўъжизасидир. Ўсимликлар дунёсининг бу хил антиқа нусхаларини ер юзининг бошқа минтақаларидан топиш амри маҳол. Тоғлардаги доривор, шифобаҳш гиёҳлар, илдизмевали ўсимликлар, қушлар, ҳайвонлар; Айғиркўл, Тўполанг ва Сангардак дарёларидаги гулмойи, ширмойи балиқлар ҳам эл-юртнинг бебаҳо бойлиги. Буларнинг ҳаммаси Ўзбекистон „Кизил китоби“га киритилган.

Ёнғоқ дарахтининг асл ватани ҳақидаги мунозара ҳалигача бир ёқлама ҳал бўлганича йўқ. Аммо, шуниси маълумки, уни Искандар Зулқарнайн босқинчилиги даврларида юононлар ўз ватанларига олиб кетишган. Европаликлар эса ёнғоқни илк бор Грецияда кўришиб, уни „Грек ёнғоғи“ деб атashган. Юртимиз боғларида шундай бобокалон ёнғоқлар борки, кўриб ҳайратга тушасиз. Ана шундай бир пурхикмат ёнғоқ дарахти Бойсунтоғдаги Назарий қишлоғида Соҳиб бобо томорқасида ўсмоқда. У ҳар йили бир туп ёнғоғидан ўртacha 50—60 қоп ҳосил олади.

Кейинги ўн-ўн беш йил мобайнида марказий ва, айниқса, маҳаллий матбуот саҳифаларида ҳалқнинг бебаҳо мулки бўлмиш табиат бойликларини асраш, тоғ табиати, ҳайвонот ва наботот дунёси муҳофазаси, дарёларимиз ҳавзаларига хос манзараларни эҳтиётлаб, тоза сақлаш юзасидан кўплаб мақолалар эълон килинди. Буларда табиатнинг ўзи минг йиллаб асраган ноёб обидаларни ҳимоя килиш, Тўполанг ва Сангардак тоғларида қўриқхона ташкил этиш, табиат гўзалликлари, бойликларини келажак авлодларга бус-бутун қолдириш ҳақида күюнчаклик билан баҳслар юритилди. Аммо бу истак ва мулоҳазалардан тайинли иш чиқмади. Маҳаллий мутасадди ташкилот раҳбарлари, мутахассислари бу долзарб муаммоларга етарлича эътибор беришмади. Аксинча, тоғ этакларидаги дехкончилик ва чорвачиликка яроқли ерларга кенг кўламда хуружлар бошланди: янги хўжаликлар, бўлимлар, дам олиш маконлари, йўллар ва ҳатто каналлар вужудга келди.

Тўполанг — юртнинг юраги. У Ҳисор тоғининг 4688 метрлик чўққисидан бошланади. У бошланишда Қорасув, сўнг Тамшуш ва ниҳоят Фова ирмоғи кўшилгач, Тўполанг номини олиб, 2200 квадрат километр ҳавзада сув тўплаб, 112 километр йўл босиб, Коратоқقا кўшилади.

Дарёларнинг юзлаб ирмоқларидан бири Чош бўлиб, у баландлиги 4426 метр Хўжай Пири-ях музилкларидан бошланади.

Табиатни муҳофаза қилиш давлат қўмитасининг бир гурӯҳ мутасадди раҳбарлари, жамоатчилик кенгаши аъзолари би-

лан июль ойида Хўжаасмин ва Чош қишлоқлари оралиғидаги Ағаба довонида турардик.

Жазирама ёз тандири – Термиз билан Ағаба ораси енгил машина олдида ярим кунлик йўл. Йўл эса равон. Шахарда ҳаво ҳарорати ўша кунлари 45 даражадан ошарди. Ағабада эса нари борса 15 даражага аранг етарди.

Эҳтимол, довонда бир неча қуролланган одамларни кўрмаганимизда, машинадан тушмасмидик. Бу одамлар кимлар? Нега қуролланишган? Ахир, ов мавсуми эмас-ку, ҳозир. Сўраб-билиб, уларнинг тожикистонлик қўшиллар эканлигини аниқладик.

Биз тўрт минг метрлик баландликдаги довонда бир соатлар чамаси тутилиб қолдик. Ҳаво айниб, рўпарадаги Хурсандтоғ тарафдан булутлар ёпирилиб кела бошлади. Ҳадемай ёмғир савалай кетди. Баданлар жунжиқди. Хурсандтоғнинг олис дараларида ўша куни тушгача икки марта, тушдан сўнг уч марта ўқ узилди. Қарийб ҳар куни шу хилда кечадиган аҳвол билан қизиқиб қолдим. Жамоа ва хўжаликлар отарлари воҳаларга энганда, улар қўралаган қўтонларда туз қоларкан. Тоғ кийиклари ана шу тузни ялаш учун энишганида, эпчил мерғанларнинг ўқига учаркан. Ҳайвон учун туз ҳам емиш, сув сингари аъло неъмат. Билмадим, ўша куни неча кийик туз ўрнига тош капалаб ҳалок бўлди. Нечаси яраланиб, тоғнинг музликларига бош олиб чиқиб кетди. Умуман, ўша куни Ҳисортотдан то Кўхитангнинг адогигача, кунчиқардаги Боботогнинг овлок сойларида қанчадан-қанча ўқ узилди экан?

Тоғ йўллари фоят хатарли эди. Аммо бу хавф-хатар мени мутлақо чўчитмас, Хурсандтоғда ва тасаввуримда бошқа ерларда янграган ўқ садолари дилимни ғаш қилган эди. Йўлда яна бир неча отарларга дуч келдик. Ширачзорлар, ям-яшил ўтлоқлар пайҳон қилинган. Аксарият чўпонлар хуржунлари тўла ўқдон. Ҳар бирининг елкасида милтиқ қўндоклари, кўп йиллар тутилганидан қилтириқ бўлиб кетган.... Минглаб саҳифа жилдлик конунлар, қарорлар, кўрсатмалар, йўл-йўриқлар, йиғилишлар, сессиялар ҳужжатлари талаблари қайда қолди?

*
* *

Тўполангдарё. Нега сенга бундай ном беришган? Ким? Қаҷон? Наҳотки, бу номни қойилмақом қилиб топган у аждодлар, бугунга келиб, ўша суюкли Тўполангидан асар қолмаслигини тасаввур қилолмаган бўлишса? Рост, улар сени мангуга асов, тўпори, шовқинли бўлиб қолади, дейишган. Ҳечқиси йўқ. Ҳозирча номинг бор. Айт-чи, ёки бу номнинг бошқача маъноси ҳам борми?

Шунда болалигимда Тўполанг хусусида эшитган бир афсона ёдимга тушди. Қадим-қадим замонларда Вахшивор ёки Вахшимор вахший илонлар макони бўлган экан. Турли-туман, катта-кичик газандалар шунчалик кўпайиб кетибдики, тоғу тошга, сою жилгаларга сиғмай қолибди. Шунда илонлар подшосидан кунчиқардаги Говургонга кўчиш тўғрисида амр бўлибди. Тоғдан энган мўру малах илон йўлида дуч келганини пайхон қилиб, текислаб, паққос тушириб кетаверибди. Пастда, водийдаги қишлокларда одамлар яшаркан. Аҳоли қараса, бу илон босқинидан на боғ-роғ, на ҳовли-жой, на зироат экилган экинзорлар омон қолади. Шунда бир донишманд чиқиб, мардум ғафлатда бўлса, юртни газанда босади, дегани шу, дебди. Қишлоқ аҳолиси тўпланиб илон тилини, фирибини биладиган бир авлиёдан қирғинбарот илонлар босқинидан бир таъбир кутиб, ҳимоя сўрабди.

У зоҳид ҳалойик арзи-додини эшитгач, эпчил ва бақувват бир йигитни ёнига чорлабди-да, бир энлик қофоз битиб қўлига тутқазибди: Вахшиворнинг устида ясси това тош бор. Унда илонлар подшоси ўтиради. Шу қофозни илонподшо қўзларига тут, агар йўлингда илонлар қуршовига тушиб қолсанг, уларга ҳам номани қўз-қўз кил, деб ўргатибди.

Қўлида хат, йигит чопиб боряпти. Атрофда юз берәётган ҳаракатни кўргани сайин юраги така-пукка бўлиб бораверибди. Ҳар илонларки, хўқизнинг белидай, на боши кўринади, на думи. Илоннинг турини айтмайсиз. Шундай илонларга дуч келдики, елкасидаги ёли селкиллайди, зилу замбил танасини аранг судраб бораяпти. Қулоқлари тагида визиллаб учётган ўқилонлар ҳуштагидан эсхонаси чиқиб, бораверади.

Йигит хатни боши узра кўтариб олди. Уни кўрган лак-лак газанда-ю, дарранда кўзини олиб қочади, биқиниб йигиттага йўл беради. Довюрак чопар неча ўнгир, неча сою дара ошиб, ниҳоят, илонлар подшоси ҳузурига етди. Не кўз билан кўрсинки, ясси, силлиқ қорамтири-қизғиши товатош устида оппоқ симоб янглиғ икки қарич илон кумушдек ялтирок гавдасини кўтарганича сой бетлари, ирмоқлар ўзанидан дум-бадум, аралаш-қуралаш, остин-устин ўрмалаб жилаётган илонлар ҳаракатига разм соляпти. Унинг тиғсимон бошида дуру гавҳар митти тож ёғду сочиб турибди. Унинг нури қараган кишининг кўзларини камаштиради.

Илонподшо чопар йигитнинг ҳайрат ва қўрқув тўла кўзларига бокди. Шу ҷоқ йигит илон кўзларига номани тутди.

Тоғу тошлар қулоқни тешиб кетар даражада аччиқ ва даҳшатли чинқириқдан ларзага келиб титради. Бутун атрофдаги

ҳаракат тәқа-тәқ тинди. Илонлар турган жойларида ерга, тошларга, харсангларга ёпишди-қолди: „ — Эй, аҳли илон, газанда! Сукут сақланг ва тингланг!: Одамзод ҳам бизга қавм. Юрти, зироати, кулбаю макони пайхон бўлмасин. Говургон йўлини қисқа ва тор олингиз. Тўс-тўполон фақат бир жойда бўлсин, замин фақат шу ерда чўксин!“ — деб наъра тортибди илонподшо.

Илонподшонинг чопарлари — учарилонлар бу фармонни етказиш учун олди воҳага ёпирилган мўру малахни ҳар икки тоғ — Хисор ва Боботоғ оралиғидаги энг тор ва яқин масофага йўналтириди. Бир неча кун мобайнида бу ерда осмон баравар чанг-тўзон кўтарилиб турди. Шунчалик кўп илон ўтдики, унинг изидан замин чўқди.

Орадан кўп замонлар ўтди. Ана шу тўс-тўполон илонхона тоғлардан оқиб чиқкан дарё ўзанига айланди. Халқ бу дарёга Тўполанг номини берди.

*
* *

Асримизнинг 20- йиллари охирида дарёга илк бор чанг солинди. Ҳазарбоғ каналига сув олинди. 1930 йилда Денов – Сарисиё оралиғидаги кўприк қурилди. 30- йилларда шу атрофда ўндан ортиқ лагерлар бўлиб, уларда сақланадиган маҳбуслар бу кўприкни қуришган эди. Кўприк ярим асрдан ортиқ элга, юртга хизмат қилди. 1941 йилдаги энг даҳшатли селга ҳам бардош берди. Лекин одамларнинг лоқайдлиги унинг устунларини қулатди. Ёнидан замонавий кўприк қурилгач, у ўз ҳолига ташлаб қўйилди. Энди эса батамом нураб, бир ҳолда чўкиб ётибди:-

Сўнгги йигирма йилда дарё батамом жиловлаб олинди. У тоғдан кенг текисликка қулоч ота бошлаган жойдаёқ гидроузелнинг тош-метин ўмровларига урилади. Пастроқда эса сувайирғич иншоотлари унинг қўлини қўл, оёғини оёқ қилиб каналлар бўйлаб йўналтириб юборади. Бу иншоотларга бокиб, кишининг ақли шошади. Шунча мукаммал, пухта қурилган булар. Соя-салқин биноларда ёш-яланглар карта ўйнашади, балиқ тутиб қовуришади, майшат гаштини суришади.

Булар ҳали ҳолва. Бу ёгини зши廷г.

Табиатни муҳофаза қилиш давлат қўмитасига Узун қишлоғидан қўнгироқ қилишарди. Булар табиатнинг куюнчак фарзандлари бўлиб, Тўполанг дарёсида содир бўлган баликлар ҳалокати тўғрисида куйиб-пишиб хабар беришарди. Ўша куниёқ Тўполанг сувайирғичи мутахассислари билан боғландик ва таш-

вишли ахволни тушунтириб беришларини сўрадик. Телефон орқали бўлган баҳсдан бирон иш чиқишига кўзимиз етмади. Ўша куниёқ ҳар йили канда қилмай ҳалокат содир бўлаётган ерга етиб бордик.

Санглоқ дарё ўзани ёз жазирамасидан чатнаб ётарди. Соҳил бўйлаб янги асфальт йўл ўтган бўлиб, унда БЕЛАЗ, КАМАЗ, МАЗлар тутун бурқситиб, у ёқдан-бу ёкка қатнашарди. Ўзанда эса оқ-кул ранг тош уюмлари тоғ бўлиб ётарди. Каръер хизматини ўтаган хандаклар, тошлоқ арна безрайиб ётарди.

Хўш, нима бўпти? Қуриган дарё дерсиз. Асло! Шошилманг. Олов пуркаётган жазирамани бир зум унутиб, айни баҳор фаслини кўз олдимизда гавдалантирайлик.

Саврда неки тирик жонивор борки, уйғонади. Күшлар жуфт излаб, самода шўх жавлон уришади, ҳайвонлар айюҳаннос кўта-ришиб, куйикишади, балиқлар қишки „майхона“ларини тарк этишиб, суви илиган саёз дарёлар сари йўл олишади.

Лак-лак, пода-пода, гала-гала турли-туман балиқлар Сурхон сув омборидан чиқиб, юкорига — оқизик дарёлар соҳилларига интилишади. Ахир, табиатнинг буюк, ўзгармас қонунлари уларга ҳам даҳлдор. Улар чизигидан чиқиш ҳалокат. Балиқлар авлод қолдириш учун саёз соҳилларга уруғ кўйишади ва бу миллиард-миллиард уруғ ҳафта, ой ўтгач, митти балиқчаларга айланиб, ота юрт — омбор кўналғага қайтишади. Бу пайтда жониворларнинг авлод қолдиришдек заҳмати ва оромини таъминлайдиган турли ҳукумат қарорлари, тақиқлари эълон килинади. Балиқ овлашнинг барча усуслари қатъиян ман этилади.

Тўполанг дарёсининг эса ўзига хос хусусиятлари аллақачон фанда эътироф этилган. Чунки бу дарёда гулмойи ва ширмойи сингари антиқа балиқлар яшайди. Дарё текисликка чиққач хосил қиласиган қайирнинг кенглиги 100—150 метргacha ёйилмага айланади. Бу сув омборлари, Сурхон дарёсидаги она балиқлар уя қурадиган ягона кулай жойдир. Вилоят ҳавзаларини кейинчалик ёш балиқ захиралари билан тўлдирадиган бебаҳо хазинахонадир. Шунга кўра, ҳукумат бу дарёда бир неча йиллар давомида умуман балиқ овлашни қатъиян тақиқлаган. Қандай олижаноб тадбир!

Афсуски, бу қонунлар, талабномалар факат қофозлар мулки бўлиб қоляпти. Уларга хеч ким амал қилмаяпти. Унга хилоф иш қиласиган шахслар-раҳбарлар улкан занжир-ла бир-бирлари билан чамбарчас боғлангандир. Қарабсизки, балиқлар уруғ ташлади. У сув эпкини, оқими, күёш тафти таъсирида жонланади ва июнь ойи охирида сув омбор — Сурхон дарёси қўйнига

қайта бошлади. Ана шу пайтда минг-минглаб гектар майдонлардаги пахтазорлар сувга ташналик сезади. Шунда Тўполанг сувайиргичидаги темир дамбалар сув йўлини фиппа бўғади. Дарёда сув чиппа тўхтайди. Хали дунёга келиб улгурмаган, кўзи эндиғина очилган балиқчалар ўзларини қайга уришни билмайди. Тез орада кўлмаклардаги лиқ тўла балиқларга қирон келади. Тошлар қизийди, сув буғланади, ерга сингади. Яшаш учун туғилган балиқчалар қирилиб битади. Сасиб кетади, дарё ўлимтиқхўр кушлар бозорига айланади.

Бу норасида балиқчалар ахир элнинг, юртнинг насибаси эди-ку. Етти хазинанинг бири, дарёларимиз бойлиги, дастурхонимиз безаги, деб жар соладиган мулк эди...

Одамлар уволдан қўрқмай қолишиди. Уволни билмаганлар оқибатсиз, бефайз кишилардир. Борингки, уволдан қўрқмаслик мумкиннидир. Ҳеч бўлмаса ёзиб қўйилган, битилган қонунлардан қўрқайлик. Жилла курса, уларни хурмат қилайлик.

Бундай мислсиз ҳалокатнинг олдини олиш қонунда қатъий кўрсатилган. Унда айтилишича, барча дарёлар қатори Тўполангда ҳам қишин-ёзин маълум миқдорда бетўхтов сув оқиши керак. Бу дарёнинг иқлими, унда яшайдиган жамики жонзотни кутқазади. Биз бу йўл-йўриклиарни сувайиргич раҳбарларига эслатганимизда, бизга ҳеч ким айтмаган, хабаримиз бўлмаган дейишди. Ҳайратдан ёқа ушладик. Ахир, бу оддийгина гуноҳ эмас, қабиҳ жиноят-ку! Қандайдир муросасиз амалдор: ҳечқиси йўқ, дарё билан балиқ тилсиз, забонсиз, юқори ташкилотларга арз-дод қилмайди, бу биринчидан; иккинчидан эса, бу жиноят улгуржи — сувга оғзи, кўли текканинг улуши бор, башарти, жиноят ҳисобланса, унда ҳамманинг ҳиссаси бор, деб ўз ҳаракатларини оқламоқчи бўлади.

*
* *

Х асрда бизга ажойиб „Худуд-ул Олам“ асарини ёзиб қолдирган номаълум муаллиф сенинг номингни ўз асарида Нихонруд деб қайд этган. Нихон — яширин, хуфия, сирли, руд — дарё дегани.

Бундан 200 йил бурун сен қучоғингга қамраб олган гўзал афсонавий диёрни Кўҳистон деб аташарди.

У замонларда тоғлар ўлкаси мустакил, ҳалқи эркпарвар эди. Мангитлар сулоласи асосчиси Раҳимхон Бухорони қўлга киритгач, Кўҳистонни тўла забт этгунга қадар уч марта бу ўлкага юриш қилди.

Биринчи жанг Пошхурт яқинида, Тангидевон қалъаси ёнида

бўлади. Раҳимхон ғолиб чиқиб, асир тушган барча эркакларни ўлдириб, хотин-қизларни қул қилиб сотади, қўшинига тортиқ қилади. Кўлга киритган ўлжани бўлиш учун олти кун лозим бўлади.

Иккинчи сафар чоғи у Шеробод қалъасини ишғол этади. Бу урушда қўхистонлик ва ҳисорликлар шерободликларга ёрдамга келади. Хон қалъани қўлга олгач, эркаклар бошини кестириб, калламинор яратади. Бу фожиаларни кўрган қўхистонликлар бола-чақа, молу ҳолларини олиб тоғларга чикиб кетишади.

Раҳимхон уч минг бош от, 500 туяга ортилган қимматбаҳо молларни, омон пули тариқасида олган 200 минг тилла тангани олиб, ҳалқни талаб, Бухорога қайтади. У ҳар бир шаҳарга ўз томонидан ҳоким белгилаб, уларни қўриқлаш учун қўшин колдириб кетади.

Хон аждодлари ҳалққа мислсиз жабр-ситамлар солди. Бунга қарши ҳалқ бош кўтарди. Хон аскарлари таъқибидан қочган ҳалойиқ Дараи Ниҳонга бош олиб чиқиб кетади. Катта қўзғлонга тайёргарлик кўра бошлайди. 1757 йил рамазон ойида қўзғолончилар Денов қалъасига юриш қилиб, уни Раҳимхон одамларидан озод қилади. Хон одамлари аркка — ичкари қальага бекиниб олишади. Исёндан хабар топган Ҳисордаги Раҳимхон лашкари ёрдамга келади ва Деновни қамал қилади. Озодлик туғини исёнчилар икки жабҳада: ҳам ичкарида — аркдагиларга қарши, ҳам ташқаридан ҳамла қилган душмандан ўзларини мудофаа қилишга мажбур бўлишади. Бу уруш кирқ кун давом этади. Раҳимхон 40 минг лашкар билан етиб келади. Қўзғолон бостирилади, қонга ботирилади.

Раҳимхон қўзғлончилар бошлиғи, ҳалқ раҳнамоси, жасур юртдошимиз, оташин ватанпарвар Омон Боқийни қозиқка ўтқизиб ўлдиради. Ахолини қўйдек бўғизлаб сўйиб, Денов якинидаги тепаликда калламинора тиклайди. Бошқа шаҳар ва қишлоқларга қирғинбарот юриш қилиб, у ерлардан ҳамма кесилган бошларни Деновга юбориб, калламинора устига қалайдилар.

Бирок эркесвар қўхистонликлар Раҳимхон меросхўрлари даврида ҳам истибдодга қарши вақт-вақти билан бош кўтариб туришди. Амир Музаффар замонида бу ўлка яна бир карра қатагон қилинди.

„Амир Музаффар рус сармояси учун ўлкани амният остига олиш вазифасини чор Россиясидан ўз устига олган эди. Амир Музаффар Россия билан ярашиб, унинг ҳимоясига киргандан кейин, унинг яроғи билан Кўхистонни тасарруф этди“, деган эди устоз С. Айний.

Шуниси ҳам борки, устоз Айний юқоридаги аччиқ ҳақиқатни айтиш билан бирга, Дараи Ниҳоннинг бекиёс гўзаллиги

ҳакида фоят латиф кузатишлар қолдирган. Эсингиздами, „Дохунда“ романи қаҳрамони Ёдгор илк бор Тўполанг соҳилига етганида ҳаяжондан:

.... Дараи Ниҳон... У дарада қуш учса қанотсиз қолади, унда қозилар ва ҳокимлар учун йўл йўқ. У ерда девлар ва парилар ҳам одамлар қаторида тирикчилик қиласди; у дарадаги одамларнинг кўпчилиги париларга уйланган. Шунинг учун уларнинг қизлари жуда ҳам гўзал бўлади....»

Дараи Ниҳон йўлининг манзараси йигитга хуш кўринди. Узилиб тушаётгандек бўлиб кўринган харсанглар остидан ўтадиган тоғ, қоронғи, эгри-буғри йўл йўловчи йигитни унча қўрқитмасди, у тоғ орасидаги йўлнинг ҳар бир бурилишида „девлар, парилар бор“, деб ўйласа ҳам, қўрқмасди, чунки чўпон ўртоқларидан эшитган афсоналарга кўра, у ердаги девлар, парилар одамлар билан дўстлашган ва ўзларига сифинган кишиларни ҳар бир хавфдан ҳимоя қиласдилар...

*
* *

Тарихда кечган кўплаб қонли воқеалар гувоҳи бўлган у тоғ сўқмоклари, ирмоқлари, эрк йўлида ҳалок бўлган тоғликлар мозорлари, ноёб ўрмонлар, минг яшарли бобокалон арчазорлар, гўзал хотиралар, устоз адид қаломига илҳом берган у манзараларнинг кўпи энди улкан сув омбори тагида қолди.

Хаётда баъзан тушуниб, англаб бўлмас, ақл бовар қилмас ишлар бўлиб туради. Юзлаб авлодлар, юзларча йиллар ҳар қаричи, сиким тупроғи учун жон бериб, жон олиб курашган табаррук, муқаддас юртни ўз қўлимиз билан сувга ботириб ўтирибмиз. У ерда замонавий сув омбори куряпмиз.

*
* *

Тўполанг сув омбори тақдири ҳалқдан холи (ошкора бўлганда ҳам нима қила оларди?) сув хўжалиги нозирлиги маҳкамалари, лойиҳалаш институтлари, режалаштириш муассасалари ва яна олий маҳкамалар деворлари ортида, сирли шивир-шивирлар, келишишлар асосида ҳал бўлди. Аҳолидан ақалли хурмати учун ҳам сўрашмади. Бу ҳол турғунлик йилларининг эсдан чиқмас ҳақиқати, меросидир.

Лекин тоғ жинслари таркибини ўрганган покдомон геологлар тамомила бошқа фикрда эдилар. Улар Хисор тоғлар силсиласи нисбатан ёш ва кўзга кўринмаса-да, ҳамон ўсишда, ўзгаришда, ҳаракатда: тоғ ости қобиглари мўрт, ковак, серёриғ, шу сабабли Тўполанг ҳавзасида сув омбори қуриш мақсадга мувофиқ эмас, деган тахминларни исботламоқчи бўлиш-

ди. Аммо бу журъат маъмурий-бюрократик раҳбариятнинг кўзига чўп суқиши билан тенг бўлди.

Юрчи – Денов ботқоқликларини ҳатто менинг авлодим яхши билади. Неча ўн йилликлар уни қутишига сарфланмади, дейсиз. Ахир, бу даҳа Тўполанг ва Сангардак дарёлари ёйилмаси минтақасида жойлашган эди-ку! Энди эса тоғда, денгиз сатҳидан 1500 метр баландлиқда бир неча ўнларча квадрат километрга ёйилган кўналғада тўпланажак 500 миллион куб метр сув шунча оғирлиқда геологлар огоҳлантирган ковак, серёриғ тоғ тўшига куч билан босади...

Хозир кўналғада лойихада белгиланган сув миқдорининг чораги тўпланди. Бу ҳол хозирдаёт унумдор воҳа заминидаги ерости сувларининг кўтарилишига олиб келгани сир эмас. Дарё тўғонидаги ишларни тўхтатишни маслаҳат берадиган мутахассислар ҳам бор. Аммо уни, ҳар ҳолда чала қолдириб бўлмайди. Анчагина сув тўпланган. Бу танг вазиятдан чиқиш чораларини кўриш керак. Ҳар қалай, соғ ақл, кенгашли тадбир энди иш берар, деб ишонса бўлади.

Бу тарафи олим ва мутахассисларнинг улуши. Мени эса бошқа нарсалар ташвишлантиради.

*
* *

Билимдонроқ мухолифлардан бири, ахир ўша „худуд-ул-Оlam“нинг номаълум муаллифи ҳам бундан минг йил бурун Сурхон дарёси (ўрта асрларда дарё Чагонруд деб аталган) ёз ойлари Амуга куйилмаган, унинг суви сугориш учун сарфланган деб ёзган, дейиши мумкин. Жуда тўғри, чунки ўшанда ҳам водийда тараққиёт гуркираб яшнаган, 16 мингдан ортиқ қишлоқ бўлган. Термиз ва мамлакатнинг маъмурий ҳамда маданий маркази Чагониёндан бўлак яна: Сарманган (Жарқўрғон ноҳиясида), Дарзанги (Бандиҳонсойнинг қўйилишида жойлашган бўлиб, хозирда сув омбори тагида қолиб кетган), Баранги (Шўрчидан 7 километр шимоли-шарқда), Басанд (Бойсун), Сангардак, Кумғонон (Деновдан 4 километр жануби-шарқда), Зинвар (Деновдан 3 километр шимоли-шарқда), Ригдашт (Узундан 2 километр шимоли-ғарбда), Навандок (Узун атрофида), Хошимгирд (Ангор атрофида), Дар-а-оҳанин-Темир қопиғ (Дарбанд қишлоғидан 9 километр шимоли-ғарбда) сингари шаҳарлар бўлган.

IX—XII асрларда Чагониён анча ривожланган мамлакат эди. Унинг хукмдорлари – чагонхудотлар, амирлар ўз номларидан мис ва кумуш тангалар зарб этишган. Истахрий ал-Муқаддас-нинг гувоҳлик беришича, пойтахт Чагониёнда қалъа ва работ

сингари ўрта аср шаҳарларига хос барча таркибий даҳалар мавжуд бўлган.

Ўша пайтда Чагонруд деярли суғориш учун сарфланган бўлсада, дарёнинг асл шакл- шамойилига путур етказмаган. У баҳор ойлари пишқириб оққан, кузга бориб эса анча тинчиган. Хуллас, табиатнинг азалий қонунлари билан бақамти, режали тадбирлар асосида иш олиб борилган.

*
* *

1959 йилда мен ЮТАКЭ (Жанубий Туркманистон археологик комплекс экспедицияси)да қадимий Марв шаҳри ҳаробаларида ишлардим. Экспедицияга машҳур археолог, шарқшунос олим, академик Михаил Евгеньевич Массон раҳбарлик қиласарди. У 1936—1938 йилларда ТАКЭ (Термиз археологик комплекс экспедицияси)га раҳбарлик қиласар ва илмий тадқиқотлари тарих, жаҳон шарқшунослик фанида катта қизиқиш уйғотган эди.

Кунларнинг бирида М.Е. Массон менинг сурхондарёлик эканимни эшишиб, ҳузурига чақиртириди ва Термизда кечган ўша йилларни мароқ билан ҳикоя қилиб берди. Олимнинг ўшандага амалга ошира олмай қолган армонлари бор экан. Шуларни мен билан баҳам кўрди.

1924 йилда республикада эндиғина ташкил этилган музейларнинг бирига ғалати экспонат тушади. Бу оҳактошдан ясалган аёл ҳайкалidan синиб тушган ўнг панжали қўл эди. Фоят нафис ишланган шугина улги моҳир ҳайкалтарошнинг етук искеъодидан дарак бериб турарди. Тагхатда унинг Ҳисор тоғларидан топилганлиги айтилган эди. Олим ўшандага вақт зик бўлгани ва Ҳисор тоғлари мешақатларидан сал чўчиганини эътироф этди. У ўз фикрларини асослаш учун „Бобурнома“дан бир парча манзарани ўқиркан, кувғинда юрган подшоҳни шунчалар вахимага соглан у тоғларда археологнинг номаълум аёл ҳайкал қолдигини излашга журъати етмаган эди, деб ҳазиллашди. Ўша сухбатдан билдимки, Бобур Сурхон воҳаси шимолидаги Навандок (Узун қишлоғи яқинида) шаҳрида икки марта: дастлаб 1500—1501 йилларда – Ҳиндистон томон юрганда ва иккинчи марта 1526 йилда Самарқандни қайта забт қилиш пайтида бўлган экан.

..... Навандок навоҳисига етганда, Ҳусравшоҳ (Ҳисор ҳокими)нинг наввари бир тўқкуз от ва бир тўқкуз ларча келтирди...

Камруд дарасига кириб қори бокка юрудук. Танги ва учма йўлларда, тунд ва тез кўталларда қалин от ва тева қолди. Учтўрт ора кўнуб. Сира тоғ (ҳозирги номи афтидан Саримсоқли тоғ – денгиз сатҳидан 4,5 минг метр баланд) кўталига еттук,

кўтал ва не навъ кўтал ҳаргиз мундок баланд ва танг кўтал курулган эмас, ҳеч вақт мундоқ танги ва учма йўллар билан юрулган эмас. Кўп ташвиш ва суубат билан мухотара танги учмаларидин ўтуб, юз ранж ва машаққат билан мухлиқ баланд ва кўталлардин ошибб, Фон навоисиға келдук. Фон тоғларининг орасида бир улуғ кўл тушибдур, мухити тахминан бир шарьрий бўлгой, тавр кўлидур, ғаройибаттдин холи эмас (Бобур Айғир кўлини назарда тутган бўлса ажаб эмас)."

Ўшанда М.Е. Массон эътиборимни яна бир жумбоқقا жалб этди. IX—XII асрларда Чагониён пўлати — „соҳти чагониён“ — жаҳон бозорида Дамашқ пўлати билан ракобатда бўлган. Бу пўлат Чагониёнга қаердан келтирилган ёки юртнинг ўзида ноёб маъдан конлари бўлганми? Пўлат қурол-аслаҳалар қай усулда яратилган, еrostи конлари бўлганми? Бунинг учун пўлат эритувчи ўтхоналар бўлгандир. Улар қаерда? Имкони бўлса, ана шуларни ҳам назардан кочирмаслигим лозим эди.

Хуллас, 1960 йилнинг ёзида бир нотаниш аёл ҳайкали қўл панжалари ишораси билан йўлга отландим. Сафаримни шифобаҳш сувлар шарқираб оқадиган Хўжаипокдан бошладим. Елкамда ов ҳалта, ён чўнтақда дафтар ва қалам, қўлда иргай таёқ... Тоғ қишлоқлари аҳолиси меҳмондўст, сайёҳ йўловчнинг гурунгларига орзуманд. Уларга акад. М.Е. Массондан эшитган гапларимни сўзлайман. Бундан 2 минг йилларча бурун шуҳрати оламни тутган кушонлар даврида ўлкамизда ҳайкалтарошлик чунонам ривожланганки, шаҳар ва қишлоқлар у ёқда турсин, ҳаттоқи, тоғларда бутун-бутун гуруҳ ҳайкалтарошлик асрлари бино этилган. Ҳиндистондаги нодир обидалар, Аффонистондаги машҳур Бамиён ҳайкаллари, Термиздаги менгтошдан иборат Қоратепадаги хилма-хил санъат асрларини мисол келтираман. Ўша пайтларда ўлкамиз ҳам кушонлар салтанатига тобе бўлган. Ҳолчаёндаги қазув ишлари эса тарихнинг мўъжизакор саҳифаларини оча бошлаган зди. Аҳолига тоғларимиз ҳам ана шундай обидаларга макон бўлиши мумкин, деган тахминларни айтаман.

У даврларда одамлар ривоят, афсона айтишни ва эшитишни яхши кўришарди. Уларда ўлканнинг тарихига бўлган оташин меҳр барқ уриб турарди. Ҳар бир қишлоқда тахминларга қанот бағишивчи умидвор далдалар эшитардим. Қариялар, ха, эшитганимиз, фалончининг бобоси тош қотган қирқ нафар қиз ҳайкалини кўрган, афсуски, у бизда эмас, қўшни тоғ қишлоғида, довон ошсангиз етасиз, дейишарди.

Шу зайлда Бештахта, ундан ўтиб Ҳовузга бордим. Ҳовузликлар мени ғалати чоҳ устига бошлаб боришиди. Яланғоч адирликнинг биқинида бир ўтовча майдонни ишғол этган гир айла-

на тубсиз чоҳ. Тош ташласангиз, анча вактдан кейин ер қаъридан гумбурлаган овоз эшитилади. Бу чоҳ, ундан эшитиладиган бўғик, сирли товуш ҳовузликлар учун жумбоқ. Унинг сирини ҳеч ким билмас экан. Мактаб ўқитувчиси, бу ерга метеорит тушган, деди. Чиндан ҳам балки тушгандир.

Ўтган йили бу чоҳни яна бориб кўрдим. Қор, ёмғир сувлари, тоғ шамоли чоҳни анчагина тупроқ билан тўлдирибди. Қандайдир күш тут уруғини бехосдан ташлаб кетган экан, катта дарахт бўлиб ўсиб чиқибди...

Кейин Оқсув, Бодиҳаво, Чинорга бордим. Чинор қишлоғидаги Мунчоқ тепани икки кун қазидим. Мунчоқ, садаф, шиша ва сопол синиклари тупроқ билан қоришиб ётибди. Мени Катта ва Кичик Вахшивор қишлоқлари ўз бағрига чорлади. Дарёning чап соҳилида омад менга кулиб бокди. Олимнинг иккинчи топшириғи – маъдан эритиладиган ўтхонани топдим. Сопол қувурлар, металл чиқиндиси – шлаклар палахса-палахса бўлиб бутун атрофга сочилиб ётарди. Енг шимариб ўтхонанинг бир четидан қазишни бошладим. Максадим шлак қалинлигини аниқлаш эди. Не машакқатлар билан етти метргача етиб бордим. Охири кўринмади. Демак, бу ердаги ўтхонада юз йил эмас, анча кўп замонлар маъдан эритилган. Ўтхонада нукул арча ёқилган. Балки ўша олмос тиғли қиличу шамширлар шу ерда эритилган пўлатдан ясалгандир.

Ниҳоний аёл ҳайкали эса яна йўлга чорлади. Тоғликлар мени Сина қишлоғи шимоли-ғарбida жойлашган Кирққиз қальясига рўбарў қилишди. Чақалоқ эмизаётган, ҳамир қораётган, тоатибодат қилаётган қизларнинг тош ҳайкалларини кўришга кўп интизор эдим. Бу гал ҳам бўлмади. Улар бардошимни синашарди. Қасдма-қасдига худди менинг излаб юрганим хабарини кимлардандир эшитишар ва тобора юксакларга, парку булултарга, кўшни чўққиларга, ўтиб бўлмас хатарли довонлар ортидаги тоғларга қочиб қолишарди...

Йиллар ўтиб, аёлларнинг тош ҳайкаллари хусусидаги билганларим афсонага айланди. Уларнинг изини қувиб саксонинчи йилларда Онгқақшар, Осмонталаш тоғларигача, булултар ҳамиша пойларига бош кўядиган Қалъаи Шеронгача, Деги Канорагача бордим. Тополмадим...

Маъдан бобида яна омадим юришиб кетди. Оқсув дарёси бошланадиган ерда (Сангардак дарёсининг боши) маъдан ўтхоналари ва шлаклар конига дуч келдим. Бу ерлар Сангардак қишлоғидан икки кунлик йўл. Тўрт тараф тоғ. Тоғ тўшидаги арчазорлар сийрак. Улар орасида чўнқайиб ўтирган баҳайбат тўнғизлардек тўнкалар кўзга ташланади. Кўплари қучоққа сифмайди. Уларни ким ва қайси замонда кесган? Балки соҳибқи-

рон Темур лашкарларига шон-шарафлар, музafferият келтирган қурол-аслаҳалар шу арчалар тобини олгандир? „Соҳти Чагониён“ пўлати шу ерда сайқал топгандир? Аёл ҳайкалидан эса ҳанузгача дарак йўқ. Ҳисор тоғининг қайсиидир ниҳоний даралари қучоғида латофати, чиройи, рухсорини сукли кўзлардан яшириб, соҳибини кутиб ётгандир.

Акад. М. Е. Массон узок умр кўриб, оламдан ўтди. Аммо армони қолди. Бу армон менга кўчди. Ўша нозик панжали кўл мени чорлаб туради. У ҳайкални ҳамон излайман. Бир кунмас-бир кун бу армон қуши кўз ўнгимда намоён бўлади, деган умид мени тарк этмайди.

*
* *

Орадан ўттиз йил ўтгач, ўша йўллардан юриб, яна сафарни тақрорладим. Бу гал ўғилларим менга ҳамроҳ эди. Ўттиз йил ўтиб кетибди-я! Даҳшат!... Қишлоқларни таниб бўлмайди. Илк бор кўрганим Оқсувда биронта шиферли уйни учратмаган эдим. Ҳаммаси — пахса, чўпкори, гувалак уйлар эди. Ўн-ўн бешта кўримсиз ҳовли сой бетида бир-бирига қалашиб турар эди. Энди эса у манзаралардан асар ҳам қолмаган. Қишлоқ боғлар-аро ястаниб ётибди. Тоголди адирликлари ўзлаштирилиб, у ерларга ҳам ҳовли-жойлар тушиб кетибди. Экилган зироат, Тешиктоғ орқали ўтган канал мўъжизага ўхшаб кўринарди, бунинг ҳаммаси сув туфайли, унинг каромати, шарофати сабабли эди.

Ҳа, ҳаммасига — тирикликка даъвогар неки зот бўлса, сувга муҳтож. Тоғ қишлоқларининг ободончилиги ҳам, файзи ҳам сувдан; у ҳозирча зўр машаққатлар билан бўлса-да, етиб турибди. Бироқ, ўттиз йилдан сўнг нима бўлади? Осмонда уммон бўлсаки, қувур тираб уни дала-даштга эндиrsa...

Сув — эҳтиёж, ризқ-насиба, тириклик, ҳаёт. Воҳанинг келаҗаги, тараққиёти ёлғиз шунга боғлиқ. Аммо бу тараққиётни, тирикликни табиий ирмоқлар, дарёларни чиппа қуритиш ёки бўғиш билан таъминлаб бўлмайди. Аксинча, бир жойни бўстон қиласиз, деб бошқа ерни ўпқонга бой беришимиз тайнин. Ҳар нарсанинг ҳудуди, меъёри бўлгани каби, сувнинг ҳам миқдори чекланган. Бунинг нечоғлик ҳақиқат эканлиги ҳаммага аён. Келажакда эса бу ҳол шахматона урчиди, кўпаяди. Бу — рад этиб бўлмайдиган ҳақиқат.

Хўш, бунинг чораси нимада? Жуда оддий. Асрлар синовидан ўтган ҳалқ таъбири бор. Тараққиёт қарор топибдики, одамзод бир ҳақиқатни тақрорлайди: дарахт (ўрмон) — намлиқ, намлиқ — сув, сув — булоқ, жилға — ирмоқ, ирмоқ — дарё. Дарё — ҳаёт, истиқбол...

Биз эса шу пайтгача аксини қилиб келдик.

XVI асрда яшаган воқеанавислар Бухориддин ва Кўшкеккилар қолдирган ёзма манбаларда айтилишича, Рангунтоғ, Тобоқчи, Боботоғда писта бениҳоя кўп бўлган. Мўғул тогида эса чўян эритадиган корхона нуқул пистакўмир билан ишлаган. Боботонинг машҳур бойларидан Хуррамбек одамлари эса карвон-карвон кўмирни Афғонистон, Арабистон бозорларида пуллаган. Пистазорларнинг ваҳшиёна камайиши оҳир-оқибат Боботоғдан Сурхон дарёсига оқиб тушадиган ўнларча доимий оқизик жилғаларнинг абадул-абад қуришига олиб келди. Яланғоч тоғ ёнбағирликлари сел ва тошқинларнинг тўпори хукмida қолди.

Сўнгги урушдан олдин ва ундан кейинги йилларда Бойсун, Шеробод, Сангардак тогларидаги ўрмонларнинг кўпи бефаросат бошқарувнинг қурбони бўлишди. Кенг майдонлар очилиб қолди. Юзлаб катта-кичик булоқлар, чашмаларнинг кўзи бекилиб кетди, намлиқ манбасидан жудо бўлишди, ўнлаб ирмоқлар азалий ўзанлари қақраган қайронларга айланди. Бу манзарани эса ҳатто эллигинчи йилларда Шерободда кузатиш мумкин эди. Тайёрлов идорасининг кенг ҳовли саҳнида, дарё соҳилидаги санглоқда қизил арча ўтилари раста-раста қалашиб ётарди. Бу ўтин аҳолига қадоқлаб сотиларди. Биргина Дарбанднинг ўзида учта маҳсус жой бўлиб, у ерда ўрмон кесувчилар истиқомат қилишарди. Яна бир неча бригада кесилган дараҳтларни шаббалаш, дарёга оқизиш билан банд эди. Шеробод остонаси дарёдан оқизилган хари, ўтиларни тутиб қоладиган жой бўлиб, юмушдан одамларнинг кўли кўлига тегмасди.

Катта майдонлардаги ўрмонзорларнинг кесилиб кетиши натижаси ўлароқ, Шерободдарёда сув кескин камайди. Ҳолбуки, бу дарёдан асрлар мобайннида ўттиз икки ариқка сув тараларди. Модомики, сув мўл бўлмаганида, беш-ён метрли харилар оқиб келармиди! Бу ўрмонлар беш юз-олти юз йиллардан бўён сув тўплар ва бир замонлар Шарқда маълум ва машҳур бўлган Гуфтон аталмиш вилоятга оби ҳаёт элтарди.

Яқин ўтмишдош замона ақлу зукколари сув танқислигининг осон йўлини топишди. Дастлаб нафс балосига йўликкан чор Россияси муҳандиси Ананьев бу режага қўл урди, шўролар даварида эса давом эттирилди. Сурхонни бўғиб, унинг сувини Шеробод чўлларига йўлладик. Чунки нам ҳосил қиладиган манбалардан пайи кирқилган Шерободдарё путури кетиб, кенг кўламли ўзлаштириш ишларига сув етказиб беролмасди.

Қадимги Рим жамоат арбоби Цицерон ўрмонларни ҳалок қилаётган кишиларни жамиятнинг ашаддий душманлари, деганди.

Ўрмоннин кесиши осон, уни яратиш қийин. Тоғда навқирон на-
вниҳол арча ўн-ўн икки йилда бир қарич ўсишини инобатга ол-
сак, унда чинакамига ташвишланишимизга асос бўладиган муд-
хиш ҳол юз берганини эътироф этмай иложимиз йўқ.

Тоғ яйловларида чорва молларини кескин камайтириш, тар-
тибга солиш ягона йўлдир. Минг-ўн минг қўй камроқ бокилса,
эл қашшоқ бўлиб қолмайди. Бунинг ўрнига ўрмонзорлар бар-
по этмоқ зарур. Тоғларимизда ўрмонларни кўпайтирмас экан-
миз, бунинг ўттиз йил, ярим аср, юз йиллик чора-тадбирлари-
ни изчил, қатъий, қонуний йўлга кўймас эканмиз-воҳа истиқ-
боли тўгрисида гапирмаса ҳам бўлади. Келажакда бешак, бе-
гумон содир бўладиган табиий ўрилишишларнинг олдини олиш-
нинг бошқа йўли йўқ. Бўлмайди ҳам. Бу ҳақиқат қанчалик оғир
ва залворли бўлмасин, тан олишдан ўзга чора йўқ.

Амударёning суви ҳозирдаёт ҳомталаш. Келажакда эса бу
жараён мураккаблашади, кескинлашади. Улушимишга тегади-
ган сув микдори шубҳасиз камаяди. Бу улуғ дарёга кўз тик-
кан, аммо ҳозирча чорасиз эл-элатлар ҳақ-хукуқларини та-
лаб қилишади. Шунда воҳамиш шимолидаги тоғ дарёларидан
оқадиган оби-ҳаёт жуда аскатади. Тирикликнинг барқарорли-
гини таъминлайди.

*
* *

Оқар сув ҳамиша тозалик рамзи. Тўққиз марта думаласа,
хар қандай сув ҳалол бўлади, дейишади. Сув омбордан куйида —
Сурхон дарёсида оқаётган сув дарёники эмас. Бу — ўзанга
оқиб тушаётган ўнлаб чорва фермалари, касалхоналар, корхо-
налар, пестицид ва бошқа минералларга тўйинган далалар зар-
добидан иборат сувсифат суюқликлардир. Минг айюҳаннос со-
линг — натижасини кўрмайсиз. Чорасиз, ожизмиз.

Ёшлигим шу дарё бўйида кечди. Она табиат Сурхонни қай
йўсин ибтидо шиддат билан яратгандаги борлиқ даҳшати, асов-
лиги, қудратини кўриш насиб этган баҳтиёр авлодга мансуб-
ман. Шу дарё бўйидаги қишлоқларнинг бирида туғилиб-ўслан
Туроб раис бир куни юрак очди:

— Ўн йилча бурун кўнглимдан бир гап кечди. Дарёга
қарайман — хўрлигим келади. У билан менинг ёшлигим ҳам
кетгандек бўлди. Бу йўқотишни на бойлик, на шодмонлик,
на марта билин тўлдириб бўлади. Наҳотки, у селлар,
пўртаналар, асов тўлқинлар, дарё ўкиришлари хотира бўлиб
қолган бўлса.... Кексалар бежиз айтишмаган — қудратли тоғ-
лари, жўшқин дарёлари, бепоён чўлу сахролари бор ўлка фар-
зандлари танти, мард, ўқтам бўлишади.

Фотих Чингизхон 1221 йилнинг кузида Термизни ўн икки кунлик жангу жадал қамалдан сўнг ишғол этгач, таранг асабларига оро бериш учун Аму соҳилларига чиқди. У болалигидан дарёларни яхши кўрарди, чунки унинг забун ва шикаста ёшлиги Онон ва Керулен дарёлари бўйларида кечган эди. Дарё бу етимчани овутган, балиқ, турли ёввойи куш, ҳайвонлар билан сийлаган; муштипар она ўрнида, меҳрибон ота ўрнида кўнглига таскин ва далда берган.

Қараса, улкан дарё оқяпти. Қадрдон Онони ва Керуленига ўхшаб кетади. Шунда унинг муруват билмас қалбига гусса чўқди, кўзларига ёш олди. Ортида қолган қанчадан-қанча ўлкалар, вайронга шаҳарлар, инсон қонидан ҳосил бўлган дарёлар уни бу қадар ларзага солмаганди.

Тошюрак жаҳонгир дунёнинг ярмини згаллади. Битмас-туган-мас бойликлар соҳиби бўлди. Қаҳри қаттол бу кимса зулмидан қўрқмаган эл-элат кам қолди. Нега шундай зот соҳилларини қамиш, кўға, ёввойи жийда ва патта босган дарёни кўрди-ю, руҳияти озор чекди?.. Одамийликдан ёвузликка юз тутган жаҳонгир кўзига тақдир қисмати оний бўлиб кўринди, холос. Дарёлар қоларкан, инсон кетаркан.

У долзарб юришлар, жангу жадал урушлар тизгинини ўғилларига топширди-да, ўзи бир неча ойга Термизда қолиб кетди. Дарё соҳилларини кезиш, ўксик болалигини эслаш, ўлганларни хотирлаш ва тиним билмай мангу харакатдаги Аму шивирларига кулоқ солиш билан вақт ўтганини билмай қолди. Ўзга халқлар бойлиги, талон-тарож қилинган хазиналар, ҳудудлар, мазлум юртлар, сершира ўтларга бой яйловлар, серунум заминдаги яшиллик олами унга фаровонлик, саодат бўлиб туюлган эди. Энди эса орзуманд бу мерос ортида буюк маънавий қашшоқликни кўрди.

У синди, дили шикаст топди ва шу билан ўзини руҳан қайта тиклай олмади. Қароргоҳга минг сувори жангчи ҳимоясида шошилинч чақиртирилган машхур хитой табиби Чан Чун ҳам бу тузалмас дардга даво тополмади. Орадан сал фурсат ўтгач, туғилиб ўсган дарё Онон ва Керулен соҳиллари уни ғойибдан чорлай бошлади. У юрт дийдорига тўйиш учун изига қайтди. Бироқ қадрдон гўшани сўнгги бор кўриш насиб қилмади. Йўлда вафот этди.

*
* *

Хуллас, табиат обидалари, манзаралари инсон қалбига, шуурига бебаҳо хазина — озиқ бўлиб киради. Бу хазинани бир умр табаррук ҳис этган одам энг баҳтли инсондир.

Сурхон дарёсидан яқин келажакда номигина қолишига кўзим

етиб турибди. Бутун бир вилоят шу нахр номи билан аталади. Орадан замонлар ўтиб, авлодлар бизга таъна килиши аниқ: ўзи йўқ дарё номини катта вилоятга берилганидан ҳайрон қолишади.

Юртимиз турли даврларда турлича ном билан аталган: Бактрия (Бахтар замин), Юнон-Бактрия подшолиги, Тохаристон, Чагониён, Шаркий Бухоро....

Шайбонийхон темурийларнинг сўнгги тарқоқ салтанатига зарба бериб, уни енгач, ҳар жойнинг шароитига қараб, ўзбек уруғларини қулай, серсув, серўтлоқ воҳаларгага жойлаштираверди. Шу зайлда кўнғирот уруғига Шеробод, Бойсун, кисман Ҳисорсой; дўрмон уруғига — Қобадиён ва Вахш водийси; лоқай уруғига — Кулоб билан Болжувон тушди. Ҳозиргача ўзбекнинг бу катта уруғлари шу жойларда аҳолининг асосий кисмини ташкил этади.

*
* *

Ўтган йили дарёning ўтмиш даврлардан қолган ўзани нишоналарини излаб сафарга отландим. Асар ҳам йўқ. Ҳаммаёқ ўзлаштирилиб кетган. Биласизми, ўттизинчи йилларда ва ундан кейин ҳам табиий дарёлар ўзанларини қатъий муҳофаза қилиш юзасидан ҳукумат томонидан шундай қарорлар қабул қилинганки, ҳакқонийлигидан ҳайратга тушасиз. Юзлаб йиллар дастури, дейсиз. Бирок дарё ўзани бўйлаб шимолдан жанубга юрганим кезларда, ҳарчанд уринмай, бу қарорлардан хабардор на бирон хабар, на мутахассисни учратдим.

Бир жода — „Шарқ ўлдузи“ жамоа хўжалиги худудида йиғирма-йигирма беш метрлар баланд, чўнг, бўз ранг, тик соҳил қолдигига кўзим тушди. Дарё ўзанини тўсган қўргон девордек қад кўтариб турарди.

Шунда Сурхон дарёси билан бевосита алоқадор, бу дарёга болалик йилларимда меҳримни пешлаган бир мўътабар кексанни эсладим. Уни Зикриё бобо, уста бобо, дейишарди.

*
* *

Чолнинг ҳаёт кечириш тарзи менга сирли туюларди. Унинг афтода кулбаси аҳоли яшайдиган қишлоқда бўлса-да, устахонасини дарёning тик соҳилида, одамлардан чет жода курган эди. Мен ўзимча, одамлар тинчини кўзлаб шу тахлит йўл танлаган бўлса, ажабмас, дердим.

Болалик йилларимда Шарофиддин акамга эргашиб гоҳ овга, гоҳ балиқ тутишга дарё соҳилига борардик. Темирчи чолни илк бор ўшанда кўрган эдим.

— Бу кенжамиз, — деди бир куни акам чолнинг бароқ қошлиари тагидан менга синчков тикилиб турганини сезиб.

— Таниб турибман, бу бола отасининг этагидан тушиб қолган, — чол тин олиб, тиззаларини силаркан, қўшиб қўйди: — Отангиз зап одам эди. Уни таниган-билгандар, мулла Раҳмон-қулнинг бўйнига тош боғлаб Сурхонга чўқтири, у чўкмайди, шунда ҳам йўлини қилиб омон қолади ва сув тагидан жавоҳир олиб чиқади, дейишарди. Лекин барибир чўқди, замон чўқтириди. Аттанг, не-не йигитлар жувонмарг бўлиб кетишиди.

— Отам билан дўст бўлганингизни бу билмайди. Отамни ўттиз еттинчи йилда қамашганида, бу онамнинг бўйида бўлган...

— Эсимда, онаизор шўрлик, отангнинг бошига сен етдинг, бадбахт, деб қорга улоқтирган.

— Ўзи ҳам роса йиғлоқи эди, — деди акам тарафимни олиб.

— Иним, замон ёмон эди, замон йиғлоқи эди. Одамлар кўз ёшларини яшириб йиғлашарди.

— Отамни кўрарман, деб қишлоқдан Термизга борибман. Ёш бола эдим. Бозорда бир қария, отангни кўрмоқчи бўлсанг, Амунинг бўйига, ажойибхона (хайвонот боғи) деворининг ортига ўт. Ҳар кеча соат иккидан кейин қамоқхонадан маҳбусларни ортган усти ёпиқ қоп-қора машина чиқади. Кўзинг ўткир бўлса, балки отангни кўриб қоларсан, деди. Намозшомда бир хандақ топиб, бекиниб олдим. кўрқмаганимни қаранг. Машинани кута-кута ухлаб қолибман. Бир маҳал пакпак милтиқ овозидан чўчиб уйгониб кетдим. Орадан бир соатча ўтгач, ўша қора машина тупроқ йўлини чангитиб, ёнимдан шаҳарга ўтиб кетди. Бозорчи чолнинг гапи рост экан. Шундай вахима босдики, аъзои баданим дир-дир титрайди, тишим-тишимга тегмай такиллади...

— Отангизни бу ерда отишмаган, чоғи, — чол мулоҳаза қилди.

— Йўқ. У киши Тошкентда ҳалок бўлганлар.

— Не қора кунлар кечмади бу бошлардан, — чол дарёга тикилиб туриб, маъюс нидо қилди.

*
* *

Мактабни тугатиб, дорилфунунга ўқишига киргач, келгуси ёз таътилида яна акам билан балиқ овига бордик. Чол бизни шод кутиб олди.

— Студент бўлибсиз, эшитиб хурсанд бўлдик. Қани, билетни кўрсатинг-чи, бир тавоғ қиласай, — деди у. Акам атайлаб чўнтағимга солган билетни олиб чолга узатдим. У у ёқ-бу ёғини айлантириб, синчиклаб кўраркан, яна сўради: — Сурат сизники, бу аник, лекин ота-бобонгиз исми-шарифлари хато кетганми, дейман?

— Нимасини айтасиз, уста бобо, кўп сиру савдолар ўтиб кетди, — акам гуноҳкорона жавоб берди.

— Янглишмасам боболаринг Сафар эмас, Саттор, Саттор ҳожи эди. Саттор ҳожининг довруғи Ҳисору Шодмондан Бухоро-ю Шарифгача кетган эди... Ҳожи бобонинг қўлларига сув қўйганман. Уни хизир кўрган, дейишарди. Ўзлариям бир юз ўн ёшда давра қилдилар, чоғи...

— Онам шўрликка баъзи оғайнилар гувоҳнома олаётганда, фарзандларинг исми-шарифини ўзгартирмасанг, улар бошига ҳам мулла Раҳмонкулнинг куни тушади, деб маслаҳат беришган.

— Жисман ўлдириш билан кифояланмай, исман ҳам йўқотишишган.

*
* *

Зикриё бобо етти пушти Бухоро ҳукмдорлари-ю амирларига ҳанжару шамширлар ясаш билан банд бўлган. Руслар Туркистонни босиб олишгач, қадимий усуlda қурол ясаш санъатига эҳтиёж сусайди. Руслар мусулмон бозорларини замонавий қурол-аслаҳаларга тўлдириб юборишли.

Ўттизинчи йилларда устани қулок қилиб, тоғ қишлоғидан водийга, янги қурилаётган жамоа хўжалигига бадарға қилишибди.

Уруш бошлангач, олдинма-кетин уч ўғли Фронтга жўнади. Аммо бирори ҳам қайтиб келмади. Фарзандлар қуюигига бардош беролмай, хотини оламдан ўтди-кетди. Сўнгра тўқсон ёшли отасини ҳам тупроққа топширди. Ёлғиз кенжа ўғли қолди. Етмишинчи йилларнинг охирларида кенжаси тухмат билан қамалиб кетди. Ўзи сўппайиб қолди. Бунчалар ғам юкини тош устига қўйсангиз, балким талқон бўлиб кетармиди. Зикриё бобо эса ҳаммасига сукут сақлаб бардош берди. Одам чидаркан. Чидамай иложи қанча.

*
* *

Ўқитувчи бўлиб ишлаб юрган йилларимда бобонинг устахонасида бир кечада меҳмон бўлдим. Ўшандаги кўмир ял-ял яшнар, хона деворларига қокилган гулмихлардаги ўрок, белкуракларни хира қизғиши ёғдуси билан нурлантирас, чолнинг бесаранжом кўланкаси девор сатҳида лопиллаб, у ёқдан-бу ёкка юрарди. Оташхонада аланга сўниб, кўмир қаловланса, чол босқонни апил-тапил босар ва бир қўли билан кўкракка тушган сарғиш соқолини тирнарди. Уста уни қип-қизил товланган темирни узун ҳаков билан қисиб, сандон устига қўяр ва болға билан уриб

текисларди. Шакл-шамойил касб этган буюмни ҳаков билан тутиб, синчиклаб кузатарди.

Мен эса чолнинг ҳаракатларига разм солиб туриб, ўзимча ўйлардим: ўтхонада яшнаётган у чўғ оддий кўмир эмас, қўёшнинг ўзи ҳадя этган парчаси. У чолга кувват, харорат. Чолнинг умри ҳамиша шу хил машъала. Неча-неча давру давронлар бу чол кўз ўнгидаги қариб тўзғимади, хотирага айланмади? Аммо у қаримади. Қаримаса керак. Шу устахонаси бор, сандону болғаси бор — унга мангу эрмак. Унинг кўл-оёғи, тиргаги шулар.

Чол саҳарда дарёга тушиб, юз-қўлини ювиб, таҳорат олади ва даққи юнусдан колган жойнамозини ёйиб, тоат-ибодатга тушади. Унга ҳавасим келади.

*
* *

Мухбирлик кезларимда чолни зиёрат қилгани бордим. Ўшанда Сурхон ўзанида тўғон қурилиши бошланган эди. Ундан сўрадим:

- Нега дарёни бу қадар яхши кўрасиз?
- Дарё забонсиз доно устоз, сирдош дўст, — деди у ўйчан.
- Биласизми, ўғлим, дарёлар қуриса нималар бўлади?
- Йўқ.
- Билагингизни пишиқ чилвир билан занжиртоб қилиб танғиб боғланг, кейин кўрасиз. Аввал панжалар оқаради, увишади, чунки томирларда қон юрмай қолади. Шу холда узоқ вақт тутинг, кўл, панжалар шол бўлиб қолади, сўнгра қурийди.

*
* *

Дарё батамом бўғилгач, чол чўқди, синди.

Бизга ҳам навбат кеб қолди, чоги, — деди у хира ёшланган кўзларини белбоги билан артиб. — Хукмни эл, авлод чиқаради: жазоси бекиёс бўлур, таъналар танни тешур...

Чолнинг ақли-хотираси хиралашган деб эшитувдим. Бу бетайн луқмани шу дардга йўйдим.

У эса яна муқкаси билан ишга шўнғиб кетди. Мен дарчадан дарё сохилини кузатардим ва нечук чол охиратга таслим бўлиш пайига тушиб қолди экан, деган фикрни хаёлдан ўтказардим. Кулокларим тагида босқон вашиллайди, сандон болға зарбидан инграницаб, занг чалади. Қарасам, чолнинг кўлида болғадан бўлак нарса йўқ. Болға салт сандонга зарб билан урилиб, сакрайди, динг-дириңг, так-тук садо чиқаради.

Нега у куруқдан-куруқ бетиним болға уради? Бу занг овозидан нималар илғаяпти. Кимга зарда-ю заҳрини сочяпти?
„ — Замон ўтди, боболар ўтди — так-тук, динг-дириңг...

— Урушга ем — рухи хуркак ўғиллар дуркун — так-түк, динг-диринг...

— Жуфти ҳалол хотин кетди, кетди кенжә — нури дийда тұхмат отлиқ тузоқ тақиб — тақ-түк, динг-диринг...

— Барча кетди — қолди болға, сандон, солди ўзин ўтхонага учиб кирган парвона — тақ-түк, динг-диринг...

— Кетди бари, хотиралар уммонаидә қолди саси — так-түк, динг-диринг...

— Тугаб борар чол Зикриё сабил умр киссаси — тақ-түк, динг-диринг"...

*
* *

Зикриё бобо юз ёшни қоралаб қазо қылдилар.

Устахона ҳали-ҳали турибди: сандон, унинг устида болға. Ашёларни чанг-губор босған. Устахона деворлари нам тортиб, нураган, сувоқлари күчган. Ҳаммаси жой-жойида. Факат Зикриё бобо йўқ, ўчоғда чўғ йўқ...

Одамлар туннинг ярмида устахонада сандон билан болға бир- бирига урилиб, занг чалади, дейишади.

*
* *

Модомики, кимдир ўтган даврларда ибратли ишлар қилинмади, деса кўзи кўр, тили шол бўлади. Бу рост. Аммо ҳаёт бир жойда турмайди. Кечагина ҳақиқат деб топинган кўп ақидалар бугун пуч хаёлга айланганини кўриб турибмиз.

Дарёларни ҳаётга менгзашади. Бу ҳам ҳақ. Хар бир юртда дарёлар файир қўзғаб, шарқираб оқиб турса, бунга нима етсин! Дарёлар — эл, юрт рамзи. Улар оқмаса, руҳий, маънавий та-наззул, қашшоқлик юз беради. Она табиатдаги қадриятлар топталса, шаксиз, инсон ҳаёти ҳам қадрсизланади. Булар бир-бирига пайваста, эгизакдир. Дарёлар оқиши учун яралган, оқсин. Тарих фани отаси Геродот қадим аждод юртдошларимиз — бақтрияликларнинг тўрт минг йил бурун ҳатто юнонларни ҳам тўлқинлантирган бир мақолини бизга мерос қилиб ёзиб қолдирган: **чукур ва собит дарёларгина шовқин-суронларсиз оқади...** Аммо бу — забонсиз обиҳаёт наҳрларини истаганча кўғирчокдек ўйнатиб, хомталаш қилиб таҳкирлаш, дегани эмас, аксинча, уни эъзозлашни, юртнинг мангу қадрияти санамоқни тақозо этади.

Мен ҳам эски хотираларни эслаш билан имиллаб қолдим. Бас. Ҳозирча Сурхонда жилла бўлса-да, кўзга оро берадиган ирмоқ оқиб турибди. Шунга ҳам қуллуқ. Борига шукур қилмоқлик ҳам замона зийнати.

МУНДАРИЖА

Тоғдек баланд, чўлдай кенг 3

Қиссалар

Айришоҳ	8
Олис кирлар ортида	89
Қишлоқ мактабида	130
Сўқмоқдаги одамлар	156
Ота ҳузурида	173

Ҳикоялар

Ота юрт	178
Она каклик	181
Тоғларда гулхан ёнади	183
Лаҳза	188
Ўтаётган кунлар	198
Армон	202
Софинч	207
Беданалар	210
Чол ва дарё	214
Кум қўргонлар	217
Долғали дарё	224
Севги қўшиқлари	242

Эссе

Сарбаста Сурхон	248
-----------------------	-----

84(5У)6

С34

Сафаров, Менгзиё.

Айришоҳ: (Қиссалар, ҳикоялар, эссе) /

М. Сафаров; Масъул мұхаррир Ҳ. Мақсадқұлов. —

Тошкент: „О'qituvchi“ НМИУ, 2008- й. — 288 б.

ББК 84(5У)6

АДАБИЙ-БАДИЙ НАШР

Менгзиё САФАРОВ

А Й Р И Ш О Х

(Қиссалар, ҳикоялар, эссе)

Мұхаррир *П. Аъзамова*

Техник мұхаррир *С. Турсунова*

Компьютерда саҳифаловчи *К. Ҳамидуллаева*

Мусахихлар: *М. Иброҳимова, А. Иброҳимов*

Оригинал-макетдан босишига рухсат этилди 28.10. 2008. Бичими
60x90'/₁₆. Кегли 10 шпонли. Pragmatic TAD гарнитураси. Офсет босма
усулида босилди. Шартли б.т. 18,0. Нашр т. 15,03. 1500 нусхада
босилди. Буюртма № 362.

Ўзбекистон Матбуот ва ахборот агентлигининг „О'qituvchi“ нашриёт-
матбаа ижодий уйи. Тошкент—129, Навоий кўчаси, 30- уй. // Тошкент,
Юнусобод даҳаси, Муродов кўчаси, 1- уй. Шартнома № 12-111-08.